



Milik Departemen P dan K
Tidak diperdagangkan
Untuk umum

Hikayat Diu Palinggam

Ramli Harun



Departemen Pendidikan dan Kebudayaan

HIKAYAT DIU PALINGGAM

Hikayat DIU PALINGGAM

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Diterjemahkan oleh
RAMLI HARUN

PERPUSTAKAAN
DIT. TRADISI DITJEN NBSF
DEPBUDPAR
NO. INV : 2760
PEROLEHAN :
TGL : 4-5-09
SANDI PUSTAKA :

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1980

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

PERPUSTAKAAN	
DIT. SEJARAH & NILAI TRADISI	
Nomor induk	: 1031/83
Tanggal terima	: 21-6-1983
Beli/hadiah dari	: Proyek Penerbitan Buku Sastra.
Nomor buku	:
Kopi ke	: 3

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalan karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.


Pemeliharaan, pembinaan, dan penggalan sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari Pusat Dokumentasi dan Informasi Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1980

Proyek Penerbitan Buku Sastra
Indonesia dan Daerah



RINGKASAN HIKAYAT DIU PALINGGAM

Adalah seorang raja bernama Usuli gelar Muda Sakti yang memerintah di sebuah kerajaan besar. Seratus tujuh puluh negeri takluk di bawah kekuasaannya. Negerinya aman dan makmur. Beliau beristrikan enam orang permaisuri tetapi tidak memperoleh keturunan. Baginda menanyakan kepada para ahli nجوم siapa generasi yang akan menggantikannya kelak. Menurut ahli nجوم beliau akan mendapat dua orang putra dari permaisuri lain.

Ketika Baginda beristirahat di gunung sehabis berburu, berkat cincin saktinya berdirilah di situ sebuah rumah yang indah. Keesokan hari beliau bertemu dengan seorang petani bernama Malem Faki yang mempunyai seorang gadis cantik bernama Nyak Ti Hina. Baginda tertarik dengan Nyak Ti Hina dan beberapa hari kemudian beliau menikah dengannya. Tinggallah baginda di gunung itu selama tiga tahun dan daerah itu sudah berubah menjadi sebuah kota bernama Sina Puri.

Keenam permaisuri tua sudah tahu bahwa Baginda kawin lagi. Mereka bermufakat sesama permaisuri hendak membunuh putri Hina. Tiga orang permaisuri berangkat ke Sina Puri. Putri Hina diajak mandi di sebuah kolam dan di sana ia dibunuh.

Tersebutlah sebuah kerajaan di kayangan bernama Diu Indra yang diperintah oleh seorang ratu bernama Sithon Gelima. Ketika Sithon Gelima turun hendak mandi di kolam dilihatnya putri Hina tergeletak dibunuh orang. Berkat ilmu sakti Sithon Gelima, putri Hina hidup lagi. Tak lama kemudian putri Hina melahirkan seorang anak laki-laki dan diberi nama Budiman Sakti. Oleh Jamalul Hikmat dan oleh raja Mambang dari negeri Indra, Budiman Sakti diajari berbagai ilmu sakti. Sithon Gelima sangat sayang kepada Budiman Sakti lalu ia diangkat sebagai raja Diu dengan gelar Budiman Alam.

Adapun Raja Usuli sudah mengetahui bahwa putri Hina di-

bunuh oleh keenam permaisurinya. Sesudah putri Hina kembali kepada Baginda, keenam permaisuri dihukum penjara atas perbuatan mereka.

Seorang putri bernama Rante Indra dari negeri Zinura anak Raja Beremakesan diculik atas perintah Sithon Gelima dan dikawinkan dengan Budiman Sakti. Putri Rante sebenarnya telah dipertunangkan dengan Juhar Alam. Tentu saja Juhar Alam amat marah mendengar tunangannya dibawa orang tetapi ia tidak berani melawan Budiman Sakti, bahkan akhirnya ia harus tunduk kepadanya. Kerajaan Diu di bawah pimpinan Budiman Alam berada dalam keadaan aman dan makmur.

Adapun Raja Muda Sakti tidak lama kemudian memperoleh seorang putra lagi yang diberi nama Diu Palinggam. Ketika ia berumur tujuh tahun ia melihat enam orang permaisuri dalam penjara. Atas permintaannya keenam permaisuri dibebaskan. Dalam usia dua belas tahun Diu Palinggam sudah mempunyai banyak teman yang berani-berani di antaranya Diu Perkasa. Pada suatu hari ketika Diu Palinggam mandi-mandi di kolam Sina Puri ia berkenalan dengan seorang putri kayangan bernama Cut Nila Wanti, putri Raja Kamarul Alam dari negeri Bukit Mega.

Dengan ilmu sakti yang baru dipelajari dari Syiah Brahman Indra, Diu Palinggam pergi ke Bukit Mega. Di sana ia bertemu dengan Cut Nila Wanti yang memang sudah jatuh cinta kepada Diu Palinggam dengan tidak diketahui ayahnya Kamarul Alam. Ketika mengetahui putrinya berhubungan dengan Diu Palinggam beliau sangat marah dan Diu Palinggam dikepungnya. Dengan bantuan tujuh ratus temannya yang setia Diu Palinggam dapat mengalahkan pasukan Kamarul Alam. Seorang kawan Diu Palinggam bernama Cahya Kaindran menghadap raja dan meminta supaya putri dapat dibawa ke bumi oleh Diu Palinggam. Baginda sangat menyekali Diu Palinggam yang berhubungan dengan putrinya secara diam-diam. Akhirnya putrinya itu dinikahkan dengan Diu Palinggam.

Raja Diu Budiman Sakti yang hidup bersama dengan putri Rante dan Sithon Gelima tak lama kemudian mendapat seorang putra dan diberi nama Banta Budiman Lela Perkasa. Pada suatu

hari Budiman Sakti minta izin kepada istrinya dan Sithon Gelima hendak pulang melihat ayahnya Raja Usuli di bumi.

Dalam perjalanan turun ke bumi Budiman Sakti berkenalan dengan Kemala Indra yaitu putri Raja Indra Pelimbang. Mereka saling jatuh cinta. Alangkah marahnya Baginda ketika mengetahui putrinya jatuh cinta kepada Budiman Sakti yang tidak dikenalnya itu. Tetapi akhirnya putrinya itu dinikahkan juga dengan raja dari kayangan itu. Selama ayahnya pergi, Banta Budiman Lela Perkasa menggantikan ayahnya memerintah negeri Diu. Raja muda ini telah kawin dengan salah seorang putri Raja Mambang bernama Cahya Nurani.

Pada suatu hari Cahya Nurani turun mandi bersama kakaknya Samingun Juhari di sebuah kolam. Seorang raja di bumi bernama Kayuzi dari negeri Petawi Biram ketika bermain layang-layang bertemu dengan Samingun Juhari yang sedang mandi. Samingun Juhari dibawa ke istana dan raja memperistrikannya. Raja Mambang dari kayangan amat murka mendengar berita ini dan segera mengerahkan balatentranya dengan dibantu oleh raja muda Diu untuk memerangi Petawi Biram. Perang pun berkecamuk antara negeri bumi dan negeri kayangan. Kedua belah pihak memiliki ilmu sakti. Akhirnya seorang alim bernama Jamalul Hikmah dapat mendamaikan kedua pihak. Raja Mambang memasuki istana negeri Petawi Biram dan bertemu dengan putrinya, lalu menikahnya dengan Raja Petawi Biram. Sesudah itu Baginda pulang ke kayangan.

Pada suatu ketika Diu Palinggam turun ke bumi hendak mandi kolam Guha Tanjung bersama istrinya Cut Nila Wanti. Selesai mandi dalam perjalanan pulang mereka tersesat dalam hutan sehingga sampai ke negeri Indra Pelimbang yang diperintah oleh abangnya Budiman Sakti. Mereka tidak berkenalan satu sama lain. Mengetahui seorang putri cantik datang ke negerinya Budiman Sakti memerintahkan pasukannya supaya Diu Palinggam menyerahkan istri kepadanya. Dalam mempertahankan istrinya terjadilah perang sakti antara kedua kakak-beradik itu. Banyak tentara Budiman Sakti yang tewas menghadapi Diu Palinggam yang pada waktu itu telah mendapat bantuan dari beberapa orang kawan-

nya yang gagah-perkasa dan juga dari tentara bangsa jin. Raja Usuli pun membantu putranya dalam melawan Diu Palinggam. Begitu pula Banta Budiman Lela Perkasa, raja muda Diu, turun ke bumi hendak membantu ayahnya. Sebelumnya ia minta izin dari kakeknya raja Usuli. Kakeknya berpesan supaya ia memeriksa dulu dengan teliti siapa sebenarnya musuh ayahnya yang gagah berani itu. Sesudah diteliti ternyata lawan ayahnya tidak lain dari pamannya sendiri Diu Palinggam. Perang berhenti dan semua saling berkenalan. Budiman Sakti minta maaf atas kesalahannya. Seusai perang Diu Palinggam dan istrinya tinggal bersama ayahnya Raja Usuli.

Sesudah beberapa waktu lamanya Cut Nila Wanti pulang ke negerinya Bukit Miga bersama suaminya. Dalam perjalanan pulang Diu Palinggam jatuh cinta lagi dengan seorang putri bernama Indra Kayangan yang sesungguhnya telah bertunangan dengan seorang pangeran bernama Syamsi Miga. Diu Palinggam dapat ditawan oleh Said Meredam yaitu Paman Syamsi Mega. Sesudah masing-masing pihak mendapat bantuan dari sahabat dan kerabatnya, terjadilah peperangan seru antara Said Meredam dan Diu Palinggam. Akhirnya Said Meredam kewalahan dan minta damai dan putri Indra Kayangan dinikahkan dengan Diu Palinggam.

Sesampainya di Bukit Miga Diu Palinggam diangkat menjadi raja menggantikan Kamarul Alam dengan mendapat gelar Sultan di Miga dan tiada berapa lama kemudian Cut Nila Wanti melahirkan seorang putra dan diberi nama Hukman Alam Diwa.

Tersebutlah seorang raja bernama Sultan Kasumi yang beristrikan sembilan permaisuri. Yang tercantik putri Awan namanya. Ke delapan permaisuri lain tidak senang kepada putri Awan lalu dicarinyalah jalan untuk menyingkirkannya. Dengan alasan ingin makan daging rusa ke delapan permaisuri mendesak Baginda untuk berburu. Sesudah Baginda pulang dari berburu mereka menghadap Baginda lagi dan menceritakan bahwa putri Awan telah hamil akibat berzina. Tanpa periksa lagi Baginda percaya dan putri Awan dibuang ke dalam hutan. Di dalam hutan putri Awan ditolong oleh Nabi Khaidir dengan diberi sebuah azimat. Dengan benda sakti itu semua keinginannya dapat tercapai. Di suatu tem-

pat di hulu sungai di bawah seponon beringin putri melahirkan seorang anak perempuan dan dinamainya Budiman Kande.


Lama-kelamaan Raja Kasumi sadar atas perbuatannya bahwa putri Awan difitnah lalu ia mencari istrinya itu. Di tempat istrinya ia disambut oleh anaknya sendiri Budiman Kande yang tidak dikenalnya. Baginda jatuh pingsan setelah mengetahui bahwa anak perempuan yang cantik bersama ibunya itu adalah anaknya sendiri. Sesudah didesak berkali-kali barulah putri Awan mau pulang ke istana. Di sana ia disambut dengan upacara kebesaran. Kedelapan permaisuri lain minta maaf atas kesalahannya.

Adapun Hukma Alam yang sudah remaja, ketika dalam perjalanan pulang dari menuntut ilmu sakti ia tertidur. Dalam keadaan setengah sadar ia bermimpi bertemu dengan seorang putri cantik yang tiada lain dari Budiman Kande. Pada waktu yang bersamaan Budiman Kande pun bermimpi bertemu dengan seorang anak muda. Melalui ilmu-ilmu sakti mereka saling bertemu tanpa diketahui oleh seorang pun. Sebenarnya Budiman Kande sedang diperebutkan oleh seratus orang raja. Akhirnya Raja Kasumi menikahkan putrinya dengan Hukma Alam. Mengetahui bahwa putri telah dinikahkan dengan Hukma Alam keseratus orang raja amat marah. Perang sakti terjadi lagi. Dalam perang ini Hukma Alam menang lalu ia pulang ke Bukit Miga bersama istrinya untuk melihat orang tuanya. Di Bukit Miga mereka disambut secara besar-besaran. Di Palinggam dengan istrinya Cut Nila Wanti dan putri dari Kayangan sangat gembira menerima kedatangan putra mereka yang pulang membawa seorang putri.

Sesudah beberapa lama tinggal di Bukit Miga Hukma Alam mohon izin mengantarkan Budiman Kande ke negeri Kasumi menjenguk orang tuanya. Sampai di sana Hukma Alam dinobatkan sebagai raja negeri Kasumi menggantikan Sultan Kasumi dengan gelar Sultan Iskandar Raja Muda. Di bawah pimpinannya negeri Kasumi aman dan makmur dan adat serta agama dipegang teguh.

Jakarta 24-10-1981

Diterjemahkan dan diringkaskan
dari naskah berbahasa Aceh.
Oleh Ramli Harun



HIKAYAT DIU PALINGGAM
BISMI L-LAHI R-RAHMANI R-RAHIM

HIJRAT siribee lhee reutoh siploh
Tadeungo lon boh na saboh haba
Lon meung peugah nama hikayat
Keureuna mangat sakti raya

Lon tueng miseue ngon teuladan
Seubab lon tueng nah keureuna haba
Seubab cangklak deungon sakti
Lom beurani di dalam Indra

Nama geuhei DIU PALINGGAM
Keurajeuen lam awan troh u donya
Nyang ka geuseubot dalam hikayat
Keureuna mangat habaran raja

Adat takheun nama laen
Kureueng he palem bijaksana
Habageuh nyoe gobnyan karang
Masa Sulotan goh prang Beulanda

Teutapi dilon meung lon surat
Keureuna galak that hate lam dada
Keureuna seubab dilon galak
Sigo tamat ka lheueh lon baca

Sit nyo sakti DIU PALINGGAM
Teutapi kureueng rancak haba
Nyankeuh he teungku sosah han ban
Lon tamah tuan peukeunong haba

Keureuna napsu lon keumeung salen
Wahe palem jampang tabaca
Lon takot han keunong bak ragam jinoo
Nyankeuh he adoe lon ato haba

Nyang that janggai han keunong ragam
Lon tamah he intan sibanja dua
Dalam siploh lon tamah sikrak
Mangat galak ureueng nyang baca

Nyankeuh he po ka leupah kalam
He adoe badan cit lon saja
Bek tacarot upat ngon pake
Dilon boh hate galak ban gata

Yoh masa cut lon beuet aleh
Teuma he wareh hikayat raya
Digob laen geubeuet kitab
Dilon he sabat hikayat nyang na

Nyankeuh seubab rindu sabe
Wahe boh hate troh an tuha
Galak sabe keu haba cakri
Seubab Putroe Ti geutueng le Raja

Raja-raja geuhadu sakti
Geutueng Putroe Ti dilon hana
Bek meung lon mat lon kalon tan
Nyang na he rakan geupeugah haba

Nyankeuh seubab rindu deundam
Ulon karang di dalam kuta
Nama Kuta Blang pageue nanggroe
Geukheun he adoe nanggroe MEURAKSA

Teuma kisah haba hikayat
Jeh pi mangat nyoe pi suka
Maseng-maseng galak bak hate
Meunan beurangri manusia

Ladom galak kisah SYAH KUBAT
Ladom sabat PEULANTA SINA
Nyang that rindu keu CINTA BUHAN
Siteungoh tuan AKAH PEUDANA

Maseng-maseng mubagoe-bagoe
Wahe adoe di dalam donya
A L K I S A H mula-mula phon
Tadeungo ulon he syeedara

Na saboh nanggroe di dalam gunong
Luah that padang hana tara
Keurajeuen sinan RAJA USULI
MUDA SAKTI geurasi nama

Sireutoh tujuh ploh raja di baroh
Sulotan nyan saboh nyang that raya
Nanggroe makmu hana lawan
Beurangri alam hana ngon peusa

Hukom ade hana lawan
Meusyeuhuran jeueb-jeueb donya
Nam droe Putro peurumoh Sulotan
Lhee reutoh gunangan nyang muda-muda

Watee Raja eh jiramah ngon mom
Uleh gunangan nyang muda-muda
Bandum jiduek lingka Sulotan
That sukaan hana tara

'Oh jiramah le gunangan
Peurab le keunan dua droe dara
Jilok-lok bajee lam ie mawo
Jijampu ngon minyeuk ata

Teuma jikeuphuk ateueh Sulotan
Mabok ensan deungan baunya
Raja teuduek lam meuligoe
Gunangan sinaroe nyang muda-muda

Di bale rakna panca logam
Disinan Sulotan seumayan Raja
Deungon wazi uleebalang
Meuntroe sajan dum panglima

Teungoh mupike musyeewarat
Troh le surat jeueb-jeueb raja
'Oh troh ureueng nyang ba surat
Leugat jid̥elat poteu Raja

Teuma jijok surat kireman
Ubak Sulotan sigra-sigra
Teuma di Raja surat neuyue beuet
Haba teuseubot bacut keu Raja

Nanggroe makmu hana bagoe
Geunap uroe ureueng teuka
Kawai kuta peuet ploh pahlawan
Uroe malam jimeujaga

Sidroe minah dua meugantoe
Meunan bagoe rok-rok masa
Mangat hate Raja ngon Putroe
Kawai nanggroë rakyat meulaksa

Treb-treb siseun beujalan-jalan
Rakyat sajan meusuka-suka
Menankeuh sabe 'oh troh watee woe
Rakyat sinaroe hate suka

Watee Raja teubiet u midan
Deungon pehasan dum aneka
Maseng-maseng ateueh kandran
'Adi ngon juhan sajan sireuta

Ladom ateueh guda taji
Siteungoh ri ateueh naga
Ladom peh gong ladom camang
Tambo pi sajan geundrang sireuta

Payong ngon alam meuribee ban
Le that macam pehasan donya
Nyang amat peudeueng neuyue meutangkeh
Ladom mubareh di mideuen Raja

Nyang pahlawan meungadu sakti
Peutang pagi meusuka-suka
'Oh ka malam woe u dalam
Dum sikeulian tuha muda

Meunankeuh sabe hana padoe
Geunap uroe hate suka
Umu peuet ploh thon neukeurajeuen
Nyang na teusangeun keu aneukenda

Nyankeuh bacut hana meusampe
Raja male aneuk hana
Keupeue guna luah keurajeuen
Keupeu pahlawan kawai kuta

Meung tan aneuk ayeuem jaroe
Hana sapeue na meulaba
Bak siuroe Raja krah rakyat
Neuyue peusapat nujum panita

'Oh lheueh sabda nibak hadarat
Jitot nubat uleh peudana
Sigo meusu beude di dalam
Ban sikeulian troh suara

Jitren rakyat baroh tunong
Lam-lam gunong jitren bak Raja
Geusyk waki panglima prang
Uleebalang troh bak Raja

Sireutoh tujuh ploh raja nyang taklok
Dum habeh trok u mideuen Raja
Maseng-maseng deungon rakyat
Dum meusapat u mideuen Raja

'Oh sare habeh dum meusapat
Mideuen ka sarat rakyat meulaksa
Maseng-maseng piyoh di mideuen
Jipreh sret kalam nibak Raja

Teuma bujang deelat sulotan
Jibeuot tangan ateueh jeumala
Jibeuot jaroe meuek meutren
Jilakee ampon meu'ah deesya

Ampon Tuanku meuribee ampon
Ho neusuron kamoe dum na
Ulama ngon nujum habeh meusapat
Jinoe peue hajat po meukuta

Trenkeuh sabda teuma di manyang
Baginda Sulotan neumeusabda
Nyang kupangge gata keunoe
Tango kamoe he peudana

Keureuna ulon aneuk lon tan
Soe keurajeuen mat neuraca
Cuba yue kalon ubak nujum
Soe keurajeuen badai hamba

'Oh lheueh sabda nibak Sulotan
Nujum yoh nyan kitab jibuka
Habeh jikalon di dalam surat
Teuma jideelat ubak Raja

Ampon Tuanku meuribee ampon
Seumbah ulon pacai nyang hina
Akhe Tuanku na aneuk dua droe
Laen Putroe Tuanku mita

Meung hana Tuanku neumeukawen
Ngon Putroe laen nyang leubeh muda
Insya Allah ngon tulong Rabbi
Aneuk Tuhan bri bak Putroe muda

Meunankeuh leumah jeueb-jeueb kitab
Habeh meulihat peuet panca indra
Mumeunan haba dum na nujum
Seumbah maklum deelat Raja

'Oh Raja deungo seumbah nujum
That sukaan di dalam dada
Teuma meusabda doli junjongan
Geudong intar neuyue buka

Sireuta deungon geudong kayen
Neuyue salen nujum ulama
'Oh lheueh seunalen neubri seudeukah
Ulama ngon syiah intan dum rata

'Oh Raja deungo narit mumeunan
That sukaan hana tara
'Oh lheueh neusalen ulama syiah
Neubri seudeukah bandum rata

Teulheueh nyan teuma rakyat dum woe
Raja ngon Putroe teutap lam kuta
Padum lawet dudoe nibak nyan
Baginda Sulotan keumeung bungka

Neukeumeung jak dalam uteuen
Peuburuan mita rusa
Neukrah rakyat dum sinaroe
Pawang nyang raghoe sajan sireuta

Sare hase dum sikalian
Beurangkat Sulotan ngon balatandra
Meuseundi-seundi rupa peukayan
Payong ngon alam le ban rupa

Nyang raja-raja ateueh guda plang
Nyang uleebalang ateueh unta
Sajan deungon bunyi-bunyian
Le that pehasan beurangkat Raja

Gong ngon canang pih na sajan
Dum sikeulian hareudom mama
MUDA SAKTI yoh nyan beurangkat
Sajan ngon rakyat jak meurusa

Neuteungoh gle neujak meuramien
Raja yoh nyan u dalam rimba
Hingga troh bak saboh padang
Piyoh sinan mita rusa

Meuteumeung rusa han ek bileueng
Dum na ureueng hate suka
Rakyat rame suka hate
Mudah raseuki di dalam rimba

Ladom rakyat mita buahan
Mita makanan boh kayee rimba
Ladom ragam sinapang cicem
Aneuk peureuleng jijak mita

Umu lhee uroe Baginda di sinan
'Oh lheueh nibak nyan teuma bungka
Sajan ngon rakyat woe u nanggroe
Sira neuwoe mita rusa

Dum na rakyat hana jarak
Suka galak di dalam rimba
Hingga troh bak saboh gunung
Piyoh di sinan tuha muda

Hingga malam le ngon uroe
Piyoh jinoe poteu Raja
Baginda Sulotan euncien neutatang
Siat le teudong ngon bale raksa

Tameh suasa bubong ie meuh
Cahya peungeuh intan peurmata
Pageue bale jeureujak beusoe
Ban peuet sagoe sama rata

Di leuen bale na saboh kulam
Meuturab intan mutu ratna
Soe nyang kalon akai hilang
Tarase bintang seumeulhoh cahya

Baginda Sulotan piyoh sinan
Bak malam nyan sajan sireuta
'Oh beungoh uroe rakyat jak meuen
Mita makanan asoe rimba

Hingga troh bak saboh gunung
Meuteumeung sinan ladang tuha
Jikalon ureueng nibak rangkang
Keumiet bawang ngon halia

Aneukjih na ureueng binoe
Rupa bagoe bintang kala
Salah bacut hana peukayan
Nyang keu ruman hana ngon peusa

Ban bintang timu meuacak-acak
Beurang soe galak jikalon rupa
Nama Putroe NYAK TI HINAAN
Ayah jimeunan MALEM FAKI nama

'Oh ban jikalon rupa indah
Jiwoe le pantah ubak Raja
Troh bak Raja teuma jipeugah
Ampon meu'ah po meukuta

Ulon kalon sidroe Putroe
That sireuloe indah rupa
Tapi Tuanku ureueng miseukin
Hana peukayan bak anggeeta

Nyang keu rupa hana teuladan
Beurang soe ensan hana ngon peusa
'Oh ban neudeungo haba meunan
Baginda Sulotan hate suka

Neucok eucien bale hilang
Neujak yoh nyan dalam rimba
Neuteungoh gle neutren panton
Data ngon leupon neujak lanja

Neuteungoh gle neutren paloh
Hingga ka troh bak ladang tuha
Troh bak ladang Malem Faki
Neupiyoh le dum sireuta

Neuyue tamong peudana meuntroe
Tajak jinoe tanyong haba
Takheun ulon peuk saleuem
Nibak ureueng rangkang tuha

'Oh Bujang deungo haba meunan
Jijak le yoh nyan pantah sigra
Malem Faki teuma kalon ureueng
Jak meuteumeung sabe mulia

Teulheueh saleuem mumat jaroe
Marit le meuntroe mumeunoe haba
Tadeungo ulon wahe teungku
Saleuem Tuanku keunoe bak gata

Ngon aneuk gata neukeumeung meukawen
Baginda Sulotan ka troh neuteuka
Atawa jeuet atawa han
Peugah rijang lon deungo nyata

Teuma seuot Malem Faki
Tadeungo lon kheun kri wahe peudana
Keureuna ulon ureueng miseukin
Lagi gasien tan hareuta

Aneuk ulon pi hana cidah
Pakri tapeugah saleuem Raja
Bitpih meunan wahe meuntroe
Nibak kamoe ateueh jeumala

Bek antara ngon Sulotan
Adat ngon rakan pi lon rila
'Oh meuntroe deungo haba meunan
Jiwoe le yoh nyan ubak Raja

Troh bak Raja teuma jipeugah
Insya Allah po meukuta
Jinoe sampoe ban nyang hajat
Tuhan halarat peutroh pinta

Ban Raja deungo haba meunan
That sukaan hana tara
Lheueh nyan Raja euncien neutatang
Jeuet le sinan saboh kuta

Tamong rakyat bandum keunan
Piyoh yoh nyan rakyat dum na
Malem Faki kalon sulotan
Di teungoh padang teudong kuta

Leugat neujak rijang-rijang
U hadapan poteu Raja
'Oh troh bak Raja teuma jipeugah
Ampon meu'ah po meukuta

Lon deungo Tuanku meuntroe peugah
Saleuem di bawah doli meukuta
Jinoe Tuanku ulon pulang
Nyawong ngon badan hukom meukuta

Seuot Raja han peue salah
Bak ulon sah ateueh jeumala
'Oh lheueh nyan Raja neuhei kali
Malem Faki wakilan sigra

'Oh lheueh nyan teuma kali peunikah
Hukom Allah ka seumporna
'Oh lheueh nyan teuma Malem Faki
Neuba Putroe Ti le bak Raja

'Oh lheueh meukawen di sulotan
Neubri peukayan dum peukara
Teuma sabda doli halarat
Neuyue peusapat dendayang dum na

Nyang muda-muda mupadum droe
Peurumoh meuntroe ngon panglima
Lheueh nyan teuka dum dendayang
Neubri peukayan dum aneka

Teuma jipeungui Putroe intan
Dum peukayan nyang bri Raja
'Oh roh alat gleueng ngon subang
Tamse bintang malam jula

Soe nyang kalon akai hilang
'Oh tapandang pueh le mata
Soe nyang kalon hate beureuhi
Budiadari nyang keumeung sa

Keuruncong meuh nibak gaki
Ngon ceuraphi nibak dada
'Oh watee roh keunong uroe
Tamse pudoe cahya peurmata

Soe nyang kalon hate laloe
Hana sidroe bandeng rupa
Poteu Raja teutap di sinan
Neupeugot dalam teumpat seuninya

Raja yue peugot saboh meuligoe
Teumpat duek Putroe sinyak Ti Hina
Sare hase leungkap meuligoe
Neupeuduek Putroe sajan ngon bunda

Peuet ploh gunangan neubri sajan
Tujoh dendayang nyang muda-muda
Umu lhee thon Baginda sinan
Hame le yoh nyan Putroe Ti Hina

Bak siuroe Baginda sulotan
Neuduek sajan Putroe Ti Hina
Neupupueh meusyen peuhabe hawa
Neukeumeung gisa bak Putroe tuha

Teuma neumarit Baginda Sulotan
Ngon Putroe intan sinyak Ti Hina
Idin he Putroe keu ulon tuan
Ubak Putroe nam lon keumeung gisa

Kadang pakri sideh di nanggroe
Idin he Putroe rijang lon gisa
Teuma seuot Putroe jeunulang
Pakri nyang reumbang nibak meukuta

Lon keumeung yue gaseh goh leukang
Adak meularang jeuet teumeureuka
Meunankeuh nyum Tuanku ampon
Keureuna ulon ureueng hina

Teuma jibeudoh sinyak Putroe Ti
Jijak com gaki doli Baginda
Laen nibak nyan hana neutuban
Marit sulotan bak Putroe Muda

Bek that syuroi hai Putroe intan
Dua malam pasang guda
Bahle lon woe bak Putroe nam
Tinggai di dalam Putroe Muda

Nama nanggroe SINA PURI
Teupat sinyak Ti ngon ayahanda
Bahle jinoe lon beurangkat
Lasyka rakyat preh di lua

Teuma marit sinyak Putroe
Pakri kamoe Tuanku bungka
Neubri Tuanku seupah lam babah
Lon niet ijazah bak meukuta

Adat mate hana sayang
Sang-sang sajan ngon meukuta
'Oh neudeungo uleh sulotan
Neutarek puan nyang meujintra

Neupajoh ranub gapu lawang
Meusajan ngon bungong pala
Neubri teuma keu Putroe intan
Neusuleueng rijang ngon jaroe Raja

'Oh lheueh seupah neuboh lam babah
sulotan meulangkah deungon lasyka
Teukeumang payong rajawardi
Kuneng seuri pancawarna

Teuma neugiduek ateueh guda plang
Ireng sajan gunangan nyang na
Nakeuh umu dua uroe
Teuka meuntroe jak bri haba

Haba jipeugah sipanyang jalan
Ka troh u peukan poteu Raja
Lheueh nyan teuma neubeurangkat
Sajan ngon rakyat u dalam kuta

'Oh troh Raja nibak Putroe nam
Jitanyong yoh nyan sigra-sigra
Pakon Tuanku treb neuriwang
Peue that bimbang bak meurusa

Seubab meuteumeung Putroe Siti
Kamoe neubeunci bak ri rupa
Seuot Raja neukheun meunoe
Gata nyak Putroe bek le haba

Hana lon beunci pi meusidro
Bandum sinaroe bak ulon sa
Baginda sulotan teutap sinan
Ngon Putroe nam lam astana

Putroe nam droe laen pike
Teuka beunci keu Putroe Hina
Teuma Putroe nam jimupakat
Pakri mangat ngon meurasa

Siti Hina tapoh mate
Pakri pike nibak gata
Lheueh nyan mupakat le ban nam droe
Nibak kamoe ban kheun gata

Soe tayue jak u Sina Puri
Cuba pike uleh gata
Teuma seuot sidroe Putroe
Lhee droe geutanyoe tajak lanja

Lhee droe tinggai sajan sulotan
Bek soe tuban meunoe keurija
Keumah pakat Putroe nam droe
Jijak jinoe pantah sigra

Dua blah dendayang sajan jijak
Hingga troh bak Putroe Hina
Troh bak nanggroe Sina Puri
Jitamong le u dalam kuta

Troh lam kuta ek meuligoe
Beudoh Putroe Siti Hina
Lheueh bri ranup dalam puan
Jibri makanan sigra-sigra

Lheueh nyan marit Putroe lhee droe
Nyang troh kamoe adoe bak gata
Hajat kamoe kaoui jak manoe
Udeh he adoe sajan gata

Keudeh bak kulam Sina Puri
Bak mata ie di babah guha
Dikamoe adoe hana meutupat
Udeh siat tajak ngon gata

Putroe Hina deungo mumeunan
Nengui peukayan bak anggeeta
Teuma neuhei dendayang dua droe
Tajak jinoe sajan cutda

Troh bak kulam Sina Puri
Piyoh bak bale sigra-sigra
'Oh tho reuoh tren jak manoe
Putroe lhee droe meukeumah sigra

Jisuet bajee nibak asoe
'Oh lheuuh nyan manoe sigra-sigra
Teuma meukeumah Siti Hina
Putroe lhee ka keunan mata

Dang-dang Putroe jisuet bajee
Troh Putroe lhee keunan sigra
Ngon cindawan jimat bak jaroe
Jikoh takue Siti Hina

Reubah meugule di bineh kulam
Bukon that sayang Putroe muda
Dendayang dua yoh nyan jimoe
Deungon jaroe tumbok dada

Allah he pocut lon pabanbah
'Oh noe langkah ateueh donya
Ka lheuuh tapoh pocutkuh sidroe
Tapoh kamoe jinoe bandua

Putroe lhee droe deungo narit meunan
Jipoh le yoh nyan dendayang dua
'Oh lheuuh mate Tuan Putroe
Putroe nyan lhee droe teuma jigisa

Mate sinyak Ti teutap di sinan
Rab kulam nyan Putroe Hina
Aneuk dalam pruet tujoh buleuen
Putroe meugleueng tinggai syeedara

Bukon sayang Tuan Putroe
Bak jak manoe jitueng nyawa
Adat mate lam meulinggoe
Na ureueng nanggroe soe moe rugha

Nyoe cit sidroe dalam uteuen
Hana ureueng kalon rupa
Teutap sinan mate Putroe
Tamat 'oh noe saboh haba

Habeh haba han le kisah
Deungo lon peugah Putroe GEULIMA
A L K I S A H wahe e rakan
Teuduek haba nyan laen calitra

Jinoe he rakan lon balek lagee
Ayat meuteuntee buhu lon balek
Na saboh nanggroe DIU INDRA
Meuceuhu nama Putroe Tasek

Keurajeuen sinan SITHON GEULIMA
Badai ayahanda wahe e adek
Jih peutimang nanggroe DIU
That meuceuhu nanggroe udek

Bak siuroe tren jak manoe
Dayang peuet droe sajan he adek
Putroe jitren di astana
Euncien meugeunta sok bak gitek

Leugat jitren u teungoh rimba
Troh bak tangga Putroe cantek
Troh bak kulam SINA PURI
Piyoh sare wahe adek

'Oh tho reuoh beudoh jak manoe
Manyet Putroe leumah mubalek
Lhee droe ureueng tan le nyawa
Jipeurab lanja keunan jisidek

Ban deuh jikalon Siti Hina
Gob enanya takue jiculek
Meunyum sayang dalam hate
Leumah pike jalan nyang bayek

Jicok ie mawo jiboh bak badan
Meukab le yoh nyan Putroe cantek
Teuma puleh Siti Hina
Dendayang dua sajan mubalek

'Oh ban leumah Putroe Indra
Lon he cutda teungeuet lagoe ek
Teuma marit Sithon Geulima
Soe enanya gata hai adek

Teuma jiseuot Siti Hina
Lon he cutda teungeut lagoe ek
Teuka keunoe Putroe lhee droe
Jijak poh kamoe keunoe lam tasek

Sithon Geulima teuma kheun meunoe
Tajak ngon kamoe adoe u Tasek
Keudeh bak teupat Nilam Cahya
Di teungoh rimba nanggroe that cantek

Seuot Putroe han peue salah
Lon seutot langkah gata u Tasek
Lheueh nyan jimanoe Sithon Geulima
Sinyak Ti Hina sajan he adek

MILIK KEPUSTAKAAN
DIREKTORAT TRADISI
DITJEN NBSF DEPBU PAR

'Oh lheueh manoe suci ngon badan
Teungoh di sinan lanja jimudek
Troh u nanggroe Nilam Cahya
Piyoh sigra Putroe cantek

Sithon Geulima teuma jok Putroe
Jipeujaroe bak Nilam Tasek
Nyoe pat Putroe Po Ni peulara
Peurumoh Raja syeedara patek

Jih nyoe ka brat tujoh buleuen
Sideh lon teumeung dalam tasek
Po Ni seuot han peue salah
Sinoe takeubah sajan patek

'Oh lheueh jikeubah Siti Hina
Sithon Geulima teuma jibalek
Umu lhee buleuen Putroe di sinan
Nyata yoh nyan budak keucek

Budak lahe bak teumpat nyan
Nibak makam BEUREUMA 'AKEK
Galak hate sinyak Ti Hina
Hana le duka wahe adek

Seubab kana ayeuem jaroe
Rupa bagoe mata uroe ek
Geurasi nan BUDIMAN SAKTI
Indran Juhari Beureuma 'Akek

Lhee thon umu muda samlakoe
Peutren u bumoe Putroe Ti bayek
Troh le keunan Sithon Geulima
Neucok le Banta neuba u Tasek

Neujak pubeuet bak Syeh Tapa
Nyang le do'a eleumee tarek
Nibak Tuan Syeh JAMALOLHEKMAH
Neuyue amanah eleumee tarek

'Oh lheueh jikeubah Banta di sinan
Leugat jiriwang bak Putroe cantek
Wahe pocut tadeungo cutda
Lon ba gata jinoo he adek

Keudeh bak Raja Muda Sakti
Mangat neusudi dudoe neusidek
Seuot teuma Tuan Putroe
Cutda bak kamoe ban nyang bayek

Sithon Geulima deungo haba meunan
Jibri peukayan Putroe cantek
Jingui peukayan ureueng Indra
Bajee ija bandum mubalek

'Oh sare lheuuh neungui peukayan
Teuma beujalan Putroe nyang bayek
Teuma lon kheun sipheuet Putroe
Sang mata uroe lam awan jiek

Putroe Geulima teuma kheun meunoe
Tajak ngon kamoe wahe adek
Sinyak Ti Hina jiseuot rijang
Pakri nyang reumbang bak cutda bayek

Adat tajak beurijang-rijang
Tateureubang wahe cut adek
Keudeh tapo dalam awan
Meuteumeung sulotan meukuta patek

Teuma mupakat Putroe dua
Tajak lanja data ngon buket
Tamse pisang dalam canek
Miseue manek cahya akek

Taeu neujak Tuan Putroe
Indah han soe that bit asyek
Miseue kapai jeumeurang aroh
Dumnann utoh Putroe cantek

Neupoh aleh nyum sikatoe
Intan ngon pudoe sok di gitek
Neutiek linggang Tuan Putroe
Bandua droe jihei adek

Jilhom langkah dua sajan
That andalan wahe euncekk
Seubab ka neubri sidroe dendayang
Uleh sulotan raja nyang bayek

Neuyue peuseumah meuribee kali
Di yub tapak gaki meukuta patek
Sithon Geulima Putroe juhari
Dua ngon cut Ti Hina he adek

Pue ban jinoe pakri peurintah
Saleuem seumah kamoe he eunceh
Ban Raja deungo seumbah meunan
Teuceungang-ceungang meuhasek-hasek

Neuyue pangge tandi meuntroe
Dum sinaroe sampoe geusiyik
Neuyue jak tueng bak uleebalang
Inong agam rame lagoe ek

Laju le jinoe jak beurijang
Sideh di blang Putroe cantek
Ban jideungo sabda meunan
Dum seukalian teuma jimudek

'Oh troh ubak Sithon Geulima
Teuma jisapa jibeuet tabek
Seureuta deungon jilakee langkah
Saleuem seumbah meukuta patek

Neuyue tueng pocut bandua droe
U meuligoe kuta 'Akek
Teuma seuot Sithon Geulima
Ban nyang sabda meukuta patek

Uleebalang peudana meuntroe
Seureuta Putroe pulang balek
'Oh sare troh bak gaki rinyeun
Marit ureueng nyang ceureudek

Teuma neukheun ubak Putroe
Bandua droe sira neuyue ek
Putroe neuk u meuligoe
Neudeelat jinoe Raja nyang bayek

Sithon Geulima Siti Hinaan
Bandua sinan meumohon tabek
'Oh ban troh keunan Putroe lam awan
Putroe Ti sajan rupa mubalek

Teuma beudoh Putroe nam droe
Mumat jaroe ngon Putroe ban ek
'Oh lheueh nyan teuma jibri puan
Makeuen santapan ranub he adek

Raja kalon Putroe Indra
Indah that rupa miseue uroe ek
Nyang leubeh jroh sinyak Ti Hina
Hana ngon peusa beurangri tasek

Sithon geulima marit ngon Raja
Ampon hamba meukuta patek
Pakon Tuanku neupoh Putroe Ti
Peue neubeunci nibak patek

Peue seubab neupoh Siti Hina
Han le meuguna neuboh lam parek
Teuma seuot Baginda sulotan
Pakon keumeunan takheun he adek

Putroe lon keubah lam astana
Ngon ayahanda wahe cut adek
Peuet ploh dayang lon keubah sajan
Kawai Putroe nyan peutren peuk

Putroe lon keubah lam astana
Ngon hareuta meulaksa bilek
Teuma seuot Putroe Indra
Ampon meukuta laman nyang picek

Nyoe leupeue Tuanku Putroe Hina
Meuteumeung lam rimba di teungoh tasek
Lon kalon ulee hana bak badan
Lon cok sinan lon ba u Tasek

Troh lam makam Nilam Cahya
Puleh angeeta sinan lam tasek
Jinoe Tuanku nyoe pat Putroe
Neutanyong keudroe meukuta patek

Lheueh jikeubah sinan Putroe
Leugat jiwoe dalam Tasek
Troh lam Tasek teutap sinan
Baginda yoh nyan marit ngon adek

Wahe Putroe cut lon pareksa
Soe poh gata wahe adek
Teuma seuot Putroe Hina
Ampon hamba meukuta patek

Nyang poh kamoe Putroe nam droe
Han lon tupeue basa mubalek
Han jan habeh Putroe peugah
Raja amarah silagoe ek

Teuma neudrob Putroe nam droe
Neuboh taloe sideungki syirek
Lheueh neurante neuboh lam glap
Sinan teutap Putroe cantek

Putroe nam droe lam peunjara
Teutap Raja bak Putroe bayek
Raja neuduek ngon Putroe Hina
Dendayang sama sireuta gundek

Teutap Raja lam meuligoe
Lon seubot Putroe woe lam Tasek
Putroe Geulima lakee idin
Ubak sulotan neukeumeung balek

Teuma seuot doli baginda
Pakon le sigra tagisa adek
Insya Allah ngon tulong Tuhan
Bahgia Tuan meukuta patek

Jakalee na idin nibak Tuhan
Rijang troh laman keunoe mubalek
Bak le do'a Tuanku ampon
Neulakee keu lon teutap lam bayek

Seureuta Putroe horeumat neubri
Keu bawah doli paduka malek
Lom neumarit doli halarat
Bak seulamat gata he adek

Teulheueh nyan Putroe neubeurangkat
Pakri nyang adat Raja nyang Tarek
Teukeumang payong iram-iram
Pudoe ngon intan meutatah 'akek

Leupah jurong meuteumeung blang
Cut Putroe linggang woe u Tasek
Jinoe lon seubot laen ayat
Meugisa bak sot miseue nyang ka

Bak get lagee deungon ragam
Bak keunong laram soe nyang baca
Bek payah lon nyang seumurat
Gata he sabat simalam saja

A M M A B A K D U teuma dudoe
Karangan muwoe Sithon Geulima
Troh bak Banta dalam tapan
Jimarit yoh nyan meunoe kata

Wahe adek cut aneuk badan
Udeh lam awan tajak sajan ma
Keudeh aneuk tatueng saktian
Bak Raja Mambang nanggroe Indra

Teuma seuot Budiman Sakti
Bak lon he ma Ti ban kheun poma
Neulakee idin dilee bak Syiah
Mangat lon langkah sajan gata

Sithon Geulima deungo narit meunan
Neulakee idin bak Syiah Tapa
'Oh sare lheueh lakee idin
Neubri saktian dum anika

Habeh neubri dum hekeumat
Euncien malakat ngon keumala
Habeh neubri dum amanat
BANTA AHMAD seumbah ulama

'Oh lheueh nibak nyan neujak leugat
Neupeuteupat u nanggroe Indra
'Oh sare troh u nanggroe DIU
Neutamong laju dalam kuta

Laju neuk u meuligoe
Banta ngon Putroe woe di donya
Geupeuk Banta ateuh keurusi
Ngon ceuradi ban siseun lingka

Ngon dendayang dum sbarang
Meugleueng ngon subang muda-muda
'Oh troh Banta bak nanggroe DIU
Hate seuu Sithon Geulima

Seubab Banta that samlakoe
Tuan Putroe galak raya
'Oh lheueh nibak nyan jikrah rakyat
Ube nyang neumat ayahjih Raja

Habeh teuka dum uleebalang
Panglima prang nyang that peukasa
'Oh sare habeh dum meusapat
Teuma jideelat Sithon Geulima

Ampon pocut meuribee ampon
Ho neusuron kamoe dum na
Toh siri nanggroe nyang ka meusugang
Toh siri blang nyang tan musara

Toh siri Raja neukeumeung prang
Peugah beurijang lon deungo nyata
Kamoe DIU bandum guransang
Jakalee nyo prang neupeugah sigra

Padum lawet ka hana prang
Silawet janjongan 'oh lheueh lam tapa
Trenkeuh sabda nibak Putroe
Tadeungo kamoe he panglima

Nyang lon pangge gata keunoe
Keureuna kamoe keumeung boh raja
Aneuk ulon ureueng bumoe
Lon ba keunoe aneuk Raja

Jinoe bahle jimat nanggroe
Pakri jinoe ubak gata
Teuma seuot dum uleebalang
Bak kamoe reumbang po meukuta

Patot Tuanku neuboh geunantoe
Soe badai jaroe dum peukara
Sithon Geulima deungo haba meunan
Neupeutren le yoh nyan Banta Muda

Geupeuduek ateueh singgasana intan
Jideelat le yoh nyan uleh panglima
Tujoh seun tujoh jitot meuriam
Geumpa 'alam subra donya

Teuma jideelat jibalek nan
BUDIMAN 'ALAM geurasi nama
'Oh lheueh nibak nyan rakyat riwang
Tinggai sulotan dalam kuta

Teutap di sinan lam meuligoe
Malam uroe duka teumasa
Sajan rakan aneuk nanggroe
Geunap uroe teubiet u banda

'Oh ka malam teuma neuwoe
Ubak Putroe Sithon Geulima
Umu siploh thon keurajeuen sinan
Teuma 'oh lheueh nyan neujak meurusa

Bak siuroe Raja Budiman
Kheundak beujalan u dalam rimba
Teuma neupeugah bak Tuan Putroe
Idin keu kamoe wahe poma

Kheundak ulon jak lam uteuen
Lon jak meuramien mita rusa
Sithon Geulima deungo haba meunan
Tajak he keumuen rijang tagisa

Taba rakan aneuk nanggroe
Pawang nyang raghoe bak meurusa
'Oh Banta ngo narit meunan
Neuseumah le yoh nyan teuot poma

Teuma neutren neuhei rakan
Lanja neupasang ateueh guda
Neuteubiet leugat u teungoh mideuen
Sajan ngon rakan meuribee laksa

Ateueh guda uleebalang
Ateueh guda plang pocut Banta
Neujak leugat dalam uteuen
Jeueb sirokan mita rusa

Meuteumeung rusa han teubileueng
Dum na ureueng hate suka
Seubab keuramat Banta sidroe
Raseuki pi toe dalam rimba

Raja piyoh di teungoh padang
Khimah neupeudong piyoh tandra
Teutap Raja di dalam uteuen
Muwoe karangan Sithon Geulima

Teungoh jiduek lam meuligoe
Leumah Putroe nanggroe ZINURA
Aneuk Raja BEUREUMA KASAN
Putroe jimeunan RANTE INDRA

Teungoh jimanoe nibak kulam
Leumah pandangan bak Sithon Geulima
Teuma jicok saboh hikeumat
Neutatang malakat jeuet le geureuda

Teuma neuyue jak u nanggroe ZINU
Jijak laju hana meudawa
'Oh sare troh u nanggroe Zinu
Putroe jieu teungoh meuupa

Jisama Putroe jibapo leugat
Jiwoe ubak Sithon Geulima
'Oh troh bak Putroe nanggroe DIU
Jitren laju ateueh astana

Jikeubah Putroe ateueh meuligoe
Geureuda jinoe teuma jibungka
'Oh troh Putroe u meuligoe
Roh lam jaroe Sithon Geulima

Rante Indra kalon Putroe
Neukeun meunoe nibak poma
Wahe poma poma badan
Payah that lon di dalam hawa

Sithon Geulima neukheun meunoe
Gata sambinoe keunoe soe ba
Teuma seuot Putroe Rante
Lon he ma Ti geureuda nyang ba

'Oh troh keunoe lheueh lam jaroe
Srot le kamoe bak gata poma
Meunyo meunan aneuk teungku droe
Taduek ngon kamoe jinoe gata

Keureuna ulon aneuk lon tan
Jinoe he intan bek le tagisa
Meung ka taduek sajan kamoe
Teuma dudoe na bicara

Lon peukawen gata sambinoe
Ngon Raja nanggroe mat neuraca
Rante Indra seuot meunoe
Jeuet bak kamoe wahe poma

Sithon Geulima deungo narit meunan
That sukaan hana tara
Rante Indra teutap sinan
Neuduek sajan Sithon Geulima

Teuduek haba Tuan Putroe
Kisah muwoe keu Raja bungka
Raja Budiman di dalam uteuen
Teungoh meuramien mita rusa

Bak simalam leumah lumpoe
Na nyum u nanggroe teuka naga
Naga piyoh di teungoh mideuen
Jilakee bungong bak Sithon Geulima

Putroe tanyong bak samlakoe
Pakri aneuk droe nibak gata
Teuma seuot na nyum lam lumpoe
Bek he ma Putroe tabri keu naga

Meungka tacok bek tapulang
Lon lawan prang deungon naga
'Oh lheueh neukheun haba meunan
Teukeujot sulotan uroe ka faja

Leugat neutren ateueh bale
Jak bak sungoe neurahob muka
'Oh lheueh nyan Raja neuleueng jaroe
Keureuna uroe pi ka jula

'Oh lheueh nyan teuma neumaba woe
Rakyat sinaroe sajan neugisa
Sira neuwoe mupehasan
That sukaan aneuk miet muda

Ladom peh tambo deungon geundrang
Bukon bubarang that guranta
Ladom yub bangsi deungon suleng
Ladom giseng ngon biula

Ladom meusyae ladom meupanton
Raja meuron di dalam rimba
Ladom meunyanyoe ladom meunajat
Maseng babat meurapana

Ladom rakan sinapang cicem
Aneuk peureuleng burong diwata
Ladom peh gong ladom canang
Dum na binatang subra di donya

Raja Budiman jak lam uteuen
Tamse tupheuen bunyoe suara
Leupah padang meuteumeung padang
Jipeh geundrang gesek biula

Leupah gunong meuteumeung gunong
Jipalee gong subra donya
Jareueng-jareueng peulheueh sinapang
Na tamse prang di dalam rimba

Habeh uteuen meuteumeung nanggroe
Muda samlakoe woe u desa
Tujoh blah uroe peujalanan
Sampoe yoh nyan troh bak kuta

Raja Budiman tamong u dalam
Rakyat sajan tamong sireuta
Leugat neuk u ateueh bale
Rakyat sare teuduek silingka

Na sikeujab teuduek di bale
Sinan lale sikutika
'Oh lheueh nyan neuk u meuligoe
Ubak Putroe Sithon Geulima

Putroe Geulima kalon Raja muda woe
Hana bagoe hate suka
Raja muda kalon Putroe
Dalam meuligoe Sithon Geulima

Rupa indah hana bagoe
Tamse uroe cahya muka
Putroe Rante kalon samlakoe
Hana bagoe ngon tapeusa

Ban bintang timu meuacak-acak
Hate galak cut Rante Indra
Banta neuduek ateueh keurusi
Hidangan geume makeuen sigra

'Oh lheueh makeuen malam uroe
Neueh samlakoe di ateueh geuta
Peurab gunangan jiduek keunan
Jiramah badan Raja Muda

Sithon Geulima saboh sagoe
Teuduek keudroe lam astana
Rante Indra ateueh geuta meuh
Sinan neueh Putroe Muda

Jula malam teungeuet dayang
Putroe intan ateueh geuta
Neukalon Raja teungeuet pansan
Putroe intan hate gila

Seubab jikalon jroh samlakoe
Jikeumeung peugoe malee mata
Panyot lam hu hana padoe
Geunap jan meunoe hana reuda

Na sikeujab neuduek Putroe
Jikalon samlakoe ateueh geuta
'Oh ban jikalon muda samlakoe
Neueh cut Putroe pura-pura

Putroe neueh ateueh kaso
Peuteungeut droe pura-pura
Neukeumeung ujoe muda samlakoe
Tuan Putroe le that bicara

'Oh ban jaga muda samlakoe
Neubeudoh jinoe sigra-sigra
Raja teuduek ateueh keurusi
Dendayang rame teungeuet pana

Habeh teungeuet dum sinaroe
Pomaneuh Putroe pika sama
Neukalon Putroe ateueh geuta meuh
Cahya peungeuh lam astana

Neukeumeung peurab neujak peugoe
Muda samlakoe meuturi hana
Teutap neuduek ateueh keurusi
Putroe Rante kalon nyata

Putroe kalon Raja teutap
Neugeuriwat sigra-sigra
Neugeureutek gaki meutangkeh gleueng
Jareueng-jareueng meusu geuta

'Oh banta deungo suara gleueng
Sireuta neukheun panton sigra

Sireh kuneng jampunya hijo
Ambek dawon lapek ceurana
Puteh kuneng di ateueh kaso
Abang tidak tahu namanya

Lom siseun trok neukheun panton
Kon lagee phon laen rasa

Tinggi-tinggi matahari
Anak keureubo mate teutimbak
Lama sangat abang meuncari
Malam ini boleh beujumpa

Lom siseun treuk neukheun panton
Kon lagee phon laen rasa

Di ateueh buket tanamkan teubu
Anak keurubo manyen seundiri
Bangket he adek dalam beuradu
Lihatlah adek keupada kami

Lom siseun treuk Raja kheun panton
Tadeungo lon he adekeunda

Batang reudeuep kayu beuduri
Dawon di atah bunta-buntakan
Bangket he adek sikarang ini
Satu janji abang mintakan

Lom mupanton muda samlakoe
Neukheun meunoe bak Putroe Muda

Batang seulaseh di kayu jati
Anak babi mate di padang
Kalu adekeunda gasehkan kami
Bangket beudiri ini sikarang

'Oh lheueh neukheun haba meunan
Putroe intan hate suka
Neureutek sapai geuriwat gaki
Neubalek le ateueh geuta

Raja kalon jaga Putroe
Neupeuteungeuet droe pura-pura
Putroe beudoh ateueh kaso
Neungieng linto ateueh geuta

Putroe kalon Banta teueh
Yoh nyan cut puteh meung teutawa
Seureuta panton le di babah
Meunoe ulah mula-mula

Sayang seulaseh kayu jati
Buket beurapi di teupi padang

Abang tido ateuh keurusi
Mubangket kami apa bilangan

Lom siseun treuk neukheun panton
Kon lagee phon mula-mula

Batang keureuma kayunya tinggi
Dawon di ateuh buju-bujukan
Adek tido abang beudiri
Apa bicara abang bilangkan

Lom siseun treuk neukheun panton
Meualon-alon mangat suara

Sayang meureubok di ateuh buket
Sayang beulalang mate di taman
Surohkan adek sikarang bangket
Apa keuheundak keupada abang

Lom siseun treuk syae Putroe
Laen bagoe nibak nyang ka

Tinggi-tinggi matahari
Anak babi di lua taman
Abang suroh kita beudiri
Apakan janji boleh katakan

Burong teureubang di ateuh buket
Jatohkan sama beulakang batu
Meunyuroh kita sikarang bangket
Apakan hajat deelat Tuanku

'Oh Banta deungo syae Putroe
Neukheun le Putroe beudoh sigra
Putroe kalon Raja beudoh
Putroe neueh ateuh geuta

Yoh nyan Banta neukheun lom panton
Kon lagee phon laen rasa

Ujong tanyong jalan keu Keudah
Teumpat urang bermalu-malu

Pintakan tulong keupada Allah
Jangan Tuan kita kan malu
Tinggi-tinggi keulapa gadeng
Jatohlah satu laot Marikan
Adeknya ilok umpama payong
Abang khendak junjong beujalan
Masok keubon carikan bunga
Bunga berkarang jatuh seundiri
Adek laksana pucok payong
Sahya di bawah meunjunjong doli
Sayang keutapang di teungoh midan
Teumpurong pari dipaku
Sahya pandang hateku deundam
Seupeurti burong teureubanglah aku
Lom siseun trok banta kheun panton
Kon lagee phon laen rasa
Puan kaca ganceng beulit
Ceumboinya di dalam maknikam
Aku dudok adek pun ada
Sipatah haba janganlah lambat
Lom siseun trok neukheun panton
Kon lagee phon laen rasa
Sayang aneuk leuek teureubang tinggi
Turon dari nanggri uteuen
Apakah jalan adek keu mari
Aku tidak cari satu katakan
'Oh Putroe deungo narit meunan
Neutiek tangan ateueh dada
Neureutek jaroe neutarek gaki
Geureuhem le pura-pura
Ka neubeudoh rijang-rijang
Neuduek le yoh nyan ateueh geuta
Banta kalon neubeudoh Putroe

Ka neuie m droe hana haba

Tuan Putroe teuma kheun panton
Meunoe phon-phon mula-mula

Apa guna bertanam pade
Beulom direundam beureuteh dahulu
Apakah seubab suroh bangket kami
Tuannya kata keupada aku

Pocut Banta yoh nyan neuie m droe
Hana sapeue le suara
Teuma Putroe lom kheun panton
Kon lagee phon laen rasa

Tidak kusaja meuntikam pari
Pari kutikam tumbak larangan
Tidak kusaja datang keumari
Ditimpa umbak ditiyup tupan

Lom siseun trok neukheun panton
Meualon-alon mangat suara

Puan kaca buat kan taji
Seulaseh jati digubahkan
Tuanku suroh mubangkit kami
Apakan janji Tuan katakan

Lom siseun trok syae Putroe
Meuadoe-adoe hana reuda

Puan kaca buat kan alat
Beusi karsani buat kan peti
Tuanku ini aku meulihat
Adalah hajat katakan kami

'Oh Banta deungo syae Putroe
Neukheun meunoe sigra-sigra
Puan kaca meutatah intan

Intan meukarang ngon rajawardi
Aku mintak keupada Tuan
Kabarkannya sikarang ini

'Oh Putroe deungo syae meunan
Teuma neukheun meunoe kata

Neutaleh panton Raja Budiman
Putroe intan that bicara

Burong pipit teureubang sikawan
Sama deungon anaknya siwah
Datang sahya keupada Tuan
Kheundak beusama bahgia ngon tuah

Raja deungo syae meunan
Neutaleh yoh nyan meunoe ulah

Wahe adekeunda sahya nak tanyak
Katakan adek janganlah lanti
Napsu kami barang keu mana
Akan adekeunda hate seujati

Komdian lagi adekeunda abang rindu
Keupada adekku Tuan Putri
Jakalu boleh sahya mintakan
Sahya jadikan akan esteuri

Teuma seuot Tuan Putroe
Neukheun meunoe jaweueb haba

Ayuhai keukanda heundak jawab
Deungo ulehmu sikada dapat
Naban keukanda sahya peutajab
Keupada abang sahya meungadap

Komdian lagi abang deungokan
Hate nyang rindu sahya peunohkan
Barang kehundakmu sahya kabulkan
Hajat keukanda jangan putohkan

Yoh nyan Banta ka teusinyom
Muka neusom bak Putroe muda
Sireuta neukheun narit meunoe
Tadeungo kamoe wahe Adekeunda

Gata he Adek pane nanggroe
Nyang troh keunoe peue tapinta
Soe nan ayah he sambinoe
Gata adoe soe beunama

Teuma seuot Tuan Putroe
Tadeungo kamoe po meukuta
Ayah ulon Beureuma Kasan
Nanggroe jimeunan Nurol Zinura

Nama ulon na neuturi
Nama geurasi Rante Indira
Nyang keumeung meukawen deungon kami
Raja Mambang sakti raya

JUHAN' ALAM geurasi nan
Taklok keunan dum beurang na
Nyang troh langkah ulon keunoe
Bak nanggroe nyoe geureuda ba

Teungoh lon manoe nibak kulam
Teuka keunan inong geureuda
Dilon Tuanku ka lon peugah
Beuna ngon salah ka lon nyata

Dituanku pat bu nanggroe
Peugah bak kamoe po meukuta
Teuma seuot Raja Budiman
Deungo lon Tuan he Adekeunda

Teumpat ulon cit di sinoe
Bak nanggroe nyoe ulon Raja
Jinoe gata ka troh keunoe
Bek le tawoe bak Ayahanda

Adak teuka Juhan 'Alam
 Lon lawan prang he Adekeunda
 Jinoe taduek sajan kamoe
 Bak teumpat nyoe he meutia

 Teuma seuot Tuan Putroe
 Ampon kamoe po meukuta
 Nibak ulon ban nyang kheundak
 Hana sikrak lon meudawa

 Nyawong tuboh dageng darah
 Ban peurintah nibak poma
 'Oh ka idin bak poma sidroe
 Nibak kamoe ban nyang suka

 'Oh Banta deungo narit Putroe
 Neukheun meunoe pantah sigra
 Meunyo meunan he Tuan Putroe
 Wajeb kamoe judo digata

 Seupeurti ban syae Meulayu
 Tadeungo teungku dumna haba

 Sayang seulaseh tumbuh di batu
 Sayang jeuruju tumbuh di laman
 Bak pihak gaseh lon buang malu
 Bak pihak napsu kubuang iman

 Nayek buket meuangen-angen
 Cincen beuganti atawa kayen
 Jawoh seudiket kita bermayen
 Janganlah Putri meuncari layen

 Teuma seuot Tuan Putroe
 Neukheun meunoe sigra-sigra

 Mirahpati teureubang keu langet
 Jarom beulati meuncabek kayen
 Beulom meulungkop bumoe dan langet
 Hareuem lon cinta raja nyang laen

Haba ka keumah pakat ka sampoe
'Oh beungeh uroe bandum ka jaga
Raja pi neutren di meuligoe
Neuek u bale bak meuseuninya

Teutap sinan Raja ngon Putroe
Laen bagoe ulon calitra
Beureuma Kasan teuduek di nanggroe
Sajan Putroe lam astana

Troh le keunan dendayang dua droe
Jipeugah proe ubak Raja
Ampon Tuanku meuribee ampon
Tadeungo ulon po meukuta

Pocut Putroe neutren bak kulam
Teuka keunan saboh geureuda
Jisama Putroe jibapo leugat
Jinoe mupakat po meukuta

'Oh Raja deungo narit meunan
Neukrah le yoh nyan nujum peunita
Troh le nujum raja teumanyong
Tamita rijang kitab tabuka

Habeh maklum awai ngon akhe
Jipeugah le ubak Raja
Ampon Tuanku jinoe Putroe
Kalam jaroe Sithon Geulima

Adat Tuanku neulakee pulang
Han jitem sayang meusiblah mata
'Oh Raja deungo narit meunan
Sosah Sulotan hate lan dada

Raja teumakot keu Juhan 'Alam
Meuhat jiprang akhe masa
Juhar 'Alam Raja saktian
Hana soe lawan dalam Indra

Nyang sabe padra ngon Kamar 'Alam
Laen nibak nyan meusidroehana
Teuma Raja peugot surat
Neuyue intat keu Sithon Geulima

Meunoe haba dalam surat
Saleuem nibak Raja Raya
Wahe Adek cut adoe budiman
Pakon meunan buet Adekeunda

Pakon tacok Tuan Putroe
Keureuna sijih nyoe tunangan ka na
Ka lheueh janji ngon Juhan 'Alam
Lon takot jeuet prang he Adekeunda

Bek he adoe tapeuna keusumat
Bek taharap sakti raya
Bek tareuloh nanggroeh DIU
He adoe teungku rakyat pana

Meunan haba di dalam surat
Lheueh meulipat srom lam hawa
Troh ngon siat nanggroeh DIU
Troh u leupu Sithon Geulima

Sithon Geulima kalon surat
Neuploh lipat teuma neubaca
'Oh neukalon haba lam surat
Amarah that hana tara

'Oh lheueh nyan teuma jibalah surat
Jiboh narit meunoe haba
Ayohe keukanda ampon laman
Tadeungo lontuan wahe Raja

Keureuna Putroe ka lon peukawen
Bak rayek idin nibak gata
Adak teuga Juhan 'Alam
Lon lawan prang he Kakeunda

Kamoe DIU ka treb hana prang
Meukon ngon Mambang han sabe padra
Dituanku taduek keudroe
bahle kamoe lawan gaza

Seulawet lon woe dalam kaluet
Han tom lem cut prang nyang raya
Kamoe DIU bandum guransang
Adak neulawan lon peulheueh naza

Menankeuh haba di dalam surat
Teuma jilipat srom lam hawa
Sret lam jaroe Beureuma Kasan
neuploh le yoh nyan pantah sigra

'Oh ban neukalon haba lam surat
Baginda pucat ubah ie muka
Tetap sinan Baginda sulotan
Meunoe habaran keu Sithon Geulima

Padum lawet Putroe keunan
Leumah pandangan lam rahsia
Yoh nyan neukrah bandum rakyat
Habehe meusapat geusyk panglima

Uleebalang habeh troh keunan
Meusabda yoh nyan Sithon Geulima
Tadeungo lon he uleebalang
Dum sikarang putroe bentara

Jinoe Raja Cut lon peukawen
Pakri padan nibak gata
Teuma seuot uleebalang
Bak lon reumbang po meukuta

Ban nyang napsu po janjongan
Bak kamoe sikalian hate suka
Teuma seuot Tuan Putroe
Tadeungo kamoe he panglima

Jinoe Banta lon meung peukawen
Umu lhee buleuen sabe keurija
Gata siblah uleebalang
Di lua di blang ureueng keu gata

Teuma seuot uleebalang
Nyo bit reumbang ban nyang sabda
Haba keurija han lon peugah
Tamse bumeusah proe umpama

Uleebalang jidong siblah
Han peue peugah maklum cit ka
Teulheueh keurija tujuh uroe
Rakyat jiwoe dum jigisa

Maseng-maseng teutap bak teumpat
'Oh noe sabat saboh calitra
Teuma lon seubot keu ureueng seumurat
Do'a seulamat sibarang bahya

Seb ka 'oh nan haba lon peugah
Jinoe lon kisah nyang sibeuna
A L K I S A H wahe rakan
Teuduek haba nyan laen lon mula

Jinoe lon seubot Raja Mambang
Teuduek di dalam bak singgasana
Jideungo Putroe ka gob meunikah
That amarah hana tara

Yoh nyan neukrah sikalian rakyat
Neuyue peusapat jeueb-jeueb raja
Sikureueng ribee raja nyang taklok
Surat jijok jeueb-jeueb raja

Raja Mambang kheun bak Juhan 'Alam
Tadeungo lontuan he aneuk Raja
Kahei rakan meung tujuh ribee
U buket batee kajak tapa

Keudeh bak syiah Jamalolhekmat
U gunong batee di dalam rimba
'Oh troh tapa keunoe tariwang
Mangat taprang nanggroe Zinura

Juhan 'Alam deungo bak ayah
Neuhei pantah rakan sigra
Leugat neujak u Buket Batu
Meuteumeung teungku Syiah Tapa

Neumubri saleuem mumat jaroe
Teumanyong jinoo teungku Tapa
Ho takeumeung jak gata sinaroe
Nyang troh keunoe peue tapinta

Teuma seuot Juhan 'Alam
Ngon idin Tuhan lon meng jak tapa
'Oh syiah deungo narit meunan
Neupeutamong yoh nyan lam tapa

Juhan 'Alam ka lam kaluet
Ka meuteumeung buet masok tapa
Sajan ngon rakyat dum sinaroe
Teungku peurunoe eleumee tapa

Teulhee thon tapa Juhan 'Alam
Neulakee idin bak teungku tapa
Idin teungku lon keumbali
Kheundak peureugi pulang keu desa

Seuot teungku han peue salah
Aneuk meutuah jinoo tagisa
Jinoo aneuk lon bri bi'at
Lon amanat aneuk bak gata

Jikalee aneuk takeumeung muprang
Nyang bek kalawan sidroe Raja
Budiman 'Alam Banta sakti
Laen beurangri hana peue mara

Seuot Raja hana peue salah
Poteu Allah nyang peulara
'Oh lheueh idin leugat neuriwang
Sajan rakan meuribee laksa

Troh u nanggroe jikrah rakyat
Habehe meusapat jeueb-jeueb raja
Tunong baroh habehe meusapat
Uleebalang rakyat habehe teuka

Sikureueng ribee rakyat nyang taklok
Dum habehe trok keunan teuka
Sare habehe dum meusapat
Baginda halarat teuma sabda

Tadeungo he uleebalang meuntroe
Dum sinaroe tuha muda
Lon pangge gata dum sinaroe
Lon keumeung prang nanggroe nan Zinura

Lon keumeung lawan Beureuma Kasan
Pakri padan nibak gata
Bak le gaseh deungon sayang
Tapeungon lon prang Raja Indra

Uleebalang deungo haba meunan
Dum sikalian pucat muka
Seubab jideungo Beureuma Kasan
Dumna sulotan pucat muka

Seubab jitakot keu Beureuma Kasan
Seubab saktian Sithon Geulima
Hana sidroe nyang na seuot
Dum teumakot hana haba

Teuma marit sidroe uleebalang
Nyang na sajan masa jak tapa
Ampon Tuanku meuribee ampon
Kamoe seuon sabda meukuta

Soe hana jak bak siseun nyoe
Uroe dudoe taboh peukara
Hareuta teuma tayue rampah
Deungon rumoh tayue baka

Adak peutua nyang mat nanggroe
Taboh gantoe nyang seutia
Meunan leumah nibak ulon
Tuanku ampon udeh tabungka

Sigala rakyat deungo haba meunan
Han jituban mubicara
Adak han lon jak meureuka dudoe
Dum sinaroe lon sabong nyawa

Yoh nyan beurangkat Raja Mambang
Juhan 'Alam sajan sireuta
Bandum rakyat beurangkat sajan
Dalam badan han le nyawa

Padumna treb neubeujalan
Sampoe yoh nyan nanggroe Zinura
Sulotan Mambang piyoh di mideuen
Neukirem saleuem u dalam kuta

Raja Mambang peuget surat
Neuboh narit mangat haba
Meunoe haba dalam surat
Saleuem horeumat nibak Raja

Tadeungo he Beureuma Kasan
Ulontuan ka troh bak gata
Rante Indra jinoe taandam
Juhar 'Alam nyoe ho ka teuka

Bek lambat le peureubuatan nyoe
Bak buleuen nyoe beu keumah sigra
'Oh lheueh jisurat teuma jilipat
Jiyue jak intat pantah sigra

Teuma neuyue me ubak bujang
Leugat u dalam troh bak Raja
Bujang teubiet jicok surat
Jijak leugat hana dawa

Troh bak kuta Beureuma Kasan
Jiheu ureueng di dalam kuta
Soe na lam kuta tabuka pinto
Lon keumeung lalo jak bak Raja

Ureueng keumawai teuma tanyong
Pane ureueng gata di lua
Teuma seuot ureueng rijang-rijang
Raja Mambang nyang suroh hamba

Meunyo meunan piyoh dilee
Dang lon bri thee ubak Raja
Lem kawai pinto jiplueng pantah
Jijak peugah bak poteu Raja

Ampon Tuanku seumbah siurang
Utosan Mambang di lua kuta
Seuot Raja rijang-rijang
Yue jak tamong keunoe sigra

Ureueng keumawai buka pinto
Bujang lalo troh bak Raja
Lheueh nibak nyan teuma jideelat
Jibri surat bak jaroe Raja

'Oh neukalon haba lam surat
Hate mangat Raja Indra
Lheueh nyan teuma neubalah surat
Neuboh narit meunoe haba

Wahe Raja deungo lon kheun kri
Aneuk lon Siti han le he Raja
Ka jitawan uleh DIU
Keudeh laju tajak gata

Bak Sithon Geulima talakee pulang
Putroe jitawan teungoh meuupa
Nibak kamoe han le Putroe
Keudeh tapeutoe wahe Raja

'Oh lheueh neusurat teuma neulipat
Neujok leugat bak bujang Raja
Bujang teubiet jiwoe leugat
Troh le siat ubak Raja

Bak Raja Mambang jibri surat
Neuploh lipat teuma neubaca
'Oh neudeungo haba lam surat
Amarah that hana tara

Neujak leugat u nanggroe DIU
Seutot judo ka Raja ba
Padum lawet neubeujalan
Sampoe yoh nyan bak Sithon Geulima

Ka neupiyoh di teungoh padang
Raja Mambang peugot kuta
Teuma jipeugot saboh surat
Jiboh narit meunoe haba



Hai Thon Geulima Putroe kapulang
Raja Mambang nyoe ho ka teuka
Bek ngon saket pulang ngon mangat
Bek jeuet keusumat kamoe ngon gata

Adak han kapulang Tuan Putroe
Kaingat keudroe hai Thon Geulima
Rakyat kupoh kah kuikat
Teuka meularat nanggroe binasa

Beuna katuri Raja Mambang
Han lom soe lawan ube nyang ka
Jinoe nyang got Putroe kapulang
Yoh goh jeuet prang hai Thon Geulima

Teulheueh jisurat teuma jilipat
Jiyue intat u dalam kuta
Bujang teubiet jijak leugat
Troh le siat ubak kuta

Meuteumeung ureueng di lua taman
Jibri kireman jih jigisa
Ureueng bak taman tamong leugat
Jibri surat bak Sithon Geulima

Sithon Geulima kalon surat
Neutanyong pakat ubak Banta
Pakri bicara he samlakoe
Jilakee Putroe uleh Raja

Banta seuot rijang-rijang
Lon lawan prang wahe poma
Jinoe he poma lon balah surat
Lon boh narit nyang bisa-bisa

Meunoe lon boh narit lam surat
Lon yue preh siat di mideuen Cahya
Pocut Banta peugot surat
Neuboh narit meunoe haba

Tadeungo he Raja Mambang
Han lon pulang Putroe gata
Keureuna Putroe ka lon meukawen
Jikalee ngeuren taprang kuta

Adak han taprang keunoe
Uroe dudoe kuprang gata
Beuta turi SYAHI BUDIMAN
Beuta tuban aneuk donya

Nyoekeuh murit Jamalolhekmah
Habeah amanah bak lon neuaja
Kamoe DIU he Raja Mambang
Ka treb hana prang wahe syeedara

Jinoe saleh ka na lawan
Ka jeuët keubisan lon ngon gata
Saleh gata keumeung keuji
Narit teumiseue uleue bisa

Meunan haba dalam surat
Lheueh nyan neulipat neusrom lam hawa
Srot lam kuta Raja Mambang
Jicok le yoh nyan teuma jibaca

'Oh jikalon haba lam surat
Yoh nyan mupakat dum na peutua
Juhar 'Alam tanyong pakat
Pakri nyang mangat he ayahanda

Wasiet teungku Syeh nibak lontuan
Han neubri lawan Raja di donya
Han neubri lawan Syahi Budiman
Meuhat tinggai nan di ateueh donya

Raja Mambang deungo aneukjih peugah
Meunyum uga hate lam dada
Meunyo meunan wahe samlakoe
Udeh malam nyoe geutanyo gisa

Yoh goh meuteumeung kalon ruman
Nibak maluan singoh dan lusa
Adak aneuk jinoe tariwang
Hana soe tuban geutanyoe gisa

Bek tabantah Jamalolhekmat
Gadoh pangkat teuka cidra
Keumah pakat Raja Mambang
Teungoh malam dum jigisa

Troh u nanggroë jiduek bak rambat
Muwoë riwayat keu Sithon Geulima
'Oh sare beungoh deungon uroe
Raja Cut jinoë neutren astana

'Oh ban neukalon teungoh malam
Raja Mambang ka jigisa
Han le ureueng di teungoh midan
Syahi Budiman hate suka

Leugat neuuk ateueh bale
Rakyat rame ngadap lingka
Raja DIU peugot surat
neuboh narit meunoe haba

Wahe Raja tadeungo kamoe
Pakon tawoe han jan troh tateuka
Gata ngon kamoe ka jeuet keusumat
Jinoe sabat tapeukong kuta

Gata kupoh rakyat dum kucang
Kuboh sikarang u cong sula
Adak takeumeung bek reuloh nanggroe
Taklok bak kamoe wahe Raja

Nyoekeuh Raja Syahi Budiman
Nyang le saktian meuganda-ganda
Meuhan tataklok nanggroe kuprang
Tamat kalam 'oh noe haba

Lheueh neusurat teuma neulipat
Neusrom meuhat dalam hawa
Nibak angen neuyue teureubang
Troh bak Mambang surat Raja

Surat bak jaroe Juhar 'Alam
Surat kireman nibak Raja
Juhar 'alam kalon surat
Teumakot that hana tara

Lheueh nyan teuma tanyong bak rakyat
Pakri pakat dumna gata
Keu geutanyoe ka kheundak Allah
Hanjeuet tabantah guree Tapa

Nyoe kireman Raja DIU
Nyang that meuceuhu Banta donya
Meung han tataklok meuh at jiprang
Pakri padan dumna gata

Teuma seuot uleebalang
Ban nyang reumbang bak meukuta
Meuhan pakat dum uleebalang
Jitaklok keunan dum bak Banta

Seubab ka wasiet nibak Syiah
Han jeuet ubah keunong meureuka
Geubri alam geupeugot ngon surat
Jiboh narit janji haba

Ampon Tuanku meuribee ampon
Seumbah ulon hamba nyang hina
Bak lontuan han le keusumat
Ka jeuet keu sabat sabe lam hawa

Adat Tuanku neukeumeung muprang
Kamoe neupeusan meuh at troh teuka
Teulheueh jisurat teuma jilipat
Jisrom leugat dalam hawa

Srot lam jaroe Budiman 'Alam
Neubeuet le yoh nyan pantah sigra
'Oh neudeungo haba lam surat
Hate mangat hana tara

Seubab jeuet sabat Raja Mambang
Bukon bubarang nate suka
Teutap Mambang teuduek di nanggroe
Banta ngon Putroe lam astana

Beureuma Kasan di meuligoe
Seunang nanggroe hana jeut bahya
Diraja DIU ngon Putroe Rante
Malam hari meusuka-suka

Hukom rakyat lam nanggroe DIU
Meugah meuceuhu hana tara
'Oh nanggroe Banta peutimang
Hukom seunang dalam Indra

Sigala rakyat hate sukaan
Dumna pahlawan neubri hareuta
Nanggroe makmu amat sangat
Meuceuhu that Raja Muda

Teutap Banta bak nanggroe nyan
Habeu 'oh nan saboh calitra
Haba lon nyoe meuriwang-riwang
Nak mangat seunang bak lon cok punca

Sebkeuh dumnan dihaba nyan
Laen karangan lon calitra

A L K I S A H laen karangan
Deungon habaran nyang laen bagoe
Muda sakti dalam astana
Teuduek sama deungon Putroe

Padum lawet lheueh nibak nyan
Aneuk Raja nyan na lom sidroe
Nyanpih aneuk ureueng agam
Galak han ban Raja nanggroe

Rayek bacut geurasi nan
DIU PALINGGAM nama he adoe
Ho siuroe rayek leugat
Tamse kulat ujeuen baroe

Tujoh thon umu Diu Palinggam
Neujak yoh nyan lam meuligo
Troh ubak glap Putroe nyang nam
Simanyak nyan cabak jaroe

Jilheueb binteh sigra-sigra
Leumah mubanja sinan cut Putroe

Ka jipeurab jiwiet rante
 Bandum sare lheueh lam taloe
 Putroe nam droe teubiet di sinan
 Geubri makanan hana pudoe
 'Oh sare lheueh dalam singkla
 Jimat Banta jicom bak dhoe
 Bak meutuah bijeh mata
 Bak mubahgia po samlakoe
 Ulon aneuk teumeureuka
 Nibak Raja duteuh sidroe
 Jinoe aneuk talakee ampon
 Salah ulon he samlakoe
 Diu Palinggam deungo meunan haba
 Neujak bak Raja le neupeutoe
 Troh bak Raja DIU seumbah
 Raja dahsyah mata laloe
 Diu Palinggam tanyong bak ayah
 Tuanku peugah nyang tanyong kamoe
 Putroe nam droe lam peunjara
 Ampon deesya bak uroe nyoe
 Bak rayek hate po meukuta
 Idin lon ba bandum keunoe
 Keureuna inong iman kureueng
 Meunan meuteumeung jeueb-jeueb nanggroe
 Adak meureuka bek that lambat
 Ampon ngon siat he du jinoe
 'Oh Raja deungo narit meunan
 Baginda sulotan mantong neuieim droe
 Diu Palinggam lom beukata
 Ampon Ayahanda bak uroe nyoe
 Keureuna inong rumoh syeetan
 Ulama kheun dum sinaroe
 Beurangpeue buet sama ngon syeetan
 Bek ikot nyan du geutanyoe

Na tatu 'oh inong mumadu
hate lam tunu hana padoe
Adak na got nibak lahe
Dalam hate deundam han padoe

Hate di dalam tamse apui
Hana deueh taeu dum sinaroe
Miseue bakat tren di laot
Meuturot-turot pantah han bagoe

Adak nyang got jiwaham nyang jeuheut
Meunan geuseubot inong sinaroe
Adak sidroe nyang mumadu
Siploh boh laku wahe adoe
Uroe malam hana beureunti
Inong meurabe kiamat he adoe
Haba sideh jipeugah keunoe
Jibalek-baloe jituka haba

Meunan beurangri inong mumadu
Adak got laku lam hate seungkoe
Nyang le taeu meunan laku
'Oh ka mumadu syeetan peulaloe

Jipeuturot buet nyang meuteugah
Nak mangat sosah hate han padoe
Meunankeuh tamse dum he ayah
Ampon meu'ah nam droe Putroe

Seuot Raja aneuk meutuah
Ban peurintah he bijeh mata
Ka padum treb Putroe lam glap
Hana soe peurab pi meung sidroe

Hana sidroe jak bicara
That ceulaka ban saboh nanggroe
Jinoe he aneuk gata peurintah
Putroe nyang salah ampon jinoe

Ban DIU deungo haba meunan
Neucok Putroe nam jak pumanoe
Nibak kulam di leuen astana
Lheueh nyan teuma ek u meuligoe

Ubak Raja DIU peuampon
Ka jiseuon dua jaroe
'Oh lheueh ampon deesya Putroe nam
Diu Palinggam marit jinoe

Wahe ayah na peue lon tanyong
Peugah bak keunong bak uroe nyoe
Padum na luah teupat keurajeuen
Padum boh mideuen hukom geutanyoe

Padum ploh raja taklok keunoe
Neupeugah jinoe wahe du Raja
Padum nyang han pi neupeugah
Tulong Allah bah tabicara

Nyankeuh haba he du teungku droe
Han jeuet han jinoe neupeugah sigra
Teuma seuot Baginda Sulotan
Deungo lontuan wahe samlakoe

Sireutoh tujuh ploh lon hukom raja
Laen hana bak geutanyoe
Raja nyang meugah han jeuet lon geunggam
PEUTAWI BIRAM saboh nanggroe

Nyang keudua SA'ID MEUREUDAM
Ngon MILON AWAN lhee ngon Raja
Raja nyang peuet SYAREB MIGA
Sabat ngon raja Milon nyang bunoe

Nyang that meugah MAMBANG SARI
DIU KASMI raja dua droe
Nyankeuh aneuk raja nyang meugah
Beurani gagah dum sinaroe

Bamdum raja nyan raya that sakti
Biram Peutawi nyang that geupujoe
Hana soe lawan beurangri raja
Lutong ngon kra taklok keunoe

Di baroh nyan Mambang Sari
Raja sakti lawan han soe
Diu Palinggam deungo haba meunan
That sukaan hana bagoe

Teutap sinan Diu Palinggam
Rupa ragam ban mata uroe
Dengon rakan nyang muda-muda
Neujak u banda geunab-nab uroe

Neubloe makanan dum keu rakan
Neubri peukayan salen sinaroe
Siploh thon umu Diu Palinggam
Tujoh reutoh rakan nyang sajan droe

Dua blah droe nyang ulee kawan
That pahlawan hana bagoe
Peurtama phon DIU PEUKASA
CAHYA INDRA keudua he adoe

Keulhee geupeunan CAHYA KAINDRAN
That pahlawan cukop tanggoe
Keupeuet geupeunan 'ADI SYAH KUAT
Keulimong he sabat PEULANTA DIWA

Keunam teuma SURAN 'ADI
Keutujoh geurasi LILA INDRA
Keulapan teuma INDRAN SAYUTI
Sikureueng geurasi BEURANGGA SURA

Siploh MUSA'IB siblah LAWET
Dua blah geusabet MANG NGEURANA
Rakan dua blah leubeh neusalen
Rakan nyang laen sama saja

Hareuta neubri dum keu rakan
Hana soe tuban boh hareuga
Meunyo le tabri hareuta keu rakan
Jimate sajan adoe ngon gata

Meunankeuh mise wahe teelan
Got uleebalang geusyk panglima
Bak mangat su beu murah tangan
Meuhat le rakan di ateueh donya

Adat tayue narit bak mangat
Bek ngon jungkat adoe di gata
Bak le gaseh deungon sayang
Bandum rakan teuingat keu gata

Meung nyo meunan bit teuingat
Cuba tasipat bak hate gata
Gaseh bek meuri beunci bek leumah
Meunankeuh nyang sah bandum teurata

Dumnankeuh adoe bak na tapike
Akhe jimate sajan gata
Jakalee han tabri atra peukayan
Meung tan he rakan budi bahasa

Bak got laku leumoh-leumbot
Bak meupatot seudeurhana
Meunan geuseubot ureueng meubudhoe
Geunab-nab uroe geuseuha

Asai bek tabri keu ureueng meudagang
'Oh ka jiriwang han le jiteuka
Meung nyo han tabri hareuta keu rakan
Hana soe peungon sajan gata

Bit pi tabri bek beurangho
Tapileh he po nyang na seutia
Meung bek tabri nyang krang ceukang
Bak ureueng nyan hana seutia

Nyang leubeh got hareuta tabri
Keu asoe neugri dum cut raya
Adak han jijak watee beujalan
'Oh na sukaran meuhat troh teuka

Hana pike pimeung sigo
Meunankeuh he po pham le gata
Adak tatem tabri peukayan
Mise alat prang peudeueng ngon kanja

Sikin ngon rincong beude ba sajan
Alat bak badan aneuk miet muda
'Oh ka ramphak tabri peukayan
Galak ji han ban adoe ngon gata

Meunan bagoe tabloe ureueng
Adak takeumeung keu aneuk donya
Meunyo ret laen hana sampoe
Pham le adoe dum na gata

Walee panglima get uleebalang
Dum sibarang raja-raja
Adak ureueng mita sabat
Bek tahisab leubeh atra

Beu tatuoh payah tuleueng
Leubeh kureueng bek takira
Uroe nyoe keunoe singoh roh keudeh
Pham he wareh tuha muda

Diu Palinggam jeuet le rakan
Seubab murahan ateueh donya
Suara mameh meuseulihat
Meujeulih adat ngon rakan nyang na

Sidroe-droe alat bak asoe
Na siploh katoe dumnan hareuga
Keureuna seubab inseuh sayang
Dum na rakan hate suka

Uroe malam hate sukaan
Sajan rakan aneuk Raja
'Oh ka malam woe sinaroe
U meuligoe dum seureuta

'Oh ka beungoh teubiet u peukan
Neubloe makanan pue nyang hawa
Hareuta pi le han teubileueng
Habeh neubulueng dum lasyeuka

Bak siuroe neujak u padang
Le that kawan cut Banta Muda
Tujoh reutoh rakan hana jarak
Ho nyang neujak sajan sireuta

Padum lawet sabe nyang meunan
Leupah beujalan troh bak guha
Troh bak kulam Sina Puri
Piyoh di bale po cut Banta

Sigala raja neuyue jak meuen
Lam guha nyan neuyue mumita
Lam guha tanjong le that macam
Bungong peukan ngon bungong jeumpa

Leupah rakyat jak pot bungong
Tinggai di sinan pocut Banta
Tujoh reutoh rakan leupah lam uteuen
Mita makanan boh kayee rimba

Diu Palinggam teutap di sinan
Laen karangan lon calitra
A M M A B A K' D U teuma dudoe
Jitren u bumoe Putroe Indra

Nama Putroe cut NILA WATI
Rupa tamse buleuen purnama
Ngon dendayang dua blah droe
Jitren jak manoe u tanoh donya

Meunankeuh sabe geunap musem
Jitren kayem bak kulam bunga
'Oh ka jitren Putroe bak kulam
Jibeuet di manyang hekeumat donya

Ureueng keumeung jak bak kulam nyan
Gaduh daratan han meuho donya
'Oh lheueh Putroe jitren u bumoe
Jibeuet lom jinoe hekeumat donya

Diu Palinggam bak bale kulam
Reubah pangsang hana haba
Sigala rakyat habeh sisat
Keunong hekeumat Putroe Muda

Putroe tren le lanja bak kulam
Deungon peukayan bak anggeeta
Troh bak kulam bandum sinaroe
Ek le Putroe u bale nyan teuma

Jikalon sinan muda samlakoe
Tamse uroe jibeudoh cahya
Ban bintang timu meuacak-acak
Beurang soe galak jikalon rupa

Tuan Putroe hate beureuhi
Ka jitren le bak kulam tahta
Putroe manoe nibak kulam
'Oh lheueh nibak nyan teungoh lanja

Ngui peukayan gleueng ngon subang
Meukarang intan peurmata
Ban keumala jibeudoh trang
Bek that tapandang hilang bicara

Putroe ek lom u bale nyan
Neuboh bee-beewan bak ija Banta
Seubab meukalon rupa indah
Putroe dasyah galak keu Banta

Putroe tuka euncien bak jaroe
Neukeumeung woe keubah keu tanda
'Oh lheueh nyan Putroe jiteureubang
Jidong bak cabeueng kayee raya

Di cong buraksa Putroe piyoh
Cahya seumeulhoh bak kulam tahta
Teuma Putroe peulheueh hekeumat
Jaga cut Ahmad di bale raksa

'Oh ban puleh nibak pangsan
Mubayang-bayang Putroe Indra
Nibak ija bee that harom
Euncien neukalon ka jituka

Banta neutangah cong kayee manyang
Leumah dum bintang di cong buraksa
Neukalon rupa sang uroe beukah
Banta dasyah hate lam dada

Meunyum galak nibak hate
Seubab neuueu indah rupa
Hana saboh na teuladan
That andalan Putroe lam hawa

Soe nyang kalon hate beureuhi
Budiadari nyang keumeung sa
Diu Palinggam kheun bak Putroe
Saleh pat nanggroe gata dekeunda

Adak tapeugah he sambinoe
Beurangri nanggroe lon peuteuka
Teuma seuot sidroe dendayang
Deungo lon kheun ban wahe Raja

Nanggroe di kamoe MIGA di awan
KAMAROL 'ALAM nama Raja
Adak na napsu gata keu Putroe
Tajak u nanggroe lam awan miga

Keureuna Putroe hana suami
Adak beureuhi tajak sigra
'Oh lheueh jikheun narit meunan
Jipo yoh nyan dalam hawa

Troh u Buket Miga di awan
Teutap cut intan dalam astana
Diu Palinggam teutap di bale
Teuduek meudeune hana haba

Woe dum rakyat nyang jak pot bungong
Habeu meutamon bak bale raksa
Rakan bri bungong Banta neuie droe
Han le ban baroe Raja Muda

Lila Indra teuma teumanyong
Pakon janjongan dukacita
Teuma seuot Diu Palinggam
Tadeungo lon kheun he syeedara

Ulon teueh sinoe bak taman
Putroe lam awan lon eu teuka
Lon eu rupa lang-geumilang
Ban buleuen trang cahya muka

Jituka euncien teuma bak jaroe
Teungeut kamoe masa jiteuka
Jinoe geutanyoe bek le tariwang
Udeh taprang Buket Miga

Deumi Allah han le lon riwang
Meung goh meuteumeung ngon Putroe Muda
Diu Peukasa teuma kheun meunoe
Tadeungo kamoe he po meukuta

Keureuna geutanyoe han jeuet teureubang
Pakri ban datang lam nanggroe Indra
Teuma seuot Diu Palinggam
Udeh he rakan tajak tapa

Keudeh tajak u Buket Ambang
Tuntut saktian hekeumat donya
Habehe mupakat dum na rakan
Diu Palinggam neujak lam rimba

Rakan tujoh reutoh han tom jarak
Beurangho neujak sajan sireuta
Troh u buket Jabai Asambon
Piyoh bandum sinan sigra

Na sikeujab neuduek sinan
Teuka le keunan Syiah lam tapa
BEURAHMAN INDRA nama Syiah nyan
Neubri saleuem deungon Banta

'Oh lheueh bri saleuem mumat jaroe
Teumanyong meunoe Syiah lam tapa
Hobu langkah gata sinaroe
Peugah bak kamoe he aneuk raja

Teuma seuot Diu Palinggam
Hajat lontuan keumeung jak tapa
Lon keumeung tueng sakti hekeumat
Teungku bri bi'at keu kamoe dum na

Seuot Beurahman han peue salah
Insya Allah ulon bri do'a
Banta jitamong lam kaluet nyan
Rakyat sikeulian amai do'a

Tujoh uroe Banta di sinan
Ka jeuet amalan hekeumat donya
Jeuet teureubang ka miseue kleueng
Rakan bandum sama juga

Lheueh neulakee idin bak Syiah
Neukeumeung langkah u Buket Miga
Idin teungku keu lon jak riwang
Lon meung jak prang Buket Miga

Seuot Beurahman neukheun meunoe
Tajak aneuk droe ho nyang suka
Hana halangan nyang meulinteueng
Beurangri ureueng talawan gaza

Hana sidroe nyang na cangklak
Beurangho tajak meunang gata
Han teubiet nyawong bandum rakan
Meung nyo dalam prang wahe Banta

'Oh lheueh nyan neubri keumala hekeumat
Nibak teumpat piyoh lasyeuka
Nyoe he aneuk keumala saboh
Teumpat piyoh rakan dum na

Lam keumala nyoe ret susahan
Taboh rakan dalam keumala
Di dalam nyan luah that nanggroe
Na meuligoe deungon astana

Cit ka hase bandum asoe
Maseng meuligoe asoe jina
Diu Palinggam sambot rijang
Teuma 'oh lheueh nyan ka neubungka

Tamong rakyat bandum keunan
Lam keumala nyan hekeumat donya
Diu Palinggam tinggai sidroe
Neuteupok jaroe nibak dada

Gadoh ceumboi tamong lam badan
Nyan that saktian Banta Muda
'Oh lheueh neubri dum saktian
Neupeujeuet badan keu cempala

Leugat neupo dalam awan
Tinggai Beurahman dalam rimba
Diu Palinggam teungoh teureubang
Dalam awan Buket Miga

Teuduek haba Diu Palinggam
Kisah meuriwang laen haba
Hikayat nyoe han sa ngon laen
Tadeungo he polem dum na gata

Haba lon nyoe meuriwang-riwang
Nak mangat seunang he syeedara
Keureuna nyang jeuet kayem meuriwang
Lon keumarang hana biasa

Bek le peu neukheun wahe sabat
Lon seumurat hana got haba
Pat nyang kureueng beuta tamah
Meunankeuh nyang sah tameusyeedara

Sebkeuh dumnian haba lon kisah
Laen silsilah ulon calitra
A L K I S A H wahe rakan
Laen karangan ulon calitra

Na saboh nanggroë Miga di awan
Keurajeuen sinan KAMARU 'ALAM DIWA
Nyankeuh Raja nyang that meugah
Teuduek dasyah di Buket Miga

Aneuk Raja nyan cut NILA WATI
Tamse hari cahya muka
Putroe teuduek lam meuligoe
Gunangan peuet droe sajan sireuta

Kawai kuta peuet ploh pahlawan
Uroe malam hana reuda
Sidroe minah dua gantoe
Kawai Putroe bek binasa

Di teungoh mideuen na saboh kulam
That andalan hana tara
Di leuen meuligoe na saboh taman
Teupat mayenan aneuk Raja

Di teungoh taman sibak kayee meuh
On di ateueh intan peurmata
Diu Palinggam ka troh keunan
Neupeujeuet badan keu cempala

Sinan neupiyoh di cong kayee nyan
Nibak taman teumpat Raja
Na sikeujab cempala sinan
Uroe yoh nyan teuka sinja

Cempala po u meuligoe
Troh bak Putroe lam astana
Cempala dong bak tingkap meuligoe
Tuan Putroe kalon rupa

Teuma Putroe hei dendayang
Geudrob cicem nvan keumeung eu rupa
Jideungo haba Putroe intan
Cicem budiman jitupeue makna

Cempala grob keudeh keunoe
Jikalon Putroe lam astana
Di Tuan Putroe siat silab
Cempala lumpat bak sagoe keuta

Didendayang pula-paloe
Jideungo su Putroe meuhei sigra
Jimeulangkah gakijih brat
Keunong hekeumat Banta Muda

Bit pi meunan jiplueng meudabee
Ka meukong ulee bak pinto raya
Seubab utoh Diu Palinggam
Jitop peuceungang keu asoe astana

Dendayang muda lale keudroe
Di tuan Putroe ngon cempala
Nyan gunangan reubah limpah
Jimeung langkah saket lam pha

Cempala cut meuriwang-riwang
Keu Putroe intan nyang jihawa
Keupeue laen hana hajat
Keu Putroe that nyang jicinta

Dumnankeuh utoh Diu Palinggam
Cicem lam uteuen jibalek rupa
Lom jimarit cicem budiman
Na tamse ban manusia

He dendayang deungo lon peugah
Saboh paidah ubak gata
Beta jangan beuruleh dijerat
Beta tidak boleh teureubang

Supaya jangan lagi kombali
Jangan dijerat dengan beunang
Dendayang deungo syae meunan
That bit hireuen hana haba

Tuan Putroe yoh nyan teukhem
Neudeungo cicem jimeusuara
Putroe marit teuma ngon cicem
Tadeungo lon he cempala

Pat bu gampong siri nanggroe
Nyang troh keunoe peue tajak mita
Soe na yue jak gata keunoe
Peugah jinoe he cempala

Soe po gata cuba peugah
Lon deungo sah jinoe nyata
Seuot cempala he pocut ampon
Teupat ulon di tanoh donya

Po lontuan Diu Palinggam
Aneuk Sulotan Kaindran Diwa
Nyang troh langkah keunoe lontuan
Neuyue tanyong ban nibak gata

Keureuna Banta keumeung jak keunoe
Wahe Putroe ubak gata
Seubab tatuka euncien bak tangan
Tasok bak kulam yoh teungeuet Banta

Jinoe Banta meuhat troh keunoe
Pakri jinoe nibak gata
Teuma seuot Tuan Putroe
Tadeungo kamoe he cempala

Pakri geujak Raja nyan keunoe
Lingka meuligoe rakyat meulaksa
Meung hanjeuet neujak rot lam awan
Toh pakri ban keunoe neuteuka

Teuma seuot cempala cut
Deungo he pocut lon calitra
Diu Palinggam adak troh keunoe
Pakri he Putroe nibak gata

Tateurimong he Tuan Putroe
Peugah jinoe sigra-sigra
Seuot Putroe cut Nila Wati
Kayue peureugi keunoe sigra

Meung jeuet jijak bek na soe thee
Deungon eleumee hekeumat donya
Kayue langkah bak troh keunoe
Hajat kamoe keumeung eu rupa

Padum na umu pakri ruman
Diu Palinggam meugah peukasa
'Oh cempala deungo narit meunan
Jipo le yoh nyan keudeh u lua

Sinan jipiyoh di lua meuligoe
Jideungo Putroe jisom bicara
Putroe peugah bak dendayang
Meunoe kalam Putroe Muda

He dendayang ka deungo kamoe
Habaku nyoe bek kabuka
Bek ka peugah bak beurangsoe
Mate kamoe ayah pupana

Teuma seuot uleh dendayang
Ampon laman po jroh rupa
Meung nyo pocut kamoe peugah
Takoh lidah bahle pana

Cempala deungo narit Putroe
Jipo lom jinoe u astana
Jipeujeuet droe teuma keu bambang
Jiteureubang bak tameh geuta

Na sikeujab piyoh sinan
Ka jeuet badan lom keu Raja
Putroe kalon Diu Palinggam
Ka troh keunan ateueh geuta

Yoh nyan Putroe meunyum malee
Tundok ulee ro ie mata
Diu Palinggam neumat bak jaroe
Neupeuduek Putroe ateueh geuta

Wahe adek cut bungong keumang
Ka troh abang ubak gata
Bek adek cut hiram masam
Ulon tapeusan ka troh kuteuka

Peue bicara lon tapeusan
Wahe intan tanglong donya
Wahe adek cut wareuna gumilang
Gasehkan abang he Adekeunda

Peue han tamarit Tuan Putroe
Pakon jinoe ro ie mata
Putroe teueh dalam leumueng
Meurijeuen-rijeuen ro ie mata

Teuma marit Tuan Putroe
Tadeungo kamoe he Kakeunda
Bek Tuanku neupubuet meunoe
Mate kamoe buet Ayahanda

Ampon Tuanku meuribee kali
Beuranggakri hana lon rila
Nyang got Tuanku neujak woe dilee
Dang-dang lon bri thee bak Ayahanda

Diu Palinggam teuma kheun meunoe
Gaseh keu kamoe wahe adekeunda
Bek meunan takheun he nyak puteh
Dilon kugaseh that keu gata

Wahe Adek cut usuinya cantek
Maha bayek dudoe seutia
Rupa tamse uroe teungoh ek
Abang asyek hate keu gata

Pajan adoe lom teuangkok
Pakon suntok tameudakwa
Jeh pat nanggroë nyoe ho ka lon jak
Bak pihak galak adek keu gata

Jen ne nanggroë keunoe lon datang
Bak pihak bimbang hate keu gata
'Oh troh keunoe lom tayue riwang
Pakon he bintang mubalek haba

Phon tayue jak ulon keunoe
Pakon jinoë hana mulia
Dilee mameh jinoë ka masam
Pakon hiram po jroh rupa

Lheueh nyan teuma Tuan Putroe
Neukheun meunoe pantah sigra
Ampon Tuanku meuribee kali
Beuranggakri han lon rila

Nyang get Tuanku neujak woe dilee
Dang-dang lon bri thee bak Ayahanda
'Oh ka idin ayah ngon umi
Bandua si hate suka

Ampon Tuanku meuribee kali
Keu bawah doli lon mohon rila
'Oh ka Tuanku ulon bri thee
Kadang pi mee rijang seumporna

Diu Palinggam neukheun meunoe
Tadeungo kamoe he Adekeunda
Pakon adoe mubalek kalam
Pakon meunan boh keureuna

Phon tayue jak ulon keunoe
'Oh troh sampoe tayue gisa
Masa jioh tayue peutoe
'Oh troh keunoe han mulia

Bek meunan takheun he nyak Putroe
Tayue lon woe han lon gisa
Lon sangka adoe ka meusampe
Jeuet tapangge keunoe lon le gata

Hana lon thee rusak hate
Lheueh tapangge tayue gisa
Lon jak di gampong pangkai tan lon me
Lon jak geumade adoe bak gata

'Oh troh keunoe lon tapake
Bukon that le putoh asa
Gata adek cut han jeuet mat kalam
Lidah meucabang miseue meurua

Idin lon mat bak ujong jaroe
Dilon kujak woe bek putoh asa
Banta beudoh ka neugrak droe
Neukeumeung woe pura-pura

'Oh neudeungo Banta keumeung woe
Beudoh cut Putroe jijak mat Banta
Bek neutren dilee Tuanku ampon
Nyoe baro phon Putroe teutawa

Han jan troh neuk neukeumeung tren
Narit dilon wayang seunda
Sireuta Putroe jikheun meunoe
Nyoe baro phon buka suara

Adalah bicah geulumbang beusa
Kapainya Cina beulayaran
Kalu sunggoh bagi dikata
Badan dan nyawa dapat dibeurikan

Di seubeulah buket kayu mate
Anak pak-iko jangan matekan
Jangan Tuanku bangket beudiri
Nanti dahulu deungo kabakan

Meunan narit Putroe kheun panton
Raya napsu Putroe kheun meuseunda
Jaroe jibeuot meuk ngon neutren
Tuanku ampon bek le neugisa

Bak le gaseh deungon sayang
Keu Putroe intan wahe Raja
Bu sireugam goh lom lon jok
Le siteugok goh lom neurasa

'Oh kalheuh lon jok bu siseun troe
Adak neuwoe lon paban teuma
Bek le neumat ujong jaroe
Tuboh lon nyoe hukom sroepada

Nyawong tuboh milek Tuhan
Gaki tangan hukom meukuta
Raja seuot mameung-mameung
Wahe buleuen cahya mata

He Adekeunda bek meunan takheun.
Ka dua seun lon tayue gisa
Jinoe mameh bunoe keueueng
Pakon teusreueng narit Adekeunda

Wahe Adek cut umpama bungong
Sabet keunong ban kheun gata
Dilon hate that kugalak
Lon meukheundak meung keu gata

Bak pihak adoe dilon galak
Goh troh lon jak tayue gisa
Pakon adoe mubalekkan
Sikarang mameh bagoe manisan

Bunoe tayue woe jinoe tatham
Dilon waham hantroh pinta
Raja neukheun syae nalam
Keunong laram mangat suara

Geulanteue meumbeulah kilat seumeurang
Buket nyang tingi meunjadi arang
Adek ilok laksana bintang
Di hate hampelah tulang

Pakri lon gaseh keu gata adoe
Ban mata uroe baro teupanca
He Putroe cut wareuna intan
Meugeulumbang cahya ie muka

Hate lon that sangat bimbang
Wahe bintang syamsu kama
Peurintah Allah Rabbul Gafu
Langet manyang bintang meutabu

Ayohe Putroe geunaseh beta
Kakeunda hina ayeb dan malu
Tuan Putroe meunyum inseueh
Ka teuka weueh di dalam kalbu

Banta jimat hana jipeulheueh
Putroe that kreueh bulee mata
Tatkala nyan Diu Palinggam
Lam ribaan Putroe Muda

Tuan Putroe meunyum sayang
Weueh jipandang Banta Muda
Seubab narit bunoe krang-ceukang
Narit wayang ka leupah seunda

Tuan Putroe sare kiam
Raja neutham han neubri gisa
Tuanku bek hate amarah
Narit nyang leupah ampon lon pinta

Gaki jaroe nyawong darah
Ulon nyoe sah he meukuta
Jinoe Tuanku neupiyoh sinoe
Sajan kamoe lam astana

Peue nyang hajat jinoe sampoe
Ulon Putroe gata Raja
Bak ulon jalo Tuanku keumudoe
Ho hajat droe po meukuta

Hate nyang saket lon bri ubat
Tuboh keurawat lon bri peunawa
Puleh asoe teuploh urat
Puleh jasad jeueb anggeeta

'Oh neudeungo haba mangat
Cut Banta Ahmad keumeung teutawa
Diu Palinggam mantong jimat
Narit mangat dum asoe kaya

Meung jimarit dumnoe mangat
Banta Ahmad hate suka
Putroe peulheueh teuma jaroe
Teuduek samlakoe ateueh geuta

Teuduek sapat deungon Putroe
Dendayang dua droe khadam lingka
Tamse buleuen jipageue bintang
Meunan-meunan proe umpama

Sukacita ban dua droe
Meuteumeung beusoe ngon meulila
Bandua droe hate teuhah
Meuen dasyah sabe muda

Meukhem-meukhak mubeurakah
Ban dua blah lawan seunda
Ureueng keumawai lingka meuligoe
Hana jitupeue Banta lam kuta

Kureueng sa tujuh ploh sinan gunangan
Sidroe pi tan tupeue basa
Na sikeujab dudoe nibak nyan
Beuot makanan keu Banta Muda

Jipeuduek di nab Diu Palinggam
Dua droe dendayang nyang keurija
Nila Wati pi di sinan
Teuduek sajan deungon Banta

'Oh lheueh jikeubah keunan hidang
Jibeuot tangan ateuh jeumala

Bungong jeumpa di teungoh keubon
Bungong sitawon di teungoh banda
Kureueng meujeulih kamoe duson
Meu'ah ampon po meukuta

Bungong jeumpa di teungoh taman
Wajib beurangjan sitangke dua
Neutungeng geupet pubasah tangan
Makeuen makanan kamoe Indra

Diu Palinggam kheun bak Putroe
Keunoe he adoe makeuen beusama

Teuma seuot Tuan Putroe
Han di kamoe po meukuta
Ka lheueh lon makeuen bunoe uroe
Meunan di kamoe adat nyang ka

Meung han tamakeuen Tuan Putroe
Pinah hidang nyoe keudeh sigra
Hana lon pajoh dilon makanan
Meung kon sajan adoe ngon gata

Keupeue takeubah meung tan ruman
Nibak pasangan hana got basa
Hana leubeh cati makanan
Leubeh ruman gata adekeunda

Bu lon pajoh han jeuet keu asoe
Meung kon na adoe makeuen ngon gata
Keupeue jeuet lon 'uet han jitem tamong
Lale kupandang adoe bak gata

Neudeungo mangat suara samlakoe
Tuan Putroe makeuen sireuta
Diu Palinggam pubasah jaroe
Neujok le Putroe bate suasa

'Oh lheueh neusibu jaroe janjongan
Makeuen sajan deungon Raja
Diu Palinggam Makeuen sinan
Jeuneh makanan peunajoh Raja

'Oh lheueh makeuen geucok hidang
Ranub lam puan geubeuot sigra
Geuboh sajan ngon bee-beewan
Lam ranub nyan bee komkoma

'Oh lheueh neupajoh sireh santapan
Ngon bee-beewan neungui dum na
Sajan dengon Tuan Putroe
Dendayang nam droe sajan sireuta

Ateuh geuta neuduek samlakoe
Dengon Putroe meuseunda-seunda
Hana sidroe nyang na troh pham
Diu Palinggam dalam kuta

Teutap neuduek sajan Putroe
Malam uroe hate suka
Meuseunda-seunda hana padoe
Malam uroe hana reuda

Nyang buet laen hana lon peugah
Malee babah ureueng nyang baca
Miseue pijet jikab ensan
Meung han jimakan keupeue jiwa

Meunankeuh ri bak dali adat
Bak hakikat han tok juga
Tamse manok peurab bak pade
Cuba pike peue jihawa



Teutap sinan Diu Palinggam
Neuduek sajan ngon Putroe Muda
Padum lawet lheueng nibak nyan
Diu Palinggam lakee gisa

Idin gata Tuan Putroe
Lon keumeung woe saweue ayahanda
Teuma seuot Tuan Putroe
Pakri neuwoe po meukuta

Pakon Tuanku neukeumeung woe
Neutinggai kamoe di dalam baya
Meung sipade han lon bri jarak
Meung sitapak han lon bri gisa

Udeb mate pi disinoe
Sajan kamoe lam astana
Peue neutakot Tuanku ampon
Ateuh ulee lon beurang peuc bahya

Bit pi ulon ureueng binoe
Han lon bri sidroe mate meukuta
Teuma seuot Diu Palinggam
Deungo lontuan he Adekeunda

Hana lon woe he bungong keumang
Lon meuwayang sipatah haba
'Oh ka lon jak pane lon woe
Meung goh sampoe hajat pinta

Got deungon jeuheut ulon teurimong
Pakon he bungong lon tinggai gata
Udeb pi sare mate bak sajan
He Putroe intan hate bek goga

'Oh ka lon jak habeh lon pike
Jakalee mate pi lon rila
Masa di nanggroeh ka habeh wajah
Rinyeun lon ludah he Putroe Muda

Han lon minah wahe Putroe
Han lon cre sinoe sajan gata
Adak he Putroe roh dalam prang
Diu Palinggam taeu jigaza

Ensyah Allah ngon tulong Tuhan
Diu Palinggam hana gli geunta
Hana tadeungo he Putroe intan
Diu Palinggam cit meunang saja

Cit dilee kon cit dalam prang
Hana soe lawan Diu ngon Indra
Meunan cit jinoh ngon tulong Tuhan
Adak na prang lon ikot gaza

Bek tatakot syok lam hate
Wahe Putroe Ti sakti raya
Dumnah he Putroe ka lon peugah
Wallah billah hana meuseunda

Ban bak babah meunan bak hate
Adak na pake lon reuloh donya
Habehe narit patah kalam
Diu Palinggam jak lawan seunda

Mangat hate Cut Putroe intan
Ka saheh kalam sumpah seutia
Ban nyang lon kheun hana ubah
Wallah billah mubalek donya

'Oh Putroe deungo haba meunan
That sukaan hana tara
Teuma neumarit Putroe intan
Sipatah kalam neulawan haba

Hana peue syok Putroe lam hate
Bit sajan mate deungon meukuta
He Tuanku Diu Palinggam
Lon jaweueb kalam sumpah meukuta

Di Putroe intan pi mumeunan
Ban sumpahan po meukuta
Udeb bak sigo mate bak sajan
Diu Palinggam ngon Putroe Muda

Suka that hate di Tuan Putroe
Malam ngon uroe peutimang Banta
Na nyum cut gle raya hate
That meusampe dum peukara

Nibak rupa han peue tanyong
Meujeulih keunong mameh rasa
Adak mate dua sajan
Hana sayang lon keu donya

Seubab rindu deungon deundam
Diu Palinggam ureueng mubangsa
Teuma kalam habehe 'oh nan
Padoe ngon intan dalam astana

Laen nibak nyan wallahu 'alam
Peurintah Tuhan wahidolkaha
A M M A B A K D U teuma dudoe
Karangan muwoe Kama 'Alam Diwa

Bak simalam neueh sidroe
Leumah lumpoe saboh rahsia
Na nyum naga teuka lam awan
Jiteureubang ateueh astana

Leugat jijak ubak Putroe
Lam meuligoe jarak hana
Naga jigrueb Tuan Putroe
Nibak jaroe ngon angeeta

Bit pi jigrueb hana sukaran
Putroe intan hana binasa
Meunan rahsia peuleumah Tuhan
Teukeujot sulotan uroe ka faja

'Oh teuingat nyan keulumpoe
Neuleueng jaroe neulakee do'a
Lheueh nyan raja neuhei bujang
Troh le rijang keunan teuka

Peue na sabda Tuanku ampon
Neupange ulon he sroepada
Raja seuot narit bujang
Kakrah rijang nujum peunita

Ulon beuklam lom meulumpoe
Han lon tupeue areutoe makna
'Oh Bujang deungo sabda meunan
Jikrah le yoh nyan nujum peunita

Habeh jitren ulama syiah
Jideelat Khalifah dumjih rata
Sare habeh dum meusapat
Teuma jideelat ubak Raja

Ampon Tuanku doli Khalifah
Ulama syiah habeh ka teuka
Peue na sabda Tuanku ampon
Peugah janjongan lon deungo nyata

Trenkeuh sabda teuma di manyang
Tadeungo lon kheun he peunita
Ulon beuklam leumah lumpoe
Han lon tupeue areutoe makna

Peue neulumpoe Tuanku droe
Neukheun jinoe lon deungo nyata
Ulon lumpoe naga teureubang
Dalam awan teuka di donya

Badan raya hibat peungaroe
Jijak bak Putroe dalam astana
Na nyum jiek laju bak Putroe
Hana sapeue na binasa

Sajan naga jiduek Putroe
Teukeujot kamoe uroe ka faja
Nyankeueh nyang na leumah lumpoe
Cuba jinoe kalon makna

'Oh nujum deungo sabda meunan
Kitab le yoh nyan laju jibuka
'Oh lheueh nyan nujum jimupakat
Pakri mangat he syeedara

Lumpoe raja bek tapeugah
Hana leumah takheun makna
Meung tapeugah meuhat paloe
Sayang Putroe keunong bahya

Yoh nyan mupakat ulama ngon syiah
Han jipeugah lumpoe raja
Ampon Tuanku meuribee kali
Hana takbi lumpoe meukuta

Hana leumah lam buseutan
Po janjongan hana makna
'Oh raja deungo haba meunan
Amarah yoh nyan Raja raya

Wahe nujum jinoe ka peugah
Nyata ngon salah peugah sigra
Soe nyang mawot bah that mate
Bah that reule peue nyang suka

Meuhan tapeugah makna lumpoe
Kukoh takue gata dum na
Teuma seuot ahlon nujum
Meu'ah ampon po meukuta

Meunoe leumah dalam lumpoe
Takbi Putroe ka binasa
Makna naga teuka ureueng
Ret lam awan po meukuta

'Oh raja deungo narit meunan
Amarah yoh nyan Raja raya
Yoh nyan raja neuhei meutroe
Dum sinaroe geusyk panglima

Neuyue tamong lam kuta Putroe
Rakyat sinaroe habeh teuka
'Oh neukalon uleh Putroe
Neupeugah jinoe bak Raja Muda

Ampon Tuanku pakri jinoe
Rakyat sinaroe lon eu teuka
Saleh ka neutupeue buet nyoe le ayah
Rakyat ka neukrah meuribee laksa

Jinoe Tuanku neujak riwang
Yoh goh jitamong rakyat meulaksa
'Oh ka malam neuwoe keunoe
'Oh ka uroe neujak u lua

Pakri tayue woe lon he adoe
Rakyat meukatoe lingka kuta
Masa dilee lon keumeung woe
Takheun kamoe han seutia

Jinoe pakri wahe intan
Tohkeuh padan rot tadaya
Jinoe adoe han le lon woe
Bahle sinoe sajan gata

Udep mate pi di sinoe
Lam meuligoe deungon gata
Tapi meung lon bah mate sidroe
Gata adoe han lon bri binasa

Teuma seuot tuan Putroe
Ampon kamoe po meukuta
Tanda lon gaseh ngon lon sayang
Lon yue jak riwang yoh goh binasa

Meung ka binasa Tuanku sidroe
Hana sapeue le meuguna
Bek cit neuwoe troh u nanggroe
Neuteubiet jinoe u lua kuta

'Oh ka malam keunoe neuriwang
Taeh sajan lam astana
Keureuna ulon ureueng binoe
Lon peurunoe han tapeucaya

Seuot Banta he nyak Putroe
Bek he adoe tayue gisa
Hana lon takot keu le angkatan
Ulon lawan tandra Raja

Meung ka bak mon han jeuet bak krueng
'Oh ka bak rimueng han jeuet bak buya
Meung ka uroe nyoe han jeuet bak singoh
Han lon jinoh takot keu Raja

Meung na idin po lon Tuhan
Diu Palinggam agam sibeuna
Cit ka dilee habeh janji
Ngon Putroe Tilam astana

Hana jituri Diu Palinggam
Aneuk sulotan Raja 'Ala
Tamse lintah jikab ensan
Adak sikhian pi mantong jiwa

Meunankeuh di lon he adek intan
Ulon Tuan hana gli geunta
Han lon takot beuranggasoe
Wahe putroe meung na gata

Sireuta panton le di babah
Meunoe ulah Banta kata

Bak peulangan di bineh sawang
Boh keutapang aneuk luntie ba
Meung bek mate bak cabeueng leukang
Kamoe meudagang keu umpeuen tunda

Deumi Allah han le lon riwang
Meung hana seunang gata Adekeunda

Nila Wati deungo haba meunan
Yoh masa nyan ubah ie muka
Teuma marit Tuan Putroe
Pakri jinoe neulawan gaza

Digob rakyat meuribee katoe
Udeh geutanyoe tajak u lua
Adak kakeunda neukeumeung muprang
Keudeh u padang ta peudong kuta

Diu Palinggam deungo narit Putroe
Neucok jinoe saboh keumala
Neupeulob Putroe dalam cumboi nyan
Ngon dendayang sajan dua

Teuma neuboh lam ikat pingang
Neupeujeuet badan keu cempala
Leugat jipo u teungoh mideuen
Jidong bak cabeueng kayee suasa

Raja yue bujang ek u meuligoe
Jiek jinoe pantah sigra
'Oh sare troh lam meuligoe
Han le Putroe lam astana

Habeh jieu jeueb-jeueb teumpat
Jitren leugat keudeh bak Raja
Troh bak Raja teuma jipeugah
Poteu dasyah hireuen bicara

Diu Palinggam troh u padang
Rupa ka ban miseue nyang ka
Neusuet euncien neutiek u bumoe
Jeuet le jinoe kuta raya

Nibak dada neuteupok jaroe
Teubiet cumboi lam anggeeta
Neubuka tutop teuma rijang
Tujoh reutoh rakan sinan keulua

Rakan tujoh reutoh mohon ampon
Ho meusuron kamoe dum na
Teuma seuot Diu Palinggam
Lon keumeung lawan sigala Raja

Kama 'Alam Diwa lon keumeung lawan
Jinoe he rakan piyoh sigra
Teutap di mideuen Diu Palinggam
Muwoe habaran keu rakyat dum na

Jikalon kuta di teungoh padang
Jipeugah yoh nyan ubak Raja
Ampon Tuanku meuribee ampon
Di teungoh mideuen ka teudong kuta

Ngon astana teudong sajan
Pakri padan po meukuta
Teuma seuot baginda sulotan
Tadeungo lontuan he panglima

Jinoe tateubiet dum u mideuen
Tajak keupong lingka kuta
Bek tabri lheueh jisurot
Tajak pagab ban siseun lingka

Takrah rakyat dum sibarang
Uleebalang bak habeh teuka
'Oh jideungo sabda sulotan
Jikrah yoh nyan rakyat dum na

Habeh meuhimpon sigala rakyat
Jiteubiet leugat u mideuen Raja
Leugat jijak u teungoh mideuen
Diu Palinggam kalon rupa

Lheueh nyan neukheun teuma bak rakan
Teubiet u mideuen wahe syeedara
Tajak lawan rakyat mideuen
Le that ureueng lon eu rupa

Cahya Indra deungo sabda meunan
Jiteubiet u mideuen sigra-sigra
Tujoh reutoh rakan Diu Palinggam
Teubiet yoh nyan jak lawan tandra

Sideh pi jiek sinoe pi jijak
Yoh nyan meurumpok dua tandra
Taeu jimuprang di teungoh mideuen
Suara peudeueng miseue taga

Leungo bumoe meuguncang alam
Meurumpok lawan ureueng lam hawa
Ureueng Indra ngon ureueng bumoe
Prang han bagoe ngon umpama

Teuma jiplueng sidroe ureueng
Leugat jitamong dalam kuta
Troh bak raja teuma jipeugah
Ampon di bawah doli sroepada

Rame that prang Tuanku di mideuen
Le that ureueng po meukuta
Le that lawan teuka keunoe
Aneuk raja nyoe sakti raya

'Oh Raja deungo narit meunan
Amarah yoh nyan Raja raya
Teuma neuyue krah raja nyang taklok
Dum habeh trok keunan teuka

Raja nyang taklok teuma masok prang
Meurumpok lawan dum na tandra
Yoh nyan ka prang sabong meunyabong
Bireng ngon seudong meuseunoh bisa

Deumpek ngon surak meutaga that
Jilumpat-lumpat nyang biek panglima
Maseng-maseng meurumpok lawan
Di teungoh midan jeuet prang raya

Ureueng Indra that beurani
Siribee mate jiek meulaksa
Tujoh blah uroe tujoh blah malam
Hana reunggang sikutika

Di teungoh mideuen meungadu sakti
Cit hana gli deungon geunta
Sare geunab lapan blah uroe
Tadeungo jinoo ulon calitra

Cahya Kaindran that amarah
Neujak u teungoh tandra Raja
Sireuta neudumpek bumoe meuguncang
Langet meulinggang bumoe meugeunta

Langet meuguncang bumoe meugob-gob
Yoh nyan teukeujot tandra Raja
Habej jiplueng dalam gunung
Peusiblah nyawong teumakot raya

Yoh masa nyan ka peungeuh mideun
Cahya Kaindran teuma neugisa
Troh lam kuta bak Diu Palinggam
Teuma neutanyong pantah sigra

Pakon rijang lon eu tariwang
Soe talo prang he syeedara
Teuma seuot Cahya Kaindran
Neudeungo lontuan he po meukuta

Han le lon lawan Tuanku di mideuen
Ka talo prang rakyat Raja
Jinoe Tuanku pakri geutanyoe
Ngon Raja nyoe dalam kuta

Teuma seuot Diu Palinggam
Jinoe he rakan na bicara
Jinoe tajak gata u dalam
Bak sulotan Buket Miga

Tajak tanyong sipatah kalam
Kalu idin lon keumeung gisa
Lon ba sajan deungon Putroe
Lon keumeung woe nanggroe ayahanda

Adak han idin lon ba Putroe
Yue teubiet keunoe syiah meung tiga
'Oh lheueh neuwasiet uleh sulotan
Cahya Kaindran jak le sigra

Diu Perkasa nyang jak sajan
Rot lam awan troh lam kuta
Kama 'Alam Diwa yoh masa nyan
Teungoh seumanyam bak singgasana

Jihadap le meuntroe uleebalang
Adi ngon juhan meuribee laksa
Cahya Kaindran ka troh keunan
U hadapan Kama 'Alam Diwa

Diu Perkasa pi ka sajan
Neudong yoh nyan di nab Raja
Rupa hibat hana lawan
Baginda sulotan hana haba

Seubab neukalon rupa that hibat
Baginda halarat teumakot raya
Teuma marit Cahya Kaindran
Jinarit ngon Kama 'Alam Diwa

Ampon Tuanku Sri Kayangan
Ampon laman po meukuta
Kamoe suroh Diu Palinggam
Neuyue jak tanyong bak poteu Raja

Keureuna Putroe aneuk janjongan
Pakri padan nibak sroepada
Diu Palinggam neukeumeung woe
Keudeh u nanggroe Indra Diwa

Adak Tuanku bri deungon mangat
Neuyue teubiet kali sigra
Adak han neubri teubiet jak muprang
Diu Palinggam di mideuen raya

Rakyat nyang laen hana peue neupreh
Bandum habeh plueng lam rimba
Jinoe nyang get peunikah Putroe
Adak han jinoe lon reuloh kuta

'Oh Raja deungo narit utosan
Hireuen sulotan hana haba
Teuma seuot Baginda Sulotan
Tadeungo lontuan he Panglima

Soe po aneuk Diu Palinggam
Peugah rijang he syeedara
Teuma seuot Cahya Kaindran
Neudeungo lon keheun po meukuta

Diu Palinggam beuneuturi
Muda Sakti nama ayahnya
Kaindran Diu teumpat keurajeuen
Hana lawan sakti raya

Kama 'Alam Diwa deungo haba meunan
Teuma neukheun bak panglima
Pakon meunan buet Diu Palinggam
Bak ulontuan hana troh haba

Adak jipeurab dilee bak kamoe
Han roh meunoe haro-hara
Meuhat lon tueng cit ngon mangat
Han mate rakyat meuribee laksa

Jinoe peue jeuet lom buet ka leupah
Lon paban bah he panglima
Jinoe tajak gata u mideuen
Lon bri ureueng sidroe dua

Tajak cok keunoe dilee sulotan
Bak sajan-sajan deungon gata
Teuma lheueh nyan tuan Putroe
Mangat kamoe meukeurija

Tajak tueng ngon Diu Palinggam
Tayue tamong keunoe lanja
Mangat lon bri jinoe Putroe
Mangat sampoe ban nyang pinta

'Oh lheueh sabda nibak sulotan
Teubiet u midan pahlawan dua
Sajan deungon meuntroe uleebalang
Neuyue jak sajan uleh Raja

Leugat jiteubiet u teungoh midan
Jijak yoh nyan troh bak Raja
Diu Peukasa neutamong u dalam
Sireuta sajan uleebalang Raja

Troh lam kuta uleebalang meuntroe
Dum sinaroe seumbah Banta
Meuntroe kalon Diu Palinggam
Hana lawan indah that rupa

Cahya Kaindran teuma peugah
Ban nyang titah Kama 'Alam Diwa
Diu Palinggam deungo haba meunan
Tabri bak tangan Diu Peukasa

'Oh lheueh neubri cumboi manikam
Teubiet yoh nyan sajan ngon tandra
Diu Peukasa meuntroe uleebalang
Leugat jiriwang bak Kama 'Alam Diwa

Troh bak kuta tamong rijang
Ubak sulotan Kama 'Alam Diwa
Diu Peukasa buka hekeumat
Teubiet cut'nyak lam keumala

Nila Wati kalon ayah
Yoh nyan dasyah Putroe Muda
Neusangka han le Diu Palinggam
Han neuthee pulang ngon mangat saja

Sangka cut Putroe ka talo prang
Diu Palinggam sangka ka pana
Teutap Putroe dalam meuligoe
Meuhei meuntroe pantah sigra

Neuyue jak tueng Diu Palinggam
Uleebalang jijak sigra
Diu Peukasa ngon Cahya Kaindran
Teutap sinan bak bale raksa

Uleebalang meuntroe teubiet u padang
Bak Diu Palinggam jijak lanja
Diu Palinggam kalon u mideuen
Le that ureueng teubiet lam kuta

Diu neutren lam meuligoe
Neuteubiet jinoe u mideuen raya
Sajan rakan dum sinaroe
Teubiet jinoe sama-sama

Diu Palinggam neucok euncien
Di teungoh mideuen han le kuta
Banta piyoh di teungoh mideuen
Troh le keunan meuntroe teuka

'Oh sare troh jiseumbah bak gaki
Bandum sare uleebalang Raja
Teuma marit meuntroe Peureudan
Ampon laman po meukuta

Sabda nibak Kama 'Alam
Neuyue tamong Tuanku lam kuta
Bak jinoe le bek that lambat
Ampon halarat doli sroepada

Diu Palinggam deungo narit meunan
Neutamong yoh nyan leugat lam kuta
Sajan rakyat dum sinaroe
Troh le sampoe bak pinto kuta

'Oh sare troh bak pinto dalam
Lheueh le meuriam seun silaksa
Diu ka troh u teungoh leuen
Geupeuek yoh nyan u bale raksa

Rakyat tujoh reutoh pi geubri teumpat
Maseng babat adat donya
Kama 'Alam Diwa kalon Diu Palinggam
Hana lawan samlakoe rupa

Patot judo ngon Putroe Mambang
Meung bangsa nyan indah rupa
'Oh lheueh nibak nyan Raja hei kali
Syiah lagi ngon ulama

'Oh troh kali deungon syiah
Raja wakilah sigra-sigra
'Oh lheueh nyan teuma kali peunikah
Hukom Allah ka seumporeuna

Lheueh nibak nyan geupeuk linto
Bak dara baro u astana
Dum na rakyat keunan tahe
Jingieng linto indah rupa

Geupeuduek sajan teuma ngon Putroe
Mata laloe inong dum na
Sinan rame ureueng binoe
Sajan Putroe lam astana

'Oh lheueh nibak nyan geubet hidang
Di hadapan Banta Muda
Beudoh dendayang buka hidangan
Makeuen santapan sigra-sigra

Ban nyang adat meujeulih reusam
Ban lakuan adat donya
Teutap sinan lam meuligoe
Sajan Putroe meusuka-suka

Jula malam lam keuleumbu
Banta beuradu lam keubon bunga
Teutap sinan Diu Palinggam
Ngon Putroe intan meusuka-suka

Tujoh reutoh rakan neuyue woe bak teumpat
Dalam hekeumat Banta Muda
Teutap sinan Diu Palinggam
Laen karangan lon calitra

Haba lon nyoe meuriwang-riwang
Nak mangat seunang bak lon cok punca
A L K I S A H laen karangan
jinoe meuriwang haba nyang ka

Jinoe lon kisah Raja DIU
Neudeungo teungku dum na gata
Raja neuduek lam meuligoe
Sajan cut Putroe Rante Indra

Sithon Geulima sinan sajan
That sukaan hana tara
Padum lawet teuma dudoe
Hame Putroe peurumoh Raja

Banta suka uroe dan malam
Hate sukaan di dalam dada
'Oh troh bak hat buleuen sampoe
Manyak jinoe pandang donya

Aneuk agam rupa that cidah
Han le sosah hate Raja
Lhee buleuen umu geurasi nan
BANTA BUDIMAN lila peukasa

Raja Muda lheueh geurasi
geutet beude hana reuda
Raja Diu bak siuroe
Marit ngon Putroe Rante Indra

Idin gata Tuan Putroe
Siat lon woe gampong donya
Lon jak saweue bunda ngon ayah
Troh lon langkah keunoe lon gisa

'Oh Putroe deungo narit meunan
Teuma neukheun meunoe haba
Meunyo Tuanku neutren u bumoe
Neuba kamoe sajan sireuta

Han jeuet lon ba gata nyak Putroe
Uroe dudoe lon jak tueng gata
'Oh Putroe deungo haba meunan
Han le jitham Raja bungka

Bak Sithon Geulima pi ka neupeugah
Neubeudoh pantah neutren lanja
Hana rakan pi meung sidroe
Neutren jinoe leugat u donya

Ateueh geureuda Raja pasang
Troh u padang nanggroe raya
Di teungoh padang saboh taman
Teumpat mayenan aneuk Raja

Aneuk raja ureueng binoe
Nama Putroe KEUMALA INDRA
Nama ayahnya INDRA PEULIMBANG
Putroe bak kulam teungoh meuupa

Rupa sambinoe ban buleuen trang
Soe nyang pandang hate gila
Raja Diu tren u bumoe
Neucok jinoe hekeumat donya

Neuisyarat nibak kulam
Ka jeuet ikan bak kulam tahta
Yoh nyan jieu uleh Putroe
Jitham jinoe kawan kadra

Lale Putroe teungoh manoe
Malam uroe troh an sinja
Banta cok le siwah hekeumat
Neusrom leugat dalam hawa

Peungeuh nanggroe ngon cahya nyan
Uroe ka malam ka jeuet keu luha
Banta piyoh di teungoh mideuen
Neutatang euncien jeuet bale raksa

Keumala hekeumat han le di manyang
Seupot padang malam ka jula
Banta bak bale tamong le leugat
Deungon siat jeuet peulita

Putroe kalon hana le uroe
Neuteungoh jinoe pantah sigra
'Oh neukalon seupot uroe
Neujak jinoe neukeumeung gisa

Leumah peulita sinan saboh
Neupeurab pantah jak le lanja
Neukeumeung woe u meuligoe
Han leumah sapeue seupot donya

Neujak laju teuma bak bale
Leumah neuueu ureueng muda
Rupa indah hana bagoe
Tuan Putroe kalon rupa

Putroe teudong di leuen bale
Teungoh pike ngon bicara
Pakri bicara he dendayang
Tajak rijang u astana

Teuma seuot sidroe dendayang
Tuanku malam that ka jula
Jinoe bahle neuk u bale
Neujak meuturi ngon ureueng muda

'Oh Putroe deungo haba meunan
Neuk le yoh nyan u bale raksa
Leumah neukalon le samlakoe
Hana bagoe hate suka

Banta beudoh nibak beuradu
Putroe tahe hana haba
Banta marit teuma ngon Putroe
Peurab he adoe keunoe lanja

Ulon untong ban timon bruek
Teungoh lon duek teuka gata
Padum lawet lon beujalan
Baro intan meuteumeung gata

Peurab keunoe Putroe sambinoe
Deungon kamoe bek malee mata
Ulon Raja gata Putroe
Peurab keunoe taeh dua

Teuma seuot Tuan Putroe
Tadeungo kamoe po meukuta
Adak na gaseh keu ulon sidroe
Taintat kamoe u astana

Seuot Banta neukheun meunoe
Piyoh sinoe he adekeunda
Singoh beungoh teubiet uroe
Mangat tawoe lam astana

Bak malam nyoe piyoh sinoe
Sajan kamoe he adekeunda
Keureuna ulon ureueng meudagang
Hantom he intan lon jak bak kuta

Hana lon tupat pinto dalam
Hana lon tuban ureueng lam kuta
'Oh Putroe deungo haba meunan
Putroe intan marit ngon Raja

Bek meugundah Tuanku ampon
Neujak sajan lon lam astana
Adak neupiyoh deungon kamoe
U meuligoe dalam kuta

Bek di sinoe di teungoh padang
Hana get bangon gob eu rupa
Adak tajak lam meuligoe
Na ban Putroe aneuk Raja

Hana gob kheun meudeh meunoe
Udeh jinoe lam astana
'Oh Raja deungo haba Putroe
Muda samlakoe hana dawa

Neucok euncien neutatang hekeumat
Deungon siat ka jeuet geureuda
Banta pasang sajan ngon Putroe
U meuligoe jipo lanja

Sireuta sajan ngon dendayang
Troh beujalan ateueh astana
Putroe neuk u meuligoe
Ngon samlakoe sajan sireuta

Sinan neupiyoh sajan Putroe
Dendayang tujuh droe sajan sireuta
Teutap sinan Raja ngon Putroe
Lam meuligoe meusuka-suka

Bandum dendayang suka galak
Meukhem-meukhak hana reuda
Padum lawet Banta sinan
Sidroe pi tan thee rahsia

Nibak siuroe teukeudi Tuhan
Meuthee le yoh nyan ubak Raja
Sidroe gunangan kureueng keuji
Saket hate le Putroe Muda

Jitren bak Raja jijak peugah
Narit jisah ngon rahsia
Ampon Tuanku seumbah laman
Meuah janjongan barang deusya

Ulon kalon ureueng lakoe
Sajan Putroe lam keubon bunga
Rupa indah hana bagoe
Muda samlakoe indah that rupa

'Oh ban neudeungo haba meunan
Amarah le yoh nyan Raja Raya
Neucok peudeueng le u jaroe
Neuek le jinoe lam astana

Meuthee haba ubak Putroe
Jipeugah proe teuma bak Banta
Pakri bicara Tuanku jinoe
Ayah uroe nyoe keunoe teuka

Saleh soe peuthee ubak ayah
Pakri na ilah ngon bicara
Teuma marit muda samlakoe
Udeh geutanyoe tajak u lua

Seuot teuma Tuan Putroe
Tuanku jinoe jak u dehta
Banta tatang euncien malakat
Deungon siat jeuet geureuda

Ateueh geureuda Banta ngon Putroe
Sajan dua droe teubiet lam kuta
Ngon dendayang pi na tujoh droe
Sajan Putroe jijak sama

'Oh sare troh u teungoh mideuen
Yoh nyan neutren Raja Muda
Masa neutiek euncien u bumoe
Jeuet le jinoe saboh kuta

Dalam kuta saboh meuligoe
Teumpat duck Putroe deungon Raja
Putroe tamong teuma u dalam
Neuek le yoh nyan u astana

Teutap di mideuen Banta ngon Putroe
Raja jinoe ek astana
'Oh sare troh lam meuligoe
Neueu jinoe Putroe ka hana

Teuma neukalon u teungoh padang
Leupah that manyang meuligoe ngon kuta
Raja tahe hireuen laloe
Neutren le jinoe pantah sigra

Neupangge meuntroe teuma ngon bujang
Neutanyong padan ngon bicara
Pakri bicara wahe meuntroe
Aneuk lon Putroe ka binasa

Jeh ho jinoe u teungoh padang
Saleh pat datang aneuk Raja
Jinoe tateubiet gata u padang
Talakee pulang Putroe Muda

Mangat tabri deungon mangat
Cuba sasat uleh gata
'Oh meuntroe deungo haba meunan
Neujak yoh nyan u mideuen Raja

Troh bak kuta teuma neutanyong
Soe na ureueng dalam kuta
Soe lam kuta peue sulotan
Siri makam teumpat teu Raja

Teuma seuot Banta Budiman
Deungo lontuan he syeedara
Kamoe he bujang na taturi
Ayahanda geurasi Kaindran Diwa

Nama ulon Banta Budiman
Beuta tuban he peudana
Jinoe ka troh ulon keunoe
Saleuem kamoe teuma keu Raja

Putroe Keumala han lon bri tapuwoe
Peugah he meuntroe bak poteu Raja
Meung goh meunikah lon ngon Putroe
Nibak uroe nyoe han lon bri taba

'Oh lheuëh menikah lon bri tapuwoe
Meuhan he meuntroe han lon bri taba
'Oh ban jideungo sabda meunan
Jiwoe le yoh nyan ubak Raja

Troh bak Raja teuma jipeugah
Ampon di bawah doli meukuta
Ka lon tanyong Raja di mideuen
Aneuk Sulotan Kaindran Diwa

Nyankeuh aneuk Raja Usuli
Nyang boh mupeuti geutanyoe dum na
Jinoe Tuanku saleuem keunoe
Neuyue teubiet jinoe kali ulama

Neuyue peunikah deungon Putroe
Teuma dudoe geuba woe lam kuta
'Oh Raja deungo narit meunan
Han le kalam Raja Raya

Seubab aneuk Baginda Sulotan
Patot lontuan jipeuhamba
'Oh lheuëh nyan neuhei lhee droe syiah
Neuyue peunikah Putroe Muda

Teuma teubiet lhee droe syiah
Troh le langkah ubak Raja
Dalam kuta jitamong leugat
Teuma jideelat ubak Raja

'Oh lheuëh nyan teuma kali peunikah
Hukom Allah ka seumporeuna
Banta bri Putroe teuma bak syiah
'Oh lheuëh nikah neuyue gisa

Kali puwoe teuma ngon Putroe
Troh le jinoe nibak Raja
'Oh lheuëh nyan Raja kheun bak ureueng
Geuyue jak tueng aneuk Raja

'Oh meuntroe deungo sabda meunan
Jijak le rijang troh bak kuta
'Oh ban sare troh jitamong leugat
Teuma jideelat ubak Banta

Teuma jipeugah sabda Sulotan
Banta Budiman hana dawa
Neuteubiet lam kuta euncien neutatang
Kuta hilang han le nyata

Banta neujak sajan bujang
Troh u dalam tamong bak Raja
Lheueh nyan neupeuduek ateueh bale
Rakyat rame keunan mata

Soe nyang kalon mata laloe
Hana sidroe bandeng rupa
'Oh ka teuka malam uroe
Muda samlakoe woe u astana

Banta teutap deungon Putroe
Lam meuligoe meuseunda-seunda
Beungoh uroe troh bak taman
'Oh ka malam bak Putroe Muda

Pocut Banta hukom nanggroe
Sajan Putroe Raja Muda
Pocut Banta teutap sinan
Laen karangan ulon calitra

AJAYEB SUBHANALLAH
Deungo lon kisah laen calitra
Raja keucek jinoe lon kisah
Neuduek dasyah sajan poma

Tujoh thon umu muda samlakoe
Neuhukom nanggroe badai ayahanda
Meusyeuhu nama jeueb-jeueb teumpat
Hukom ade that Raja Muda

Rupa pi jroh tangan murah
Rakyat barollah hate suka
Sithon Geulima ngon Putroe Rante
Galak hate hana tara

Umu siploh thon neukeurajeuen
Goh lom meukawen Raja Muda
Hana meuteumeung nyang sambinoe
Dalam nanggroe Diu Indra

Teuduek haba Raja keucek
Jinoe lon balek Mambang Raja
JUHAN 'ALAM neuduek di nanggroe
Sajan Putroe esteurinya

Padum lawet lheueh nibak nyan
Raja Mambang aneuk na dua
Bandua droe ureueng binoe
Rupa bagoe bintang kala

Nyang aneuk phon SAMINGUN JUHARI
Rupa mise buleuen purnama
Teuma nyang adoe CAHYA NURANI
Hana tamse ngon umpama

Trang-geumilang indah sangat
Meukilat-kilat cahya muka
Ban bintang timu meuacak-acak
Beurangsoe galak jieu rupa

Ilok parah hana bagoe
Miseue uroe baro keulua
Soe nyang kalon mata laloe
Hana sidroe bandeng rupa

Juhan 'Alam Putroe that meusyen
Keumeung peukawen ngon Raja Muda
Teuma neupeugot saboh surat
Neuboh narit meunoe haba

Seumbah dan saleuem sireuta takzem
Surat lon kirem keu po meukuta
Wahe Raja nanggroë Dui
Ampon Tuanku doli sroepada

Nibak ulon na bungong lam karang
Teungoh keumang sitangke dua
Hajat ulon sijati-jati
Lon keumeung bri keu sroepada

Toh nyang galak nibak janjongan
Harap lontuan simata-mata
'Oh lheueh jisurat teuma jilipat
Jiyue jak intat pantah sigra

Bujang teubiet jijak leugat
Jime surat troh bak Raja
Bak Raja Muda jibri surat
Neubri teupat keu ureueng teuka

Lheueh nibak nyan neuyue bri makanan
Neubuka kireman le Raja Muda
'Oh neukalon haba lam surat
Hate mangat hana tara

Lheueh nyan teuma neubalah surat
Neuboh narit mangat haba
Wahe Raja paduka sulotan
Ateueh lontuan saleuem meukuta

Tuanku keubah sidroe Putroe
Tinggai nyang adoe wahe Raja
Nyang aduen nyan neupeukawen
Ngon raja laen toh nyang suka

Dudoe he Raja cit lon datang
Tinggai cut bintang harap simata
Meunankeueh haba di dalam surat
Neuyue jak intat le sigra-sigra

Bak bujang Mambang neupeujok surat
Jiwoe le leugat ubak Raja
Troh bak Raja jibri surat
Neuploh leugat le neubaca

'Oh ban neudeungo haba lam surat
Hate mangat hana tara
Mangat hate Raja Mambang
Putroe bintang jikeubah keu Raja

Putroe neuduek lam meuligoe
Dendayang siploh droe sajan sireuta
Treb-treb siseun jitren u bumoe
Jijak manoe u teungoh rimba

Bak siuroe Tuan Putroe
Neujak manoe u gampong donya
Cahya Nurani ngon peukayan
Ban lakuan aneuk Raja

Jisok gleueng meuh kaki jaroe
Di asoe bajee meudokma
Rupa indah hana bagoe
Beuranggasoe jiteuka hawa

Jisok subang mata intan
Di tangan euncien meugeunta
Rupa that jroh hana lawan
Dum na ensan hate gila

Sare habeh jingui peukayan
Miseue intan cahya muka
'Oh sare roh ngon patam dhoe
Tiwah uroe teungoh keulua

'Oh lheueh jingui dum peukayan
Putroe intan tren u donya
Dua Putroe seudang-seudang
Siploh dendayang muda-muda

Putroe jitreu leugat u leuen
Miseue bayeuu meuen dua
Deungon ija' ka jisawak
Leugat jijak adoe ngon a

Jareueng-jareueng jicok tapak
Miseue burak woe u rimba
Jicok langkah jareueng-jareueng
Meukeuting gleueng miseue geunta

'Oh jitiek jaroe ulee meulinggang
Meukilat subang meuhambo cahya
Soe nyang kalon akai hilang
'Oh ka tapandang han pu weh mata

Meukeuting gleueng meukilat subang
Miseue bintang blet-blot cahya
Ureueng muda hate bimbang
Akai hilang pungo gila

Putroe jijak langkah meualeh
'Oh jitaleh meuhambo cahya
Leupah di leuen tren lam jurong
Keumang payong ateuch keupala

Leupah jurong sampoe u blang
Jipoh linggang hana reuda
Jitiek lengiek jipoh linggang
Putroe seudang teungoh muda

Rupa jroh that na miseue bintang
Hate girang aneuk miet muda
Leupah siseun Putroe jijak
Hingga troh bak pinta donya

Sinan piyoh dilee siat
Miseue adat dilee nyang ka
Teuduek siat haba Putroe
Laen adoe lon calitra

A L K I S A H wahe rakan
Na sidroe sulotan ateuh donya
Nama nanggroe PEUTAWI BIRAM
Nama Sulotan Kayuzi Raja

Nyankeuh Raja nyang that pahlawan
Raya saktian hana tara
Bak siuroe Baginda Sulotan
Neupeugot geulayang deungong suasa

Teuma neupeuek deungon rakan
Di teungoh padang jiek lanja
Jimeusu deungong that meukeumbang
Nyan di manyang dalam hawa


Putroe Rante tren u bumoe
Leumah bak Putroe geulayang raya
Samingun Juhari kalon geulayang
Jipeurab keunan pantah sigra

Jireuet taloe jipeutren bak kulam
Putroe lam awan tren u donya
Troh bak kulam piyoh siat
Duek bak teumpat dilee nyang ka

'Oh tho reuoh peuhah peukayan
Tamuek bak kulam Putroe Muda
Putroe Indra manoe bak kulam
Le that macam meuria-ria

Jikasyuk ie meugeulumbang
Miseue geundrang meusuara
Jikasyuk ie jareueng-jareueng
Miseue ureueng peh reubana

Lale Putroe dalam kulam
Sulotan Biram lon calitra
'Oh ban jikalon hana le geulayang
Teungoh jipandang gadoh di mata



Leugat jijak seutot lam uteuen
Sajan rakan dua tiga
Siteungoh rot teuma troh jijak
Sinan meurumpok panglima kra

Lanta Waila raja eungkong
Meuteumeung sinan dalam rimba
'Oh jikalon Raja beurangkat
Ka jiseutot sigra-sigra

Sulotan Biram hate suka that
Meuteumeung sabat raja rimba
Neujak leugat hana piyoh
Taeu neubloh dalam rimba

Karab sampoe bineh kulam
Putroe intan lon calitra
Cahya Nurani kheun sipatah
Udeh tateungoh wahe cutda

Bek le cutda sinoe tamanoe
Udeh tawoe nanggroe Indra
Keureuna riä that geutanyoe bunoe
Meuhat jinoe meuteumeung bahya

Teuma seuot Samingun Juhari
Pakon he nyak Ti teumakot gata
Meung nyoe han ek le tamanoe
Teungoh jinoe dilee gata

Keudeh adoe piyoh yub kayee
Sinan dilee dudoe tagisa
Cahya Nurani deungo narit meunan
Jiteungoh le yoh nyan Putroe Muda

Lhee droe dendayang teungoh sajan
Salen peukayan bak anggeeta
'Oh lheueh jingui dum peukayan
Piyoh sinan Putroe Muda

Na sikeu jab sinan Putroe
Troh le k eunoe teuma Raja
Jideungo : suara ureueng kiam
Jipeurab k eunan pantah sigra

'Oh ban leu mah jieu Putroe
Teuduek lhe se droe yub kayee raya
Putroe kalor, i Raja datang
Jiteureubang cong kayee raya

Samingun Juh ari tinggai bak kulam
Neucok peuka, yan ulah Raja
Neucok ija deu ngon bajee
Hana jithee le P utroe Muda

Neukalon rupa la ng-geumilang
Miseue intan cahya muka
Putroe teungoh rijang-rijang
Neulakee pulang b ajee ija

Ampon Tuanku meukuta patek
Neupulang keu adek bajee ija
Lon keumeung woe nanggroe lam awan
Bek janjongan neumeuseunda

Teuma seuot Sulot an Peutawi
Deungo he nyak Ti narit kakeunda
Pakon gata nyak got that girang
Tacok geulayang keunoe taba

Jinoe ija han le lon pulang
Udeh he bintang tajak bak hamba
Keudeh u nanggroe Peutawi Biram
Nibak makam teumpat lon Raja

Teuma seuot Tuan Putroe
Han dikamoe po meukuta
Adak siseun nyoe idin lon woe
Bek le jinoe tameuseunda

Adak takeumeung meukawen ngon kamoe
Tajak u nanggroe bak ayahanda
Bek pneumat lon bak ija manoe
Ayeb kamoe ateueh donya

Cahya Nurani jikalon meunan
Jitren le, yoh nyan lom u donya
Jipeuhah muka Cahya Nurani
Biram Peutawi kalon rupa

Reubah pangsang di teungoh mideuen
Seubab jikalon cahya muka
Cahya Nurani teuma dong sinan
Habeh pangsang rakan Raja

Samingun Juhari keumeung cok peukayan
Tajo yoh nyan Lanta Waila
Jimat bak badan Samingun Juhari
Cahya Nurani marit ngon cutda

Nyoe he cutda lon maha woe
Gata bunoe tameudawa
Balah ria gata bunoe
Peunyum jinoe meuteumeung bahya

Balah takhem meuhah tamoe
Meunan cutda droe kheun ureueng tuha
Samingun Juhari teuma kheun meunoe
Jak gata woe adoe digata

Takheun bak ayah lon ka jitham
Le Raja Ensan sajan ngon kra
Takheun saleuem bak judo adoe
Yue jak tueng kamoe di tanoh donya

Cahya Nurani deungo haba meunan
Weuehjih yoh nyan he syeedara
Teuma jinoe Cahya Nurani
Samingun Juhari manoe ie mata

Cahya nurani jiwoe u nanggroe
Troh le jinoe bak ayahanda
'Oh troh bak Raja teuma jipeugah
Ka jikisah haba cutda

Teutap siat Cahya Nurani
Samingun Juhari lon calitra
Teutap lam jaroe raja eungkong
Puleh le yoh nyan sigala Raja

Puleh Raja Peutawi Biram
Sireuta sajan dum panglima
'Oh ban puleh nibak pangsan
Marit sulotan ngon Putroe Muda

Udeh adoe tajak ngon kamoe
Lanja jinoe u nanggroe Raja
Bek le sinoe dalam uteuen
Udeh bak lon he adekeunda

Teuma seuot Tuan Putroe
Ampon kamoe po meukuta
Idin Tuanku di bawah doli
Lon peureugi u antara

Bek treb ulon nyoe di bumoe
Malam uroe han troh lon gisa
Sulotan Biram teuma kheun meunoe
Tadeungo kamoe he adekeunda

Bek le narit gata sambinoe
Udeh u nanggroe bek le lam rimba
Adak beurangdum talakee idin
Han ulon bri adek tagisa

Adak Maha Raja tren di manyang
Lon tawan prang he adekeunda
Dalam hate lon that rindu
Wahe cut meulu bek tameudawa

Beuranggakri bak ulon sidroe
Gata adoe meuhat lon ba
Nibak hate lon that galak
Adak geutak pi lon rila

'Oh Putroe deungo narit meunan
Han le kalam Putroe Muda
Yoh nyan neujak sajan sulotan
Tujoh dendayang sajan neuba

Leugat neujak u Biram Peutawi
Suka hate Raja Raya
Troh u nanggroe neuhei syiah
Neuyue peunikah ngon Putroe Muda

Sulotan Peutawi teutap sinan
Uroe malam meusuka-suka
Teuduek haba Sulotan Biram
Juhan 'Alam lon calitra

Raja Mambang teuduek di nanggroe
'Oh troh Putroe jipeugah haba
Ban geudeungo narit Putroe
Amarah le jinoo Raja Raya

Teuma neupeugot saboh surat
Neuyue intat keu Raja Muda
Meunoe haba dalam surat
Saleuem nibak Mambang Raja

Ampon Tuanku meuribee ampon
Seumbah ulon hamba sahya
Keureuna kamoe ka mupaloe
Aneuk lon Putroe ka cileungga

Ka jireubot bak jak manoe
Tinggai meung adoe akak jiba
Jinoo nyang tinggai Cahya Nurani
Jinoo lon bri keu meukuta

Jinoe ulon tren u bumoe
Lon jak jinoe he meukuta
Bak le do'a nibak janjongan
Akan laman patek nyang hina

Meunankeuh haba di dalam surat
Sajan rakyat ngon balatandra
Uleebalang neuyue me surat
Sajan rakyat han teukira

Cahya Nurani neubri sajan
Lapek kireman neubri aneukeunda
Uleebalang jak me surat
Jijak leugat nanggroe Raja

Hingga ka troh u nanggroe Diu
Piyoh laju di lua kuta
Tamong sidroe jak me surat
Jijak leugat bak Raja Muda

Raja Muda kalon surat
Neuploh leugat le neubaca
'Oh neudeungo haba lam surat
Neuyue teubiet Sithon Geulima

Neuyue jak tueng Cahya Nurani
Bek treb beureunti di lua kuta
Sithon Geulima teubiet yoh nyan
Bak Putroe intan keumala donya

Cahya Nurani geuba u dalam
Rakyat sajan tamong lam kuta
Dendayang Banta dua blah sajan
Geupeuk yoh nyan lam astana

Di Raja geujak musyawarat
Neutanyong pakat bak peutua
Pakri bicara he uleebalang
Raja Mambang keunong bahya

Teuma seuot uleebalang
Neuyue jak muprang po meukuta
Meung han jipulang Tuan Putroe
Neuyue prang nanggroe tanoh donya

Adak meukarat Raja Mambang
Kamoe sibirang bantu jak gaza
Mumeunan narit uleebalang
That guransang hana tara

Raja Mambang deungo narit meunan
Neupeugot kireman sigra-sigra
Meunoe haba di dalam surat
Saleuem nibak Raja Muda

Wahe Raja Juhan 'Alam
Jak leh tamuprang u tanoh donya
Adat meugriet gata di padang
Lon yue pahlawan soe bantu gata

Meung hana pulang Samingun Juhari
Biram Peutawi tareuloh kuta
Meunankeuh haba di dalam surat
Ka neubri leugat meuntroe Raja

Lheueh neubri surat teuma jiriwang
Leugat seunang troh bak Raja
'Oh troh bak Raja jibri kireman
Neubuka yoh nyan pantah sigra

'Oh ban neudeungo haba lam surat
Hate mangat hana tara
Juhan 'Alam teuma krah rakyat
Ube nyang neumat droeneuh Raja

Dua ploh laksa bala bantuan
Dum seukalian habeh teuka
Maseng-maseng ngon alat prang
Bukon bubarang geugap-gumpita

'Oh sare habeh dum troh rakyat
Teuma beurangkat Raja Raya
Juhan 'Alam tren u padang
Rakyat sajan meuribee laksa

Miseue reudok keumeung ujeuen
Tamse tupheuen bade raya
Meuseundi rupa ngui peukayan
Musta'id ngon alat sinyata

'Oh sare troh u teungoh padang
Euncien bak tangan neutiek u donya
Jeuet le kuta teuma ngon midan
Teudong sajan ngon astana

Tamong rakyat dum sinaroe
Uleebalang meuntroe ngon panglima
Teuma marit Raja Mambang
Neutanyong padan bak peurdahna

Pakri bicara wahe meuntroe
Keureuna geutanyoe ka troh u donya
Teuma seuot meuntroe Peureudan
Nibak lontuan na bicara

Neuyue peugot saboh surat
Tayue intat teuma keu Raja
Talakee pulang Tuan Putroe
Keureuna geutanyoe ka troh teuka

'Oh Raja deungo haba meunan
Neupeugot kireman pantah sigra
Meunoe haba di dalam surat
Saleuem nibak Raja Indra

Wahe Raja Peutawi Biram
Putroe tapulang bek le meuseunda
Bak rayek gaseh deungon sayang
Kamoe di manyang ka troh meuteuka

Jinoe ka lon tren nyoe ho u bumoe
Tapulang jinoe Putroe Muda
Bek takeumeung peuna keusumat
Pulang ngon mangat wahe raja

Gata ngon lon bek jeuet keu ukam
Bek bantahan lon ngon gata
Uroe nyoe donya singoh akhirat
Bak teuingat wahe e Raja

Adak han tapulang Tuan Putroe
Taingat keudroe gata he Raja
Kuta kureuloh gata kuikat
Sigala rakyat kupupana

Mangat taturi Raja Mambang
Nanggroe di manyang lam awan Indra
Nyang got he Raja Putroe tapulang
Ngon Raja Mambang bek tameuseunda

Tanda lon gaseh keu gata sabat
Lon peuingat bek that lupa
Meung nyo takeumeung reuloh nanggroe
Bek tabri Putroe keu lon he Raja

Mangat takalon Juhan 'Alam
Mangat tatuban Raja Indra
'Oh noe habeh tamat kalam
Neulipat rijang pantah sigra

Ubak panglima neuyue jak intat
Jijak leugat hana dawa
Troh bak kuta Biram Peutawi
Teuma jihei le ureueng lam kuta

Tabuka pinto lon keumeung tamong
Lon jak bri bungong saleuem bak Raja
Ureueng lam kuta pi buka pinto
Leugat jilalo troh bak Raja

'Oh troh bak Raja jijok surat
Jiploh leugat lalu jibaca
'Oh ban jideungo haba lam surat
Baginda halarat teusinyom muka

Teuma lheueh nyan neubri makanan
Keu utosan Raja Indra
Sulotam Peutawi peugot surat
Neuboh narit jaweueb haba

Nyoekeuh saleuem bak Raja Biram
Disampoekeun keu Raja Indra
Ampon Tuanku Raja lam awan
Ampon laman po meukuta

Beurayek gaseh keu lon ngon sayang
Wahe Sulotán Mambang Indra
Bek le neulakee Tuan Putroe
Sayang that kamoe putoh asa

Bak Raja gaseh keu lon ngon sayang
Jak leh riwang u nanggroe Indra
Keureuna Putroe ka lon meukawen
Bak rayek idin po meukuta

Bek neulakee Tuan Putroe
Malee that kamoe bak Raja dum na
Jinoe bek le neulakee pulang
Beuthat sayang keu kamoe donya

Ampon Tuanku meukuta awan
Bek that he rakan teukabo ria
Putroe nyang lon cok pantang lon pulang
Meung hana hilang nyawong lam dada

Bek tasangka lon pulang mangat
Dilon pi sabat lon lawan gata
Nyang got jinoe tajak riwang
Yoh goh he abang meuteumee baya

Lon takot paloe namateuh keuji
Jak leh keumbali dalam Indra
Adak han tawoe pubeudoh prang
Jakalee tungang gata Indra

'Oh lheueh neusurat teuma neulipat
Neujok le leugat bak utosan Raja
Panglima Mambang jiwoe leugat
Jibri surat teuma bak Raja

Juhan 'Alam kalon surat
Amarah that hana tara
Jiyue teubiet panglima prang
Ratna Mambang nyang peukasa

Habeh teubiet sukee Mambang
Ka peunoh blang mideuen Raja
Mambang Sayuti saboh pahlawan
Keulhee he rakan Mambang Bulia

Keupeuet panglima Mambang Sayubi
Mambang Sari nyang that peukasa
Ratna Mambang teubiet u midan
Rakyat sajan meuribee laksa

Laen nibak nyan uleebalang
'Adi ngon Juhan sajan sireuta
'Oh sare troh u teungoh mideuen
Musta'id ngon alat seunjata

Sireuta jideumpek jimeuhei lawan
Teubiet u padang he ureueng donya
Soe nyang galak keumeung theun peudeueng
Teubiet u mideuen bek le lam kuta

Mangat taturi kamoe lam awan
Teubiet bak rijang wahe syeedara
Raja Biram eu ureueng di mideuen
Teuma neukheun ubak panglima

Teuma neuyue krah sigala rakyat
Neuyue peusapat jeueb-jeueb raja
Sulotan meureudan Ahmad Rambari
Meureudan Ali nyang that peukasa

Sulotan Bahrom that pahlawan
Makdat Kasmi saboh panglima
Habeh meusapat dum sikalian
Sabda Sulotan neuyue jak gaza

Ka jiteubiet dum u midan
Payong ngon alam le that ban rupa
Meuseundi-seundi rupa peukayan
Geumeurlapan cahya ie muka

U ateueh guda ka jipasang
U teungoh padang geugap-gumpita
Deumpek surak na miseue guroh
Nyum-nyum ka runtoah alam donya

Sideh pi reudok sinoe pi reudok
Miseue keumeung tok ujeuen keunong sa
Sideh pi peugom sinoe pi peugom
Nyoe phon bangon keumeung jeuet baya

Sideh pi jiek sinoe pi jiek
Surak ngon deumpek that meutaga
Sideh pi jijak sinoe pi jijak
Yoh nyan meurumpok seudong ngon kala

Nyoe baro phon prang meuteumeung
Jipeukab peusan deungon kala
Sideh pahlawan sinoe pahlawan
Di teungoh midan jeuet prang raya

Sideh panglima nyang guransang
Sinoe pi saban sabe panglima
Maseng-maseng meurumpok lawan
Ureueng lam awan ngon ureueng lam donya

Yoh nyan ka prang subhanallah
Ile darah ban ie raya
Darah guda darah ureueng
Miseue ie krueng ka meukeuba

Meusu cokma deungon peudeueng
Deumpek ureueng nyang that meutaga
Trang cuaca di dalam klam
Raya that prang hana ngon peusa

Han soe turi kawan ngon lawan
Miseue malam glab-gulita
'Oh le darah ateueh bumoe
Leumah jinoe ureueng dum na

Ban ureueng meuen lam buleuen peungeuh
Hana that deuh leumah nyata
Ratna Mambang yoh masa nyan
Meuteumeung ngon sabe Raja

Teuma meurumpok ngon Ahmad Zamhari
Neumeucang le sabe Raja
Sinoe jilhom sideh jibet
Miseue meulet leuek bangguna

Ahmad Zamhari that pahlawan
Ratna Mambang tak bak muka
Putoh dua di teungoh mideuen
Surak ureueng tandra donya

Jikalon le Mambang Sikandran Pari
Ka jitren le ateueh guda
Meuteumeung ngon Meureudan Ali
Ka meutadi deungon cokma

Keunong cokma ateueh peurise
Miseue bade geulanteue raya
Tujoh lapeh langet ngon bumoe
Nanyum sang lagoe miseue geumpa

Sikandran Pari teuma 'oh balah
Cokma patah jeuet keu dua
Meureudan Ali that pahlawan
Sikandran Mambang keunong bak dada

Reubah meugulé di teungoh midan
Putoh badan tinggai nama
Meureudan Ali neucang rakyat
Ho meupagab habeh seureupha

Ureueng Indra ka talo prang
Teuma jiriwang dalam kuta
Sare habeh rakyat lalo
Jitop pinto sigra-sigra

Juhan 'Alam tanyong bak rakan
Pakon tariwang he syeedara
Soe talo prang bak uroe nyoe
Lon eu tawoe gata dum na

Teuma seuot Mambang Sayuti
Tuanku ka mate dum na panglima
Jipoh uleh Raja Ensan
Putoh meukhan jikoh dua

Juhan 'Alam deungo haba meunan
Han le kalam Raja Indra
Sulotan Biram Buket Peutawi
Rakyat keumbali u dalam kuta

Teuma neutanyong soe talo prang
Lon eu tariwang gata dum na
Teuma seuot Ahmad Zamhari
Tuanku ka mate Mambang dua

Laen rakyat le that nyang ka tan
Kamoe riwang ngon meunan saja
Sulotan Biram deungo narit rakan
That sukaan hana tara

Teutap piyoh bak malam nyan
Minom makan dalam kuta
Hingga beungoh cuaca trang
Meuse geundrang prang bak ureueng Indra

Mambang Sayuti teubiet u midan
deungon rakan meuribee laksa
Padum 'Adi dengon Juhan
meuribee ban alat sinyata

Maseng-maseng ateueh kandran
Payong ngon alam laen rupa
Ateueh guda dum jipasang
Peudeueng bak tangan sajan ngon cokma

Leugat jijak u teungoh mideuen
Musta'id ngon alat sinyata
Di teungoh mideuen teudong meureuntang
Siulahan keumeung poh bila

Sireuta jideumpek jihei lawan
Teubiet u padang hai ureueng donya
Ahmad Zamhuri deungo jihei lawan
Ka neupasang u ateueh guda

Leugat jiteubiet u teungoh mideuen
Neumat peudeueng neumat cokma
Sajan 'Adi deungon Juhan
Laen nibak nyan rakyat meulaksa

Maseng-maseng ateueh kandran
U teungoh padang dum jihala
Miseue reudok nyang got that hitam
Dumnang angkatan ureueng po banda

Teudong meuseueh-seueh di teungoh padang
Musta'id ngon alat sinyata
Deumpek ngon surak bukon bubarang
Di teungoh padang geugap-gumpita

Sideh jideumpek sinoe jisurak
Bumoe meugrak-grak miseue geumpa
Sideh pi reuduk sinoe pi peugom
Nyoe baro lom keumeung jeuet baya

Sideh jiek meugalak-galak
Sinoe pi jijak meusuka-suka
'Oh lheueh nyan meuteumeung dua pihak
Ban geulanteue tak Buket Miga

Meuhubo-hubo di teungoh padang
Bumoe meuguncang meugisa-gisa
Deumpek ngon surak meuhalon-halon
Miseue riyeuek tren musem keunong sa

Mambang Sayuti di teungoh padang
Jimeucang ban cicem pala
Wie ngon uneun reubah peudeueng
Mate ureueng meuribee laksa

Ri nyang leumah u hadapan
Habeu simpan ngon sikleb mata
Neukalon uleh Ahmad Zamhuri
Neutajo le u mideuen Raja

Teuma meuteumeung Mambang Sayuti
Neutanyong le soebu nama
Lon eu le that tapoh rakyat
Jinoe he sabat peugah soe nama

Adak mate gata di mideuen
Ka meusinan tinggai nama
Cit meunan adat dalam pupeurangan
Dilee geukheun nan nak meusoe nama

Teuma seuot Mambang Sayuti
Deungo lon kheun kri he syeedara
Nama ulon beutaturi
Mambang Sayuti geurasi nama

Nyang ka dileekon hana soe lawan
Jinoe he rakan kana ngon gata
Bek he rakan takeumeung mate
Beutaturi kamoe Indra

Jinoe gata jak leh tawoe
Peuteubiet Putroe keunoe bak sigra
Adak han taintat keunoe Putroe
Gata mupaloe nanggroe binasa

Adak mate gata sinoe
Peugah adoe soe nan gata
Peugah rijang mangat lon tusoe
Singoh uroe cit lon aja

Teuma seuot Ahmat Zamhari
Deungo lon kheun kri he panglima
Sulotan ka turi Peutawi Biram
Raja lontuan nyang that peukasa

Nama ulon Ahmad Zamhari
Beutaturi wahe syeedara
Jinoe gata wahe Mambang
Jak tariwang u nanggroe Indra

Keu gata Putroe lon bri pulang
Nyang got he abang jak tagisa
Beudoh sinoe jak leh tawoe
Yoh goh mupaloe nyawong keulua

Takeumeung lingkeue sane lam sawang
Adak han nyawong badan binasa
Nyang jroh he Raja jak tariwang
Di lon kusayang that keu gata

Bek takeumeung mate meudarah
Jinoe lon peugah nyang got jak gisa
Teuma seuot Mambang Sayuti
Neuyue keumbali kamoe Indra

Masa lon tren ka habeh wajah
Rinyeun lon rudah masa lon bungka
Meung han tapulang Tuan Putroe
Hareuem bak kamoe nanggroe Indra

Masa lon tren rudah rinyeun
Hana dua seun lon pandang donya
Lon jak ngon tapak lon woe ngon papeuen
Lon agam geukheun he syeedara

Hana lon takot keu kilat guroh
Lon lawan musoh han syok sangka
Sireuta jibot cokma meulayang
Jipeh le yoh nyan pantah sigra

Ahmad Zamhari pantah han ban
Neugrob le yoh nyan hana tara
Cokma Mambang sret ateueh bumoe
Meutanom le jinoe na siploh deupa

Ahmad Zamhari jinoe poh balah
Meuteumeung pantah jitheun sangga
Keunong neupoh ateueh peurise
Miseue bade meunan suara

Teubiet meuk peudeueng meujeureulah
Mambang pi gagah hana gli geunta
Mambang Sayuti peusuci peudeueng
Neutak le yoh nyan pantah sigra

Kenong bak ulee sret u baho
Meuk meuhambo na sigunca
Ahmad kheun le teuma bak Mambang
Bek tameuayang ngon kamoe donya

Keupeue tagaro gatai lon tan
Payah mantong paidah hana
Mambang Sayuti deungo haba meunan
Jitajo le rijang teupet mata

Neukeumeung rumpok ngon Ahmad Zamhuri
Ka neutadi deungon cokma
Reubah meugule di teungoh mideuen
Hanco tuleueng jeuet keu sira

'Oh jikalon Mambang Sayuti
Jipasang le ateueh guda
Lanja jijak u teungoh mideuen
Jicang ureueng seun silaksa

Ri meuteumeung u hadapan
Habeu jisimpan sikleb mata
Teuma neukalon le Makdi Kasan
Ka neupasang ateueh guda

Leugat jiteubiet u teungoh mideuen
Neucang ureueng Mambang Indra
Teuma meuteumeung ngon Mambang Sayuti
Neucang laju le pantah sigra

Jitak keudeh jigrob keunoe
Peudeueng lam bumoe sang geupula
Bacut silab Makdi Kasan
Jitak le yoh nyan keunong bak dada

Reubah meugule di ateueh midan
Makdi Kasan tinggai nama
Neukalon uleh Ahmad Zamhuri
Neutajo le pantah sigra

Neubet cokma ka meulayang
Neupoh keunong ateueh dada
Reubah meugule di teungoh midan
Jiikat tangan le rakyat donya

Mambang Sayuti geudrob di midan
Sigala rakan jiwoe le sigra
Dalam kuta dum jitamong
Sigala Mambang teumakot raya

Sigala rakyat Buket Peutawi
Bandum sare hate suka
Teuma jilingka kuta Mambang
Bukon bubarang that guranta

Sireuta jideumpek deungon jisurak
Suka galak hana tara
Teuma jihei ureueng di dalam
Wahe Mambang bek le lam kuta

Soe nyang galak keumeung theun peudeueng
Teubiet u mideuen bek le lam kuta
Bek bunoeon that guransang
Jinoe he Mambang teubiet u lua

Mangat tatu' oh Peutawi Biram
Mangat tatuban kamoe donya
Nyang ka nyang ka han tom soe lawan
Peutawi Biram meusyeuhu nama

Jinoe peue kaiem dum sinaroe
Teubiet keunoe u mideuen Raja
Nak mangat meuri ensan ngon Mambang
Teubiet u padang bek that jula

Juhan 'Alam deungo haba meunan
Neuyue pahlawan teubiet u lua
He panglima uleebalang
Dum sibarang meuntroe bentara

Jak kateubiet dum u padang
Jak lawan ensan nyang peukasa
Bek katakot adak mate
Nibak keuji gadoh nama

Yoh nyan Mambang suka hate
Jiteubiet le u, lua kuta
'Oh sajan leupah pinto dalam
Keumah ensan lingka kuta

Yoh nyan jibeuet saboh hekeumat
Ka jeuet laot mideuen Raja
Ahmad Zamhari kalon laot
Ka jisurot u padang raya

Bandum jipiyoh di teungoh padang
Panglima Mambang kalon rupa
Jikalon ensan ka jisurot
Teuma lom jibeuet puleh do'a

Suka 'Adi puleh hekeumat
Gadoh laot di mideuen Raja
'Oh lheueh nyan jiteubiet dum u mideuen
Ka meuteumeung dua tandra

Suka 'Adi ateueh guda plang
U teungoh padang jijak gaza
Sare habeh dum u padang
Meuteumeung lawan sabe Raja

Meuteumeung ngon Meureudan Ali
Teuma neusudi sipatah haba
Teuma seuot Suka 'Adi Mambang
Tadeungo lontuan he syeedara

Lah ka neuteumeung bah le lon peugah
Beuna ngon salah lon calitra
Nama lon Mambang Suka 'Adi
Nan geurasi uleh Raja

Jinoe ka troh lon u padang
Putroe tapulang lon keumeung gisa
Adak tapulang Tuan Putroe
Gata sinaroe han le baya

Adak takeumeung bek reuloh nanggroe
Pulang Putroe kamoe meugisa
Adak han tapulang gata taingat
Siseun nyoe meuhat keunong baya

Rakyat mate nanggroë rusak
Ube ka lon jak han soe sangga
Jinoë he Raja jak beurijang
Putroë tapulang he panglima

Adak nyang han wahe rakan
Gata he teelan meuhät pana
Meung han pi goh na soe turi
Suka 'Adi Mambang Indra

Dilon bunoe ka lon peugah nan
Digata tolan soe geuhei nama
Lon eu rupa sangat hibat
Janggöt panyang that na peuet deupa

Teuma seuot Meureudan Ali
Deungo lon kheun kri wahe Raja
Sulotan Biram Buket Peutawi
Nyang jituri uleh Raja

Nama ulon Meureudan Ali
Raja beurangri nama lon taba
Narit gata bunoe tapeugah
Adak aneuk mirah pi han jikira

Bek tameung thok eupung keumuroh
Meuhät jibuboh gata bak muka
Kamoe donya han peue tapakat
Hana meuhajat nyang ban kheun gata

Hana lon takot keu kilat tanggoh
Lon lawan taroh si aneuk dua
Hana lon takot keu panglima prang
Nyang got jak riwang yoh goh binasa

Meung han tadeungo narit lon nyoe
Tarasa keudroe buet ureueng donya
Nyang got tasurot yoh goh meupakhok
Yoh goh meurumpok geutanyoe dua

Bek le tatinggai gata di sinoe
Bak Raja kamoe bek le tateuka
Bakna tagaseh keu nyawong badan
Jak leh tariwang u nanggroe Indra

Suka 'Adi deungo narit meunan
Amarah le yoh nyan hu ngon mata
Jibeuot cokma ka meulayang
Ali Meureudan neutheun sangga

Keunong jipoh ateueh peurise
Miseue bade meunan suara
Meureudan Ali that amarah
Jimat pantah Mambang Sugara

Leugat jisrom dalam awan
Srot bak makam Raja Muda
Habeh hanco sigala tuleueng
Di teungoh mideuen nanggroe Indra

Jikalon teuma le rakyat Diu
Jipeugah laju bak Raja Muda
Ampon Tuanku meuribee kali
Mambang mate di lua kuta

Saleh ka talo Juhan 'Alam
Lon eu di padang bangke panglima
'Oh Raja deungo narit rakan
Neukheun le yoh nyan sigala raja

Diwa Samari panglima prang
That pahlawan hana tara
Sidroe treuk teuma Diwa Kusani
That beurani ngon peukasa

Lhee droe teuka Diu Meureudan
Lae pahlawan meuribee laksa
Tujoh ploh raja habeh tren keunan
Suroh sulotan jak bantu Raja

Habeh bandum ka meusapat
Teuma jideelat Raja Muda
Ampon Tuanku meuribee katoe
idin kamoe tren u donya

Dituanku neuduek sinoe
Geunap uroe neulakee do'a
Raja Muda kheun han peue salah
Jak talangkah tren u donya

Uleebalang Diwa dum guransang
Jitren le yoh nyan u tanoh donya
Teuduek haba Diwa teureubang
Jinoe meuriwang haba nyang ka

Juhan 'Alam eu pahlawan hana le
Saket hate hana tara
Neuyue teubiet laen uleebalang
Namajih Mambang Sikandran Lila

Leugat jijak u teungoh padang
Ateueh guda plang jipoh lawa
Sajan rakyat 'Adi ngon Juhan
Laen pahlawan teubiet u lua

Habeh bandum teubiet uroe nyan
Na tamse tupheuen bade raya
Miseue reudok keumeung ujeuen
Le that ureueng di mideuen Raja

Teudong meuseueh-seueh di teungoh mideuen
Musta'id ngon alat seunyata
Sulotan Bahrom Meureudan Ali
Rakyat rame sajan sireuta

Meung mupreh-preh keunan datang
Teudong meureuntang di mideuen Raja
Deumpek ngon surak that meuguncang
Bukon bubarang geugap-gumpita

Teungoh-teungoh keumeung muprang
Leumah angkatan Diwa Indra
Tamse reudok kandong ujeuen
Le that ureueng teungoh teuka

Bak watee nyan hana jeuet prang
Seubab angkatan tan geup melia
Ho maken rab keunan datang
Raja Mambang jak pumeulia

Juhan 'Alam that sukaan
Ka troh angkatan Raja Muda
Dalam kuta peutamong leugat
Neubri teumput maseng jeumba

Neubri makanan dum sinaroe
Piyoh jinoe ureueng teuka
Panglima Mambang di teungoh mideuen
Yoh nyan meuteumeung dua tandra

Yoh nyan geumuprang sabong-meunyabong
Bireng ngon seudong meuseunoh bisa
Maseng-maseng mita lawan
Nyang sipadan sabe nama

Tujoh uroe sabe muprang
Tiwah Mambang di mideuen Raja
Diwa Kusani kheun bak rakan
Teubiet he teelan u mideuen Raja

Peue lom taduek han tajak muprang
Teubiet u padang bandum gata
'Oh ban jideungo sabda meunan
Teubiet le yoh nyan u mideuen Raja

Diwa Samarani keupala prang
Uleebalang Raja Muda
Ka jiteubiet dum u padang
Jitamong prang pantah sigra

Nyoe baro lam prang meutunang
Jimeukab bireng deungon cuala
Meuhubo-hubo meuhayak-hayak
Deumpek ngon surak that meutaga

Meukeupong-keupong meupalot-palot
Jimeugrob-grob di mideuen Raja
Suara peudeueng miseue guroh
Na nyum ka runtoh that meutaga

Nyang mat peudeueng-sama peudeueng
Ladom meuteumeung peudeueng ngon cokma
Nyang mat panah sama panah
Mubalah-balah di mideuen Raja

Nyang mat leumbeng sama leumbeng
Mupateng-pateng lam-lam mata
Watee meuteumeung cokma ngon peudeueng
Di sinan tangieng nyang leupah gura

Jibeudoh ngon dhoi tanoh teureubang
Uroe teungoh trang ka gadoh cahya
Hana le meuri lawan ngon kawan
Raya that prang hana tara

'Oh le darah ateueh bumoe
Leumah le jinoe ureueng lam gaza
Yoh nyan baro leumah lawan
Uroe pi trang leumah nyata

Tujoh uroe tujoh malam
Tiwah le yoh nyan ureueng donya
Ureueng Diwa bandum gagah
Nyankeuh tiwah rakyat donya

Teuduek haba ureueng di mideuen
Laen karangan ulon calitra
A M M A B A K D U sahibol kisah
Deungo lon peugah Bulia Keumira

Raja Kra teuduek di Buket Zamrot
Sajan ngon rakyat meuribee laksa
Meugah Raja Peutawi Biram
Ka jeuet ukam ngon Mambang Indra

Yoh nyan raja Kra jikrah rakyat
Habeh meusapat dua blah raja
Sare habeh dum meusapat
Jibeurangkat raja lam rimba

Bak rot jihak gunong manyang
Jeuet keu padang ngon sikleb mata
Leugat jihak u Buket Peutawi
Bandum sare that guranta

Tujoh pat piyoh lam peujalanan
Sampoe le yoh nyan rab padang raya
Bulia keumira teutap sinan
Bak gunong nyan meuseuninya

Jikalon ureueng teungoh muprang
That guransang hana tara
Jikalon tiwah sukee ensan
Jiteubiet yoh nyan u mideuen Raja

Jitamong teuma lam lawan Diu
Jimat ukeue kayee raya
Jipoh ureueng wie ngon uneun
Yoh masa nyan jeuet prang raya

Sare meuteumeung Kra ngon Mambang
Yoh nyankeuh prang geugap-gumpita
Uleebalang Kra that pahlawan
Gunong jitatang jisrom lam hawa

Srot u teungoh tandra Mambang
Di teungoh padang mate meulaksa
Ladom jimat nibak badan
Jisrom lam awan maté pana

Meuhambo-hambo di teungoh padang
Diu muprang deungon rakyat Kra
Bulia Zakari jimasok prang
Aneuk sulotan Bulia Keumira

Sajan deungon uleebalang
U teungoh padang jijak gaza
Jimat gunong wie ngon uneun
Jisrom u mideuen bak Diu Indra

Le that mate ureueng Diu
Ka teudu-du di mideuen Raja
Bulia Zakari that pahlawan
Jitajo lam kawan Diu Indra

Jimat bak u nibak jaroe
Jipoh jinoe rakyat meulaksa
Diu Samari peudeueng bak tangan
Neutak le yoh nyan sukee raja Kra

Na cit mate jareueng-jareueng
Keunong peudeueng ureueng Indra
Mate rakyat Kra na dua-lhee
Teuka siribee laen pula

Diu Samari pantah kilat
Neucang le that sukee raja Kra
Jikalon le Bulia Zakari
Jipeutoe le pantah sigra

Teuma meuteumeung ngon Diu Samari
Ka jitadi ngon kayee raya
Diu Samari kalon mumeunan
Jisurot yoh nyan pantah sigra

Sireuta jipeulheueh saboh panah
Jipo pantah dalam hawa
Aneuk panah nyan jeuet keu apui
Jitren laju bak kawan Kra

Bulia Zakari kalon apui nyan
Jigrak-grak badan bulee meubura
Teuka ujeuen le u mideuen
Apui ka len han le nyata

Diu Samari eu apui han le
Jisurot le dalam kuta
Habeh jitamong dum u dalam
Han ek lawan sukee raja Kra

Dua ploh ribee raja lam awan
Han ek jilawan Bulia keumira
Lila Ngindra beuet hekeumat
Jeu et le laot lingka kuta

Meualon-alon deungon geulumbang
Hireuen tapandang saktian Raja
Miyub ngon manyang meuek meutren
Jibeudoh alon meubura-bura

Bulia Zakari kalon meunan
Jigeureubang sigra-sigra
Nibak bumoe jiteupok jaroe
Laot ka doe muwoe bak nyang ka

Diu Kusani eu han le laot
Neupasang leugat ateueh guda
Juhan. 'Alam neuyue pahlawan
Teubiet he rakan bandum u lua

Tajak peungon Diu Kusani
Jak adu sakti ngon raja Kra
Keureuna geutanyoe ka jeu et keu malee
Yoh masa dilee ka leupah haba

Jinoe he rakan nibak keuji
Bahle mate tinggai nama
Bek gob teuoh uroe dudoe
Geukheun geutanyoe malee hana

Nibak puteh mata got puteh tuleueng
Bahle teugageueng di mideuen Raja
Mambang Sikanda meuntroe Meureudan
Uleebalang teubiet seumua

Raja-raja nyang mat nanggroe
Teubiet sinaroe jak lawan Kra
Ateueh guda dum jipasang
Diu ngon Mambang teubiet u lua

'Oh sare troh u teungoh midan
Meuribee-ribee ban alat sinyata
Meujeuneh jeuneh rupa peukayan
Payong ngon alam le ban rupa

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Mubajee zireh nibak asoe
Keutupong beusoe ateueh keupala
Peudeueng ngon cokma jimat bak jaroe
Ladom he adoe payong suasa

Keumang payong pupanji alam
Meuribee ban taeu rupa
Teudong meuseueh-seueh di teungoh padang
Musta'id ngon alat sinyata

Bulia Zakaria piyoh di padang
Jikalon Mambang teubiet lam kuta
Teuma jiyue jak Raja Simbang
Mila Gadeng ngon Nila Keumala

Sajan rakyat gak-gak simbang
Bruk beuruang eungkong sireuta
Nila Peujangga raja lutong
Raja eungkong Lanta Waila

Nila Keumala Gadeng Kujami
Nyang jeuet beurani Naran Seumanda
Wasiran Sina Raja Jami
Nyang beurani Nila Wanta

Bandum jijak u teungoh padang
Ka meuteumeung dua tandra
Uleebalang Diu bandum guransang
Le that jicang rakyat raja Kra

Sidroe mate peuet ribee meugantoe
Jiek sinaroe u mideuen Raja
Raja Simbang jimat batee
Jisrom bak ulee Diu Indra

Nila Keumala jitatang gunong
Jisrom u mideuen mate meulaksa
Nyang le that mate sukee Mambang
Keunong angkatan Nila Keumala

Meuhubo-hubo di teungoh padang
Diu muprang ngon rakyat Kra
Di rakyat ensan ka jipiyoh
Jihe i taroh di mideuen Raja

Di raja Kra jisrom gunong
Diu ngon Mambang pupreh cokma
Keunong cokma jisrom ngon batee
Hana tathee ka jeuet keu sira

Uleebalang Kra bandum pahlawan
Jitajo lam kawan ureueng Indra
Taeu ka jipoh teuma ngon kayee
Jisrom ngon batee le that pana

Di rakyat Kra pantah ban kilat
Jilumpat-lumpat u teungoh tandra
Jitak ngon peudeueng jisilek pantah
Ngon cokma jipoh jilumpat sigra

Rakyat Diu deungon Mambang
Dum sibarang hate lia
Dalam kuta dum jisurot
Seubab teumakot raja dum lia

Ureueng Diu deungon Mambang
Habeu jitamong dalam kuta
Bulia Keumira eu hana le lawan
Jitamong u dalam ubak Raja

Sulotan Biram kalon sabat
Sukaan that hana tara
Troh lam kuta neubri teumpat
Ban nyang adat daseuto Raja

Sulotan Peutawi tanyong bak rakan
Soe talo prang he syeedara
Teuma seuot Bulia Zakari
Ampon doli laman sroepada

Tiwah Tuanku sukee Mambang
Habeu jiriwang dalam kuta
Sulotan Peutawi kheun nibak sabat
Jinoe meuh at teubiet jak gaza

Nak mangat talo saho-saho
Prang nyoe he po Raja-Raja
Adak tiwah dum geutanyoe
Lon peusan keunoe Raja Raya

Lon peusan Raja Meureudan 'Alam
Geureuda 'Alam saboh panglima
Geureuda 'Alam hibat peungaroe
Cokma beusoe na peuet ploh gunca

Bulia Keumira seuot meunoe
Tuanku hana peue troh le tandra
Meung Raja Diu deungon Mambang
Siat laman prang habeu teureupa

Ensya Allah ngon tulong Tuhan
Ulonteu lawan Mambang Indra
Singoh uroe bahle lon yue prang
Lon yue lawan Diu Indra

Sulotan Peutawi deungo narit meunan
That sukaan hana tara
Teutap piyoh bak malam nyan
Laen karangan lon calitra

A M M A B A K D U dudoe nibak nyan
Lon peuduek haba prang sikutika
Jinoe lon seubot Jamalolhekmat
Duek di Buket teungoh neutapa

Leumah neukalon deungo hate
Biram Peutawi teungoh prang raya
Jilawan uleh Raja Mambang
Di teungoh padang ka jeuét prang raya

Sulotan Peutawi raya that sakti
Mambang ngon Diu tiwah padra
Biram Peutawi le soe tulong
Ngon Meureudan 'Alam nyang that peukasa

Meung habeh teuka bandum keunan
Diu ngon Mambang siat pana
Teuma neukheun bak panglima sidroe
Tajak jinoe u mideuen Raja

Teuma neupeugot dua boh surat
Neuyue jak intat keu Raja dua
Meunoe haba di dalam surat
Saleuem horeumat bak Syiah Tapa

Wahe Raja Peutawi Biram
Deungo lontuan he aneukeunda
Lon deungo gata aneuk dalam prang
Deungon Mambang Diu Indra

Jinoe he aneuk bek le tamuprang
Ngon Raja Mambang bak jeuét syeedara
Bak na tagaseh deungon tasayang
Ngon Raja Mambang seb dum nyang ka

Jinoe he aneuk bek le keusumat
Lon yue peuingat nibak panglima
Putroe nyang tacok bak jeuet tatueng
Ngon Raja Mambang bek le meudawa

Meunankeuh haba keu Raja Biram
Laen lakuan keu Raja dua
Nyoe he Raja deungon Mambang
Saleuem lontuan keu gata dua

Lon deungo gata aneuk dalam prang
Ngon sulotan Raja donya
Jinoe he aneuk bek le tamuprang
Nibak lontuan hana dawa

Peutawi Biram han ek soe lawan
Raya saktian hana tara
Nyankeuh Raja nyang le soe tulong
Ngon Meureudan 'Alam goh lom teuka

Bek nyang laen wahe Mambang
Meung nyang ka keunan han ek tagaza
Sukee Raja nyang ka troh keunan
Han ek talawan uleh gata

Jinoe he aneuk bek lek keusumat
Jaroe lon pumat ngon Raja donya
Bek le Putroe talakee pulang
Dum sibarang idin gata

Nibak panglima lon yue peugot prang
He Raja Mambang bek le meudawa
Lheueh neusurat teuma neulipat
Neujok le meuh at ubak panglima

Syahi Beureuma geurasi nan
Jijak yoh nyan u nanggroe Raja
Jime tanda saboh alam
Alamat datang Syiah Tapa

Panglima deungo sabda meunan
Jijak le rijang pantah sigra
Sajan rakyat na siploh ribee
Maseng jime alat sinyata

Leugat neujak u Buket Peutawi
Rakyat rame sajan sireuta
Teuduek haba nyan wahe abang
Raja Mambang ulon calitra

Jikheun ubak meuntroe Beureudan
Sireuta deungon Diu Indra
Udeh geutanyoe teubiet u mideuen
Bek le taiem he syeedara

'Oh ka mate ulonteu sidroe
Teuma dudoe gata tagisa
Jinoe beudoh dum sibarang
Teubiet u padang he panglima

Ulon di keue gata di likot
Bek le teumakot he syeedara
'Oh lheueh sabda Juhan 'Alam
Jiteubiet yoh nyan u mideuen Raja

Juhan 'Alam teubiet sajan
Ateueh guda plang Raja Raya
Neungui meukuta dua blah pangkat
Rupa hibat hana tara

Meujeuneh-jeuneh rupa peukayan
Geumeulapan blet-blot cahya
Keumang payong iram-iram
Alamat prang Raja Raya

Nyang mat busu ateueh gajah
Nyang reugam panah ateueh guda
Nyang mat peudeueng ateueh wali
Jroh meuriti sukee Raja

Sireuta jideumpek meutaga that
Jideungo le rakyat Sulotan Kra
Bulia Zakaria jideumgo surak
Jiheh rakyat dum panglima

He syeedara dum na rakan
Teubiet u mideuen jak lawan Raja
Lanta Waila deungo sabda meunan
Jiteubiet u midan pantah sigra

Taeu badan hibat sangat
Meukilat-kilat jibeudoh cahya
Taeukeuh bajee tamse pualam
That le macam hana tara

Badan raya na ban gajah
Bulee mirah hijo wareuna
Sajan rakyat teubiet u mideuen
Uleebalang dum sama sireuta

Leugat jijak u teungoh mideuen
Hireuen ureueng kalon rupa
Lheueh nyan teubiet Raja lutong
Gak-gak Simbang teubiet sireuta

Raja-raja bruk ngon beuruang
Laen nibak nyan sama rata
Bulia Zahari teubiet sajan
Aneuk Sulotan Bulia Keumira

Leugat jijak u teungoh padang
Gunong jitatang bandum Raja
Nyang dirakyat jimat batee
Ladom kayee sideupa-deupa

'Oh sare troh u teungoh padang
Ka meuteumeung dua tandra
Raja Kra bandum guransang
Meurumpok lawan Mambang Indra

Sinoe jijak sideh pi jijak
Prang meuhayak hana tara
Meuhubo-hubo di teungoh padang
Diu ngon Mambang lawan raja Kra

Jipoh ngon kayee jisrom ngon batee
Seun siribee jigeulawa
Na sikeujab sinan muprang
Tiwah Mambang meunyum lia

Teungoh-teungoh geukeumeung plueng
Leumah ureueng le that teuka
Tamse reudok kandong ujeuen
Tamse tupheuen bade teuka

Sajan payong deungon alam
Meuribee ban jeuneh rupa
'Oh sare deuh dum angkatan
Teutap 'oh nan prang sikutika

Adak kon seubab teuka angkatan
Diu ngon Mambang bandum ka pana
Sayhi Beurama ka troh keunan
Leumah jikalon le rakyat dum na

Neupeudong alam Jamalolhekmah
Nyan alamat ureueng tuha
Cahi Beurama neuyue bak rakan
Jak intat kireman keu Raja donya

Sidroe neuyue jak bak Raja Mambang
Jijak le rijang pantah sigra
Rakyat jijak lanja leugat
Phon jibri surat keu Raja donya

'Oh troh bak rakyat jibri surat
'Oh ban neulihat hate suka
Neukalon surat Jamalolhekmah
Neuyue teubiet rakyat dum na

Sulotan Peutawi teubiet u mideuen
Uleebalang dum sajan sireuta
Jijak meuteumeung deungon guree
Sajan teubee ngon u muda

Sare hase dum beukailan
Teubiet sulotan u mideuen Raja
Bak raja Kra neubri bi'at
Ka troh surat bak guree Tapa

Raja kheun le nibak rakyat
Piyoh bak teutap dum na gata
Raja Kra teuma jijak sajan
Ngon sulotan Raja donya

Dua blah droe raja hutan
Nyang jak sajan deungon Raja
Troh teujali u teungoh padang
Leugat meuteumeung ngon guree Tapa

Beureuma kalon Raja Peutawi
That got sakti hana tara
Syahi Beurama teuduek sapat
Tanyong syeewarat ubak Raja

Pakri Tuanku haba lam surat
Ban nyang narit Syiah Tapa
Seuot Raja neukheun meunoe
Nibak kamoe ateueh jeumala

Syahi Beurama deungo haba meunan
That sukaan hana tara
Sulotan Biram teutap sinan
Ureueng me kireman ulon calitra

Troh ka jijak bak Raja Mambang
Jibri kireman pantah sigra
Raja Mambang kalon surat
Hate mangat hana tara

Teuma neupeugah ubak Diu
Ban nyang laku neucalitra
Raja Mambang yue piyoh rakyat
Ubak teumpat maseng jeumba

Raja Mambang ngon Raja Diu
Laen laku uleebalang Raja
Neujak meuteumeung ngon Beurama Syeh
Bek tabantah guree Tapa

Troh bak khimah tamong leugat
Jaroe jimumat bandum rata
Raja Mambang kalon Sulotan Peutawi
Rakyat rame ngadap lingka

Syahi Beurama pumat jaroe
Raja Bumoe ngon Raja Indra
Lheueh pumat jaroe dua Raja nyan
Marit le yoh nyan Syahi Beurama

He Raja Mambang tadeungo kamoe
Pakri jinoe nibak gata
Teuma seuot Raja Mambang
Bak lontuan ban nyang suka

Meung nyo meunan tadeungo kamoe
Idin Putroe keu Raja donya
Sulotan Peutawi bak jai ka sabat
Bek le keusumat ngon Raja Muda

Bek seubab gata he Raja Mambang
Dudoe jeuet prang ngon Raja Muda
Jinoe gata bak jeuet keu sabat
Bek le keusumat singoh dan lusa

Raja Mambang seuot meunoe
Tuanku bak kamoe hana le dawa
Udeb mate bak lontuan
Nyawong badan hukom gata

Syahi Beurama deungo haba meunan
That sukaan han tara
Seubab ka troh pinta hajat
Ka jeuet sabat dua Raja

Lheueh nibak nyan padum uroe
Neulakee droe Syahi Beurama
Idin ulon jinoo lon riwang
Seubab mantong teungoh tapa

Hanjeuet lon jak lom u nanggroe
Keureuna kamoe hana troh tapa
Lheueh nyan neuwoe dalam gunung
Tinggai Mambang Raja donya

Sulotan Peutawi kheun bak Juhan 'Alam
Udeh u dalam tamong bak hamba
Bek di sinoe di teungoh midan
Udeh beujalan dalam kuta

Teuma seuot Juhan 'Alam
Nibak lontuan ateueh jeumala
Jinoo neuwoe Tuanku dilee
Kamoe jamee di likot gata

Sulotan Peutawi deungo haba meunan
Neuwoe u dalam pantah sigra
Bulia Keumira jilakee droe
Jikeumeung woe dalam rimba

Bulia Keumira teuma riwang
Rakyat sajan meuribee laksa
Juhan 'Alam tamong u dalam
Lheueh meuriam ateueh kuta

Tanda mulia neubri horeumat
Neubri teupat nyang mulia
Yoh phon musoh jinoo ka sabat
Dum na rakyat hate suka

Juhan 'Alam geuduek bak bale
Ateueh keurusi singgasana
Samingun Juhari tren bak ayah
Jitatang karah Putroe Muda

Troh le jitren bak Juhan 'Alam
Jibri puan 'oh lheueh seumbahnya
Raja Mambang kalon cut Putroe
Neucom bak dhoe bijeh mata

Mangat hate hana bagoe
Suami Putroe Raja Raya
Lheueh nyan Putroe ek u meuligoe
Neuduek sidroe lam astana

Juhan 'Alam sajan rakan
Geubet makanan makeuen rata
'Oh lheueh makeuen pinah hidang
Teutap sinan dalam kuta

Padum uroe lheueh nibak nyan
Juhan 'Alam lakee gisa
Nibak Raja Peutawi Biram
Neulakee idin bak Putroe Muda

'Oh lheueh idin bak sulotan
Juhan 'Alam jinoe gisa
Sajan rakyat that barollah
Na siteungoh nyang ka panas

Leugat jiwoe nanggroe Mambang
Diu meuriwang bak Raja Muda
Troh bak Raja Ka neutanyong
Soe talo prang lon eu tagisa

Teuma seuot uleebalang
Ampon laman po meukuta
Sulotan Peutawi Raja angkatan
Han ek soe lawan sakti raya

'Oh tiwah kamoe di mideuen prang
Teuka angkatan guree Tapa
Neujak pumeu'ah Raja nanggroe
Dengon kamoe han le jeuet dawa

Jinoe Tuanku ka jeuet keu sabat
Meusyeuhu that Raja donya
'Oh neudeungo haba meunan
Han le kalam Raja Muda

Teutap sinan muda samlakoe
Dalam nanggroe Diu Indra
Sukacita malam uroe
Sajan Putroe Keumala Donya

Raja Mambang pi ka troh woe
Teutap bak nanggroe han le goga
Samingun Juhari teutap jipuwoe
Dalam jaroe Raja donya

Maseng-maseng teutap bak teumpat
'Oh hase tamat saboh haba
A L K I S A H wahe rakan
Laen karangan lon calitra

Lon puwoe kisah Diu Palinggam
Geuduek di dalam Buket Miga
Hate mangat geumeudasyah
Meusyeuhu meugah dalam antara

Didendayang peuet ploh droe sajan
Uroe ngon malam meuseunda-seunda
Bak siuroe Tuan Putroe
Neumarit meunoe deungon Banta

Ampon Tuanku meuribee ampon
Neudeungo ulon po meukuta
Meunyo Tuanku neugaseh kamoe
Keudeh jinoe tren u donya

Lon jak manoe bak Guha Tanjong
Nibak taman kulam seuninya
Diu Palinggam deungo haba meunan
Neukheun le yoh nyan meunoe sigra

Meunyo tatren adoe bak kulam
Bak troh beujalan u nanggroe hamba
Hana troh lon jak nyan u nanggroe
Han jeuet tawoe keunoe tagisa

Jinoe tajak peugah bak ayah
Mangat talangkah tren u donya
Cut Nila Wati deungo sabda meunan
Jitren le yoh nyan ubak ayahanda

Troh bak Raja ka jiseumbah
Jaroe dua blah ateueh jeumala
Jaroe jibeu-et meuek neutren
Jilakee ampon meu'ah deesya

Ampon Tuanku meuribee ampon
Neudeungo lon he ayahanda
Idin ayah lon tren u bumoe
Lon jak manoe bak kulam donya

Teuma seuot Baginda Sulotan
Peugah he intan bak cutda gata
Keudeh tapeugah bak Diu Palinggam
Nibak lontuan hana dawa

Seuot teuma Putroe intan
Diu pi sajan tren u donya
Meunyo meunan he aneuk droe
Idin kamoe bijeh mata

'Oh Putroe deungo haba ayah
Jiek pantah teuma bak Banta
Diu Palinggam tanyong bak Putroe
Pakri adoe narit ayahanda

Teuma seuot Tuan Putroe
Neubri jinoe idin lon bungka
Diu Palinggam deungo narit Putroe
Neuyue jinoe meukeumah sigra

Nila Wati peukeumah droe
Peukayan jingui bak angeeta
Sare habeh jingui peukayan
Rupajih ban uroe keulua

Putroe neutren di meuligoe
Pekayan bak asoe na yum sibara
Putroe neutren neujak leugat
Dum na rakyat keunan mata

Bak cok langkah that meusigak
Miseue meurak woe di rimba
Soe nyang kalon hate galak
Ka jitalak keunan mata

Putroe jijak dalam jurong
Meukeulubong ija sutra
Leupah jurong troh le u blang
Payong pi keumang ateueh keupala

Jitiek langkah jipoh linggang
Soe nyang pandang hate gila
Phon meuteumeung ureueng koh naleueng
Bak Putroe meugleueng jipubloe mata

Jikoh neleueng ka roh jaroe
Mata bak Putroe hana reuda
Neucre sinan Tuan Putroe
Ureueng meuumpoe bak rot raya

Jiumpoe naleueng ka roh pade
Dijih hate keu Putroe Muda
Neucre sinan Banta ngon Putroe
Ureueng meugoe bak rot raya

Jimu'ue umong ka roh ateueng
Matajih hireuen bak Putroe Muda
Neucre sinan Putroe meugleueng
Lom meuteumeung pande teumeumpa

Jipeh beusoe ka roh keu landah
Dijih dasyah bak Putroe Muda
Neucre lom sinan Putroe cangklak
Lom meurumpok ureueng suleueng guda

Dijih mata tahe bak Putroe
Putoh jaroe jikab le guda
Leupah sinan Putroe sambinoe
Meuteumeung sidroe ureueng pheuet bara

Mupakhok nuga teuma bak jaroe
Dijih bak Putroe lale mata
Neucre sinan Putroe lalu
Ureueng pot u di rot raya

Jingieng bak Putroe hana malee
Luka ulee darah keulua
Neucre sinan Tuan Putroe Ti
Ureueng bak jeungki di rot raya

Jeungki jibet hana teudoh
Bak Putroe jroh keunan mata
Ureueng seumeuroh ka puntong jaroe
Mata bak Putroe jitalak hawa

Putroe kheun le narit meunoe
Bek tatob jaroe wahe cutda
Pade mantong lon eu lam eumpang
Pakon that rijang jaroe taseuba

Hana jiseuot narit Putroe
Dijih laloe keunan mata
Neucre sinan Putroe ceudah
Ureueng teumarah bak rot raya

Jitak kayee mata bak Putroe
Teuma dudoe ka jitak pha
Neucre sinan Putroe Diu
Ureueng pot u di rot raya

Jipot nyang masak ka roh nyang pateuen
Dijih hireuen Putroe jroh rupa
Meunan-meunan tiep-tiep gampong
Adak lam jurong pi meunan rupa

Inong agam han peue peugah
Sobhanallah le that teuka
Keureuna meugah Putroe intan
Jak meutandang ngon judonya

Jeueb-jeueb nanggroe meugah meusyeuhu
Ban bintang timu Putroe ngon Raja
Hana miseue ngon teuladan
Cut Putroe intan meucahya-cahya

Nyankeuh seubab meugah lam nanggroe
Ureueng sinaroe jak kalon rupa
Bit nyo ban kheun haba geupeugah
Kon beurakah ureueng donya

Neucre sinan Putroe seudang
Neupoh linggang ban meurak sama
Neulhom tapak leumoh-leumbot
Ban leuek meulot ngon judonya

Neutiek jaroe neualeh linggang
Neupeuseunang bak pinto donya
Leugat jitren le u bumoe
Jitakat jinoe gunong raya

Lanja ateueh gunong manyang
Leugat bak kulam meuseuninya
Troh bak kulam Tuan Putroe
Piyoh jinoe bak kulam raksa

'Oh tho reuoh teuma jak manoe
Dendayang tujuh droe sajan sireuta
'Oh lleueh manoe cut Putroe intan
Salen basahan pantah sigra

Nila Wati ngui peukayan
Ban lakuan aneuk Raja
Putroe ngon Banta piyoh bak kulam
Uroe pi malam le ho sinja

Diu Palinggam teutap sinan
Bak malam nyan dalam rimba
Beungoh uroe tren jak manoe
Banta ngon Putroe suka reumasa

'Oh lleueh makeuen Banta cok langkah
Cut Putroe indah sajan neuba
Rot dalam gle Diu meulangkah
Teukeudi Allah sisat lam rimba

Kheundak Tuhan peurintah Allah
Keumeung mubantah deungon syeedara
Tujuh uroe neubeujalan
Leumah padang Indra Diwa

Troh bak nanggroe Indra Peulimbang
U teungoh padang neujak lanja
Banta piyoh bak pante manikam
Di teungoh padang nanggroe Raja

Keurajeuen sinan Budiman Sakti
Nyang that beurani meusyeuhu nama
Nyankeuh aduen Diu Palinggam
Nyang duek di dalam mat neuraca

Diu Palinggam piyoh di mideuen
Teuka le keunan meuntroe peudana
Jikalon Putroe lang-geumilang
Miseue bintang malam jula

Ubak Raja jijak peugah
Teuma jiseumbah teuot Raja
Ampon Tuanku meuribee katoe
Neudeungo kamoe sipatah haba

Na sidroe ureueng piyoh di padang
Putroe sang bintang sajan jiba
Tujoh dendayang dum sambinoe
Sidroe Putroe nyang that jroh rupa

Budiman Sakti deungo narit meuntroe
Neuyue le jinoe jak pareksa
Jak leh teubiet gata sinaroe
Yue tamong keunoe lon meung eu rupa

Kayue tamong keunoe Putroe
Tinggai lakoe di mideuen Raja
Adak han jitamong kacok Putroe
Kaba keunoe dalam kuta

Adak han jibri deungon mangat
Jih kaikat Putroe kaba
'Oh meuntroe deungo haba meunan
Jiteubiet yoh nyan u mideuen Raja

Sajan rakyat ngon pahlawan
U teungoh padang jijak lanja
'Oh sare troh bak Diu Palinggam
Jitanyong yoh nyan sipatah haba

Tadeungo he muda samlakoe
Pane nanggroe ho keumeung bungka
Teuma seuot Diu Palinggam
Tadeungo lontuan he peudana

Dilon nanggroe di Miga Awan
Lon keumeung jalan u nanggroe Jawa
Peue bicara lon tatanyong
Peugah bak keunong peue na sabda

Teuma seuot peudana meuntroe
Tadeungo kamoe wahe Banta
Poteu Raja nyang di dalam
Gata neuyue prang han neubri bungka

Neuyue lakee Tuan Putroe
Peutamong jinoe keudeh bak Raja
Saleuem Raja Budiman Sakti
Putroe Juhari neuyue me sigra

Tinggai gata sinoe di mideuen
Putroe meugleueng lon me bak Raja
Nila Wati deungo narit bujang
Teusinyom yoh nyan Putroe Muda

Diu Palinggam deungo haba meuntroe
Amarah jinoe ban uleue bisa
Rupa hibat han soe jeuet pandang
Na tamse ban uroe teungoh kha

Sireuta neukheun bak lem meuntroe
Tadeungo kamoe lem peudana
Kakheun saleuem lon keudeh u dalam
Si Mereudan 'Alam lon jok keu Raja

Lom pi takheun sipatah kalam
Bek tabri tham teungoh lon bungka
Kujak kuwoe han soe jeuet tham
Peue meung jih agam kamoe dara

Bek jiharap keu le angkatan
Sidroe kulawan han peue meulaksa
Bek takeuneung drob aneuk rimoeng bueh
Cit kayem lheueh-lheueh dalam bahya

Phon di donya lantak lam awan
Cit dalam prang guna biasa
Nyoe ka treb hana tom muprang
Simideuen 'Alam bah lon cuba

Han tom na ampon Simideuen 'Alam
Lawet neupulang uleh Raja
Bak siseun nyoe saleh na ampon
Meuseunoh bayeuen ngon Raja gata

Silawet neupulang cokma ngon peudeueng
Limong thon ka lheueng prang han tom na
Deumi jideungo meunan.kalam
Teukhem angkatan ban sineuna

Peue saleh gata tamarit meunan
Tapeusak untong keumeung tueng nama
Kamoe meulaksa gata siurang
Pakri tamuprang sidroe gata

Gata lon syen bukon bubarang
Weueh that lon pandang seubab jroh rupa
Surot gata tinggai bintang
Di kamoe sayang that keu gata

Jak leh taplueng bek le teudong
Mate mantong hana bila
Weueh lon kalon rupa carong
Bek le teudong jak tabungka

Gata seulammat bahya han keunong
Tabri bungong lon me keu Raja
Bek tameung lagee sane meuganong
Adak han nyawong tuboh teu luka

Teuma seuot Diu Palinggam
Rupa miseue ban uleue bisa
Hate saket bukon bubarang
Rakyat neupandang na ube seuma

Pakri laku Putroe sambinoe
Raja nanggroe nyoe lalem raya
Takheun saleuem nibak kamoe
Talakee Putroe peurumoh Raja

Tayue intat keunoe beurijang
Lon di padang goh lon bungka
Padum na mangat padum na seungkoe
Meunan dikamoe talakee bunga

Meunankeuh dilon talakee Putroe
Bah that sidroe kulawan Raja
Bahle lon lingkeue sane meuganong
'Oh habeh nyawong bah tatueng bunga

Meung na mantong nyawong lam badan
Han lon bri bintang tame keu Raja
Tacuba cok Tuan Putroe
Kukoh jaroe kurancong pha

'Oh ban jideungo haba meunan
Rakyat yoh nyan beungeh raya
Teuma jilingka muda samlakoe
Peudeueng bak jaroe bandum rata

Lon paban bah gata sidroe
Narit seungkoe meuganda-ganda
Meuploh-ploh seun lon peurunoe
Gata sidroe keumeung binasa

Bit kreueh mawot gata sidroe
Lon peurunoe han tapeucaya
Meuploh-ploh seun lon peuingat
Gata maken that teuangkara

Pakri talawan dum noe rakyat
Meung kon ka sisat nyawong lam dada
Gata cit sidroe kamoe le that
Padum na kuat meung sidroe gata

Meung panglima han ek tahimat
Pakri that kuat meung sidroe gata
Peudeueng jisayong dum na rakyat
Teuma jihadap dum bak Banta

Diu Palinggam peudeueng lam sarong
Goh lom neusayong mantong meuhaba
Sireuta neumat bak ulee peudeueng
Meunoe le neukheun bak rakyat dum na

Peue han tadong wie ngon uneun
Keureuna peudeueng jikheundak sama
Jikeumeung jeb darah ureueng
Nyoekeuh peudeueng gunong Miga

Nyankeuh peudeueng Kama 'Alam
Simideuen 'Alam geurasi nama
Meung ka lon suet peudeueng lam sarong
Beurangsoe agam gadoh bisa

Lon peuingat gata he rakan
Beutatuban peudeueng seumapa
Bak taturi Diu Palinggam
Beuleuheuen Tuan bek tasangga

Teuma neubet peudeueng meulayang
Wie ngon uneun habeh pana
Sigo u nab ngon u likot
Lheueh nyan neugrob dalam tandra

Wie ngon uneun reubah peudeueng
Mate ureueng meuribee laksa
Diu Palinggam pantah ban kilat
Le that rakyat neutueng nyawa

Sira neutak neupeuingat
Jak woe he sabat dalam kuta
Keukheun bek tatham aneuk rimueng bueh
Karasa goh nyawong keulua

Diu Palinggam that guransang
Di teungoh padang neulila-lila
Mate meuntroe ngon pahlawan
Sigo neucang le ngon gaza

Na siteungoh nyang ka mate
Jisurot le dum lam kuta
Habeh jiplueng dum u dalam
Diu Palinggam that peukasa

'Oh neukalon hana le lawan
Lheueh nyan neuriwang bak Putroe Muda
Badan payah tutong asoe
Piyoh le jinoo sikutika

Na sikeujab piyoh di sinan
Reubah pangsang le teuhanta
Jimueng ulee teuma le Putroe
Dayang dua droe pot-pot lingka

Diu Palinggam teutap di mideuen
Muwoe habaran u dalam kuta
Baginda kalon rakyat riwang
Neutanyong yoh nyan neupareksa

Pakon rijang lon eu tawoe
Ka tacok Putroe ho ka taba
Teuma seuot sidroe rakan
Ampon laman po meukuta

Raja di mideuen Tuanku that gagah
Le that kapilah nyang ka pana
Habeh mate dum pahlawan
Uleebalang ngon peudana

Jinoo Tuanku pakri padan
Toh rot jalan talawan Raja
Teuma seuot Baginda Sulotan
Tadeungo lon kheun he syeedara

Jinoo tajak krah dum uleebalang
Ngon pahlawan bak habeh teuka
Mangat jinoo tateubiet u padang
Jinoo tatham Putroe Muda

Mangat tatuntut pahlawan mate
Teubiet bak sare tuha muda
'Oh ban jideungo haba sulotan
Amarah yoh nyan dum na panglima

Teuma jiteubiet le u mideuen
Rakyat sajan meuribee laksa
Nyang reugam peudeueng ateueh gajah
Nyang mat panah ateueh guda

Nyang mat cokma ateueh waliman
Ban lakuan adat Raja
Nyang mubareh mat sinampang
Ateueh guda plang nyang panglima

Bak raja-raja payong zolzari
Dong meuriti di mideuen Raja
Keumang ngon alam bak panglima prang
Bak uleebalang bajee teumaga

Rakyat teubiet habeh han habeh
Peudeueng puteh ulee suasa
Nyang blah mubareh rata sinampang
Kreh meudolang bak raja-raja

Jipeh ngon tambo arak-arakan
Seurune ngon geundrang that geulura
Sare habeh troh u mideuen
Putroe meugleueng kalon tandra

Lheueh nyan neupeugoe Diu Palinggam
Putroe intan hate lia
Bek meung jaga meugrak pi tan
Dua lhee seun Putroe hila

Yoh nyan Putroe gundah hate
Jinoe pakri lon bicara
Peue jeuet lon peugoe paidah tan
Bah lontuan jinoe gaza

Meunankeuh leumah dalam hate
Putroe Siti le bicara
Lheueh nyan jibeuet saboh hekeumat
Ka jeuet laot mideuen Raja

Meual kalon ngon geulumbang
Hireuen tapandang hana tara
Rakyat di mideuen kalon laot
Dum habeh krot ngon ie muka

Yoh nyan marit sidroe uleebalang
Jitanyong padan pakri bicara
Hoka gata dum na rakan
Dum sikeulian tuha muda

Soe nyang na troh sakti lam badan
Doe laot nyan uleh gata
Teuma seuot sidroe uleebalang
Syahi Midan geurasi nama

Insya Allah ngon do'a guree
Nyang bri eleumee di dalam dada
Jinoe lon doe laot di mideuen
Idin ulon masok tapa

Meung lhee uroe lon teukhalued
Do'a lon beuet sakti lon puja
'Oh lheueh neukheun nyan Syahi Midan
Tamong le yoh nyan dalam tapa

Jaroe meulinteueng dua tangan
Neulakee bak Tuhan puleh do'a
'Oh sare troh ka lhee uroe
Jiteupok jaroe ateueh donya

Doe le laot jeuet keu padang
Rakyat sikeulian hate suka
Sireuta jideumpek bukon buatan
That guransang ban saboh donya

Takalon jijak lanja u mideuen
Jimat peudeueng dumjih rata
Jipeutoe leugat ubak Putroe
Dum sinaroe meusuka-suka

'Oh ban Putroe eu rakyat ka keunan
Jibeuet le yoh nyan saboh do'a
Ka jeuet apui di teungoh mideuen
Tahe hireuen rakyat dum na

Apui raya that hana bagoe
Rakyat sinaroe hate lia
Le that mate ureueng di mideuen
Keunong apui hanco anggeeta

Syahi Midan teuma meukalam
Jitanyong yoh nyan bak syeedara
Hoka gata uleebalang
Ngon pahlawan nyang that peukasa

Apui lon kalon raya sangat
Le that rakyat nyang ka pana
Soe nyang na troh sakti lam badan
Peulen apui nyan uleh gata

Teuma seuot sidroe uleebalang
Di hadapan dum na tandra
Ami Zaban geurasi nan
Jibet tangan ateueh jeumala

Insya Allah ngon tulong Rabbi
Bahle lon cuba ci sakti lon mula
Ami Zaban jibeuet hekeumat
Apui ranab di mideuen Raja

Rakyat beudoh dum sinaroe
Jijak jinoe bak Putroe Muda
'Oh ban Putroe eu rakyat ka keunan
Jibeuet le yoh nyan hekeumat donya

Ubak bumoe neutepok jaroe
Tuan Putroe le bicara
Ie di laot jiek u darat
Sajan ngon kilat geulanteue teuka

Langet pi klam bumoe pi seupot
Yoh nyan teukeujot rakyat dum na
Sigala rakyat Indra Peulimbang
Di teungoh padang meugisa-gisa

Ami Zaban beuet hekeumat
Deungon siat muwoe ban nyang ka
Peungeuh mideuen ureueng trang bandrang
Putroe pandang rakyat meulaksa

Rakyat yoh nyan bandum gurangsang
Jipeurab yoh nyan bak Putroe Muda
Diu Palinggam jikalon pangsang
Rakyat sikeulian hate suka

Putroe Siti peudeueng bak jaroe
Rakyat sinaroe keunan mata
Dendayang dua muka pucat
Keureuna seubab rakyat meulaksa

Tuan Putroe pi lia hate
Neupeurab le ubak Banta
Putroe peugoe Diu Palinggam
Roh teusrong tangan teuma bak dada

Teubiet asap deungon apui
Teukeujot Putroe kalon rupa
Teubiet teuma lam asap nyan
Cumboi manikam dalam mata

Putroe buka keumala hekeumat
Tujoh reutoh rakyat sinan keulua
Cahya Kaindran keunan datang
Sajan rakan dum sireuta

Jibet jaroe seumbah Siti
Ubak gaki sujud sigra
Keupeue pocut neupangge lon
Ho neusuron kamoe dum na

Teuma seuot Tuan Putroe
Tadeungo kamoe he panglima
Nyang lon pangge gata sinaroe
Keureuna kamoe ka keunong bahya

Teungoh keumeung woe u nanggroe
Jitham kamoe uleh Raja
Jinoe gata jak lawan prang
Jeh di padang rakyat meulaksa

Cahya Indra deungo haba meunan
U teungoh padang jijak gaza
Tujoh reutoh siseun masok prang
Dum sikeulian that peukasa

Rakyat nanggroe eu teuka lawan
Amarah yoh nyan dum panglima
Yoh nyan ka prang sabong-meunyabong
Bireng ngon seudong meuseunoh bisa

Deumpek surak meutaga 'Alam
Le that pahlawan nyang peukasa
Meuhubo-hubo di teungoh mideuen
Jimeukab limpeuen deungon kala

Diu Peukasa di teungoh padang
Peudeueng bak tangan sajan ngon cokma
Neucang ureueng wie ngon uneun
Le that ureueng nyang ka pana

Cahya Kaindran pi that guransang
Amarah sajan Cahya Indra
Meuhubo-hubo deumpek ngon surak
Bumoe meugrak-grak miseue geumpa

Teuma teukeujot Diu Palinggam
Neubeudoh rijang pantah sigra
Neukeumeung tajo leugat u padang
Jimat bak tangan le Putroe Muda

Banta tanyong teuma bak Putroe
Soe jeh adoe di mideuen Raja
Lon eu ureueng le that di padang
Soe lawan prang tulong gata

Teuma seuot Putroe Siti
Ampon Doli laman sroepada
Nyang di mideuen rakan Tuanku
Nyang duek meusyehu dalam keumala

Yoh teuka musoh bandum keunoe
Tuanku lon peugoe han ek jaga
Ubak dada roh lon boh jaroe
Teubiet le jinoe cumboi lam mata

Diu Palinggam deungo narit Putroe
Incien bak jaroe neutiek u donya
Jeuet le kuta di teungoh miduen
Sireuta sajan ngon astana

Diu Palinggam tamong u dalam
Putroe sajan dendayang sama
Leugat neuek lam meuligoe
Neungieng jinoe u mideuen Raja

Diu Peukasa di teungoh mideuen
Wie ngon uneun neucang tandra
Watee meuteumeung sabe pahlawan
Adu saktian di mideuen Raja


Teuma tiwah ureueng po nanggroe
Surak le jinoe dalam kuta
Budiman sakti eu rakan riwang
Ka neutanyong pantah sigra

Pakon taplueng gata sinaroe
Pane keunoe lawan teuka
Teuma seuot Syahi Midan
Ampon laman po meukuta

Tujoh reutoh Tuanku pahlawan
Hibat ruman ngon peukasa
Raya sakti Tuanku di mideuen
Dum na ureueng han meune teuka

Dua blah droe nyang pahlawan
Rupajih ban bintang kala
Han tajeuet ngieng meung bak ruman
Hana lawan hibat rupa

Jinoe Tuanku gata bak ingat
Saleh troh hat tinggai donya
Adak jitamong bandum keunoe
Dum na kamoe han ek theun sangga



Dilee buet cut Tuanku ampon
Bak peunyum lon jinoe bit ka raya
'Oh Raja deungo narit meunan
Amarah le yoh nyan hu ngon mata

Teuma neuyue krah jeueb-jeueb sulotan
Neuyue beujalan dum peutua
Ami Zaban nyang jak keumeurah
Jeueb-jeueb dairah neumat Raja

Neuyue jitren dum sulotan
Bak troh rijang jeueb-jeueb raja
Soe nyang han troh ingat keudroe
Uroe dudoe lon boh peukara

'Oh lheueh sabda Budiman Sakti
Teuma jijak le pantah sigra
Teuduek haba ureueng keumeurah
Jinoe-lon peugah Diu Peukasa

Jikalon lawan han le di mideuen
Teuma jiriwang laju bak Raja
'Oh troh jiwoe bak Diu Palinggam
Leugat jitamong dalam kuta

Troh lam kuta seumbah sulotan
Marit le yoh nyan Diu Peukasa
Ampon Tuanku seumbah laman
Geutanyoe Tuan bit geusangga

Raja nanggroe nyoe ka jikrah rakyat
Jiyue peusapat jeueb-jeueb raja
Meunyo habeh troh bandum keunoe
Tiwah geutanyoe po meukuta

Jinoe Tuanku pakri padan
Talakee tulongan u Buket Miga
Bek tiwah prang Tuanku geutanyoe
Patot jinoe takirem haba

Diu Palinggam deungo haba rakan
Amarah le yoh nyan hana tara
Pakon meunan wahe rakan
That lupaan dum na gata

Pakon teumakot gob le angkatan
Dilon he rakan han gli geunta
Pakri han teuingat dum sibarang
Masa taprang gunong Miga

Han le teuingat wasiet Beurahman
Nyang bri saktian dalam rimba
Maken le rakyat mangat tacang
Han srot geudubang ateuh donya

Teutapi gata lon peuingat
Lon amanat bek that lupa
Watee meurumpok deungon lawan
Bek that tacang nyang raja-raja

Kadang-kadang akhe dudoe
Bak geutanyoe jimasok teuma
Meunankeuh sabda Diu Palinggam
Tujoh reutoh rakan peuteubiet tandra

Hana sidroe nyang na bantah
Teutap piyoh dum panglima
Makeuen minom meusukaan
Muwoe karangan u mideuen Raja

Ami Zaban jak me surat
HabeH jiintat jeueb-jeueb raja
Ube nyang taklok Indra Peulimbang
Bandum tuan jibri haba

Umu lhee uroe jikrah sabe
Jeueb-jeueb lungkiek gle bandum raja
Troh bak Raja Muda Sakti
Surat jibri uleh panglima

'Oh jibri surat kireman
Ami Zaban jiwoe gisa
Troh u nanggroë bak sulotan
Jiyue pahlawan teubiet jak gaza

Ahmad Peulita saboh pahlawan
Teubiet u mideuen suroh Raja
Jipasang guda lanja u mideuen
Rakyat sajan meuribee laksa

Padum-padum 'Adi ngon Juhan
Uleebalang meuribee laksa
Keumang payong pupanji alam
U teungoh padang jijak gaza

Teungoh teubiet rakyat u padang
Troh angkatan sigala raja
Tujoh ploh raja nyang taklok keunan
Bak uroe nyan dum habeH teuka

Leugat jiteubiet dum u mideuen
Uleebalang meuribee laksa
Nyang mat busu ateueh gajah
Nyang mat panah ateueh guda

Nyang mat peudeueng ateueh waliman
Na miseue ban geulanteue teuka
Nyang jak di keue bareh sinampang
Di likot nyan bareh lila

Nyang raja-raja di yub payong intan
Uleebalang payong suasa
Keumang ngon payong iram-iram
Alamat prang ureueng le tandra

Nyang ulee kawan guda jipasang
Nyang uleebalang seurapah Indra
Payong mirah keupala prang
Intan meukarang reumboe meutia

'Oh sare troh u teungoh padang
Jideumpek yoh nyan that meutaga
Diu Palinggam kalon u mideuen
Neukalon ureueng meuribee laksa

Payong ngon alam han teubileueng
Le that ureueng dalam rimba
Miseue reudok kandong ujeuen
Miseue tupheuen angen raya

Teuma neupeugah bak Cahya Kaindran
Le that ureueng di mideuen Raja
Jak ka teubiet he pahlawan
Jak lawan prang gata dum na

Teuma seuot Cahya Kaindran
Idin laman lon jak gaza
Cahya Kaindran teubiet u midan
Neumeukandran seurapah Indra

Sikureueng ploh rakan ireng sajan
U teungoh padang jak le lanja
Neumupayong mirah ngon hijo
Hibat laku taeu rupa

Leugat neujak u teungoh mideuen
Neucang ureueng seun silaksa
Diu Peukasa teubiet 'Oh lheueh nyan
Lapan ploh rakan teubiet sama

Neugiduek ateueh unta peulari
Payong zolzari ateueh keupala
Cahya Indra teubiat 'oh lheuh nyan
Tujoh ploh rakan sajan sireuta

Neupasang ateueh guda hijo
Hibat laku hana tara
Neumupayong zamrot nyang hijo
Sigak laku sang gajah meunta

Teuma neusandang cokma ngon peudeueng
Leugat u mideuen neujak gaza
Neucang ureueng wie ngon uneun
Ban siwah naleueng ngon cempala

Lheueh nyan teubiet sikureueng pahlawan
Sajan rakan dum keulua
Maseng-maseng ateueh kandran
Ban lakuan maseng jeumba

Yoh nyan ka prang sabong-meunyabong
Na nyum ka tutong meuligoe Raja
Sinoe pi jiek sideh pi jijak
Prang meusigak hana tara

Meuhubo-hubo di teungoh mideuen
Cokma ngon peudeueng han teukira
Ka jimeucang tadeungo grub
Jimeugrob-grob di mideuen Raja

Deumpek ngon surak bumoe meuguncang
Surak pahlawan that meutaga
Nyang mat peudeueng sama peudeueng
Ladom meuteumeung peudeueng ngon cokma

Teubiet meuk apui miseue bintang
Meukarang-karang jiek lam hawa
Trang cuaca ka jeuet keu malam
Raya that prang hana tara

Hana le meuri kawan lawan
Miseue malam glab-gulita
'Oh le darah ateueh bumoe
Leumah le jinoe ureueng lam gaza

Ban ureueng meuen lam buleuen peungeuh
Dumnan keudeuh taeu rupa
Ahmad Peulita yoh masa nyan
Meuteumeung ngon Diu Peukasa

Raja Diu yoh nyan tanyong
Soe nan takheun jinoe gata
Lon eu lakuan sangat hibat
Jinoe he sabat peugah nama

Ahmad Peulita seuot rijang
Nama lontuan Ahmad Peulita
Dilon dalem ka lon peugah nan
Digata tuan soe bu nama

Adak mate gata di padang
Nyawong hilang tinggai nama
Diu Peukasa seuot pantah
Peue kapeugah Ahmad Peulita

Pakriban han malee dum muka kah
Jinoe kapeugah nyang kon haba
Kasangka mate lon di mideuen
Pakri kajeuet kheun meunan haba

Nyoekeuh murid Syahi Beurahman
Geurasi nan Diu Peukasa
Lon han teubiet nyawong di mideuen
Pakri gata kheun tinggai nama

Nyang got jinoe jak tariwang
Tanda lon sayang adoe keu gata
Gata muda rupa carong
Bek le tadong jak tagisa

Hana sabe padra ngon kamoe
Gata adoe umuteuh muda
Jinoe adek jak leh tawoe
Yue teubiet keunoe Raja gata

Yue teubiet keunoe Indra Peulimbang
Lon keumeung kalon pakri rupa
Ahmad seuot neukheun meunoe
Pakri tayue woe lon Raja

Meung ka lon teubiet pane lon woe
Malee that kamoe bak rakyat dum na
Nyoe pi saboh sane meuganong
Han tom soe linteung ube nyang ka

Jinoe he dalem gata jak riwang
That lon sayang kakeunda gata
Peue na tame keunoe halua
Tabri lon kalon keumeung rasa

Diu Peukasa mat cokma u jaroe
Neupoh le jinoe ateueh panglima
Ahmad Peulita peurise bak jaroe
Neukheun le meunoe sira neusangga

Keupeue tapoh payah mantong
Han tom keunong ube nyang ka
Peurise jitheun cokma pi srot
Jiteubiet meuk meubura-bura

Ahmad Peulita poh le balah
Diu pi pantah neutheun sangga
Keunong jipoh ateueh peurise
Miseue bade geulanteue raya

Diu Peukasa suet le peudeueng
Neudeumpek yoh nyan that meutaga
Ahmad Peulita hireuen teuceungong
Neutak ngon peudeueng keunong bak muka

Reubah meugule di ateueh mideuen
Ahmad yoh nyan tinggai nama
Sulotan Ahmad mate di mideuen
Amarah le ureueng raja-raja

Habeh jiteubiet dum u padang
Tujoh ploh sulotan teubiet jak gaza
Meusurak-surak di teungoh mideuen
Miseue bayeuen meulet di banda

Cahya Kaindran di teungoh padang
Miseue birang meuhambo bisa
Neucang rakyat ngon pahlawan
Bukon bubarang that guranta

Rakan dua blah bandum guransang
Di teungoh padang meugisa-gisa
Meunyum tiwah ureueng po nanggroe
Seubab that raghoe rakan Banta

Teuma jiplueng dum u dalam
Syahi Budiman kalon rupa
Teuma amarah Budiman Sakti
Neupasang le ateueh guda

Surak deumpek meualon-alon
Raja Budiman neupasang guda
Leugat neuteubiet u teungoh mideuen
Sireuta neukheun neubeuet do'a

Ubak pha wie neureutek jaroe
Teubiet apui meubura-bura
Teuma teubiet lam apui nyan
Aneuk Raja Jen dua syeedara

Sidroe geupeunan Hasyem Alfari
Sidroe geurasi Hamidolkama
'Oh troh keunan jaroe jiseuon
Jilakee ampon ubak Raja

Peue Tuanku neupangge kamoe
Takheun jinoe siri sabda
Teuma seuot Raja Budiman
Gata lon peusan he syeedara

Keureuna lon ka roh dalam prang
Jinoe jak lawan Raja teuka
Le that rakyat nyang ka mate
Jinoe pakri ubak gata

Hasyem Alfari deungo sabda meunan
Amarah le yoh nyan hu ngon mata
'Oh lheueh nyan deumpek meuguncang 'Alam
Teubiet lam tangan peudeueng ngon cokma

Leugat jiteubiet u teungoh mideuen
Jipinta rakan nanggroë lam hawa
Troh le rakyat ka peunoh padang
Bukon bubarang geugap-gumpita

Diu Peukasa di teungoh mideuen
Neukalon ureueng teubiet lam kuta
Rupa hibat hana lawan
Teuka angkatan dalam hawa

Bak Cahya Indra jitanyong padan
Pakri he rakan dum syeedara
Lon eu rakyat teuka lam awan
Alat bak tangan peudeueng ngon cokma

Teuma seuot Cahya Kaindran
Neumarit ngon Diu Peukasa
Bek that gundah adek badan
Tulong Tuhan ateueh hamba

Keureuna geutanyoe adak mit rakan
Han jeuet takheun ban bak Baginda
Adak talakee laen tulong
Geukheun geusuen geutanyoe dum na

Jinoe bahle dum na rakan
Mangat that tacang meung ka le tandra
Bek tatakot keu le ureueng
Udeh taampeueng u gaki kuta

Diu Peukasa deungo narit rakan
Amarah yoh nyan dum panglima
Neumat peudeueng ubak jaroe
Jak le jinoe u teungoh tandra

Ka jinari di teungoh mideuen
Miseue bayeuken meuen lam cintra
Neucang ureueng di teungoh mideuen
Wie ngon uneun mate meulaksa

Diu Peukasa that guransang
Di teungoh padang meulila-lila
Ri nyang leumah u hadapan
Habeu simpan ngon sikleb mata

Meuhayak-hayak di teungoh padang
Raya that prang leubeu bak nyang ka
Tujoh uroe tujoh malam
Tiwah rakan Raja Indra

Diu Peukasa meunyum ugah
Neusurot pantah dalam kuta
Diu Palinggam tiwah rakan
Neupinta rijang hekeumat donya

Ubak bumoe neuceukam gaki
Teubiet mata ie meubura-bura
Teuma teubiet dalam ie nyan
Aneuk Raja Jen di baroh donya

Rupa hibat hana sakri
Nama geurasi Sa'idilkama
Troh bak Raja jihei ampon
Jaroe jiseuon ateueh jeumala

Pakon Tuanku neupangge kamoe
Neukheun jinoe lon deungo nyata
Teuma seuot Diu Palinggam
Tadeungo lon kheun wahe Raja

Keureuna lon ka roh dalam prang
Ka jisagang teungoh lon bungka
Jinoe he Raja jak lawan prang
Gaseh ngon sayang tulong hamba

'Oh ban jideungo sabda meunan
Amarah le yoh nyan hu ngon mata
Sa'idilkama reutek ngon teuot
Jitarek janggut Raja ban tiga

Teubiet saboh aneuk guda plang
Teuma jipasang u mideuen Raja
'Oh troh u mideuen jideumpek that
Teuka le rakyat di bawah donya

Teuka rakyat meuribee katoe
Rakyat di nanggroe Tahta Sara
Mubajee zireh keutupong beusoe
Peudeueng bak jaroe sajan ngon cokma

Ateueh guda dum jipasang
U teungoh padang jijak gaza
Sinoe pi jiek sideh pi jijak
Deumpek ngon surak that meutaga

Yoh nyan ka prang that meusigak
Ka meurumpok sabe Raja
Meuhubo-hubo di teungoh padang
Sabe andalan han peue kira

Peuet blah uroe sabe muprang
Tiwah angkatan sukee lam hawa
Ureueng yub bumoe bandum guransang
Di teungoh padang jilila-lila

Syahi Budiman kalon tiwah sakti
Saket hate malee mata
Yoh nyan neupinta Raja di manyang
Raja Mambang ho saleh ka

Raja Indra ngon Raja Diu
Lon tabantu he Raja Muda
'Oh lheueh meusabda Raja Budiman
Raja lam awan thee rahsia

Raja Muda meunyum bak hate
Lon neupangge le ayahanda
'Oh lheueh nyan neukrah sigala rakyat
Habeu meusapat jeueb-jeueb raja

Dua ploh laksa raja lam awan
Neukirem kireman Raja Muda
Neuyue bak troh dum sinaroe
Hajat kamoe tren u donya

'Oh lheueh neuyue jak intat kireman
Neuek yoh nyan bak Sithon Geulima
Habeu neupeugah dum hareutoe
Ulon jinoe tren u donya

Teuduek haba Raja Diu
Laen laku lon calitra
A M M A B A K D U komdian lagi
Raja Usuli lon calitra

'Oh troh surat Indra Peulimbang
Jiboh di dalam saleuem aneukeunda
Meugah saleuem Raja Budiman
Baginda Sulotan hate suka

'Oh lheueh nyan neukrah dum uleebalang
Dum pahlawan tuha muda
Habehe dum tren panglima prang
Meuntroe uleebalang habehe teuka

Sireutoh tujuh plohe raja nyang taklok
Dum habehe trok ubak Raja
Sare habehe dum meusapat
Yoh nyan beurangkat Raja Tuha

Sajan 'Adi deungon Juhan
Beurangkat yoh nyan doli Baginda
Ateueh gajah Raja meukandra
Payong pi keumang panca wareuna

Jiireng uleh dum uleebalang
Ateueh guda plang jipoh lawa
Leugat neujak bak Indra Peulimbang
Peuet plohe pahlawan nyang ireng Raja

Teuduek haba Raja beurangkat
Muwoe riwayat nibak nyang ka
Raja Budiman suroh pahlawan
Teubiet u padang he syeedara

Bek katakot keu beuranggasoe
Teubiet jinoe lawan gaza
Keureuna geutanyoe ka leupah kalam
Bek jeuet maluan bak raja-raja

Ami Zaban deungo sabda meunan
Leugat jipasang ateueh guda
Lanja jijak u teungoh padang
'Adi ngon Juhan sajan sireuta

Taeu jiteubiet dum u mideuen
Jimat peudeueng puteh mata
Dua ploh ribee ateueh gajah
That barollah nyang ateueh guda

Sikureueng ribee ateueh waliman
Jroh lakuan hana tara
Sikureueng laksa nyang mat sinampang
U teungoh padang jijak gaza

Miseue reudok di seulatan
Meunan lakuan tapdra Raja
Sa'idilkama kalon lawan
U teungoh midan jijak gaza

Sajan rakyat ngon pahlawan
Uleebalang ngon balatandra
Teudong meuseueh-seueh di teungoh padang
Musta'id ngon alat sinyata

Teungoh-teungoh keumeung muprang
Leumah angkatan blah barat daya
Miseu reudok jikandong ujeuen
Le that ureueng meuribee laksa

Bandum ateueh gajah balohan
U teungoh padang le jihala
Ami Zaban hana jadeh prang
Seubab angkatan geupumeulia

Ho maken rab lanja keunan
U teungoh midan ka deuh nyata
Raja Usuli sajan rakyat
Dengon siat ka troh teuka

Raja Budiman teubiet le rijang
Neujak meuteumeung ngon ayahanda
Muda Sakti neuek leugat
Neubri teumpät nyang that mulia

Troh lam kuta Raja teumanyong
Peugah bak keunong he aneukeunda
Peue seubab aneuk gata tamuprang
Nyang di padang pi tan Raja

Teuma seuot Budiman Sakti
Ampon doli wahe ayahanda
Asai ulon nyang jeuet muprang
Sira wayang lon meuseunda

Lon yue lakee Putroe ban tanglong
Bak Raja datang po meukuta
Teuma jipoh peudana meuntroe
Akhe dudoe jeuet prang raya

Muda Sakti lom teumanyong
Raja di padang soe geuhei nama
Seuot le teuma Raja Budiman
Raja 'Alam he ayahanda

Sulotan Miga geurasi nan
Nyang keurajeuen lam awan miga
Teumpat keurajeuen Miga di Awan
Aneuk Sulotan Kama 'Alam Diwa

Muda Sakti deungo haba meunan
Hireuen Sulotan hana haba
Lheueh nyan neyue teubiet pahlawan
Jak lawan prang he panglima

Sulotan Miga sakti teubileueng
Jinoe cuba theun tandra Indra
'Oh ban jideungo sabda meunan
Dum na pahlawan amarah raya

Leugat jiteubiet u teungoh mideuen
Cokma ngon peudeueng bandum rata
Sireuta jideumpek jihei lawan
Teubiet u padang he ureueng Diwa

Sa'idilkama cit di mideuen
Yoh nyan meuteumeung dua tandra
Nyoe baro lom keumeung jeuet prang
Jipeukab peusan deungon kala

Deumpek ngon surak bumoe meuguncang
Raya that prang leubeh bak nyang ka
Payong meuriti di teungoh alam
Ateuh waliman nyang biek panglima

Yoh nyan meuteumeung sabe wadan
Nyang sulotan sabe Raja
Nyang di rakyat sabe rakyat
Mate le that ban dua tandra

Watee meuteumeung cokma ngon peudeueng
Di teungoh mideuen meuk teupanca
Teubiet meuk apui meukarang-karang
Miseue bintang malam jula

Sinoe suka sideh pi galak
Taeu jimeutak ban leuek kua
Tujoh reutoh rakan Diu Palinggam
That guransang hana tara

Ho nyang geucang habeh ranab
Ho jipagab dum seureupha
Peuet blah uroe sabe muprang
Tiwah yoh nyan ureueng po banda

Bandua si geupeh geundrang
Rakyat meuriwang dalam kuta
Teuduek haba ureueng muprang
Teutap 'oh nan sikutika

Kata sahibol eumpunya karangan
Lon seubot Tuan Raja Muda
A L K I S A H wahe teungku
Raja Diu lon calitra

Habeh jikrah dum na rakyat
Kheundak beurangkat tren u donya
Ubak bunda pi ka neupeugah
Raja seumbah Sithon Geulima

Idin keu lon ma sikarang
Kheundak lontuan tren u donya
Sithon Geulima marit meunoe
Tadeungo kamoe cuco Raja

Adak aneuk tatren u bumoe
Sajan kamoe aneuk taba
Bundateuh aneuk tame sajan
Ngon lontuan sajan sireuta

Cahya Nurani pi jak sajan
Laen dendayang bandum taba
Raja Muda deungo haba meunan
That sukaan hana tara

Neuyue peukeumah dum beukailan
Kheundak beujalan tren u donya
Sare hase dum peue leungkap
Lheueh nyan beurangkat Raja Muda

Sajan 'Adi dengon Juhan
Uleebalang nyang that peukasa
Maseng-maseng ateueh kandran
Kheundak beujalan tren u donya

Leugat neutuju bak Indra Peulimbang
'Adi ngon Juhan meuribee laksa
Raja Mambang pi ka beurangkat
'Oh troh surat bak Raja Muda

Habeh jikrah`dum pahlawan
Sikureueng sulotan dum sireuta
Leugat jitren dum u padang
'Adi ngon Juhan meuribee laksa

Habeh keumah 'oh troh surat
Yoh nyan beurangkat ngon bala tandra
Tujoh blah raja habeh meusapat
Yoh nyan beurangkat tren u donya

Meuseundi-seundi rupa peukayan
Ateuh kandran bandum rata
Maseng-maseng raya sakti
Siteungoh ri ateuh singa

Ladom ateuh rata teureubang
Ladom pasang ateuh naga
Ladom ateuh keurapat teureubang
Nyang uleebalang seurapah Indra

Nyang raja-raja uleebalang
Ladom pasang lila angkara
Ladom ateuh burak teureubang
Ladom pasang ateuh geureuda

Leugat jituju u teungoh padang
Ureueng lam awan tren u donya
Teuduek haba ureueng teureubang
Muwoe karangan keu Raja donya

Raja Budiman ka tiwah prang
Amarah le yoh nyan Raja raya
Ateuh guda leugat neupasang
Teubiet u padang neujak gaza

Sajan rakyat dum uleebalang
Laen sulotan raja-raja
Bandum jiteubiet teuma u padang
Seubab sulotan teubiet jak gaza

Neumupayong intan meukarang
U teungoh padang teubiet Raja
Rakyat ireng wie ngon uneun
Di teungoh mideuen alam mubanja

Diu Palinggam kalon u padang
Le that angkatan teubiet lam kuta
Teuma neukheun bak panglima prang
Nyang that guransang Diu Peulita

Teubiet gata bandum u mideuen
Tajak ampeueng tandra Raja
Bek tatakot beurangasoe
Ulon sinoe lakee do'a

'Oh ban jideungo haba sulotan
Amarah le yoh nyan Diu Peulita
Ateueh guda leugat jipasang
U teungoh padang jijak gaza

Sa'idilkama teubiet sajan
Rakyat sikalian dum sireuta
Diu Peulita keupala prang
Payong teukeumang ateueh naga

Miseue reudok nyang got hitam
Le that angkatan balatandra
Sideh pi reudok sinoe pi peugom
Nyoe baro lom keumeung jeuet bahya

Deumpek ngon surak meualon-alon
Miseue riyeuek tren musem keunong sa
Teudong meuseueh-seueh di teungoh padang
Musta'id deungon alat sinyata

Meuseundi-seundi rupa peukayan
Geumeureulapan cahya meukuta
Teungoh-teungoh keumeung muprang
Dhoi teureubang di antara

Teuma leumah dalam dhoi nyan
Teuka angkatan Raja Muda
Ateueh gajah dum jipasang
Keumang ngon alam panca wareuna

Ho maken toe keunan u padang
Geupiyoh prang di mideuen Raja
Bandua si han jadeh prang
Seubab angkatan le that teuka

'Oh sare deuh troh u padang
Raja Budiman kalon aneukeunda
Neupeutamong leugat u dalam
Sajan-sajan Sithon Geulima

Raja Muda seumbah ayah
Neutamong pantah dalam kuta
Diu Kusani tamong sajan
Dengon rakan Nila Ngindra

Raja Diu Peukasa 'Alam
Tamong sajan Raja Muda
Troh u dalam geubri makanan
Dum sikeulian makeuen rata

Raja Diu piyoh di dalam
Surak di padang that meutaga
Sa'idilkama Diu Peulita
Di teungoh midan jilila-lila

Deumpek ngon surak meuguncang-guncang
Raja Budiman surot panglima
Neuyue teubiet Syahi Midan
Jak lawan prang u mideuen Raja

Syahi Midan deungo haba meunan
Leugat jipasang ateueh guda
Lanja jiteubiet u teungoh mideuen
Yoh nyan meuteumeung dua tandra

Teungoh-teungoh ureueng muprang
Leumah angkatan le that teuka
Dhoi beurangkat di teungoh padang
Dalam dhoi nyan leumah tandra

Miseue reudok jikandong ujeuen
Le that ureueng teungoh teuka
Juhan 'Alam ka troh keunan
Geutamong yoh nyan u dalam kuta

Diu Peulita that amarah
Seubab meutamah ureueng po banda
Meunoe leumah dalam hate
Saleh pane ureueng teuka

Peuleumah rancak keunoe u padang
Meung goh soe lawan that angkara
Juhan 'Alam ka troh u dalam
Meusu lam awan lom meutaga

Miseue guroh su alamat
Miseue kiamat that meutaga
Meung salang jioh dumnan geumeuntam
'Oh troh u padang pakri bahya

Na sikeujab meusu guroh
Reudok pi troh angen pi teuka
Teuma leumah dalam reudok nyan
Naga teureubang meuribee laksa

Burak geureuda keureukat sajan
Rata teureubang seurapah Indra
Maseng-maseng na ureueng pasang
Raya angkatan Raja Indra

Leugat jitren dum u padang
Rakyat hitam siblah donya
Le that tandra Beureuma Kasan
Bandum ngon kandran sakti raja

Miseue reudok nyang got hitam
Uroe teungoh trang padam cahya
Cokma ngon peudeueng dum bak jaroe
Keutupong beusoe ateueh keupala

Bajee zireh dum bak asoe
Dum sinaroe that guranta
Diu Peulita kalon angkatan
Baro datang meuribee laksa

Yoh nyan neudeumpek meuguncang-guncang
Ureueung di padang peuneng keupala
Ami Zahan ngon Syahi Midan
Rakyat sajan han takira

Ulee meuantok badan meugrak-grak
Keureuna surak that meutaga
Beureuma Kasan baro datang
Sajan pahlawan meuribee laksa

Leugat neujak u teungoh padang
Bak teumpat prang u mideuen Raja
Nibak jaroe cokma ngon peudeueng
Neukeumeung ampeueng tandra Raja

Peulita Diu kalon lakuan
Beureuma Kasan keumeung gaza
Teuma neulambong saboh hakeumat
Di mideuen leugat jeuet laot raya

Jibeudoh riyeuek ngon geulumbang
Miyub manyang han teukira
Yoh nyan tahe Beureuma Kasan
Dum na pahlawan hate lia

Beureuma Kasan Raja geuturi
Neungidong gaki ateueh donya
Doe le laot jeuet keu padang
Raya saktian Raja Indra

Peulita Diu han le kalam
Seubab saktian han le nyata
Amarah yoh nyan Raja lam bumoe
Neubeuet lom jinoo saboh do'a

Di teungoh mideuen ka teudong gunong
Troh lam awan gunong raya
Beureuma Kasan kalon gunong
Leugat neutamong dalam kuta

Raja Muda teuma bri teupat
Ban nyang adat tahta Raja
'Oh lheueh nyan neubri ngon makanan
Ban lakuan adat donya

'Oh lheueh makeuen Beureuma Kasan
Meuhaba yoh nyan Raja Muda
Neumarit ngon Raja Usuli
Sireuta jari neubet bandua

Ampon nekeunda seumbah laman
Patek mohon nibak Baginda
Idin Tuanku laman masok prang
Raja di padang lon lawan gaza

Di Tuanku neuleueng jaroe
Neueu buet kamoe cuco digata
Nak mangat meuri kamoe lam awan
Raja di midan lon boh lam singkla

Teuma seuot Baginda Sulotan
He cuco badan jinoe tagaza
Adak meukarat gata dalam prang
Keunoe tariwang dalam kuta

Adak meuteumeung ngon Raja di padang
He aneuk bintang tatanyong nama
Kadang he aneuk nyang di padang
Diu Palinggam pocut gata

Aneuk ulon Diu Palinggam
Leupah ka jameun dalam rimba
Raja Muda deungo sabda Sulotan
Neulakee idin bak ayahanda

'Oh lheueh idin bak sulotan
Ka neupasang ateueh guda
Leugat neutebiet u teungoh padang
Meuntroe uleebalang ireng sireuta

Diu Kharsani jak rot uneun
Diwie geukheun Peukasa Diwa
Nila Ngindra nyang mat payong
Troh u mideuen neujak lanja

'Oh sare troh u teungoh padang
Neukalon gunong jab ngon hawa
Raja Muda kheun bak panglima prang
Tareuloh gunong nyan he panglima

Diu Kharsani deungo sabda meunan
Jipeurab yoh nyan u mideuen Raja
Neumat gunong ka neutatang
Neusrom lam awan hanco le sigra

Diu Palinggam kalon u mideuen
Leumah ureueng ateueh guda
Neukalon rupa lang-geumilang
Ureueng ireng ban siseun lingka

Teuma neutatang saboh hekeumat
Deungon siat jeuet le geureuda
Phon-phon rupa miseue siwah
Jipo pantah u mideuen Raja

Troh jipeurab u teungoh padang
Siteuntang-teuntang Raja Muda
Teuma jitren lanja keunan
Jipeujeuet badan keu geureuda

Raja Muda ateueh guda plang
Jisama yoh nyan uleh geureuda
Dalam kuta leugat jipuwoe
Jibri le jinoo ubak Raja

Jibri ubak Diu Palinggam
Neupeuduek yoh nyan ateueh geuta
Bak Raja Muda Diu jipandang
Siakan-akan hi ayahanda

Raja Muda hana kalam
That maluan hana tara
Neukalon ubak Diu Palinggam
Neueu ruman hi ayahanda

Diu Palinggam marit le yoh nyan
Neutanyong padan bak Raja Muda
Wahe Raja muda seudang
Miseue bintang cahya muka

Lon kalon gata nyak di padang
Ateueh guda plang sang aneuk Raja
Wie ngon uneun ureueng ireng
Sidroe mat payong ateueh keupala

Soe nan gata he samlakoe
Peugah jinoe lon deungo nyata
Saleh roh wareh gata ngon kamoe
Lon kalon bagoe sang syeedara

Raja Muda deungo haba meunan
Neumarit yoh nyan leumbot suara
Ampon Tuanku Raja saktian
Neudeungo lontuan he Baginda

Raja Muda nama lontuan
Nyang hukom lam awan nanggroe Miga
Ayah ulon Budiman Sakti
Raja Usuli kusyik hamba

Lon keurajeuen nanggroe Diu
Dituanku pat neu Raja
Soebu nama cuba peugah
Lon deungo sah cuba kata

Teuma seuot Diu Palinggam
Deungo lontuan he Raja Muda
Lon nyoe Raja Miga di awan
Nibak makam Kama 'Alam Diwa

Bak siuroe lon tren u padang
Meurumpok lawan ngon Raja donya
Geutham ulon teungoh lon woe
Raja nanggroe that angkara

Muploh-ploh seun lon peuingat
Raja nyoe that teuangkara
Nyankeuh asai jeuet lon meuprang
Keureuna Raja nyan bit that mongka

Nama ulon Diu Palinggam
Nanggroe lam awan miseue digata
Keureuna geutanyoe sabe lam awan
Bek le he intan muprang ngon hamba

Peue seubab gata jak tulong prang
Keureuna Raja nyan buet angkara
Seudang digata aneuk Raja patot
Kusyikteuh geuseubot Indra Diwa

Indra Diwa Muda Sakti
Raja Usuli nyang mat neuraca
Peue seubab keunoe gata muprang
Ngon Raja nyan keupeue roh gata

Keureuna geutanyoe he aneuk intan
Ulon nyoe Tuan Ayahanda gata
Ulon pi aneuk Raja Usuli
Beuna taturi he Raja Muda

Raja Muda deungo haba meunan
Neuseumbah le yoh nyan teuot Baginda
Ampon Tuanku meuribee ampon
Keureuna ulon raya that deesya

Hana lon turi Tuanku ampon
Ayah ulon kureueng pareksa
Raja nanggroe nyoe ayah lontuan
Nyang lawan prang deungon gata

Jinoe Tuanku ampon laman
Ayah lon sajan ampon deesya
Raja Muda teungoh meukalam
Surak di padang that meutaga

Nila Ngindra Diu Kharsani
Saket hate Diu Peukaša
Leugat jijak u teungoh kawan
Ka meuteumeung dua tandra

Seubab Raja han le sajan
Amarah yoh nyan Diu Indra
Meugah bak Raja Indra Peulimbang
Meugah ka tan Raja Muda

'Oh lheueh nyan meuthee bak Muda Sakti
Meugah han le Raja Muda
Teuma neukheun bak uleebalang
Teubiet u padang dum na gata

Meunyo han le Raja jinoe
Kuhanco nanggroe ngon sikleb mata
Beurangasoe han le kutakot
Meunyo ka mawot Raja Muda

'Oh ban jideungo sabda meunan
Amarah yoh nyan dum na raja
Juhan 'Alam guda neupasang
U teungoh padang neupoh lawa

Jiireng le meuntroe uleebalang
Payong ngon alam keumang rata
Rame rakyat ateueh guda plang
Teubiet u padang ngon balatandra

Beureuma Kasan pi ka amarah
Neupasang pantah ateueh geureuda
Jiireng uleh dum uleebalang
U teungoh padang neujak lanja

Beureuma Kasan raya teureukah
Ateueh gajah dua ploh laksa
Na dua laksa singa beudiri
Naga paksi siploh laksa

Na dua laksa waliman teureubang
Burak jipasang ngon geureuda
Sikureueng ploh laksa guda seumaran
Beureuma Kasan Ureueng geupuja

U teungoh mideuen leugat jitujuh
Alam mirah bandum rata
'Oh lheueh nyan beungeh Budiman Sakti
Neupasang le ateueh guda

Leugat neutebiet u teungoh padang
Rakyat sajan meuribee laksa
Neungui meukuta dua blah pangkat
Payong meusurat ateueh keupala

'Oh lheueh nyan teubiet Indra Peulimbang
Teuma neupasang ateueh guda
Jiireng le meuntroe uleebalang
'Adi ngon Juhan meuribee laksa

Keumang ngon payong geumeureulapan
Hibat lakuan hana tara
Leugat jijak u teungoh padang
Teudong meureuntang mideuen Raja

'Oh lheueh nyan teubiet Muda Sakti
Raja Usuli umu that tuha
Ka neupasang ateueh gajah
Payong mirah rumboe meutia

Peudeueng bak jaroe sarongjih intan
Cokma bak tangan tatah peureumata
Neungui meukuta tujuh blah pangkat
Rupa hibat Raja Tuha

Jiireng le meuntroe uleebalang
'Adi ngon Juhan meuribee laksa
Leugat neujak u teungoh padang
Jak ato prang u lua kuta

Diu Palinggam ateuh meuligoe
Teuduek jinoe ngon Raja Muda
Rakyat nyang laen pi dum di dalam
Han le di padang habeh lam kuta

Sa'idilkama pinta hekeumat
Jeuet laot meuhat lingka kuta
Rakyat bandum piyoh di dalam
Diu Palinggam han neubri gaza

Diu Palinggam neungieng u mideuen
Le that ureueng leumah nyata
Teudong meuseueh-seueh di Teungoh mideuen
Musta'id ngon alat sinyata

Diu tanyong bak muda samlakoe
Jeh he intan soe ateuh naga
Rupa hibat hana bandeng
Rakyat ireng meuribee laksa

Keumang ngon payong alam puteh
Di likot bareh meuribee laksa
Raja Muda peugah le rijang
Raja Mambang he ayahanda

Geurasi nan Juhan 'Alam
Taklok keunan sikureueng laksa
Diu Palinggam lom neutanyong
Soe nyang pasang ateuh guda

Rupa hibat payong meutatah
Alam mirah bandum rata
Rakyat ireng that barollah
Raya teureukah bak ri rupa

Raja Muda teuma peugah
Nyankeuh nyang sah Raja Indra
Beureuma Kasan geurasi nan
Kusyik laman Raja 'Ala

Nyan nyang leubeh Raja lam awan
Teupat keurajeuen nanggroe Zinura
Diu Palinggam tanyong lagi
Jeh boh hate soebu nama

Nyang duek ateueh guda tiji
Payong zolzari reumboe mutiara
Dua ploh laksa uleebalang
Deungon alam hijo dum rata

Raja Muda teuma peugah
Nyankeuh ayah laman sroepada
Aneuk Tuanku Muda Sakti
Raja Usuli nyankeuh aneuknya

Geurasi nan Budiman Sakti
Nyankeuh he doli syeedara gata
Diu Palinggam lom neutanyong
Jeh he bungong soe geuhei nama

Nyang duek ateueh guda seumaran
Payong meukarang nibak amba
Alam hitam rata jiboh
Rakyat damoh sajan sireuta

Raja Muda peugah rijang
Indra Peulimbang he Baginda
Nyankeuh Raja bak nanggroe nyan
Di sinan sajan ayahanda

Diu Palinggam lom teumanyong
Jeh he bungong soe pasang guda
Nyang mupayong intan meukarang
Tujoh blah macam neungui meukuta

Alam kuneng bandum meureuntang
'Adi ngon Juhan sajan sireuta
Peudeueng bak jaroe cokma meusandang
Hana lawan hibat rupa

Raja Muda peugah rijang
Nyankeuh janjongan ayahanda gata
Kusyik laman Raja Usuli
Ampon doli bek le meudawa

Diu Palinggam neukheun meunoe
He samlakoe bek that geurraba
Bahle jinoe takeumalon
Pakri bangon buet raja-raja

MILIK KEPUSTAKAAN
DIREKTORAT TRADISI
DITJEN NBSF DEPEUDPAR

Geutanyoe taduek sinoe di dalam
Takalon ragam ureueng di lua
Raja Muda deungo haba meunan
Teutap sinan dalam kuta

Raja Muda neuduek bak tingkab
Mata neulihat keudeh u lua
Ureueng surak meuguncang-guncang
Lingka kuta nyan laot raya

Raja Diu di teungoh mideuen
Amarah le yoh nyan Nila Ngindra
Ubak bumoe jiteupok jaroe
Laot ka doe han le nyata

Teuma teumanyong Diu Palinggam
Nyang doe laot nyan peue nan Raja
Teudong toe Raja ureung lhee droe
Peugah jinoe pane tandra

Raja Muda peugah laju
Raja Diu syeedara hamba
Nyankeuh Raja nanggroe Diu
Nama meusyeuhu Nila Ngindra

Nama sidroe Diu Kharsani
Sidroe geurasi Diu Peukasa
Jih nyan lhee droe that pahlawan
Han sabe wadan ngon Raja Indra

Diu Palinggam ka neuim droe
Neukalon ujoe ureueng di lua
Neuthee leubeh Raja Budiman
Seubab habeh tren dum raja-raja

Rakyat di mideuen bandum guransang
Seubab tan lawan di lua kuta
Rakyat lam kuta bandum piyoh
Jipreh suroh neuyue le Raja

Jipreh sabda Diu Palinggam
Bandum yoh nyan hana haba
Nila Ngindra di teungoh mideuen
Jiheu ureueng dalam kuta

Soe nyang galak keumeung theun peudeueng
Teubiet u mideuen bek le lam kuta
Pakon bunoe that guransang
Yoh goh na lawan bandum guranta

Bak uroe nyoe teubiet u padang
Jakalee tungang gagah peukasa
Peulita Diu deungo narit meunan
Amarah le yoh nyan hu ngon mata

Teuma neuseuot narit sipatah
Peu ka peugah nyang kon-kon haba
Siploh buleuen kamoe di mideuen
Hana ureueng keunoe teuka

Dum muka kah kamarit meunan
Pakri ka jeuet kheun han malee mata
Meunyo dumnan le angkatan gata nyoe
Kulawan sidroe han peue meulaksa

Nila Ngindra deungo haba meunan
Amarah le yoh nyan hu ngon mata
Jimat cokma ubak jaroe
Leugat jipeutoe u gaki kuta

Jikeumeung heumpu ngon cokma beusoe
Jikeumeung kiloe pinto kuta
Diu Peulita neucok panah
Ka neupeulheueh dalam hawa

Deungon siat troh u mideuen
Teuka ujeuen ie meubura
Ujeuen raya hana bagoe
Ka ngob nanggroe sikleb mata

Nila Ngindra yoh nyan di mideuen
Keunong ujeuen pehasan donya
Diu Kharsani kalon meunan
Jibeuet le yoh nyan hekeumat donya

Gadoh ngon ie han le ujeuen
Jinoe mideuen miseue nyang ka
Cahaya Kaindran kalon meunan
Jijak le yoh nyan ubak Raja

'Oh troh ubak Diu Palinggam
Jibet tangan ateueh jeumala
Idin Tuanku keu lon sikarang
Lon teubiet u padang jak lawan tandra

Idin Tuanku lon reuloh nanggroe
Nak jithee keudroe Raja cilaka
Nanggroe beuhanco kuta lon reuloh
Rakyat lon poh sigo ngon Raja

Mangat bek le geutanyoe sinoe
Idin jinoe ulon gaza
Mangat lon prang lon peugajah
Nak mangat meugah jeueb-jeueb donya

Diu Palinggam panglima prang
Amarah tuan meunoe kata
Bek e rakan tapubuet meunan
Ceureucaan bak asoe donya

Keureuna Raja nyang di mideuen
Ngon lontuan neusa syeedara
Lon paban bah kheundak Tuhan
Ka roh jeuet lawan deungon syeedara

Keureuna ka treb-treb meuturi tan
Gob nyan lam awan kamoe di donya
Lom pi Raja nyang di sinoe
Keumuen kamoe Raja Muda

Jinoe gata dum sikeulian
Bek le tamuprang seb ban nyang ka
Diu Kharsani han le kalam
Baginda sulotan lom meusabda

Bak Raja Muda neukheun meunoe
Teubiet samlakoe gata u lua
Jak tabri thee keudeh bak ayah
Lon tapeugah dalam kuta

Sajan deungon Raja Kaindran
Teubiet u midan tajak bak Raja
Raja Muda deungo haba meunan
Neuseumah le yoh nyan teuot baginda

Cahya Kaindran neutebiet sajan
Sireuta deungon Diu Peulita
Leupah that hibat hana bagoe
Teubiet jinoe ngon Raja Muda

Raja Muda ateueh guda plang
Di wie tuan Diu Peukasa
Raja Kaindran jak rot uneun
Di likot nyan Cahya Indra

Leugat neujak u teungoh padang
Payong keumang ateueh keupala
Nila Ngindra di teungoh mideuen
Leumah jikalon pojih Raja

Jikalon rakan lhee droe sajan
Rupa miseue ban uleue bisa
Beureuma Kasan ngon Juhan 'Alam
Leumah neukalon Raja Muda

Leumah neukalon pahlawan lhee droe
Peudeueng bak jaroe sajan ngon cokma
Leugat jipeurab le jipeutoe
Raja Muda jinoe le meusabda

Neumarit ngon Cahya Kaindran
Tadeungo lon kheun he panglima
'Oh rab keunoe Raja sikeulian
Gata he tuan bak hibat rupa

Mangat teumakot ureueng pandang
U teungoh midan tajak bak Raja
Cahya Indra mangat hate
Ka jijak le sajan Raja

Beureuma Kasan ngon Raja Mambang
Sireuta sajan ngon Diu Indra
Bak Raja Muda leugat jipeutoe
Jibeuet jaroe ateueh jeumala

Watee neungieng panglima lhee droe
Leungo asoe dum raja-raja
Dum teumakot hana bagoe
Panglima peuet droe jibeuet pegeumpa

Rupa hibat hana sakri
Miseue uroe tangieng silala
Raja Muda neumarit le yoh nyan
Ngon pahlawan Nila Ngindra

He Raja Diu Indra ngon Mambang
Saleuem lontuan takheun bak Raja
Takheun saleuem lon bak Raja Usuli
Saleh neuturi Raja Miga

Adak neuturi Diu Palinggam
Takheun salam nibak hamba
Yue jak bandum keunoe u midan
Diu Palinggam dalam kuta

Tayue tamong Raja sinaroe
Ulon sidroe peumeu'ah deesya
Lon lakee ampon keusalahan
Jak kheun salam bak raja-raja

Nila Ngindra deungo sabda meunan
Leugat jiriwang dalam kuta
Raja Muda pi ka neuriwang
Bak Diu Palinggam tamong lam kuta

Nila Ngindra troh bak sulotan
Jibeuet tangan ateueh jeumala
Seumbah Raja Muda Sakti
Ampon doli laman sroepada

Seumbah Diu eumpunya salam
Keupada janjongan neukirem sabda
Neuyue tanyong ubak doli
Saleh neuturi sulotan Miga

Geulakab nama Diu Palinggam
Meulintee sulotan Kama 'Alam Diwa
Diu Palinggam di teungoh padang
Nyang lawan prang gata nyoe dum na

Meusyeuhu meugah sakti meukarang
Saleuem sulotan Raja Muda
Adak neuturi Diu Palinggam
Patot janjongan jak pumeulia

Jak lakee ampon keusalahan
Po janjongan bek reuloh kuta
Raja Muda piyoh didalam
Neukheun gob nyan meusyeedara

Raja Tuha deungo sabda meunan
Teupike sulotan sikutika
Raja teuingat keu Diu Palinggam
Leupah jameun u Buket Miga

Tujoh reutoh sajan rakan
Dua nyang riwang peugah haba
Teuma neukheun bak Raja Diu
Jinoe tadeungo he panglima

Cit lon turi Diu Palinggam
Tujoh reutoh rakan dum peukasa
Keureuna Diu aneuk lontuan
Leupah beujalan u Buket Miga

Meuseunoh Putroe Nila Wati
Lheueh nyan geurasi Raja Miga
Raja meusabda bak Raja Peulimbang
Beureuma Kasan Peulimbang Indra

Tadeungo he dum gata tuan
Raja di padang aneuk hamba
Nyankeuh adoe Budiman Sakti
Treb that lawi ka lam rimba

Tujoh reutoh sajan rakan
Jinoe pakri padan dum na gata
Raja Budiman buet that salah
Sebab tan bah jipareksa

Han jan sidek deungon sasat
Gob tapagab hana keureuna
Patot jinoe talakee ampon
Keusalahan dum na digata

Raja Budiman deungo sabda halarat
Muka pucat Raja 'Ala
Keureuna malee bak angkatan
Buet salahan hana pareksa

Hana sapeue neumeukalam
Duek teudiam hana haba
Seuot Raja Beureuma Kasan
Patot janjongan neulakee cara

Keureuna geutanyoe buet that salah
Talakee meu'ah sikeulian deesa
Keumah pakat dum uleebalang
Teubiet u padang Raja Tuha

Habeh bandum sigala sulotan
Beureuma Kasan Mambang sireuta
Raja Diu ngon Indra Peulimbang
Raja Budiman sajan sireuta

Raja Usuli jak di hadapan
Sulotan lam awam beurangkat sama
Meuseundi-seundi rupa peukayan
Geumeureulapan ngon meukuta

'Oh sare troh u teungoh padang
Dong meureuntang dum mubanja
Diu Palinggam kalon angkatan
Laen macam neukalon rupa

Siakan-akan keumeung peugot prang
Diu Palinggam mubicara
Neumupakat deungon pahlawan
Udeh u padang jak bak Raja

Tajak meuteumeung ngon Raja Sakti
Teubiet sare tuha muda
Raja Muda tinggai didalam
Laen sikeulian teubiet jak gaza

Pura-pura keumeung lawan prang
Tajak meuteumeung bek meuri rupa
Keumah pakat Diu Palinggam
Teubiet le yoh nyan pantah sigra

Neupasang ateuh guda hijo
Hibat that laku hana tara
Nyang jak rot wie Cahya Kaindran
Nyang rot uneun Cahya Indra

Diu Peukasa nyang mat payong
Rot nab geukheun Peulita Diwa
Keumang ngon alam amba nyang kuneng
Rakyat ireng meuribee laksa

Sa'idilkama beurangkat sajan
Leugat u padang dum geuhala
Meuseundi-seundi rupa peukayan
Geumeureulapan blet-blot cahya

Neungui meukuta limong blah pangkat
Dum na rakyat keunan mata
Raja Tuha eu Diu Palinggam
Rupa miseue ban gajah manta

Miseue uroe teungoh beukah
Han jeuet tatangah silala mata
Beuereuma Kasan ngon Juhan 'Alam
Hireuen neupandang bak Raja donya

Diu Palinggam keunan troh le
Raja Usuli neuseumbah sigra
Raja Budiman meuteumeung ngon adoe
Ampon kamoe he adekeunda

Hana lon turi gata adoe
Ulonteu sidroe buta mata
Diu Palinggam teuma seuot
Cit meunan patot he kakeunda

Cara-cara tameuturi
Meungadu sakti sira meuseunda
Raja Tuha marit meunoe
Udeh samlakoe tamong lam kuta

Keudeh aneuk piyoh u dalam
Nibak makam kakeunda gata
Diu Palinggam deungo sabda meunan
Leugat neutamong sajan Raja

Troh lam kuta rakyat sajan
Neubri le yoh nyan teumpat mulia
'Oh lheueh nyan neubri ngon makanan
Makeuen sikeulian meusuka-suka

Diu Palinggam teutap sinan
'Oh lheueh meuteumeung ngon ayahanda
Rante Indra ngon Cahya Nurani
Sajan sinyak Ti Rakna Lila

Leugat jinoe teubiet u padang
Jijak tueng bintang Putroe Miga
Deungon puan nibak jaroe
Tuan Putroe teubiet lanja

'Oh sare troh bak kuta di padang
Jitamong u dalam pantah sigra
Putroe Miga kalon ureueng datang
Meuri bak ruman ureueng Indra

Neueu sidroe ureueng nanggroe
Beudoh Putroe peumulia
'Oh lheueh bri saleuem mumat jaroe
Piyoh jinoe bandum rata

Putroe Indra marit jinoe
Deungon Putroe Awan Miga
Udeh tamong adoe u dalam
Nibak makam Putroe Lila

Bek le piyoh he sambinoe
Udeh ngon kamoe tamong lam kuta
Nila Wati hana le kalam
Beudoh le yoh nyan pantah sigra

Leugat lam kuta Raja Peulimbang
Tamong u dalam neubri tahta
Geupeuduek Putroe ateueh keurusi
Ngon ceuradi ban siseun lingka

Bahkeuh 'oh nan haba Putroe
Lon seubot jinoe haba Raja
Raja Mudapi ka troh keunan
Habe bandum tuha muda

Beureuma Kasan lakee idin
Nibak sulotan Raja Muda
Idin aneuk ulon kuriwang
Saleh pakriban di antara

Raja Muda kheun han peue salah
Tuanku langkah bak lon do'a
'Oh lheueh idin Beureuma Kasan
Beurangkat yoh nyan woe lam hawa

Sajan rakyat dum sinaroe
Raja Indra woe teureukah raya
Lheueh nyan teuma woe Juhan 'Alam
Neulakee idin bak Raja Muda

'Oh lheueh idin Raja beurangkat
Neuwoe le leugat dalam hawa
Raja Muda teuma kheun meunoe
Gata tawoe he panglima

Lhee droe gata u dalam tawoe
Lon pulang sinaroe hukom gata
Diu Peukasa taboh khalifah
Dum peurintah hukom Indra

Gata hukom nanggroe Diu
Bak meusyeuhu jeueb-jeueb donya
Ulon akhe teuma dudoe
Ulonteu woe ubak gata

Raja Diu deungo sabda meunan
'Oh lheueh idin bak Raja Muda
Leugat neuwoe dum sikeulian
Uleebalang dum sireuta

Raja Muda tinggai di sinan
Diu Palinggam lon calitra
Ubak bumoe neugeudam gaki
Teubiet mata ie meubura-bura

Sa'idilkama deungon rakan
Gadoh le yoh nyan bandum rata
'Oh lheueh nyan neucok euncien di padang
Kuta hilang han le nyata

Neucok cumboi meumanikam
Tujoh reutoh rakan gadoh seumua
Ubak dada neutepok lom jaroe
Gadoh le jinoe cumboi lam mata

Dum raja-raja hireuen bimbang
Neukalon saktian Raja Miga
Muda Sakti neumeukalam
Lon kheundak beujalan pulang keu desa

Neulakee idin bak Indra Peulimbang
Leugat neuriwang Raja Muda
Neuba sajan Diu Palinggam
Sireuta deungon Raja Muda

Sithon Geulima Putroe Rante
Cahya Nurani sajan sireuta
Putroe Kandi Indra tinggai di sinan
Ngon Raja Budiman neuduek lam kuta

Nila Wati deungon dendayang
Beurangkat sajan deungon Raja
Geupeuduek ateueh keurakat teureubang
Beurangkat sulotan pulang keu desa

Tujoh uroe peujalanan
Sampoe le yoh nyan Indran Diwa
Poteu tamong leugat u dalam
Lheueh meuriam meuribee laksa

Troh u dalam neubri teumpat
Miseue adat aneuk Raja
Teutap sinan Diu Palinggam
Uroe malam meusuka-suka

Padum lawet teutap sinan
Kheundak Tuhan laen calitra
Bak siuroe Nila Wati
Neumarit le ngon judonya

Ampon tuanku meuribee ampon
Keureuna ulon kheundak gisa
Janji dilee masa saboh roe
Lon keu Putroe gata keu Raja

Miga diawan teumpat keurajeuen
Hukom mideuen badai ayahanda
Diu Palinggam deungo haba Putroe
Peurab le jinoo bak ayahanda

Dilon ayah laman meukatoe
Jak intat Putroe u gunong Miga
Teuma seuot baginda sulotan
Jak he intan bak rijang tagisa

Diu Palinggam deungo haba ayah
Beudoh pantah sigra-sigra
'Oh lheueh meuteumeung bunda ngon ayah
Neucok langkah leugat neubungka

Deungon Putroe rupa sang intan
Yoh nyan beujalan ret lam rimba
Diu Palinggam yoh nyan beurangkat
Ret neutakat dalam rimba

Neuteungoh gle neutren paloh
Laju neubloh ateueh data
Tujoh uroe neubeujalan
Sampoe le yoh nyan u gunong Miga

Nila Wati muka pucat
Seubab payah that rot lam rimba
Teuma neucok keumala saboh
Neupeulob Putroe jroh dalam keumala

Dendayang dua keunan sajan
Diu Palinggam sakti raya
Diu Palinggam neutepok jaroe
Teubiet le jinoe saboh guda

Ateueh guda leugat neupasang
Neuteungoh yoh nyan gunong raya
Gunong manyang jab ngon awan
Diu Palinggam troh ateuehnya

Leumah neukalon saboh nanggroe
Luah han soe ateueh donya
Nanggroe luah hana lawan
Keurajeuen sinan SYAREH MIGA

Diu Palinggam neutepok jaroe
Gadoh le jinoe aneuk guda
Teuma neubeuet saboh hekeumat
Badan ka jeuet keu cempala

Leugat jipo dalam awan
Neupeuseunang nanggroe Raja
Tujoh nanggroe sinan sapat
Maseng pangkat ateuh tahta

Raja nyang raya SA'ID MEUREUDAN
Nyang le saktian Raja 'Ala
Nyan pi saboh Raja geudeelat
Nama meuhat Syareh Miga

Sidroë treuk Raja MILON di awan
Raja saktian lagi peukasa
Sa'id Meureudan aneuk na sidroe
Ureueng binoe indah that rupa

Lang-geumilang bukon indah that
Meukilat-kilat cahya muka
Cahya muka ban bintang timu
Beurang soe eu hate suka

Namajih Putroe INDRA KAYANGAN
Rupa miseue ban buleuen purnama
Putroe neuduek dalam meuligoe
Dendayang tujoh droe muda-muda

Diu Palinggam ka troh keunan
U Nanggroe sulotan Syareh Miga
Syareh Miga aneuk dua droe
Ureueng lakoe that peukasa

Sidroë geupeunan RAKNA SYAHI
Sidroe geurasi SYAMSI MIGA
Syamsi Miga that pahlawan
Neupoh aduen neupupana

Meuseunoh Putroe Indra Kayangan
Keureuna Putroe nyan jipoh syeedara
Diu Palinggam neucre sinan
Troh beujalan nanggroe Raja

Troh u nanggroe ISEUMBON PARI
Neutamong le dalam kuta
Cempala dong bak tingkap meuligoe
Leumah Putroe Kayangan Indra

Cempala dong teuntang tingkap
Keudeh jilihat dalam astana
Putroe teuduek nibak tingkap
Leumah teulihat saboh cempala

Neueu bulee jroh meusurat
Hireuen leuzat Putroe Muda
Putroe peugah bak dendayang
Kapeurab rijang keunoe bak sigra

Dendayang peurab teuma keunan
Keupeue neuhei lon pocut Raja
Teuma seuot tuan Putroe
Nyang jeuet keunoe lon hei gata

Takalon cicem di cong langsung
Bulee meusurat indah that rupa
Saleh pane cicem teuka keunoe
Han tom puroe dilee nyang ka

Saleh pi cicem rupa that carong
Han tom lon kalon dilee nyang ka
'Oh ban cempala deungo haba meunan
Jimarit yoh nyan ban manusia

Peue tapeugah he cut Putroe
Sang keu kamoe meutangkeh haba
Teuma seuot tuan Putroe
Neukheun meunoe bak cicem rimba

He cicem jroh lon keumeung sudi
Tapeugah kri he cempala
Patbu gampong pane nanggroe
Tapeugah soe nan po gata

Han tom lon eu ngon lon lumpoe
Saleh pat nanggroe peue nan banda
Teuma seuot cempala cut
Tadeungo pocut lon calitra

Dilon gampong di yub banda Palinggam
Nyoe baro ban troh bak gata
Jioh that teumpat nanggroe laman
Didalam awan gunong Miga

Peue keureuna tatanyong kamoe
Peugah jinoe Putroe jroh rupa
Seuot cek siti rupa ban tanglong
Tadeungo ulon he cempala

Nyang jeuet lon tanyong gata sidroe
Galak that kamoe kalon rupa
Adak tatem duek sajan kamoe
Malam uroe lon meuseunda

He cicem cut cuba peugah
Tatem pioh sajan hamba
Teuma seuot cempala cut
Deungo he pocut lon calitra

Han jeuet lon duek ngon gata Putroe
Keureuna kamoe na po areuta
Lon nyoe ayeuem Diu Palinggam
Raja didalam gunong Miga

Adak tatem meukawen ngon po dikamoe
Ulonteu nyoe ayeuem jaroe gata
Teuma seuot tuan Putroe
Keureuna kamoe suka keu gata

Deungon po gata han lon meukawen
Keureuna dilon suami ka na
Syamsi Miga nama tunangan
Aneuk Sulotan Syareh Miga

Cempala deungo haba meunan
Jipo le yoh nyan dalam hawa
Putroe kalon cempala han le
Putroe siti ro ie mata

Cempala pi troh dalam awan
Jitren u midan lom bak kuta
Miseue bayeuen jibalek droe
Jidong le jinoe bak binteh astana

Putroe kalon bayeuen that indah
Bulee mirah miseue suasa
Bulee puteh sang manikam
Tamse pualam mata dua

Paruh cantek zat beureujat
Mata leuzat soe eu rupa
Putroe kalon bayeuen teureubang
Bak dendayang neuyue drob sigra

He dendayang tadeungo lon kheun
Tadrob bayeuen lon keumeung eu rupa
Dendayang tajo keumeung mat bayeuen
Meunoe jikheun sigra-sigra

He Putroe cut rupa ban tanglong
Bek taikat lon he Putroe Muda
Meunyo taikat sinoe lontuan
Diu Palinggam meuhat troh teuka

Adak tahajat keu lon sidroe
Tatueng keu lakoe Raja Miga
Diu Palinggam aneuk Raja lam awan
Bek jeuet tunangan pocut ngon gata

Putroe seuot rijang-rijang
Diu Palinggam pakri hi rupa
Soe po judo di pat teupat
Peugah bak teupat bayeuen jroh rupa

Na neuyue jak le Diu Palinggam
Jeuet troh jalan keunoe gata
Keureuna ulon ka na tunangan
Aneuk sulotan meusyeuhu nama

Seuot le bayeuen he cut Putroe
Lon jak keudroe soe yue hana
Bak lon meuen peulayaran
Troh le laman bak teumpat gata

Keureuna gata galak kamoe
Lon tanyong proe sira meuseunda
Keureuna Raja Diu Palinggam
Rupa miseue ban uroe keulua

Hana bandeng beurangri nanggroe
That samlakoe hana tara
Rupa pi jroh ngon pahlawan
Le saktian dalam dada

Syamsu Miga pi ka lon kalon
Hana bangon pocut ngon gata
Dum paleuet gaki Diu Palinggam
Dumnankeuh ruman Syamsi Miga

Jinoe di Putroe pakri padan
Diu Palinggam tatem rila
Seuot Putroe he cicem jroh
Tadeungo lon peugah ubak gata

Ngon Diu Palinggam han lon meukawen
Seubab gob nyan esteuri ka na
Lon takot beungeh cut Nila Wati
Akan cek siti Kayangan Indra

Adak kon seubab ka na isteuri
Dilon pi hate meunyo jroh rupa
'Oh bayeuen deungo haba Putroe
Neukhem le jinoe teutawa-tawa

Peu tapeugah wahe Putroe
Tadeungo kamoe po jroh rupa
Takeumeung keu laba meurugoe dilee
Meunankeuh putroe asai mula

Meunyo takeumeung bak jroh lakoe
Mita he Putroe ngon rahsia
Meunan adat aneuk sulotan
Mita tunangan nyang jroh rupa

Teuma seuot tuan Putroe
Jikheun meunoe bak bayeuen jroh rupa
Sulu-sulu kayu di gunong manyang
Di teungoh padang andam beudiri
Jikalu sunggoh bayek budiman
Surohlah datang deundam keumari

Bayeuen seuot jikheun panton
Putroe hireuen deungo suara

Dari Pawoh aneuk seumilang
Mate di padang Pante Peulari
Dari jawoh heundak meundatang
Jangan tuan meunyeusai lagi

Teuma seuot Putroe Kayangan
Neumarit deungon bayeuen Raja
Diu Palinggam patbu jinoe
Takheun bak kamoe samlakoe rupa

Seuot bayeuen pocut Kayangan
Sideh di manyang nanggroe Indra
Meunyo takeumeung bak jeuet keu lakoe
Bak uroe nyoe pi ek teuka

Sayang keurakab timoh di padang
Cabeuengjih panyang meutangga-tangga
Putroe tapeugah bek seunda wayang
Diu Palinggam meuhat troh teuka

Seuot Putroe muda seudang
Suara ban tamse biula

Aneuk siwah di teungoh padang
Burong teureubang jikheundak sama
Kalu troh langkah keunoe datang
Hajat lontuan keumeung eu rupa

Meunyo meunan tuan Putroe
Tapreh sinoe siat gata
Putroe jikheun hana lon preh
Jak bak bagah bayeuen Raja

Kah nyan kaduek sajan kamoe
Bek le kawoe ubak Raja
Adak teuka po ke keunoe
Bahle kamoe pumeulia

Bayeuen deungo haba meunan
Jipo le yoh nyan bak tameh keuta
Putroe Kayangan hate sukaan
Bayeuen le yoh nyan meusuara

Miseue bangsi meujanbagoe
Tuan Putroe hate suka
Diphon uroe troh bak malam
Teutap bayeuen lam astana

Hingga akhe jula malam
Putroe tidoran ateueh keuta
Bayeuen sinan hana jarak
Putroe galak hate lam dada

Jula malam geulhom keuleumbu
Putroe beuradu ateueh geuta
Bayeuen sajan deungon Putroe
Teuduek keudroe hana haba

Akhe malam teungeut Putroe

Bayeuen jinoe balek rupa
Rupa miseue dilee baroe
Diu samlakoe hate suka

Diu Palinggam peureubah droe
Sajan Putroe ateueh geuta
Diu neueh sajan Putroe
Teungeut le jinoe ateueh geuta

Padum lawet neueh cit tan
Diu pangsang ateueh geuta
Hingga beungoh le ngon uroe
Jaga Putroe Kayangan Indra

'Oh teukeujot bak tidoran
Neukalon bayeuen hanle nyata
Leumah neue muda samlakoe
Miseue uroe cahya muka

Ban bintang timu meuacak-acak
Putroe galak hate lam dada
Leumah lam hate tuan Putroe
Saleh nyo nyoe Raja Indra

Nyoekeuh saleh Diu Palinggam
Miseue intan cahya muka
Putroe pi that hireuen laloe
Neukeumeung peugoe malee mata

Hate galak geuma dahsyah
Diphon beungoh troh 'an luha
Teuma jaga Diu Palinggam
Putroe intan kalon rupa

Putroe marit deungon sumpan
Dua tangan ateueh jeumala
Dua jaroe taeu geubet
Miseue leuek meulet jilhom kua

Pajan tuanku keunoe datang
Peue na padan keunoe teuka
Patbu gampong siri nanggroe
Nyang troh keunoe peue hajat pinta

Teuma seuot Diu Palinggam
Rupa miseue ban buleuen purnama
Neumeututo leumah leumbot
Meunurot patot aneuk Raja

Di gunong manyang burong meusapat
Ureueng meupukat ateuh kuala
Lon cre di gampong lon tinggai teumpat
Lon meuhajat adoe keu gata

Hana laen lon meukheundak
Hajat lon jak cit bak gata
'Oh Putroe deungo haba meunan
Putroe Kayangan meusuara

Meunyo meunan tuanku ampon
Tadeungo lon sipatah haba
Meunyo napsu nyan keu kamoe
Neujak jinoe bak ayahanda

Meung hana idin bunda ngon ayah
Ulon sosah hate lam dada
Diu Palinggam deungo haba Putroe
Muda samlakoe neukeumeung gisa

Meunyo meunan tuan Putroe
Payah that kamoe keunoe meuteuka
Meung han rila gata he adoe
Idin lon woe he Putroe Muda

Seuot Putroe pocut ampon
Tadeungo lon po meukuta
Bek tuanku neukeumeung riwang
Narit lontuan wayang ngon seunda

Adak han neujak dilee bak ayah
Lon paban bah po meukuta
Bahle taduek sajan kamoe
Bek cit jinoe neukeumeung gisa

Bek sia-sia neujak keunoe
Bek neukheun kamoe hana seutia
Jinoe tuanku teutap sinoe
Sajan kamoe bek neugisa

Diu Palinggam deungo haba Putroe
Neukheun meunoe bak Putroe Muda
Bek meunan takheun he adek siti
Bek teukeuse singoh dan lusa

Bek seubab ulon binasaan
Wahe intan tanglong donya
Bak gata nyak habeh lon bri pham
Bak lon he intan habeh useuha

Tuan Putroe hana le kalam
Diu Palinggam hana le kata
Syae panton hana lon peugah
Panyang khoteubah han lon bawa

Keureuna hikayat DIU PALINGGAM
Sapat pi tan dalam donya
Nit deungon le salah ngon silab
Meu'ah lon harap nibak syeedara

Diu Palinggam teutap sinan
Ngon Putroe Kayangan lam astana
Teuduek haba tuan Putroe
Tamat 'oh noe saboh calitra

A L K I S A H wahe rakan
SA'ID MEUREUDAN lon calitra
Nyankeuh ayah Putroe Kayangan
Le saktian hekeumat donya

Raja nyang taklok sikureueng ribee
Le that sukee hana tara
Lhee blah raja nyang that pahlawan
Phon-phon geupeunan 'ALAM DIWA

Nyang keudua SIGEUMPA 'ALAM
Keulhee geupeunan nyan GUMPITA
Diu nyang keupeuet LILA PARI
Keulimong geurasi USI TAPA

Keunam JAKPHA keutujoh BALUWI
Keulapan geurasi SAMARAN INDRA
Keusikureueng AHMAD ISKANDA PARI
Keusiploh geurasi ZANJA BILA

Siblah NALARAD dua blah PEULITA SARI
Keulhee blah geurasi KAPAH DIWA
Raja teuduek ateueh meuligoe
Panglima lhee droe sajan sireuta

Teungoh neukaluet ileumee sakti
Tuhan teukeudi leumah lam tapa
Leumah bak Raja lam tapaan
Diu Palinggam dalam astana

Teuduek sajan deungon Putroe
Raja jinoe beuet le mintra
Diu Palinggam teungoh beuradu
Dalam keuleumbu tiree rawa

Mata layoh reubah pangsang
Keunong saktian nibak Raja
Sa'id Meureudan tren lam tapaan
Dua pahlawan sajan sireuta

Leugat neuek u meuligoe
Ubak Putroe Kayangan Indra
Yoh nyan meugah bak tuan Putroe
Keumeung ek meuligoe le ayahanda

Teuma neupeurab bak Diu Palinggam
Neupeugoe yoh nyan hana jaga
Lheueh nyan Putroe teuma jimoe
Teuingat keudroe salah meureuka

Diu Palinggam teutap pangsang
Ateueh tilam jitob ngon ija
Sa'id Meureudan troh le keunan
Putroe Kayangan seumbah le sigra

Raja kalon teuma bak Putroe
Laen bagoe nibak nyang ka
Raja isyarat bak panglima lhee droe
Jibuka le jinoo tiree rawa

Leumah sinan Diu Palinggam
Teungeut pangsang di ateueh geuta
Putroe kalon laen bagoe
Jiplueng le jinoo malee mata

Panglima kalon Diu Palinggam
Jimat bak tangan jime u lua
Hana teupeh bak pha ngon badan
Jitakot saktian teubiet lam dada

Teuma jiboh lam bubeu beusoe
Gaki ngon jaroe jiboh lam singkla
Teuma jikeubah yub seuloran
Teutap sinan lam peunjara

Putroe Kayangan hate gundah
Jikeumeung peujeulah han jeuet jidaya
Hilang akai bicara gadoh
Tuan Putroe ro ie mata

Putroe teutap dalam sosah
Akai gadoh hate gila
Keureuna teuingat Diu Palinggam
Uroe malam ro ie mata

Bu jipajoh han jeuet keu asoe
Sayang that Putroe hana tara
Teuduek haba Putroe Kayangan
Teutap sinan lam astana

A M M A B A K D U teuduek haba nyan
Laen karangan lon calitra
Muda Sakti jinoe lon kisah
Neuduek dairah Indran Diwa

Hate seunang geuma dasyah
Meusyeuhu meugah jeueb-jeueb donya
Bak simalam Raja meulumpoe
Na nyum ka woe aneuk bungka

Na nyum teuka Diu Palinggam
Teuduek sajan u nab Raja
Hana sapeue nibak badan -
Hana peukayan nibak angeeta

Diu teuduek sipu malee
Tundok ulee ro ie mata
Raja marit neuseuot tan
Hana kalam neuem droe saja

Nyang na leumah cit meung neumoe
Raja tanyong proe dukacita
Raja marit Banta neuem droe
Teukeujot jinoe uroe ka faja

'Oh ban teuingat Raja keu lumpoe
Neukrah le jinoe nujum peundita
Sigo neutet beude nubat
Jitren rakyat jeueb-jeueb raja

Pakon tuanku neupangge kamoe
Bak uroe nyoe peue na sabda
Tren le sabda teuma di manyang
Tadeungo lontuan nujum peundita

Nyang lon pangge gata sinaroe
Leumah lumpoe saboh rasia
Lon lumpoe teuka Diu Palinggam
Hana kalam ro ie mata

Hana ija nibak badan
Cuba ci tuan kalon makna
Nujum deungo sabda Sulotan
Peundita yoh nyan kitab jibuka

Habeh jikalon lua dalam
Diu Palinggam leumah nyata
'Oh lheueh nyan teuma jibeuet jaroe
Neudeungo kamoe po meukuta

Leumah tuanku Diu Palinggam
Ka roh u dalam bubee teumaga
Nibak nanggroe Sa'id Meureudan
Gaki tangan dalam singkla

'Oh Raja deungo haba meunan
Baginda sulotan neumeusabda
Tadeungo he dum pahlawan
Jak beujalan nanggroe Raja

Tajak lakee Diu Palinggam
Bak Sa'id Meureudan dalam peunjara
Hana sidroe nyang na seuot
Bandum teumakot hana haba

Keureuna seubab Sa'id Meureudan
Dum sikeulian pucat muka
Lhee seun neuhei meuturot-turot
Lheueh nyan seuot Raja Muda

Insya Allah ngon tulong Rabbi
Lon peureugi u nanggroe Raja
Meung han jipulang hana lon woe
Kureuloh nanggroe Raja cilaka

Meung han pi hana jithee keudroe
Raja pindoe lon boh singkla
Lon poh beuhabeh dum pahlawan
Mangat jituban geutanyoe Diwa

Mangat jitu'oh Raja Usuli
Lon ngadu sakti ngon Pari Kaya
Idin tuanku lon peureugi
Badai doli jak tuntutan nama

Meusabda teuma baginda sulotan
Tadeungo lontuan he Raja Muda
Adak tajak he samlakoe
Takrah sinaroe raja-raja

Sireutoh raja taba sajan
Dum pahlawan sajan sireuta
Lekee ngon mangat bak Sa'id Meureudan
Bek krang-ceukang tabri haba

Adak han jipulang deungon mangat
Taprang teumpat tareuloh kuta
Raja Muda deungo sabda meunan
Neukrah le yoh nyan dum peutua

Sigala 'adi ngon uleebalang
Ngon pahlawan nyang peukasa
Raja Muda neukrah rakyat
Habeh meusapat balatandra

Maseng-maseng cukop alat
Ban nyang babat maseng jeumba
Sulotan Diu panglima prang
That pahlawan sakti raya

'Alem San Diwa sidroe pahlawan
Keupala prang Diu Kaindra
Sare hase dum peue keumah
Neulakee meu'ah bak baginda

Raja Muda seumbah sulotan
Neulakee idin keumeung bungka
Idin tuanku laman sikali
Lon peureugi nanggroe Raja

Bak le do'a tuanku keu kamoe
Neuleueng jaroe bek na reuda
Bak leupah lon nibak baya nyoe
Meunang kamoe bak troh pinta

Baginda seuot he samlakoe
Idin kamoe aneuk Raja
Tajak aneuk bak seulammat
Tuhan halarat tulong gata

Raja Muda deungo haba meunan
Leugat neutren pantah sigra
Phon-phon neucok langkah uneun
Leupah u leuen neupasang guda

U teungoh mideuen neutebiet leugat
Sajan rakyat meuribee laksa
Maseng-maseng ateueh kandran
Ladom pasang ateueh naga

Sulotan Diwa Kaindran Diu
Lhee he teungku 'Alem San Diwa
Nyan peungapet Raja Muda jak
That meusigak hana tara

Raja Muda yoh nyan beurangkat
Cukop ngon alat gajah ngon guda
Meuseundi-seundi rupa peukayan
Geumeureulapan jibeudoh cahya

Dua ploh laksa 'adi ngon juhan
Uleebalang dum peukasa
Miseue reudok nyang that hitam
Dumnan angkatan Raja Muda

Sireutoh raja keunan meusapat
Padum na rakyat cuba takira
Rot dalam gle neubeujalan
Gunong nyang manyang jeuet keu data

Raja beurangkat that meuseuke
Seubab dalam gle uteuen raya
Mita nanggroe Sa'id Meureudan
That sukaan rakyat bungka

Padum lawet neubeujalan
Sampoe le yoh nyan u nanggroe Raja
Raja Muda piyoh di padang
Ka neupeudong saboh kuta

Tamong rakyat bandum keunan
Uleebalang mita bicara
Uleebalang musyeewarat
Sireuta mupakat dum panglima



Raja peugot teuma surat
Neuyue intat keu Raja Raya
Mumeunoe haba dalam surat
Saleuem nibak Raja Muda

Dapat disampoe uleh Tuhan
Keupada tuan syeedara hamba
Lagi saleuem Raja Usuli
Muda Sakti Raja 'Ala

Wahe Raja Sa'id Meureudan
Tadeungo lontuan po meukuta
Aneuk lontuan Diu Palinggam
Meugah lam tangan tuanku Raja

Lazem ateueh mee jinoe tapulang
Gaseh ngon sayang keu kamoe Diwa
Adak Raja gaseh tuanku ampon
Bek janjongan neuboh dawa

Keureuna geutanyoe sabe meureutabat
Pulang ngon mangat wahe Raja
Meuhan tapulang lon paban bah
Grak bak Allah ateueh hamba

Teutapi nyang got bak tapulang
Tanda lon sayang keu gata Raja
Jakalu bit-bit han tapulang
Nanggroeteuh kuprang tapeukong kuta

Tahei pahlawan nyang kuat-kuat
Bak meusapat dalam kuta
Kamoe nyang jak han le meuriwang
Meung han tapulang aneuk Raja

Wahe Raja Sa'id Meureudan
Bek talawan kamoe Diwa
Pulang ngon mangat Diu Palinggam
Kamoe meuriwang hana jeuet bahya

Adak han tapulang tabri keurajeuen
Toh siri mideuen tabri neuraca
Adak na mantong tapeugah pat
Peugah pat jirat adak ka pana

Uroe nyoe donya singoh akhirat
Bak taingat wahe Raja
Lon peuingat he sulotan
Pulang he rakan bek meudawa

Yoh goh troh keunoe Kama'Alam
Got tapulang mangat lon gisa
'Oh noe habeh tamat kalam
Neulipat yoh nyan pantah sigra

Lheueh nyan neujok bak utosan
Jak ba rijang ubak Raja
Meuntroe Peureudan jak intat surat
Jijak le leugat hana dawa

Teubiet lam kuta jijak leugat
Jipeuteupat bak pinto kuta
Troh bak kuta Sa'id Meureudan
Jihe yoh nyan ureueng kawai kuta

Soe lam kuta buka pinto
Lon keumeung lalo jak bak Raja
Sikawai pinto deungo narit meunan
Jitanyong yoh nyan pane gata

Lon ba surat keunoe u dalam
Suroh sulotan Raja Muda
Utosan deungo haba meunan
Jibuka le yoh nyan pinto kuta

Meutroe tamong rijang-rijang
Jibri kireman ubak Raja
Sa'id Meureudan kalon surat
Neuploh leugat le neubaca

'Oh jikalon haba lam surat
Jitanyong pakat bak panglima
Pakri bicara he pahlawan
Ka troh saleuem bak Raja Muda

Diu Palinggam jilakee pulang
Pakri padan nibak gata
Teuma seuot Sigeumpa 'Alam
Sireuta deungon Usi Tapa

Ampon tuanku seumbah laman
Bek tapulang po meukuta
Keureuna kamoe han tom muprang
Keupeue saktian meuribee laksa

Keupeue guna dum pahlawan
Meung hana prang nyang sabe raja
Idin tuanku lon kaleh surat
Lon boh narit balah haba

Sa'id Meureudan deungo haba pahlawan
Han le kalam Raja Raya
Usi Tapa peugot surat
Jiboh narit nyang that bisa

Meunoe haba dalam kireman
Saleuem lontuan keu Raja Muda
Ampon tuanku meukuta 'alam
Ampon laman he Raja Muda

Diu Palinggam talakee pulang
Bak kamoe tan meueu rupa
Han tom lon deungo Diu Palinggam
Peue lon pulang ponyak keu gata

Lon kalon han tom lon turi pi tan
Aneuk janjongan Indra Diwa
Bek tadawa u ateueh kamoe
Wahe adoe bak ulon hana

Bit pi meunan meung ka takheun
Bak lontuan pi sabet na
Diu Palinggam bek talakee le
Jih ka mate lon boh cong sula

Treb ka mate bukon siat
Keureuna seubab lon turi hana
Hana lon turi Diu Palinggam
Hana lon tuban aneuk Raja

Adak lon thee aneuk tuanku
Han habeh umu lon boh keu Raja
Raya that gaseh bak lon he rakan
Jak tariwang u nanggroë Diwa

Adak han meunan pubeudoh prang
Jakalee tungang gata Diwa
Mangat taturi Sa'id Meureudan
Mangat tatuban Usi Tapa

Meunyo na ureueng nyang arat nyawong
Tajo bak prang he Raja Muda
'Oh noe habeh tamat kalam
Neulipat yoh nyan pantah sigra

Ubak meuntroe jibri surat
Jiwoe leugat bak Raja Muda
Troh bak kuta tamong leugat
Jibri surat bak Raja Muda

Raja Muda kalon surat
Amarah that hu ngon mata
Teuma neukheun bak peudana meuntroe
Taba surat nyoe u gunong Miga

'Oh lheueh nyan taba bak Juhan 'Alam
Teuma 'oh lheueh nyan bak Raja Indra
Taba bak troh u nanggroe Diu
Surat tayue eu jeueb-jeueb Raja

Ube na sabat deungon geutanyoe
Jeueb-jeueb nanggroe surat taba
'Oh lheueh sabda bak Sulotan
Meuntroe Peureudan jak le sigra

Phon-phon jijak u Miga di awan
Bak Sulotan Kama 'Alam Diwa
Padum lawet peujalanan
Sampoe yoh nyan u gunong Miga

Ubak Raja tamong leugat
Jibri surat pantah sigra
Kama 'Alam Diwa kalon surat
Amarah that hana tara

Lheueh nyan meuntroe jilakee droe
Leugat jiwoe bak Mambang Raja
Leupah meuntroe jak beujalan
Kama 'Alam neukrah tandra

Meuntroe Peureudan troh bak Mambang
Tamong le rijang u dalam kuta
Jibri surat bak Juhan 'Alam
Raja Mambang kalon sigra

Juhan 'Alam kalon surat
Amarah that Raja Raya
Peudana meuntroe jilakee droe
Jijak jinoo u nanggroe Zinura

Juhan 'Alam jikrah rakyat
Habehe meusapat dum raja-raja
Meuntroe Peureudan jijak me surat
Hingga troh bak Raja Indra

Bak beureuma Kasan jibri surat
Ka neulihat pantah sigra
'Oh neukalon haba lam surat
Amarah that Raja 'Ala

Peudana meuntroe neucre sinan
Neulakee idin bak baginda
Beureuma Kasan neukrah rakyat
Habehe meusapat jeueb-jeueb raja

Peudana jijak teuma le jinoo
Troh u nanggroe Diwa Indra
Tamong leugat le u dalam
Bak sulotan dalam kuta

Bak Raja Diu jibri surat
Ka neulihat pantah sigra
'Oh lheueh neukalon asoe surat
Amarah that hana tara

'Oh lheueh nyan neukrah sigala rakyat
Habehe meusapat jeueb-jeueb raja
Teuduek haba meuntroe me surat
Muwoe riwayat keu Raja Muda

Neumeusabda bak uleebalang
Teubiet u padang he panglima
Bek that lambat geutanyoe sinoe
Teubiet jinoe tajak gaza

'Oh ban jideungo sabda sulotan
Amarah yoh nyan hu ngon mata
Ka jiteubiet u teungoh padang
Sireutoh sulotan teubiet jak gaza

Keumang payong deungon alam
Alamat prang ureueng meunama
Leugat jijak u teungoh padang
Jihei lawan dalam kuta

Ho ka gata Sa'id Meureudan
Suroh pahlawan teubiet u lua
Meung nyo galak keumeung theun peudeueng
Teubiet u mideuen bek lam kuta

Sa'id Meureudan deungo haba meunan
Teuma neukheun bak panglima
Kadeungo he uleebalang
Geutanyoe jiprang le Raja Muda

Jinoe tayue krah raja nyang taklok
Bandum bak trok keunoe teuka
Tujoh ploh raja bandum ka suron
Kayue jitren jeueb-jeueb raja

Dang-dang goh troh raja sinaroe
Teubiet jinoe jak lawan tandra
Uleebalang deungo sabda meunan
Neuyue bujang jak seuranta

Leupah bujang jak keumeurah
Teubiet kapilah jak lawan tandra
Teubiet sidroe panglima prang
Leugat jipasang ateueh guda

Dilon hai nyak ka lon peugah nan
Digata tuan peugah nama
Teuma seuot Geumpa Diu
Tadeungo teungku lon kheun nama

Lon nyoe uleebalang Sa'id Meureudan
Jinoe he rakan meuteumeung ngon gata
Peue na kame keunoe haluan
Tabri lon kalon pakri rupa

Diu deungo jikheun meunan
Neubeuet le yoh nyan cokma raya
Neupeusret ateueh Geumpa Diu
Tuleueng hanco di mideuen Raja

Mate panglima di teungoh mideuen
Habeh jiplueng rakyat dum na
Le that mate sira jiplueng
Jitak bak rueng seun-seun dua

Sulotan Diu teutap di padang
Neukalon lawan han le nyata
Bak Raja Muda leugat neuriwang
Rakyat sibarang piyoh di lua

Sa'id Meureudan kalon rakyat plueng
Ka neutanyong pantah sigra
Pakon taplueng gata sidroe
Pane ureueng use gata

Seuot rakyat uleebalang
Tuanku datang sidroe Diwa
Geumpa Diu ka jipoh mate
That beurani sulotan Diwa

Teuma seuot Sigeumpa 'alam
Singoh lontuan bantu jak gaza
Jak poh bila pahlawan nyang mate
Mangat jituri le sukee Diwa

Seuot Raja han peue salah
Singoh talangkah gata u lua
Teutap sinan Sigeumpa 'Alam
Teuduek habaran he syeedara

KATA SAHI BOL PO KARANGAN

Teuseubot habaran u gunong Miga
Kama 'Alam Diwa neukrah rakyat
Habeh meusapat jeueb-jeueb raja

RAKNA SA'IDAR saboh pahlawan
AMIR SAKDAN sukee Indra
Nyan peungapet baginda Sulotan
Laen uleebalang meuribee laksa

Sare habeh dum meusapat
Yoh nyan beurangkat Raja Miga
Sikureueng laksa naga teureubang
Gajah balohan limong ploh laksa

Lapan ploh laksa singa jipasang
Burak meulayang na dua laksa
Sikureueng ploh ribee geureuda teureubang
Baginda pasang nila angkasa

Sulotan Miga raya teureukah
Rakyat barollah ireng baginda
Sare leungkap 'adi ngon juhan
Alat peuprangan bandum rata

Leugat neutuju u buket Pari
Juhan ngon 'adi meuribee laksa
Raja Miga teungoh teureubang
Raja Mambang lon calitra

Juhan 'Alam neukrah rakyat
Habeh meusapat jeueb-jeueb raja
Dua peungapet Raja Mambang
Uleebalang nyang peukasa

Peutama MAMBANG SYAHI'ALAB
Dua sukee brat cokma meulila
Nyang kéudua MAMBANG SARI
Lakab geurasi PEUKASA DONYA

Juhan 'Alam le that rakyat
Lheueh nyan beurangkat tren u donya
Leugat neutuju u padang Pari
Juhan ngon 'adi meuribee laksa

Cahya Mambang teungoh beurangkat
Muwoe riwayat keu Raja Indra
Beureuma Kasan neukrah rakyat
Habehe meusapat tujuh blah raja

Peuet droe peungapet Beureuma Kasan
Nyang phon geupeunan INDRAN LILA
Nyang keudua PADUKA KAINDRAN
Keulhee geupeunan MEUNGEUNAI LILA

Teuma nyang keu peuet INDRA SAKTI
SAMANDON PARI LILA INDRA
Nyankeuh Raja nyang teubileueng
Beureuma Kasan nyang panglima

Sare habehe dum troh keunan
Beureuma Kasan tren u donya
Dua blah laksa naga teureubang
Burak meulayang na limong laksa

Sikureueng ribee rata teureubang
Peuet laksa pasang keurapat diwa
Nyang ateueh singa that barollah
Nyang ateueh gajah hana ek kira

Nila Angkara Raja pasang
Tren u padang bak Raja Muda
Teuduek haba Beureuma Kasan
Muwoe karangan Diu Peukasa

Habeh jikrah dum uleebalang
Beurangkat yoh nyan tren u donya
Nila Ngindra Diu Kharsani
Uleebalang rame sajan sireuta

Diu peukasa yoh nyan beurangkat
Lanja leugat tren u donya
Teuduek haba Diu teureubang
Sa'id Meureudan lon calitra

Beungoh uroe cuaca trang
Jiyue pahlawan teubiet jak gaza
Sigeumpa 'Alam teubiet u padang
Leugat jipasang ateueh guda

Sajan 'adi deungon juhan
Teubiet sajan dum u lua
Nyang meubusu ateueh gajah
Nyang mat panah ateueh guda

Nyang mat peudeueng ateueh waliman
Jroh lakuan tandra Raja
Deumpek ngon surak meualon-alon
Miseue bakat tren ujeuen keunong sa

Raja Muda suroh pahlawan
Teubiet u padang he syeedara
'Oh sare jideungo sabda meunan
Amarah le yoh nyan hu ngon mata

Cok le cokma sandang ngon peudeueng
Laju u mideuen neupasang guda
Leugat neujak u teungoh padang
'Adi ngon juhan meuribee laksa

Maseng-maseng guda jipasang
U teungoh padang jijak gaza
Meuseundi-seundi rupa peukayan
Geumeureulapan bak Raja Raya

Jidong meuseueh-seueh di teungoh midan
Musta'id ngon alat sinyata
Deumpek ngon surak na miseue guroh
Na nyum runtoh 'alam donya

Sideh pi seudong sinoe pi seudong
Di teungoh padang geugap gumpita
Yoh nyan meuteumeung dua blah pihak
Prang meusigak hana tara

'Oh le ureueng ban dua si
Prang sang-sang ri kiamat donya
Sigeumpa 'Alam di teungoh padang
Jicang kawan Diu Indra

Neukalon uleh Diu Seumari
Neutajo le u teungoh tandra
Leugat neujak u teungoh kawan
Neucang rakan Pari Kaya

Meuhubo-hubo di teungoh padang
Raya that prang leubeh bak nyang ka
Diu Seumari di teungoh padang
Ngon Sigeumpa 'Alam meungadap muka

Sigeumpa 'Alam teuma tanyong soe
Peugah jinoe nama gata
Lon eu le that tacang rakyat
Uroe nyoe he sabat peugah nama

Adak mate gata di padang
Peugah rijang he syeedara
Teuma seuot Diu Seumari
Deungo lon kheun kri he panglima

Lon nyoe nama Diu Seumari
Di bawah doli Raja Muda
Laman he Raja ka tatusoe
Peugah jinoe nama gata

Teuma seuot Sigeumpa 'Alam
Tadeungo lon kheun he syeedara
Nyoekeuh panglima Sa'id Meureudan
Sigeumpa 'Alam geurasi nama

Jinoe he Raja jak tariwang
Bek tinggai nan di mideuen Raja
Lon takot mate gata di padang
Nyang got jak riwang bak Raja Muda

Diu Seumari seuot pantah
Peue kapeugah nyang kon-kon haba
Bit kakalon hana rakan
Pantang lon riwang peue tasangka

Lon kon ureueng geupeutakot
Hana kuyut meung dum gata
Padum lawet sabe lam prang
Phon di manyang troh lam donya

Bak uroe nyoe gata peukeujot
Kon aneuk cut lon he tuha
Jinoe he raja peugah padan
Jak tariwang udeh bak Raja

Takheun saleuem bak Sa'id Meureudan
Beuna sayang keu raja dum na
Tayue pulang Diu Palinggam
Mangat bek karam nanggroe Raja

Meung han tapulang ingat keudroe
Akhe mupaloe gata binasa
Sigeumpa 'Alam deungo haba meunan
Amarah yoh nyan hu ngon mata

Jibet le cokma ka meulayang
Diu Pandang meunyum lia
Neumat peurise nibak jaroe
Diu samlakoe le bicara

Cokma jipeusret ateueh Diu
Neugrob laju di mideuen Raja
Keunong cokma ngon peurise
Miseue geulanteue meunan suara

Diu Seumari teuma poh balah
Jitheun pantah peurise raja
Keunong cokma bak jisayong
Meuk meukeupong u andaran

Teubiet meuk apui sabong -meunyang
Miseue ka tutong nanggroe Indra
Sigeumpa 'Alam kalon mumeunan
Jitajo le yoh nyan jidrob jiwa

Neumeureupah di teungoh mideuen
Ka meuteumeung sabe peukasa
Leungo bumoe sang kiamat
Sigala rakyat hate lia

Neubet kayee di teungoh padang
Dhoi teureubang dalam hawa
Bacut silab Diu Seumari
Bak cet gaki reubah teuhanta

Sigeumpa 'Alam teuma boh taloe
Jikeumeung puwoe dalam kuta
Yoh nyan neubeuet do'a peurapoh
Rante putoh jeuet keu sira

Teuma neudong di mideuen prang
Neumat di tangan peudeueng raya
Neutak teuma Sigeumpa 'Alam
Keunong badan nibak dada

Teubiet apui dalam badan
Na miseue ban apui neuraka
Diu Seumari hireuen teuceungong
Seubab neukalon apui meunyal

Sigeumpa 'Alam kheun bak Diu
Jak leh lalu woe lam kuta
Keupeue guna tateubiet u padang
Han ek talawan lon le gata

Jak woe gata yue teubiet laen
Dilon kusyen that keu gata
Diu Seumari deungo haba meunan
Amarah yoh nyan ban uleue bisa

Neupet mata neuganceng bibi
Jeuet keu gogasi badan raya
Sigeumpa 'Alam kalon meunan
Jibeuet le yoh nyan saboh do'a

Geureuda ka jeuet deungon badan
Jipo le yoh nyan dalam hawa
Jisama gogasi nibak ulee
Keunong gukee bacut luka

Geureuda beungeh that guransang
Gogasi yoh nyan ubah rupa
Ka jeuet keu naga raya badan
Jiteureubang dalam hawa

Jimeukab-kab dalam awan
Tiwah le yoh nyan geureuda raya
Jipeujeuet droe lom keu ensan
Jitren u mideuen miseue nyang ka

Diu Seumari tren u mideuen
Ka muwoe badan miseue nyang ka
Ka jimeutak di teungoh padang
Meuriwang-riwang meugisa-gisa

Jinari-nari di teungoh mideuen
Tamse bayeuen meulet di banda
Jicok langkah that meusigak
Watee jarak meuen panika

'Oh meuteumeung ka jimeutak
Keunoe han rusak keudeh han luka
Teungoh-teungoh ureueng muprang
Mata uroe trang hana le cahya

Yoh nyan meusurot bandua sagoe
Keureuna uroe ka padam cahya
Diu Seumari piyoh di padang
Sigeumpa 'Alam mumeunan juga

Teuduck meuseueh-seueh di teungoh padang
Mata lam awan bandum raja
Na sikeujab dudoe nibak nyan
Leumah angkatan tren lam hawa

Miseue reudok nyang got that hitam
Uroe teungoh trang miseue ka sinja
Dalam awan dum meulang-lang
Naga teureubang deungon singa

Rata teureubang keurakat sajan
Burak meulayang ngon geureuda
Leugat jitren u teungoh padang
Zanggi pahlawan ngon panglima

Jibeudoh dhoi abee anoe
Miseue bagoe ribot teuka
Sulotan Miga tren u mideuen
Rakyat sajan meuribee laksa

Diu Seumari kalon angkatan
Neujak le yoh nyan bak Raja Miga
Sajan rakyat ngon pahlawan
Jijak meuteumeung ngon Raja Miga

'Oh lheueh meuteumeung bri horeumat
Peutamong leugat dalam kuta
Raja Muda teuma bri teumpat
Ban nyang adat Raja-Raja

Kama 'Alam Diwa piyoh didalam
Jibri makanan makeuen rata
Diu Seumari kheun bak sulotan
Idin lontuan teubiet jak gaza

Raja Muda kheun piyoh sikeujab
Singoh he sabat gata keulua
Keureuna gata ban lheueh tamuprang
Bek le guransang tapiyoh gata

Diu Seumari deungo haba sulotan
Rupajih ban uleue bisa
Han jipateh Raja Muda tham
Leugat jipasang ateueh guda

Neusuet peudeueng neutak rijang
Sigeumpa 'Alam keunong keupala
Reubah meugule di teungoh padang
Jicok le rakan puwoe bak Raja

Sa'id Meureudan eu panglima jipuwoe
Neukalon bak asoe darah teupanca
Neumeung peurab le neujak lihat
Neukalon that bak ulee luka

Neucuko ok neuboh ubat
Teutap lam hat sidroe panglima
Diu Seumari mantong di mideuen
Neucang ureueng meuribee laksa

Na dua ploh mate pahlawan
Jikalon le 'Alem Diwa
Leugat jijak u teungoh mideuen
Bak jaroe peudeueng ube bleuet mata

Meuteumeung le Diu Seumari
Jimeutak le hana tara
Bacut silab Diu Seumari
Lheueh nyan jitadi ngon peudeueng raya

Lhee seun jitak meuadoe-adoe
Reubah u bumoe hilang nyawa
Diu Seumari mate di mideuen
Surak le yoh nyan ureueng po banda

Jicok mayet teuma le rakan
Jipuwoe le yoh nyan bak Raja Muda
Raja Muda eu pahlawan mate
Ka teupike Raja Muda

Keureuna seubab han neubri muprang
That guransang Diu panglima
Kama 'Alam Diwa kheun bak pahlawan
Teubiet u midan he panglima

Jindra deungo sabda sulotan
Sukee Kaindran amarah raya
Teuma jiteubiet dum u padang
Siakan-akan reudok keunong sa

Le that tandra Miga di awan
Raja pilehan Kama 'Alam Diwa
Nyang mat cokma naga jipasang
Bak bilangan sikureueng laksa

Nyang uleebalang ateueh burak
Suka galak soe eu rupa
Limong laksa nyang sukee nyan
Teubiet u padang jijak gaza

Di likot nyan rata teureubang
Bak bilangan lapan laksa
Nyang pasang nyan raja sagoe
Dum sinaroe ateueh guda

Nyang mat panah guda teureubang
Keunan jipasang limong ploh laksa
Nyang mat busu ateueh gajah
That barollah han ek kira

Nyang ateueh guda payong ngon alam
Sajan sinampan bandum rata
Nyang di rakyat mubagoe-bagoe
Dum sinaroe u mideuen Raja

Kama 'Alam Diwa raya teureukah
Alam mirah bandum sirupa
Leugat neujak u teungoh mideuen
Miseue tupheuen bumoe meutaga

Miseue reudok nyang got that hitam
Le that angkatan Kama 'Alam Diwa
Teudong meuseueh-seueh di teungoh mideuen
Musta'id deungon alat sinyata

Deumpek ngon surak that meuguncang
Yoh nyan meuteumeung Pari ngon Diwa
Meuhubo-hubo di teungoh mideuen
Jimeukab limpeuen deungon kala

Raja CINDRA PEUKASA 'ADI
That beurani hana tara
Neucang ureueng wie ngon uneun
Di teungoh mideuen mate meulaksa

Siribee mate meulaksa jiek
Surak ngon deumpek that meutaga
Ngon 'Alem Diwa ka meuteumeung
Di teungoh mideuen meungadu muka

'Alem Diwa yoh nyan neutanyong
Soe he bungong nama gata
Sulotan Cindra Peukasa 'Adi
Neuseuot le meunoe kata

Nyoekeuh kamoe Miga di awan
Nama geukheun Raja Cindra
Bak uroe nyoe lon masok prang
Ngon gata rakan meuteumeung muka

Dilon dalem ka lon peugah nan
Digata rakan soe geuhei nama
Bak uroe nyoe nyawongteuh hilang
He pahlawan peugah sigra

'Alem Diwa seuot rijang
Tadeungo lon kheun wahe raja
'Alem Diwa nama lontuan
Hana lawan ube nyang ka

Bak uroe nyoe saleh na lawan
Cuba theun tangan lon tiek meutia
Teuma jibeuet cokma meulayang
Cindra pahlawan neutheun le sangga

Keunong jipoh ateueh peurise
Miseue bade geulanteue teuka
Leungokeuh 'alam tujoh lapeh
Hingga habeh bumoe jeuet geumpa

Cindra teuma neupoh balah
Neubet le pantah cokma sigra
Neupeusret ateueh 'Alem Diu
Reubah le laju di mideuen Raja

Luroh asoe deungon tuleueng
Di teungoh mideuen mate pana
'Alem Diu mate di padang
Ureueng di manyang surak meutaga

Sa'id Meureudan eu pahlawan han le
Jiyue teubiet le laen panglima
SIKANDA PARI geurasi nan
Leugat jipasang ateueh guda

Lanja jijak u teungoh padang
'Adi ngon juhan meuribee laksa
Meuseundi-seundi rupa peukayan
Alat bak tangan peudeueng ngon cokma

Teudong meuseueh-seueh di teungoh mideuen
Musta'id deungon alat sinyata
Deumpek ngon surak meualon-alon
Miseue riyeuek tren musem keunong sa

Teungoh-teungoh keumeung muprang
Leumah angkatan meuribee laksa
Dhoi teureubang di teungoh padang
Juhan 'Alam tren u donya

Leumah dalam dhoi lasyeuka Mambang
Han tebileueng meuribee laksa
Ngon bajee zireh keutupong beusoe
Dum sinaroe di ateueh guda

Troh le keunan u teungoh padang
Hana jadeh prang bandua tandra
Raja Muda kalon ka troh Mambang
Neuyue peutamong u dalam kuta

Juhan 'Alam tamong u dalam
Sajan rakan dum sireuta
Raja Muda teuma bri teumpat
Ban nyang adat meujeulih Raja

Raja Cindra mantong di padang
Yoh nyan meuteumeung dua tandra
Nyoe baro lom ka bicah prang
Rakyat guransang hana tara

Sikanda Pari pi that guransang
Rakyat jicang meuribee laksa
Deumpek ngon surak that meuguncang
Di teungoh padang geugap gumpita

Sikanda Pari di teungoh padang
Rakyat jicang sukee Raja
Ri nyang leumah u hadapan
Habeh jisimpan ngon sikleb mata

Neukalon le Miga Rakam
Nyang pahlawan nanggroe Indra
Neupasang guda lanja u mideuen
Neucang ureueng meuribee laksa

Ri nyang leumah u hadapan
Neusimpan ngon sikleb mata
Teuma meuteumeung ngon Kanda Pari
Jitanyong le soe nan gata

Wajib jinoe nyan tapeugah
Lon deungo sah he panglima
Adak tamuprang di teungoh padang
Wajib peugah nan yoh goh pahna

Adak mate didalam prang
Ka meusoe nan tinggai nama
Miga Rakam deungo haba meunan
Neuseuot le yoh nyan pantah sigra

Lon nyoe Raja didalam awan
Uleebalang Kama 'Alam Diwa
Bak uroe nyoe lon masok prang
Ngon gata rakan meuteumeung muka

Harap teewakai ulon keu teelan
Teubiet u midan tulong tandra
Digata adek soe geuhei nan
Peugah rijang lon deungo nyata

Sikanda Pari seuot le rijang
Tadeungo lontuan he syeedara
Lon nyoe Raja nanggroe Kayangan
Sa'id Meureudan lon panglima

Bak uroe nyoe lon masok prang
Meurumpok lawan deungon gata
Jinoe dalem tadeungo lontuan
Tatheun tangan lon tiek mutiara

Miga Rakam deungo haba meunan
Teuma neukheuen meunoe kata
Han peue salah wahe adoe
Cuba boh keunoe sianeuk dua

Sikanda Pari deungo haba meunan
Jibet le yoh nyan cokma raya
Jipeusret ateueh raja di manyang
Neutheun le yoh nyan peurise raya

Keunong jipoh ateueh peurise
Cokma he sampee hanco ban sira
Raja Miga teuma poh balah
Pari reubah keunong bak dada

Reubah meugule di teungoh mideuen
Hanco tuleueng han meukala
Raja Pari mate di padang
That guransang tandra Miga

Sigala rakyat Miga di awan
That guransang hana tara
Jilet ureueng tandra Meureudan
Jiplueng yoh nyan u dalam kuta

Rakyat Miga e hana le lawan
Uroe pi malam jiwoe bak Raja
Kama 'Alam Diwa tanyong bak rakan
Soe talo prang he panglima

Teuma seuot Cindra pahlawan
Tuanku ampon tiwah tandra
Rakyat nanggroe habeh jiplueng
Di teungoh mideuen mate panglima

Dua droe raja kamoe poh mate
Jiplueng sare dum lamkuta
Sa'id Meureudan eu rakyat jiplueng
Teuma jitanyong pantah sigra

...eng gata sinaroe
Peugai jinoe lon deungo nyata
Rakyat seuot tuanku ampon
Neudeungo lon po meukuta

Raja dua tuanku hana le
Ka jipoh mate le Raja Miga
Le that ureueng Miga di awan
Jinoe peue padan po meukuta

Raja Muda le that rakyat
Lon eu leugat teungoh teuka
Jinoe tuanku neukirem surat
Keudeh bak sabat Raja 'Ala

Ubak Raja nanggroe ZAMILON
U Buket Zihon dalam kuta
Sulotan Tasek Batee meudolang
Ubak sulotan Syareh Miga

Saboh bak Raja Bangga Pari
Nyang bri mupeuti di nanggroe Cahya
Nyang jak tapa lam pusat laot
'Alem MALAKOT nyang that 'ala

Meunyo tuanku hana tulongan
Han ek talawan Raja Miga
Sa'id Meureudan deungo haba meunan
Jipeugot kireman pantah sigra

Meunoe haba didalam surat
Nibak sabat tuan dum na
Wahe Raja dum sibarang
Tadeungo lontuan po meukuta

Keureuna kamoe tuanku ampon
Kheundak Tuhan ka keunong bahya
Raja Miga nyang lam awan
Raja Mambang ngon Raja Indra

Raja Diwa ngon Raja Diu
Bandum tuanku jiprang hamba
Jijak enanya kamoe duek keudroe
Bak siseun nyoe lon binasa

Meung konka gaseh tuanku nyang sabat
Kamoe meuhat gadoh nyawa
Meunankeuh haba didalam surat
Jiyue jak intat jeueb-jeueb Raja

Teubiet bujang jak me surat
Jijak leugat rot lam hawa
Jipasang le ateueh burak
Teuma bujang jak jeueb-jeueb Raja

Habeh jijak jeueb-jeueb sulotan
Jibri kireman bandum rata
Teuduek haba bujang me surat
Raja yue teubiet pahlawan dum na

He panglima uleebalang
Teubiet u midan jak lawan tandra
Dang-dang teuka Raja tulongan
Teubiet u mideuen bek that jula

Gumpinta Diu deungo haba meunan
Leugat jipasang ateueh guda
Lanja jiteubiet u teungoh padang
'Adi ngon juhan sajan sireuta

'Oh sare troh u teungoh padang
Jideumpek le yoh nyan that meutaga
Juhan 'Alam kalon u padang
Le that ureueng di mideuen Raja

Neuyue teubiet dum uleebalang
Keudeh u padang he panglima
SYAHI MALAKAB Mambang Sakti
Jipasang le ateueh guda

Sukeureueng laksa raja sajan
Sukee Mambang le lasyeuka
Leugat jiteubiet u teungoh padang
'Adi ngon juhan meuribee laksa

Meuseundi-seundi rupa peukayan
Geumeureulapan dum peutua
Kawoh bak kaki dum sinaroe
Bajee beusoe ngon teumaga

Mubajee zireh keutupong beusoe
Peudeueng bak jaroe deungon cokma
Maseng-maseng alat bak asoe
Miseue bagoe adat donya

'Oh sare troh u teungoh padang
Seueh jipeudong maseng jeumba
Deumpek ngon surak that meuguncang
Meunyum leukang 'alam donya

Gumpinta Diu di teungoh midan
U teungoh kawan jijak lanja
Yoh nyan ka phon lom bicah prang
Ureueng di manyang ngon ureueng donya

Meuhubo-hubo di teungoh padang
Pari ngon Mambang meuseunoh bunga
Sulotan Mambang Malakab Sakti
Jipasang le ateueh guda

Neujak lanja u teungoh mideuen
Neucang ureueng seun dua-dua
Neucang ureueng wie ngon uneun
Ban siwah naleueng ngon cempala

Gumpinta Diu yoh masa nyan
Ngon Raja Mambang meuteumeung dua
Meuhadapan oh meutemeung
Neumubri saleuem sigra-sigra

Na sikeujab meungadu sakti
Teuma mate Gumpinta Diwa
Jikalon uleh Lila Pari
Jipasang le ateueh guda

Lanja jijak u teungoh mideuen
Jicang ureueng ban kleueng sama
'Oh ban neukalon le Raja Mambang
Leugat neupasang ateueh guda

Leugat neujak u hadapan
Meuteumeung le yoh nyan sabe Raja
Teungoh-teungoh keumeung muprang
Leumah lam awan ureueng meulaksa

Uroe teungoh trang cahya ka padam
Miseue malam han le cahya
Seubab mupadok mata uroe
Rakyat meukatoe troh lam hawa

Na sikeujab dalam awan
Troh u padang rakyat meulaksa
SINGA PAKSI naga teureubang
Laen nibak nyan burak lam hawa

Geureuda sajan ngon keurakat
Ladom meuhateueh rata
Keumang ngon payong ateueh gajah
Alam nirah ateueh guda

Mubajee zireh keutupong beusoe
Bandum bak jaroe peudeueng ngon cokma
Meuseundi-seundi rupa peukayan
Beureuma Kasan teureukah raya

Raja Mambang eu Beureuma Kasan
Yoh masa nyan jak pumeulia
Jibri saleuem mumat ngon jaroe
Peutamong le jinoe u dalam kuta

Raja Muda eu Beureuma Kasan
Hate sukaan hana tara
Troh lam kuta neubri teumpat
Ban nyang adat meujeulih Raja

Beureuma Kasan piyoh didalam
Sajan rakan balatandra
Na sikeujab piyoh sulotan
Surak di midan meutaga-tagataga

Lila Pari di teungoh mideuen
Jingieng ureueng meuribee laksa
Meuteumeung deungon Mambang Sakti
Meungadu sakti di mideuen Raja

Na sikeujab meungadu sakti
Lila Pari mate pana
Tandra Mambang surak di mideuen
Jiplueng ureueng dum lam kuta

Le that mate sira jiplueng
Jitak bak rueng seun-seun dua
Sa'id Meureudan eu rakyat jiplueng
Teuma jitanyong sigra-sigra

Pakon kaplueng kah sinaroe
Dua ngon nyoe lon eu tagisa
Teuma seuot uleebalang
Tuanku ka tan dua panglima

Nyankeuh seubab kamoe meuriwang
Ampon laman po meukuta
Teuduek haba Sa'id Meureudan
Teuseubot teelan Syareh Miga

'Oh troh keunan bujang me surat
Jikrah rakyat jeueb-jeueb raja
Syamsi Miga beurangkat sajan
'Adi ngon juhan dum sireuta

Peuet panglima keupala prang
Uleebalang that peukasa
Peutama phon PAMITAAN ZANGGI
Keudua geurasi BEURIBOT TAPA

Nyang keulhee teuma 'ALIMAN SYAMSI
Keupeuet geurasi KASTAM PEURMASA
Sare ka troh dum meusapat
Yoh nyan beurangkat Raja Raya

Sulotan Milon 'oh troh surat
Jikrah rakyat bandum raja
Raja di Buket Batee Peulinggam
DIKAR 'ALAM geurasi nama

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Sidroë Raja di Tasek Biram
MILON AWAN JUMBA SAKILA
Sidroe Raja di padang Zihon
Namajih HARON 'ALEM PEUKASA

Sidroë Raja di padang Tukahh
Raja meugah sakti geupuja
Sulotan Bahlui Zanggi Milon
Sidroe adoe nyan Zanggi Peuraba

Peuet ploh pahlawan nyang jak sajan
Kawai Raja nyan dalam tapa
Habeh jikrah le Raja Milon
'Oh lheueh nyan dum jitren bak Raja

Sare habeh dum peue leungkap
Yoh nyan beurangkat Milon Raja
Sikureueng laksa guda samaran
Gajah balohan han ek soe kira

Jijak leugat u Buket Pari
Juhan ngon 'adi meuribee laksa
Raja Milon teungoh peureugi
KUSANGGA PARI lon calitra

'Oh troh surat nibak sulotan
Jikrah le yoh nyan rakyat dum na
Sare habeh dum meusapat
Yoh nyan beurangkat Raja Lam Cahya

Aduen Raja nyan 'Alem Majakob
Di pusat laot sinan jitapa
Sajan yoh nyan dum beurangkat
Laen rakyat meuribee laksa

Leugat jituju u Buket Pari
Juhan ngon 'adi meuribee laksa
Teuduek haba ureueng beujalan
Sa'id Meureudan lon calitra

Jiyue teubiet panglima prang
Jafar 'Alam nyang peukasa
Ateueh guda lanja jipasang
Teubiet u padang ngon balatandra

Sajan 'adi deungon juhan
Meuribee ban alat sinyata
Lanja jiteubiet u teungoh padang
Jidong meureuntang di mideuen Raja

Sireuta jideumpek jihei lawan
Teubiet u padang tandra Diwa
Beureuma Kasan suroh pahlawan
Teubiet u padang he panglima

Sulotan Zinura Indran Sakti
Neupasang le ateueh guda
Leugat jijak u teungoh midan
'Adi ngon juhan meuribee laksa

Sukee Indra that meureumpan
Ateueh kandran bandum rata
Maseng-maseng ban nyang laku
That meusyeuhu tandra Indra

Indra Sakti ateueh guda plang
Teubiet u padang sajan lasyeuka
Ladom ateueh guda samaran
Ladom meukandran nila angkara

Ladom ateueh naga sakti
Ladom peureugi ateueh singa
Ladom ateueh geureuda meulayang
Burak teureubang ladom jiba

Ateueh gajah biek pahlawan
Payong pi keumang alam sireuta
Meuseundi-seundi rupa peukayan
Geumeureulapan ngon meukuta

'Oh sare troh u teungoh mideuen
Alam jipeudong maseng panglima
Surak meuhubo di teungoh padang
Meurumpok lawan Pari ngon Indra

Sideh pi jiek sinoe pi jijak
Yoh nyan meurumpok seudong ngon kala
Yoh nyankeuh prang nyang raya that
Jicang rakyat meuribee laksa

Tandra Indra that guransang
Le that jicang rakyat donya
Mate rakyat Sa'id Meureudan
Di teungoh midan meuribee laksa

Yoh nyan tiwah tandra Pari
Le that mate han teukira
Habej isurot dum angkatan
U likot pahlawan jak meuseuninya

Hate kuyu muka pucat
Seubab kreueh that rakyat Indra
Jafar 'Alam kalon meunan
Jitajo yoh nyan lam kawan Indra

Jicang ureueng wie ngon uneun
Di teungoh mideuen rakyat pana
Teuma meuteumeung ngon Indra Sakti
Jitanyong le panglima Jafar

Wahe Raja dalam awan
Soe he tuan nama gata
Lon eu laku that andalan
Sigak bangon that peukasa

Jinoe palem peugah rijang
Mangat lon tuban he syeedara
Teuma seuot Indra sakti *
Deungo lon kheun kri he syeedara

Ulon peungapet Beureuma Kasan
Teupat keurajeuen nanggroe Zinura
Nama ulon Indra Sakti
Beutaturi singoh lusa

Bak uroe nyoe gata beuingat
Nyoekeuh he nyak pahlawan Indra
Diulon ka lon peugah nan
Digata rakan soe geuhei nama

Seuot jafar jikheun meunoe
Tadeungo kamoe wahe Raja
Nama ulon Jakpha 'Alam
Lon mat gayam nanggroe Saraya

Bak uroe nyoe lon masok prang
Meurumpok lawan teuma ngon gata
Peue na taba keunoe haluan
Tabri he rakan lon keumeung rasa

Indra Sakti deungo haba meunan
Neubet le yoh nyan cokma raya
Neupoh ateueh Jafar 'Alam
Jitheun le rijang peurise raya

Cokma pi sret ateueh peurise
Miseue bade geulanteue teuka
Jafar 'Alam reubah pangsang
Neuboh le yoh nyan dalam singkla

Dalam kuta leugat keumbali
Indra Sakti meusyeyuhu nama
Rakyat Pari eu pahlawan han le
Jiplueng sare dalam kuta

Jikalon le Peulita Sari
Jipasang le ateueh guda
Leugat jajak u teungoh mideuen
Rakyat nyang plueng habeh jigisa

'Oh sare troh u teungoh mideuen
Jicang ureueng tandra Indra
Yoh nyan lom prang di teungoh padang
Seudong nyang tungang baro keulua

Indra Lila kalon meunan
Leugat neupasang ateueh guda
Laju jituju u teungoh mideuen
Jicang ureung meuribee laksa

Ho nyang neucang habeh ranab
Ho neupeunab dum seureupha
Teuma meuteumeung Peulita Sari
Meungadu sakti di mideuen Raja

Na sikeujab meungadu sakti
Yoh nyan mate Indra Lila
Rakyat Indra surak di padang
Seubab ka tan saboh panglima

Meungeunai Lila kalon rakyat plueng
Leugat neupasang ateueh guda
Neujak leugat u teungoh mideuen
Rakyat nyang ka plueng habeh jigisa

Nyoe baro lom meuhubo prang
Uleue ngon birang baro keulua
'Oh sare troh u teungoh mideuen
Ka meuteumeung dua tantra

Neucang ureueng wie ngon uneun
Ban siwah naleueng ngon ceumpala
Teuma meuteumeung ngon Peulita Sari
Meungadu sakti di mideuen Raja

Na sikeujab meungadu sakti
Peulita Sari mate pahna
Sukee Indra surak meuguncang
Mate pahlawan meuteumeung nama

Rakyat Pari le that mate
Reubah meugule di mideuen Raja
Jikalon le Samaran 'Adi
Jipasang le ateueh guda

Leugat jijak u teungoh mideuen
Jicang ureueng meuribee laksa
Rakyat nyangka plueng habeh jiriwang
Jak bantu prang Raja Raya

Meungeunai Lila kalon meunan
Teuma jipasang ateueh guda
Jijak linteueng Samaran 'Adi
Meuteumeung le di mideuen Raja

Yoh nyan ka lom meungadu sakti
Samaran 'Adi roh lam singkla
Meungeunai Lila jiwoe u dalam
Surak meugeuntam rakyat sineuna

Tandra Pari pi ka bicah kawan
Habeh teureuban plueng lam kuta
Rakyat Indra let di likot
Pari teumakot pucat muka

Zanjabila kalon mumeunan
Leugat jipasang ateueh guda
Lanja jijak u teungoh padang
Jimasok lam prang di mideuen Raja

Rakyat nyang ka plueng habeh jiriwang
Seubab masok prang Zanja Bila
Jijak laju dalam mideuen
Jicang ureueng rakyat Indra

Jikalon le Samandon Pari
That beureuhi Lila Peukasa
Jipasang guda lanja u mideuen
Meurumpok le yoh nyan ngon Zanjabila

Na sikeujab meuhadapan
Meungadu saktian di mideuen Raja
Samandon Pari mate di midan
Tinggai rakan Lila Peukasa

Yoh nyan amarah hana lawan
Jimat bak tangan cokma raya
Jipoh ateueh panglima Pari
'Oh lheueh nyan mate Zanjabila

Luroh asoe deungon tuleueng
Di teungoh mideuen hanco ban sira
Mate panglima jicang rakyat
Mate le that ureueng po banda

Lila Pari kalon meunan
Leugat jipasang ateueh guda
Jiteubiet le u teungoh padang
Meurumpok lawan Lila Peukasa

Yoh nyankeuh lom ka bicah prang
Di teungoh padang meulila-lila
Lila Peukasa jibeuet hekeumat
Yoh nyan teuingat eleumee mintra

Meugrak-grak lidah deungon bibi
Reubah Pari peurab Indra
Lila peukasa teuma boh taloe
Leugat neupuwoe u dalam kuta

Jikalon le Sigeumpa 'Alam
Leugat jipasang ateueh guda
Jijak laju u teungoh mideuen
Jicang ureueng rakyat Indra

Wie ngon uneun peudeueng reubah
Mate barollah rakyat meulaksa
Neukalon le Paduka Kaindran
Lanja u padang neupasang guda

'Oh sare troh u teungoh mideuen
Neucang ureueng siseun-seun dua
Teuma meuteumeung ngon Sigeumpa 'Alam
Yoh nyan teumanyong Raja Indra

He panglima nyang guransang
Soe he rakan nama gata
Lon kalon le that tapoh rakyat
Rupateuh hibat lon ngieng sila-la

Teuma seuot Sigeumpa 'Alam
Tadeungo lon kheun wahe Indra
Nama ulon Sigeumpa 'Alam
Hana soe lawan ube nyang ka

Bak uroe nyoe saleh na lawan
Ngon gata rakan saleh padra
Bak peunyum lon han ek talawan
Nyang got he rakan jak tagisa

Bek tameuseunda ngon Sigeumpa 'Alam
Lon takot karam nyawong lam dada
Dilon adoe ka lon peugah nan
Digata rakan soebu nama

Nibak mate gata di padang
Meuhat tinggai nan Raja digata
Teuma seuot Paduka Kaindran
Lagee buleuen trang cahya muka

Pakon meunan takheun he Sigeumpa 'Alam
Bit le that ragam haba digata
Pakri bah han malee babah
Dum muka kah kee kayue gisa

Pakri kasangka nibak hate
Meuhat hase ban kheun gata
Nyoekeuh saboh uleue birang
Hana soe sagang ube nyang ka

Paduka Kaindran geurasi nan
Beutatuban he panglima
Tadeungo he Sigeumpa 'Alam
Peue na haluan keunoe taba

Bak uroe nyoe lon masok prang
Wajeb haluan dilee bak gata
Sigeumpa 'Alam deungo haba meunan
Jiteupok tangan ateueh donya

Ka jeuet apui di teungoh midan
Paduka Kaindran kalon rupa
Nibak bumoe neuceukan gaki
Teubiet mata ie meubura-bura

Habeh mate apui bunoe
Rakyat sinaroe hati suka
Sigeumpa 'Alam kalon meunan
Jicok le yoh nyan panah sigra

Teuma jipeulheueh u teungoh mideuen
Aneuk panah nyan jeuet keu naga
Badan raya hana bagoe
Leugat jipeutoe bak rakyat Indra

Paduka Kaindran kalon meunan
Neupeulheueh le yoh nyan panah sigra.
Aneuk panah nyan jeuet keu syeetan
Meukawan-kawan dalam hawa

Gukeejih tajam miseue tajoe
Jimat le jinoe panglima naga
Syeetan bandum gagah sangat
Jipoh rakyat Pari gaya

Naga mate rakyat dum habeh
Yoh nyan meuceh Raja Indra
Sigeumpa 'Alam kalon meunan
Jimat bak tangan cokma meulila

Jipoh ateueh Paduka Kaindran
Teuma neutheun peurise raya
Keunong jipoh ateueh peurise
Miseue bade geulanteue teuka

Paduka Kaindran teuma poh balah
Nyan pi pantah jitheun sangga
Nyan baro sabe bareh sinampang
Di teungoh padang meuen sinyata

Teungoh lale ureueng muprang
Leumah angkatan ureueng Indra
Uroe teungoh trang cahya ka padam
Seubab angkatan tren lam hawa

Padam cahya mata uroe
Ngon rakyat nanggroe Diu Indra
Ho maken toe leugat keunan
Troh u padang dum lasyeuka

Miseue reudok nyang got that hitam
Le that angkatan Diu Peukasa
Paduka Kaindran han jadeh prang
Seubab angkatan geupumeulia

Diu Peukasa ka troh keunan
Peuet Raja nyan that peukasa
Paduka Kaindran peutamong u dalam
Piyoh le yoh nyan Raja Indra

Raja Muda teuma bri teupat
Miseue adat reusam donya
Lheueh nyan neubri ngon makanan
Makeuen minom raja-raja

'Oh lheueh makeuen piyoh sinan
That sukaan Raja Muda
Diu Peukasa teutap didalam
Sigeumpa 'Alam surak meutaga

Deumpek di mideuen meualon-alon
Miseue riyeuek tren musem keunong sa
Diu Kharsani deungo surak di padang
Leugat neupasang nila angkasa

Lanja neujak u teungoh padang
Dua sajan ngon Lila Indra
Sajan 'adi deungon juhan
Meuribee ban alat sinyata

Meuseundi-seundi rupa peukayan
Geumeureulapan cahya meukuta
'Oh ban sare troh u teungoh mideuen
Yoh nyan meuteumeung dua tandra

Diu Kharsani that guransang
Yoh nyan neupasang nila angkasa
Neucang rakyat di teungoh padang
Miseue birang meuhambo bisa

'Oh rab rakyat deuh neupandang
Yoh nyan neucang seun silaksa
Wie ngon uneun reubah peudeueng
Mate ureueng meukeuba-keuba

Nila Ngindra naga neupasang
Neuteureubang u teungoh tandra
Wie ngon uneun rakyat neucang
Leumah neupandang sidroe panglima

Pari Nakra geurasi nan
Treb ka keunan dalam tandra
Nila Ngindra keunan neupeutoe
Neumat bak jaroe panglima Nakra

Yoh nyan neusrom dalam awan
Angen teureubang neuyue bawa
Sret u nanggroe Biram Peutawi
Bak Raja Sakti that peukasa

Di teungoh padang sret di mideuen
Hanco tuleueng jeuet keu sira
Diu Kharsani di teungoh padang
Ngon Sigeumpa 'Alam meuteumeung dua

Sigeumpa 'Alam teuma teumanyong
Soe he rakan nama gata
Lon eu le that tapoh rakyat
Jinoe he sabat peugah nama

Diu Kharsani seuot le rijang
Tadeungo lontuan wahe Raja
Nama ulon Diu Kharsani
Bak taturi singoh dan lusa

Bak uroe nyoe lon masok prang
Ngon gata rakan meuteumeung muka
Phon dileekon hana soe lawan
Dalam awan geupujoe nama

Dilon ponyak ka lon peugah nan
Digata rakan soebu nama
Teuma seuot Sigeumpa 'Alam
Tadeungo lon kheun wahe Raja

Lon keurajeuen di nanggroe Khadam
Sigeumpa 'Alam geurasi nama
Bak uroe nyoe lon jak muprang
Meurumpok lawan deungon gata

Jinoe cuba theun beukah tangan
Lon boh keunan sigo dua
Diu Kharsani teuma seuot
Cit meunan patot he syeedara

Sigeumpa 'Alam cokma jibeuet
Leugat jipeusret ateueh Raja
Diu Kharsani pantah ban kilat
Ka neulumpat na peuet ploh deupa

Cokma Raja sret u mideuen
Meutanom sikhian dalam donya
Diu Kharsani teuma poh balah
Keunong reubah panglima donya

Keunong bak ulee Sigeumpa 'Alam
Meutanom badan dalam donya
Luroh tuleueng deungon asoe
Panglima sidroe ka mate pana

Rakyat Diu surak meuguncang
Di teungoh padang that guranta
Usi Tapa kalon panglima hanle
Saket hate malee mata

Ateueh gajah leugat jipasang
U teungoh padang jijak gaza
Sireutoh tujuh ploh raja nyang sajan
Bak uroe nyan teubiet panglima

Lanja jijak u teungoh mideuen
Teuma meuteumeung dua tandra
Meuhubo-hubo di teungoh mideuen
Miseue tupheuen suara cokma

Teungoh-teungoh ureueng muprang
Leumah angkatan siblah utara
Miseue reudok keumeung ujeuen
Meunankeuh ureueng blah utara

Usi Tapa han jadeh prang
Seubab angkatan geupumeulia
Syareh Miga po angkatan
Ka troh keunan ngon aneukeunda

Sajan rakyat ngon uleebalang
'Adi ngon juhan meuribee laksa
'Oh sare troh u teungoh padang
Usi yoh nyan jak peumulia

Ban nyang laku adat reusam
Keumeujeulihan raja teuka
'Oh lheuh nyan lanja tamong u dalam
Sa'id Meureudan hate suka

Jibri teumpat ngon keurusi
Piyoh sare bandum raja
Syamsi Miga piyoh didalam
Usi yoh nyan teubiet jak gaza

Teuma meuteumeung dua pihak
Prang meuhayak miseue nyang ka
Teungoh-teungoh geumeung muprang
Leumah angkatan blah barat daya

Miseue reudok kandong ujeuen
Le that ureueng meuribee laksa
Gajah ngon guda burak teureuebang
Ladom pasang ateueh singa

Meuseundi-seundi rupa peukayan
Payong ngon alam dum mubanja
Nyankeuh tandra Zamilon Awan
Troh u padang ngon sikleb mata

Usi Tapa turi rijang
Han le jimuprang jijak bak Raja
Jipeutamong leugat u dalam
Sa'id Meureudan jak peumulia

Raja Milon teutap didalam
Usi Tapa lom teubiet jak gaza
Jipasang gajah u teungoh mideuen
Jicang ureueng tandra Indra

Diu Kharsani kalon meunan
Neujak linteueng pantah sigra
Nila Ngindra pi na sajan
Dua Raja nyan jarak hana

Ngon Usi Tapa teuma meuteumeung
Adu saktian di mideuen Raja
Usi Tapa that andalan
Dua Raja nyan sidroe jigaza

Meusurot-surot di teungoh mideuen
Bit that useueng Usi Tapa
Nila Ngindra dong rot kiri
Diu Kharsani jilila-lila

Usi Tapa sama teungoh
Yoh nyan ka roh sabe Raja
Jitak rot uneun Diu Kharsani
Jikaleh rot wie Nila Ngindra

Dua Raja sidroe jilawan
That bit tungang hana tara
Diu Kharsani peudeueng bak tangan
Neutak le yoh nyan Diu panglima

Neutak Usi keunong baho
Meuk meuhambo na sigunca
'Oh ban neukalon rupa meunan
Diu yoh nyan meunyum lia

Nila Ngindra cokma bak jaroe
Neupoh le jinoe Usi Tapa
Keunong cokma ateueh ulee
Hana jithee Usi Tapa

Raja dua meunyum ugah
Teuma tiwah raja Indra
Jisurot le di teungoh mideuen
Leumah neukalon le Diwa Peukasa

Hate saket ka tiwah rakan
Leugat neupasang ateueh guda
Lanja neujak u teungoh mideuen
Neucang ureueng meuribee laksa

Teuma neupeurab bak panglima Usi
Nyang that beurani gagah peukasa
'Oh ban meuteumeung ka neutanyong
Soe he bungong nama gata

Lon eu le that tapoh rakyat
Jinoe he sabat peugah nama
Usi tapa seuot rijang
Tadeungo lon kheun wahe Raja

Usi Tapa nama lontuan
Beutatuban wahe Raja
Jinoe palem lon peungat
Gata sabat jak tagisa

Bek tinggai nan di teungoh mideuen
Bek talinteueng Usi Tapa
Nyoekeuh peungapet Sa'id Meureudan
Beutatuban Usi Tapa

Meunyo takeumeung bak seulamat
Lon peungat nyang got jak gisa
Keureuna lon eu gata jroh ruman
Cuba peugah nan lon deungo nyata

Adak mate gata uroe nyoe
Peugah jinoe soebu nama
Teuma seuot panglima Diu
Nyang meusyeuhu sakti raya

Taeu rupa sangat juwah
Peue ka peugah Usi Tapa
Pakri tamarit nyang hana patot
Tapeukeujot kamoe ka tuha

Pakri tamarit ek teugrak bibi
Nyang museutahe tabicara
Pakri ka sangka kutakot' keu kah
Nyang jeuet leupah meunan haba

Saleh gata keumeung keuji
Narit nyang singke tameuhaba
Nyoe pi saboh nama meusyeuhu
Di nanggroe Diu ulon Raja

Nama ulon Raja Diu
That meusyeuhu Diwa Peukasa
Bak uroe nyoe gata mupaloe
Lon boh taloe kume bak Raja

Usi Tapa deungo haba meunan
Amarah le yoh nyan hu ngon mata
Jicok teuma panah sakti
Areuta neubri uleh Raja

Ka jipeulheueh u teungoh mideuen
Aneuk panah nyan jiek lam hawa
Na sikeujab panak lam awan
Jitren le ujeuen di mideuen Raja

Ujeuen batee tajam sang kapak
Mate le that rakyat Indra
Diwa Peukasa kalon teuka ujeuen
Neupeulheueh yoh nyan panah sigra

Panah jipo dalam awan
Ka jeuet sinan nanggroe Antara
Habeu meutheun ujeuen sinaroe
Tahe keudroe Usi Tapa

Teuma jicok panah laen
Jipeulheueh lom dalam hawa
Na sikeujab panah lam awan
Jitren angen nyang that raya

Teuma geuhei angen kasambon
Leubeh that tutong bak neuraka
Tho ie laot jeuet keu padang
Gunong sikeulian habeu seureupna

Gunong bandum ka habeu tutong
Teuma neukalon le Diwa Peukasa
Neucok lom saboh panah sakti
Ka neusrom le dalam hawa

Ka jeuet gunong di teungoh padang
Troh lam awan gunong raya
Yoh nyan meutheun angen bunoe
Raja dua droe sabe padra

Usi Tapa jisuet peudeueng
Jikeumeung cang Diwa Peukasa
Raja Diu kalon meunan
Neupeulheueh yoh nyan panah lom sigra

Aneuk panah nyan jeuet keu rante
Meucarueh gaki Usi Tapa
Reubah meugule di teungoh padang
Gaki ngon tangan ka lam singkla

Raja Diu teuma yue puwoe
Rakyat sinaroe surak meutaga
Rakyat Pari habeu jiplueng
Jitak bak rueng le rakyat Indra

Syamsi Miga eu laku meunan
Neulakee idin bak ayahanda
Idin ayah lon masok lam prang
Lon jak lawan tandra Indra

Syareh Miga seuot le yoh nyan
Bek he intan dilee tagaza
Piyon dilee po samlakoe
Bak uroe nyoe hana kutika

Lon eu that gagah Raja Diu
He aneuk teungku piyoh gata
Syamsi Miga seuot pantah
Bek that gundah he ayahanda

Harap keu keubai meung hana soe tak
Kalon buet sinyak jaroe got pusa
Adak keunong bak tangkurak
Adak han rusak utak keulua

Lon he ayah bek tapeutakot
Neueu buet sicut nanggroe Miga
Hana lon takot keugob le sakti
Hana lon turi Diu Indra

'Oh habeh jikheun habeh meunan
Leugat jipasang ateueh guda
Syamsi Miga rupa jroh that
Takalon hibat di medeuen Raja

Sajan rakyat 'adi ngon juhan /
Uleebalang sajan sireuta
Keumang ngon payong iram-iram
Alamat prang Raja 'Ala

Panglima Zanggi ateueh gajah
Payong mirah ateueh keupala
Beuribot Tapa ateueh waliman
Nibak tangan payong suasa

'Aliman Syamsi burak jipasang
Panglima Gustam ateueh singa
Syamsi Miga naga paksi
Rakyat rame ireng seureuta

'Oh sare troh u teungoh mideuen
Seueh jipeudong maseng jeumba
Teudong meuseueh-seueh di teungoh mideuen
Musta'id deungon alat sinyata

Meuseundi-seundi rupa peukayan
Geumeureulapan cahya meukuta
Deumpek ngon surak meualon-alon
Miseue riyeuek tren musem keunong sa

Sideh pi surak sinoe pi surak
That meuhayak hana tara
Sideh pi deumpek sinoe pi deumpek
Yoh nyan jiek bandua tandra

Meuhubo-hubo di teungoh padang
Nyoe keubit prang leubeh bak nyang ka
Jibeudoh abee dhoi teureubang
Seupot padang han leumah rupa

Dhoi teureubang troh u manyang
Uroe teungoh trang ka padam cahya
Raja Muda eu rame that prang
Neuyue teubiet lom dum na raja

Tadeungo ulon tuanku ampon
Udeh janjongan bandum tateuka
Udeh bandum teubiet u padang
Bek le rakan piyoh lam kuta

Nak mangat talo saho-saho
Teubiet he po nyang raja-raja
Kama 'Alam Diu deungo sabda meunan
Teuma neukheun bak Raja Muda

Tinggaikueh gata cuco di dalam
Kamoe jak lawan Pari kaya
Gata aneuk piyoh sikarang
Saleh soe datang keunoe lom teuka

Gata bri teumpat tanda horeumat
Laen rakyat teubiet jak gaza
Kama 'Alam Diu lheueh neukheun nyan
Neuyue pahlawan teubiet jak gaza

Raja Miga Cindra lam awan
Leugat neupasang ateueh guda
Meumupayong intan meukarang
Dilikot nyan rakyat meulaksa

'Oh lheueh nyan teubiet Raja Mambang
Rakyat pahlawan teubiet:sama
Maseng-maseng ateueh kandran
Dua pahlawan peungapet Raja

Raja Indra teubiet u padang
Rakyat sajan meuribee laksa
Indra Sakti Paduka Kaindran
Teubiet sajan Lila Peukasa

Bandum rata ka jipasang
Leugat u padang jijak gaza
Meuseundi-seundi rupa peukayan
Geumeureulapan cahya meukuta

Raja Diu cit ka u mideuen
Yoh nyan meuteumeung dua tandra
Sukee Diu bandum masok prang
Kama 'Alam tinggai lam kuta

Juhan 'Alam Beureuma Kasan
Tinggai sajan Raja Muda
Yoh nyan ka prang di teungoh mideuen
Miseue supheuen suara cokma

Raja Milon eu rame that ureueng
Jijyue pahlawan teubiet u lua
Wahe raja uleebalang
Jak tulong prang Syamsi Miga

Aneuk Raja ka u padang
Jak leh peungon dum na gata
Bek that lale teubiet rijang
Yoh nyan tiwah prang Syamsi Miga

Dikar 'Alam deungo haba sulotan
Leugat jipasang ateueh singa
Di likot nyan Milon Awan
Sireuta sajan nyang raja-raja

Ateueh gajah keumang ngon payong
Di Nuron 'Alem Reukasa
Ateueh naga lanja jipasang
Teubiet didalam rakyat meulaksa

Di likot nyan sulotan Zanggi
Milon Pari nyang that 'ala
Jipasang ateueh burak meulayang
Rakyat sajan meuribee laksa

Di likot nyan Milon Peuraba Zanggi
Meureudan Syahi that peukasa
Jipasang ateueh geureuda teureubang
Lanja u padang jijak gaza

'Oh sare troh u teungoh padang
Maseng-maseng lawan jimita
Nyang pahlawan sama pahlawan
Meunankeu bangon rakyat dum na

Nyang rakyat sama rakyat
Prang raya that nibak nyang ka
Yoh nyan lom prang di teungoh mideuen
Jimeukab limpeuen deungon kala

Teuduek haba ureueng muprang
Lon seubot tuan laen calitra
Haba lon nyoe meutindeh lapeh
Jeh goh habeh laen ka teuka

JINOE LON SEUBOT SULOTAN PEUTAWI

Duek beudiri dalam kuta
Teubiet meuntroe u teungoh padang
Leumah jipandang mayet teuhanta

Nakra Pari mate di mideuen
Meuntroe kalon jiwoe lanja
Troh bak Raja meuntroe peugah
Ampon di bawah doli meukuta

Lon eu tuanku mayet Pari
Reubah meugule di mideuen Raja
Asoe hanco jeuet keu anoe
Saleh pat nanggroe prang nyang raya

'Oh Raja deungo haba meunan
Neuyue le yoh nyan sidroe bentara
Neuyue jak kalon toh nanggroe prang
Bentara teureubang ateueh geureuda

Jeueb-jeueb nanggroe habeh jipandang
Jeueb-jeueb padang jijak pareksa
Hingga troh le u Buket Pari
Leumah that rame di mideuen Raja

Jikalon kuta di teungoh padang
Jitren le yoh nyan jak peunyata
'Oh sare troh keunan datang
Raja Mambang kalon bentara

Bak Raja Muda teuma neupeugah
Neuisyarah tron lam kuta
Bentara kalon na panggelan
Jitron le yoh nyan dalam kuta

Troh lam kuta seumbah sulotan
Meusabda yoh nyan Raja Muda
He Bentara Peutawi Biram
'Oh na jalan gata teuka

Ho keumeung jak peugah sikarang
Lon kalon tapasang ateueh geureuda
Seuot beutara tuanku ampon
Laman surohan bak baginda

Neuyue jak kalon tuanku muprang
Siri padang neuyue peunyata
Jinoe tuanku ka troh sampoe
Idin lon woe po meukuta

Raja Muda teuma kheun meunoe
Jak leh tawoe ubak Raja
Takheun saleuem lon bak sulotan
Kamoe ka lam prang beuraya do'a

Takheun lon muprang deungon Pari
Dilon that keuji ka jidrob bapa
Meung hana talo nanggroe Pari
Hana lon woe le takheun bak Raja

Bentara deungo sabda meunan
Jiteureubang deungon geureuda
Leugat jiwoe u Biram Peutawi
Troh peureugi ubak Raja

Troh bak Raja jipeugah le
Ampon doli laman sroepada
Ka troh lon jak doli tuanku
Raja Diu tengoh prang raya

Neupeuet saleuem keunoe keu doli
Peutang pagi neuyue meudo'a
Sulotan Biram-deungo haba meunan
Neuyue kheun yoh nyan jeueb-jeueb raja

Nama ulon Indran Sakti
Beutaturi wahe Raja
Dilon adoe ka lon peugah nan
Digata rakan soebu nama

Syamsi Miga seuot le rijang
Tadeungo lon kheun wahe Raja
Lon nyoe nama beutaturi
Nama geurasi Syamsi Miga

Syareh Miga nama ayah
Ka lon peugah ubak gata
Indran Sakti deungo haba meunan
Neubet le yoh nyan cokma raya

Jipeusrot ateueh Miga Syamsi,
Reubah meugule di mideuen Raja
Luroh asoe deungon tuleueng
Ka teugageueng mate pahna

Panglima kalon Raja mate
Amarah sare hana tara
Yon nyan ka prang subhanallah
Sang geulanteue plah Buket Miga

Teuma tiwah tandra di manyang
Seubab Milon that guranta
Teungoh-teungoh geumeung riwang
Leumah angkatan le that teuka

Kusangga Pari 'Alam Meuleukob
Keunan ka trok Raja dua
Sajan rakyat ngon pahlawan
Meuribee ban alat sinyata

Meuseundi-seundi rupa peukayan
Geumeureulapan cahya meukuta
'Oh sare troh u teungoh mideuen
Piyoh le yoh nyan dum lasyeuka

'Oh lheueh nyan tamong teuma u dalam
Bak Sa'id Meureudan dalam kuta
Rakyat di mideuen han le muprang
Piyoh di padang bandua tandra

Na sikeujab piyoh di midan
Leumah angkatan laen teuka
Sulotan Biram Raja Kra sajan
Ka troh keunan u mideuen Raja

Diu Peukasa kalon mumeunan
Neujak le yoh nyan ubak Raja
Sajan rakyat dum uleebalang
Jak meuteumeung teuma ngon Raja

'Oh lheueh nyan teuma tamong u dalam
Sulotan Biram tamong bak Raja
Beulia Geumira han jitamong
U teungoh padang jijak gaza

Raja Engkong nyang that guransang
Jitajo u padang han deungo sabda
Yoh nyan jipoh sukee Milon
Di teungoh mideuen mate meulaksa

Ngon Syamsi Miga teuma meuteumeung
Ngon Raja Engkong di teungoh tandra
Nanta Waila that pahlawan
Jimat bak tampan Syamsi Miga

Teuma jiseumpom ateueh bumoe
Hanco asoe jeuet keu sira
Syamsi Miga yoh masa nyan
Di teungoh midan mate pana

Syareh Miga eu aneukjih hanle
Saket hate Raja Raya
Ateueh guda leugat jipasang
U teungoh padang jiteubiet sigra

Yoh nyan amarah Raja Milon
Teubiet u mideuen jipasang guda
Kusangga Pari amarah that
Teubiet leugat jijak gaza

'Alem Meuleukob teubiet le yoh nyan
Sireuta deungon Suran Geumira
'Oh sare troh u teungoh mideuen
Raya that prang leubeh bak nyang ka

Raja Kra ngon Raja Siamang
Rakyat sajan ngon panglima
Bandum habeh jimasok prang
Raja Engkong nyang that geupuja

Yoh nyan ka prang sabong-meunyang
Sukee Milon lawan ngon Kra
Sukee Diu lawan ngon Pari
Prang meuseuke di mideuen Raja

Sulotan Miga teubiet u mideuen
Beureuma Kasan teubiet sireuta
Juhan 'Alam sulotan Biram
Teubiet sajan u mideuen Raja

Ahmad Zamhari Ali Meureudan
Teubiet u mideuen Raja Muda
Hana le sidroe tinggai di dalam
Yoh nyan ka prang that guranta

Meuhubo-hubo di teungoh padang
Dum pahlawan teungoh lam gaza
Teungoh rame ureueng muprang
Indra Peulimbang ka troh teuka

Budiman Sakti pi na sajan
Neutamong dalam prang sigra-sigra
Beulia Zakari that pahlawan
Ngon Raja Milon meuteumeung dua

Raja Milon beuet hekeumat
Ka jeuet laot mideuen Raja
Lam laot nyan ie seuuem that
Jibeudoh asap seupot donya

Ie di laot jipot u darat
Jibeudoh bakat meubura-bura
Di teungoh laot teudong kareueng
Jab ngon awan lam antara

Teutapkeuh laot di teungoh padang
Teupiyoh prang sikleb mata
Haba lon nyoe meuriwang-riwang
Nak mangat seunang bak lon cok punca

Putroe Kayangan lam meuligoe
Neujak le jinoe bak ayahanda
Troh bak Raja neutuntut hekeumat
Ka habeh jeuet dum peukara

Lheueh nyan jitamong dalam khaluet
Tuan Putroe cut le bicara
Peuet blah uroe dalam tapaan
Jijak le yoh nyan troh bak Raja

'Oh troh jijak bak Diu Palinggam
Jikalon badan dalam singkla
Yoh nyan Putroe jibeuet peunuleh
Dua seun tujoh Putroe baca


Teuma puleh Diu Palinggam
Neukalon badan dalam peunjara
Teuma neukheun bak Tuan Putroe
Pakon buet meunoe he adekeunda

Teuma seuot Tuan Putroe
Ampon kamoe po meukuta
Kon buet ulon po janjongan
Keureuna buet nyan uleh ayahanda

Diu Palinggam deungo haba meunan
Neubeuet le yoh nyan saboh do'a
'Oh lheueh nyan neubeuet do'a peurapoh
Rante luroh jeuet keu sira

'Oh lheueh nyan neuek u meuligoe
Sajan Putroe lam astana
Teutap sinan Diu Palinggam
Ngon Putroe intan meusuka-suka

Uroe malam hate seunang
Teutap sinan dalam kuta
Muwoe kisah lom u padang
Bak angkatan Raja Muda



Sulotan Biram beuet hekeumat
Ka gadoh laot di mideuen Raja
Laot han le jeuet keu padang
Milon muprang ngon rakyat Kra

Yoh nyan lom prang sabong-meunyabong
Di teungoh mideuen geugap-gumpita
Deumpek ngon surak that meuguncang
Meurumpok lawan sabe meunama

Kama 'Alam Diwa di teungoh mideuen
Pari neucang Milon pi na
Wie ngon uneun reubah peudeueng
Mate ureueng meuribee laksa

Ngon Syareh Miga yoh nyan meuteumeung
Ka neutanyong soebu nama
Wahe Raja nyang pahlawan
Soe he rakan nama gata

Laman eu le that tapoh rakyat
Jinoe he sabat peugah soe nama
Kama 'Alam Diu deungo haba meunan
Seuot le yoh nyan pantah sigra

Lon nyoe Raja Miga di awan
Lon mat tahtaan Gunong Miga
Kama 'Alam Diwa lakab geurasi
Beuna taturi Raja 'Alam

Dilon adoe ka lon peugah nan
Digata rakan soebu nama
Lon kalon sigak that peurangoe
Geumeuhei soe nama gata

Teuma seuot Baginda Sulotan
Neujaweueb kalam Kama 'Alam Diwa
Syareh Miga nama lontuan
Lon mat keurajeuen nanggroe Miga

Bak uroe nyoe lon masok prang
Hajat lontuan keumeung poh gata
Aneuk ulon mate di padang
Buet binatang engkong rimba

Bak uroe nyoe lon poh balah
Rakan meutuah bak ingat gata
Surot gata sinoe di mideuen
Bek keunong peudeueng lon takot pana

Kama 'Alam Diwa seuot pantah
Peue tapeugah Syareh Miga
Hantom cempala jilawan siwah
Pakri kajeuet hah keumeung poh bila

Cuba sigo kapoh balah
Dum ruman kah hana lon taba
Lon he Raja bek tapeukeujot
Hana lon takot dum muka gata

Bek tapok-pok ngon sarong peudeueng
Kon lon ureueng takot keu gata
Han lon takot keu kilat guroh
Lon jeuet meutaroh meunyo ngon gata

Syareh Miga deungo haba meunan
Amarah le yoh nyan hu ngon mata
Jisuet le peudeueng dalam sarong
Jitak rancong Kama 'Alam Diwa

Keunong bak ulee sret keupiah
Peudeueng meutatah meukhan dua
Sion bulee hana putoh
Keubai tuboh Kama 'Alam Diwa

Sireuta neukheun bek that kagaro
He adoe teungku gatai lon hana
Meunyo dumnan katak balah
Meung aneuk mirah pi dumnan teuga

Jinoe bak ingat lon poh balah
Bak ingat kah Syareh Miga
Sireuta neubet cokma meulayang
Neupoh le rijang Syareh Miga

Keunong neupoh ateueh peurise
Miseue bade geulanteue teuka
Habeu leungo tujoh lapeh bumoe
Lacab that bunyoe hana tara

Syareh Miga reubah di mideuen
Tajo pahlawan jiangkat sigra
Gaki jaroe ka jikat
Puwoe le leugat dalam kuta

Syareh Miga ka lam rante
Kusangga Pari that guranta
Jicang ureueng di teungoh mideuen
Ban siwah naleueng ngon cempala

Teuma meuteumeung ngon sulotan Biram
Neutanyong le yoh nyan seobu nama
Wahe Raja nyang guransang
Soe he rakan nama gata

Lon eu le that tapoh rakyat
Jinoe he sabat gata soe nama
Teuma seuot Kusangga Pari
Tadeungo lon kheun kri wahe Raja

Lon nyoe Raja di Cahya Biram
Keurajeuen dalam Tasek Beulanta
Kusangga Pari lon geupeunan
Digata abang soe bu nama

Lon kalon laku rupa hibat
Meunyum han dapat soe ngieng rupa
Khuluk sifeuet that peungaroe
Cuba jinoe peugah pat desa

Teuma seuot Sulotan Biram
Tadeungo lon kheun wahe Raja
Lon nyoe Raja Peutawi Biram
Cit dalam geunggam ensan dengon kra

Lon geupeunan Sulotan Kayuzi
Biram Peutawi teupat lon Raja
Bak uroe nyoe lon masok prang
Ngon gata rakan meuteumeung muka

Jinoe bak gata peue na haluan
Tabri lon kalon keumeung rasa
Kusangga Pari deungo haba meunan
Jibet le yoh nyan cokma raya

Jipeh bak bumoe teubiet apui
Meugasui-gasui di mideuen Raja
Sukee Diu yoh nyan teumakot
Ka jisurot u likot Raja

Sukee Raja Kra deungon ensam
Surot sikeulian u likot Raja
Sulotan Kayuzi neuteupok jaroe
Mata uroe yoh nyan silala

Teuka reudok dalam awan
Jitren le ujeuen teuma u donya
Sajan ie laot jiek keunan
Apui di midan habeh pana

Ujeuen raya guroh ngon kilat
Mate rakyat Milon meureuka
Amarah Raja 'Alem Malakob
Di pusat laot teumpat jitapa

Yoh nyan jibeuet saboh hekeumat
Ujeuen ngon kilat gadoh le sigra
Dum na rakyat lom masok prang
Peutawi Biram peutoe bak Raja

Neujak u nab Kusangga Pari
Neudeumpek le that meutaga
Kusangga Pari hireuen teuceungang
Teubiet bak tangan 'oh keunong do'a

Teuma neuhapit di teungoh mideuen
Hanco tuleueng jeuet keu sira
Kusangga Pari mate di mideuen
Amarah le yoh nyan Sura Geumira

Jicang ureueng wie ngon uneun
Ban siwah naleueng ngon cempala
Teuma meuteumeung ngon Budiman Sakti
Neumeucang le sabe padra

Meuhubo-hubo di teungoh padang
Na nyum ka karam 'alam donya
Tujoh uroe meungadu sakti
Yoh nyan mate Sura Geumira

Dikar 'Alam ngon Indra Peulimbang
Yoh nyan muprang di mideuen Raja
Na sikeujab di sinan prang
Mate yoh nyan 'Alam Dika

Tajo Gustam teuma ngon Bahlui
Bandua sajan keunan sigra
Indra Peulimbang kalon meunan
Neutak le yoh nyan pantah sigra

Neutak rot wie sangga rot uneun
Di teungoh mideuen meugisa-gisa
Gustam rot wie Bahlui rot uneun
Di teungoh mideuen meuhadap muka

Yoh nyan amarah Indra Peulimbang
Seubab guransang pahlawan dua
Indra Peulimbang peudeueng neusayong
Keunong Gustam teuma bak dada

Yoh nyan reubah ateueh bumoe
Leumah asoe peudeueng bisa
Bahlui kalon teupeh rakan
Jibet le yoh nyan cokma sigra

Silab bacut Indra Peulimbang
Cokma keunong ateueh keupala
Hanco tuboh deungon tuleueng
Yoh nyan teugageueng mate pahna

Jikalon le Juhan 'Alam
Jibet le yoh nyan peudeueng raya
Jitajo ateueh pahlawan Bahlui
Jitak meugasui putoh keudua

Amarah Raja 'Alam Malakob
Peudeueng jibet pantah sigra
Jitajo ateueh Juhan 'Alam
Jitak bak badan ngon peudeueng raya

Juhan 'Alam neugrob pantah
Peudeueng reubah sret u donya
Neukalon le Beureuma Kasan
Neutajo yoh nyan neupoh ngon cokma

Reubah meugule di teungoh mideuen
 Hanco tuleueng jeuet keu sira
 Raja Milon Wantaransah
 Yoh nyan amarah Raja Raya
 Sireuta jihei dum pahlawan
 Uleebalang limong ploh laksa
 Pahlawan Pari dum sibarang
 Uleebalang dum sireuta
 Ka jiteubiet dum u padang
 Yoh nyan lom prang that guranta
 Sukee Raja Kra that guransang
 Gunong jitatang jisrom lam hawa
 Pahlawan Milon pi srom gunong
 U dalam awan nanggroe Indra
 Raja Milon that guransang
 Jitajo lam kawan sukee Raja Kra
 Wie ngon uneun jitak peudeueng
 Di teungoh mideuen mate Raja Kra
 Adak meuteumeung ngon uleebalang
 Han ek jilawan Milon peukasa
 Meuhubo-hubo di teungoh mideuen
 Sukee Milon gagah raya
 Yoh nyan tiwah sukee binatang
 Seubab guransang Milon dum na
 Milon ngon Pari dum ka galak
 Le that rusak sukee Diwa
 Sulotan Peutawi surot di mideuen
 Kimah jipeudong bak piyoh tandra
 Bandum sare piyoh di mideuen
 Beureuma Kasan beuet di lua
 Neutulong rakyat mangat jipoh
 Neubeuet saboh hekeumat donya
 Jeuet laot apui di teungoh mideuen
 Troh lam awan asap meubuar

Rame-rame Pari ngon Milon
Lam laot nyan mate meulaksa
Raja Milon kalon laot
Ka jisurot di teungoh tandra

Bandum piyoh di teungoh padang
Zamilon Awan marit ngon Raja
Idin Tuanku lon langoe laot nyan
Mangat lon lawan ensan ngon diwa

Mangat lon drob sukee engkong
Nak gadoh carong lon boh lam singkla
Teuma seuot Raja Milon
Tadeungo lon he adekeunda

Piyoh dilee adoe sikeujab
Dang puleh rakyat payah that gaza
Teuma marit Zanggi Sang Milon
Tuanku ampon tadeungo hamba

Got Tuanku ban kheun Zamilon
Bahle laman meung jak gaza
Raja Milon teuma bri idin
Zamilon awan teuma beuet do'a

Gadoh laot jeuet keu padang
Surak pahlawan meutaga-tagat
Watee jideumpek bumoe meuguncang
Langet meulinggang bumoe meugisa

Yoh nyan teukeujot Diu Palinggam
Teuma neutanyong bak Putroe Muda
Wahe adek cut bungong keumang
Sideh di padang deumpek meutaga

Siakan-akan ureueng muprang
Pane angkatan keunoe teuka
Seuot sinyak Ti Indra Kayangan
Ampon laman po meukuta

Lon deungo Tuanku nyang di padang
Raja lam awan Mambang ngon Diwa

Diu ngon Indra Kra ngon Ensan
Le that angkatan Raja Muda
Geukheun nama Raja Usuli
Nan geurasi Raja Diwa

Raja tanyong bak Putroe Kayangan
Peue seubab muprang Raja kuta

Tapeugah bak trang wahe adoe
Peue mekeusud nyang disinoe jeuet prang
Peugah rijang he Adek Siti
Bek lambat le peugah sigra

Teuma seuot Putroe Kayangan
Neudeungo lontuan po meukuta
Masa phon teuka kakeunda keunoe
Sajan kamoe lam astana

'Oh lheueh nyan teukeudi bri le Tuhan
Kakeunda pangsang keunong mintra
Teuka ayah teuma keunoe
Tuanku geupasoe lam peunjara

Raja Muda teuma datang
Neulakee pulang bak ayahanda
Nyankeuh asai Tuanku jeuet prang
Umu dua thon prang hana reuda

Habeh mate dum na pahlawan
Raja saktian Raja lam hawa
Dua blah pahlawan sukee ayah
Bandum punah tinggai nama

Bit pi dumnan mantong timang prang
Seubab that guransang Milon Miga
Bit pi timang bak nyum kamoe
Akhe dudoe talo kuta

Raja di lua le that sakti
Biram Peutawi nyang that geupuja
Sidroe treuk teuma Kama 'Alam Diu
Nyan pi meusyeuhu hana tara

Beureuma Kasan Raja geuturi
Le that sakti ateueh donya
Raja Diu teuma ngon Mambang
Raja Ensan ngon Raja Kra

Meung sibuleuen treuk Tuanku ampon
Bak peunyum lon talo ayahanda
Diu Palinggam deungo haba Putroe
Neulakee droe bak Putroe Muda

Idin gata he cek Siti
Lon peureugi bak Raja Muda
Kalee ek jeuet ulon peugot
Bek le khusumat singoh lusa

Teuma seuot Putroe Kayangan
Idin bak lon po meukuta
Teutapi Tuanku neuba lon sajan
Bek tinggailan dalam kuta

Diu Palinggam deungo haba Putroe
Teuma neupasoe dalam keumala
Teutap sinan Putroe Kayangan
Diu Palinggam neubeuet do'a

Keu cempala neupeujeuet droe
Neupo le jinoe dalam hawa
Raja Muda di teungoh padang
Payong pi keumang intan peureumata

Sajan sinan limong sulotan
Piyoh sajan Raja Muda
Sukee Raja Kra bandum guransang
Jikeumeung jak lawan Milon peukasa

Sukee Milon di teungoh padang
Surak meuguncang di mideuen Raja
Raja Milon jimat peudeueng
Di teungoh mideuen jijak gaza

Zanggi Milon Zamilon Awan
Teubiet sajan deungon Raja
Diu Palinggam kalon meunan
Neutren le yoh nyan u mideuen Raja

Raja Muda ateueh guda plang
Keunan le datang aneuk cempala
Ateueh payong cempala dong
Neutop rijang le Raja Muda

Neukeumeung drob rijang-rijang
Cempala teureubang jidong lam hawa
Raja Muda keunan neupandang
Diu Palinggam ubah rupa

Teudong beudiri di teungoh padang
Raja sibarang hireuen mata
Raja Muda eu Diu Palinggam
Neutren le rijang ateueh guda

Neujak meuteumeung ngon Diu Palinggam
Raja sikeulian seumbah Banta
Kama 'Alam Diwa kalon samlakoe
Hana bagoe hate suka

Sulotan Peutawi hireuen mantong
Diu Palinggam jituri hana
'Oh rakan peugah baro jituri
Suka hate dum na Raja

Na sikeujab piyoh di padang
Milon yoh nyan surak meutaga
Ka troh keunan dum sikeulian
Jiheh lawan Raja Muda

He Raja Diu deungon Mambang
Indra ngon ensan dum Raja Kra
Keunoe tateuka u teungoh padang
Bek that bimbang bunoe kreueh jungka

Sulotan Biram deungo haba meunan
Neulakee idin neumeung jak gaza
Teuma neuthan le Diu Palinggam
Piyoh Tuan dum na gata

Bak siseun nyoe bah le lon muprang
Bek treb di padang sang-sang meuseunda
'Oh ban jideungo sabda meunan
Sidroe pi tan na jeuet meudawa

Raja Milon keunan datang
Diu Palinggam teubiet jak gaza
Jaroe neuteupok nibak pha uneun
Jiteubiet apui meubura-bura

Teuma teubiet lam apui nyan
Guda samaran nyan jimeunan sa
Diu Palinggam teuma pasang
U teungoh padang neujak gaza

Teuma meuhadap ngon Raja Milon
Neuteupok lom jaroe bak dada
Teuma teubiet keumala hekeumat
Neubuka leugat pantah sigra

Teuma teubiet tujoh reutoh rakan
Raja sikeulian hireuen mata
Diu Palinggam sakti teubileueng
Beurangri ureueng han ek theun sangga

Diu Peukasa Cahya Kaindran
Sireuta deungon Cahya Indra
Sare meusapat dua blah rakan
Jijak le muprang u mideuen Raja

Teuma jideumpek bumoe meuguncang
Na miseue birang jiek bisa
Diu Peukasa that gurangsang
Milon neucang meuribee laksa

Ri nyang leumah u hadapan
Habehe neusimpan rakyat dum na
Cahya Indra pi that beurani
Neucang sabe pari meulaksa

Cahya Kaindran nyang that amarah
Pari neupoh Milon sireuta
Peulita Diu pi that gurangsang
Habehe neucang rakyat Raja

Peudeueng bak jaroe yo meukrang-krang
Neutak pahlawan putoh dua
Adak keubai pi hana pantang
'Oh ka neucang habehe pana

Zamilon Awan yoh masa nyan
Teuma meuteumeung ngon Cahya Indra
Cahya Indra teuma teumanyong
Seobu bungong nama digata

Lon kalon sigak that peungaroe
Peugah he adoe nama gata
Teuma seuot Zamilon Awan
Tadeungo lon kheun he panglima

Lon nyoe Raja Zamilon Awan
Peungapet Sulotan Milon Peukasa
Bak uroe nyoe lon jak muprang
Bak ingat rakan gata binasa

Nyang got jinoo jak leh riwang
Seubab lon sayang dalem keu gata
Bek talinteueng Zamilon Awan
Le that pahlawan nyang ka binasa

Bek tameuseunoh keu jirat baro
Piyoh teungku dilee gata
Dilon dalem ka lon peugah nan
Digata abang soe geuhei nama

Cahya Indra deungo haba meunan
Amarah yoh nyan hu ngon mata
Jibeudoh bulee ube-be kabat
Gurangsang that hana tara

Neuseuot le pantah-pantah
Peue kapeugah nyang kon-kon haba
Peue kapeugah he Raja Milon
Pakri ka jeuet kheun meunan rupa

Narit gata meuasap bu ie
Geulunyueng hanyi lon deungo suara
Pakri kasangka kah he Milon
Pakri ka jeuet kheun nyang meunan haba

Katueng mantong han meugrak babah
Pakri kajeuet hah meunan haba
Kasangka mate lon di mideuen
Meunankeuh nyum lam hate gata

Lon he Milon bek tapeuwayang
Cit dalam prang riek-riek masa
Phon di donya troh lam awan
Cit dalam prang guna biasa

Cahya Indra geurasi nan
Hana lawan ateuh donya
Bak uroe nyoe lon amanat
Gata bak ingat hilang nyawa

Raja Milon deungo haba meunan
Amarah le yoh nyan hu ngon mata
Jibet le cokma ka meulayang
Jipoh le rijang Cahya Indra

Keunong jipoh ateuh peurise
Miseue bade geulanteue teuka
Cahya Indra teuma suet peudeueng
Neucang le yoh nyan Milon Raja

Keunong peudeueng ubak lihe
Reubah meugule di mideuen Raja
Raja Milon eu uleebalang han le
Jitajo le u teungoh tandra

Ngon Diu Palinggam meurumpok lawan
Ngadu saktian sabe Raja
Diu Peukasa Cahya Kaindran
Laen lawan meungadu muka

Peulita Diu that guransang
Neucang Milon le that pana
Le that mate Pari ngon Milon
Leubeh bak phon prang that raya

Tujoh reutoh rakan Diu Palinggam
Bandum guransang hana tara
Meuhubo-hubo di teungoh mideuen
Jimeukab kleueng ngon siwah Raja

Jibeudoh ngon dhoi anoe teureubang
Di teungoh padang asap meubura
Dhoi teureubang troh lam awan
Mata uroe trang gadoh cahya

Na sikeujab prang di padang
Raja Milon meunyum lia
Jicok incien jitiek u bumoe
Jeuet le jinoe kuta raya

Tamong rakyat plueng u dalam
Teutap sinan ban sineuna
Lingka kuta jiplueng leugat
Habeu rakyat tamong lam kuta

Diu Palinggam kalon meunan
Neusurot yoh nyan bak Raja Muda
Sajan Rakan tujoh reutoh droe
Piyoh jinoe sikutika

Diu Palinggam tanyong bak rakan
Pakri padan he syeedara
Jinoe gata lon yue masuk prang
Tatamong u dalam kuta Raja

Tadrob Raja ngon uleebalang
Dum sibarang taboh lam singkla
Bek tapoh-poh pi meung sidroe
Taboh lam taloe pahlawan dum na

Rakan dua blah deungo sabda meunan
Jiteureubang rot lam hawa
Leugat ateueh kuta Milon
Teuma jitren dalam kuta

Raja Milon teungoh piyoh droe
Rakyat sinaroe payah dum na
Troh le keunan Cahya Kaindran
Deungon rakan bandum sireuta

Kuta Milon meuhayak-hayak
Rakyat le that dalam kuta
Teungoh piyoh dum angkatan
Teuka lawan peunoh kuta

Sukee Diwa deumpek meuguncang
Pari ngon Milon pucat muka
Raja Milon ngon uleebalang
Bak bale keumang piyoh dum na

Diu Peukasa ka troh keunan
U hadapan Raja dum na
Diu Peukasa beuet dua boh ayat
Muka pucat bandum Raja

Diu Peukasa dong di hadapan
Teuma neutanyong ubak Raja
He Raja Milon meukuta Zibon
Tadeungo lon wahe Raja

Gata uroe nyoe nyawong hilang
Toh rot jalan lheueh lam bahya
Cit goh lon poh gata ka mate
Jinoe pakri wahe Raja

Teuma seuot Raja Milon
Jaroe jiseuon ateueh jeumala
Bak Diu Peukasa hana jijeuet ngieng
Jimarit deungon meujeulih basa

He panglima nyang pahlawan
Tadeungo lon kheun ubak gata
Bit goh tapoh kamoe ka mate
Adak goh tarante ka lam singkla

Sipeureuti adat dilee baroe
Bak kamoe nyoe ban kheun gata
Tagantung manyang taboh jioh
Nyawong ngon tuboh hukom gata

Udeb mate laba rugoe
Dum sinaroe hukom gata
Diu Peukasa peudeueng bak jaroe
Neukheun lom meunoe ubak Raja

Hai Raja Milon jinoe lon peugah
Gata lon poh ban sineuna
Lon tueng nyawong jinoe ngon peudeueng
Nyan pi takheun pakri bak gata

Nyang got jinoe tahei pahlawan
Tayue drob lontuan bak panglima
Meung han meunan gata lon cang
Jinoe hilang nyawong lam dada

Raja Milon ngieng bak uleebalang
Dum sikeulian pucat muka
Diu Peukasa tajam hekeumat
Nyankeuh jeuet pucat bandum Raja

Do'a peugeumpa neubeuet bak teudoh
Nibak babah hana reuda
Tangieng bak rupa ban uroe beukah
Han soe jeuet tangah silala mata

Muka pucat yo ngon atot
Dum teumakot hana haba
Diu Peukasa deungon rakan
Bandum sinan dalam kuta

Cahya Kaindran marit sipatah
Tadeungo lon peugah wahe Raja
Bak uroe nyoe gata lon ikat
Pakri mangat nibak gata

Raja Milon hana jiseuot
Teuma neudhot le Raja Indra
Peu kaiem droe Raja paleh
Jinoe habeh kutueng nyawa

Peulita Diu marit ngon leumah leumbot
Mangat bek jitakot hate Raja
Ampon tuanku meukuta Zibon
Tadeungo lon po meukuta

Sabda nibak Diu Palinggam
Nyang mat keurajeuen nanggroe Diwa
Neuyue tanyong sipatah kalam
Ubak janjongan nyang that 'ala

Diu Palinggam piyoh di padang
Rakyat sajan meuribee laksa
Neuyue tanyong ubak tuanku
Keureuna Diu Raja geupuja

Tatem meusahbat ngon Diu Palinggam
Teubiet u padang tajak lakee jra
Jak lakee ampon keusalahan
Adak bit han teubiet jak gaza

Adak han tateubiet tajak muprang
Gata sibarang lon ba bak Raja
Gata he Raja han jeuet peulheueh droe
Seubab kamoe ka lam kuta

Raja Milon deungo haba meunan
Jiseuot le yoh nyan pantah sigra
He panglima nyang le sakti
Tadeungo lon kheun kri adoe bak gata

Keureuna sabda Diu Palinggam
Bak ulontuan ateueh jeumala
Jinoe he po lon pulang droe
Nibak jaroe gata panglima

Adat ngon reusam meujeulih nanggroe
Taba kamoe nyoe bak Raja Raya
Phon di donya sampoe akhirat
Bak jeuet keu sabat sisyeedara

Peulita Diu deungo sabda meunan
Neupeupuleh yoh nyan deungo do'a
Raja Milon puleh hekeumat
Gaduh laot di mideuen Raja

Teuma jicok euncien rijang
Kuta hilang han le nyata
Raja Milon teubiet u padang
Di hadapan Diu Peukasa

Di likot nyan Cahya Kaindran
Teuma likot nyan Cahya Indra
Peulita Diu Raja Milon
Laen nibak nyan rakyat sireuta

Raja Milon sajan rakyat
Dum meusapat jak bak Raja
Diu Palinggam teuma mumeunan
Neuthee le yoh nyan hana le dawa

Raja Milon pi ka troh keunan
Lakee ampon meu'ah deesya
'Oh lheueh mumat jaroe bri horeumat
Tanda 'erat Raja-Raja

Diu Palinggam kheun bak panglima prang
Jak cok sulotan jeh lam singkla
Tayue peuteubiet keunoe u padang
Bandum pahlawan nyang ka lam singkla

'Oh ban jideungo sabda sulotan
Jijak le yoh nyan pantah sigra
Habeh jiba dum sinaroe
Keunan le jinoo u keue Raja

Diu Palinggam teuma teumanyong
Ubak Sulotan Syareh Miga
Wahe Raja pakri jinoo
Peugah bak kamoe peue bicara

Syareh Miga seuot le yoh nyan
Tadeungo lontuan po meukuta
Keureuna lon ka dalam tangan
Nyawong badan hukom meukuta

Hana peue neutanyong bak kamoe sidroe
Cit ka maklum droe proe adat nyang ka
Diu Palinggam deungo haba meunan
Neuyue peulheueh yoh nyan Raja lam singkla

Diu Peukasa nyang plooh taloe
Pahlawan sinaroe deungon Raja
Usi Tapa seumbah sulotan
Deungon rakan dum sireuta

Teutap sinan piyoh di mideuen
Diu Palinggam lom meusabda
He Syareh Miga deungo lontuan
Bak Sa'id Meureudan tajak gata

Tatanyong padan pakri pakat
Jitem meusabat ngon kamoe teuka
Adak han jitem yue pubeudoh prang
Kamoe di mideuen takheun bek jula

Peu nyang hajat ka Allah bri
Sampoe janji woeu Raja Muda
Raja Milon deungo haba meunan
Jijak yoh nyan pantah sigra

Dalam kuta jitamong leugat
Han jan siat troh bak Raja
Raja teuduek bak bale taman
Uleebalang dum sireuta

Sajan meuntroe 'adi ngon juhan
Rakyat sajan meuribee laksa
Raja Milon pi ka troh keunan
Deungon Sa'id Mereudan jimeuhaba

Ampon tuanku seumbah laman
Pakri padan doli meukuta
Bandum Raja deungon pahlawan
Dum sikeulian ka lam singkla

Habeh jidrob di teungoh mideuen
Le that ureueng ngon Raja teuka
Tujoh droe Raja nyang raya meugah
Rakyat barollah meuribee laksa

Diu Palinggam pi ka u mideuen
Raya saktian hana tara
Jinoe tuanku pakri reumbang
Toh ret jalan nyang sijahtra

Sangkira ek lom neumuprang
Neuyue teubiet pahlawan u mideuen Raja
Adak nyang han ek bahle tataklok
Jinoe tajak bak Raja Diwa

Sa'id Meureudan deungo haba meunan
Hireuen sulotan hana haba
Teuma jimarit Sa'id Meureudan
Tadeungo lon kheun sipatah haba

Ulon jinoe kujak muprang
Bahle lon lawan Raja Indra
'Oh ka mate lon di mideuen
Nyan baro phon habeh kuraja

Raja Milon deungo haba meunan
Teuma jikheun meunoe kata
Ampon tuanku meuribee ampon
Tadeungo lon po meukuta

Bak lon pike po janjongan
Bahle seb nyan dum na nyang ka
Got tuanku tameusabat
Bak pike halarat po meukuta

Adak neutebiet neujak muprang
Meuhat le rijang jiboh lam singkla
Han ek soe linteueng Diu Palinggam
Han ek soe lawan Diu Peukasa

Beuranggasoe han jijeuet pandang
Miseue birang cahya muka
'Oh ban takalon meunyum teumakot
Yo ngon atot miseue geumpa

Kamoe bandum habeh jikat
'Oh lheueh jeuet keu sabat jipeulheueh teuma
Sa'id Meureudan deungo haba meunan
Teutap teuiem hana le haba

Raja Milon puteubiet u padang
Sa'id Meureudan ngon balatandra
Bandum jiteubiet u teungoh padang
Bak Diu Palinggam jijk lanja

Diu Palinggam kalon meunan
Neuthee yoh nyan hana le bahya
Sa'id Meureudan pi troh le keunan
Jimumat tangan ngon Raja dum na

'Oh sare lheueh mumat tangan
Tanda meujeulihan adat Raja
'Oh lheueh nibak nyanduek le sapat
Musyeewarat sabe Raja

Sa'id Meureudan marit sipatah
Meunoe ulah jicalitra
Ampon tuanku Raja lam awan
Udeh bak lon dalam kuta

Bek le neupiyoh sinoe di padang
Udeh beujalan dalam kuta
Teuma seuot Kama 'Alam Diu
Jak woe tuanku dilee lam kuta

Cit meunan adat meujeulih reusam
Wajeb abang dilee gata
Sa'id Meureudan deungo haba meunan
Leugat jiriwang dalam kuta

Deungon rakyat dum uleebalang
Sireuta deungon Usi Tapa
'Oh troh u dalam peukeumah droe
Dum sinaroe rakyat Raja

Sare hase dum ka leungkap
Doli halarat beurangkat sigra
'Oh ban sare troh bak pinto dalam
Geutot meuriam ampeueng Raja

'Oh lheueh nyan leugat tamong u dalam
Bak Sa'id Meureudan piyoh dum tandra
Troh lam kuta jibri teumpat
Miseue adat meujeulih Raja

'Oh lheueh nyan geubri ngon makanan
Makeuen sikeulian cut ngon raya
'Oh lheueh makeun dum sinaroe
Piyoh le jinoe dum cut raya

Teuma marit Kama 'Alam
Ngon Sa'id Meureudan Raja 'ala
Wahe Raja Sa'id Meureudan
Tadeungo lon kheun he kakeunda

Keureuna geutanyoe ka lheueh tamuprang
Dilee lawan jinöe hana
Aneuk gata Putroe kayangan
Ka lam tangan Raja Diwa

Ka lam jaroe Diu Palinggam
Raja saktian hana tara
Jinoe tabri deungon mangat
Tapangge leugat Syiah nyang tiga

Neuyue peunikah Diu Palinggam
Ngon Putroe Kayangan bek that jula
Sa'id Meureudan deungo haba sulotan
Neuyue hei le yoh nyan lhee droe ulama

Neuyue peunikah tuan Putroe
Ubak teungku Syiah Tapa
'Oh lheueh sabda Sa'id Meureudan
Peunikah le yoh nyan Putroe Muda

'Oh lheueh nikah hukom sampoe
Neumumat jaroe ngon ulama
Diu Palinggam hate mangat
Keureuna seubab ka troh ban pirta

Diu Palinggam hate sukaan
Putroe Kayangan cit lam keumala
Bandum Raja hate mangat
Han le khuseumat ka taklok Raja

Raja Peutawi lakee idin
Dua deungon Beulia Gumpita
Ampon tuanku meuribee ampon
Tadeungo ulon po meukuta

Idintuanku keu lon sikarang
Kamoe meuriwang po meukuta
Keureuna seubab ka treb sinoe
Saleh di nanggroe teuka bahya

Dudoe tuanku 'oh ka na prang
Kamoe neupeusan meuhat troh teuka
Teuma seuot Diu Palinggam
Jak leh tariwang he kakeunda

Saleh peue-peue bahya di nanggroe
Rijangkeuh keunoe po meukuta
'Oh ban jideungo sabda sulotan
Peutawi Biram leugat jigisa

Sajan rakyat meuribee katoe
Woe u nanggroe Raja Raya
'Oh ban sare troh nyan u nanggroe
Tamong le jinoo u dalam kuta

Biram Peutawi teutap di nanggroe
Kisah muwoe keu Raja Indra
Ampon tuanku Sa'id Meureudan
Ulonteu riwang u nanggroe Indra

Sa'id Meureudan teuma idin
Juhan 'Alam woe le lanja
Leugat neutuju nyan u nanggroe
Tamong le jinoo dalam kuta

Beureuma Kasan pi ka sajan
Ngon Juhan 'Alam woe le sigra
'Oh lheueh nibak nyan Raja Milon
Jilakee idin ubak Raja

Ampon tuanku meuribee ampon
Neudeungo lon po meukuta
Idin tuanku keu lon sikarang
Kamoe meuriwang dalam hawa

Teuma seuot baginda sulotan
Jak tariwang he syeedara
Leugat jiwoe sulotan Milon
Troh u nanggroe dalam hawa

Kusangga Pari lakee riwang
Dua deungon Syareh Miga
Ampon tuanku keu lon sikarang
Kamoe meuriwang po meukuta

Teuma seuot Diu Palinggam
Jak leh tariwang wahe Raja
'Oh ban jideungo sabda sulotan
Syareh riwang woe le sigra

Teutap Raja nyan di nanggroe
Kisah muwoe teuma keu Raja
Budiman 'Alam neulakee idin
Sireuta deungon Raja Muda

'Oh lheueh idin bak sulotan
Beurangkat le yoh nyan Raja Muda
Sajan rakyat meuribee katoe
Woe u nanggroe Raja Muda

'Oh ban sare troh nyan u dalam
Meuteumeung Sulotan Raja Tuha
Teuma neutanyong soe talo prang
Peugah rijang he aneukeunda

Teuma seuot muda samlakoe
Neudeungo jinoe lon calitra
Habej jipeugah dum sikeulian
Baginda sulotan hate suka

Teutap Raja nyoe di nanggroe
Kisah lon nyoe teuma keu Raja
Diu Palinggam ngon Kama 'Alam
Teuduek sajan deungon Raja

Padum uroe lheueng nibak nyan
Neulakee idin teuma bak Raja
Ampon tuanku meuribee ampon
Seumbah ulon po meukuta

Idin tuanku keu lon sikarang
Jinoe lon riwang u Buket Miga
Sa'id Meureudan deungo haba meunan
Teuma neuidin pantah sigra

Jak he aneuk bak seulamat
Bak jioh laknat mara bahya
'Oh ban neudeungo haba meunan
Diu Palinggam beurangkat sigra

Sajan rakyat meuribee katoe
Kama 'Alam woe deungon aneukeunda
Leugat neutuju u Buket Palinggam
Leugat beujalan u Buket Miga

Diu Palinggam pi na sajan
Tujoh reutoh rakan dalam keumala
Sa'id Meureudan tinggai di nanggroe
Rakyat sinaroe sajan sireuta

Na siteungoh mate dalam prang
Uleebalang dua blah panna
Keurajeuen teutap nanggroe ka seunang
Hana le prang ka taklok Raja

Talo Raja Sa'id Meureudan
Seubab Sulotan Milon Diwangga
Adak kon seubab keunong padan
Raya lom prang 'oh teubiet Raja

Adak roh teubiet Sa'id Meureudan
Bandum sulotan han ek theun sangga
Lah bak pihak keunong taki
Han jan lheueh sakti ka keunong daya

Teutap sinan Sa'id Meureudan
Nangroe pi aman hana le goga
Diu Palinggam teuma lakee idin
Ubak Sulotan Kama 'Alam Diwa

Ampon tuanku meuribee ampon
Seumbah ulon patai nyang hina
Idin tuanku keu lon sikarang
Bahle lon riwang lam Awan Miga

'Oh lheueh neudeungo sabda meunan
Jak leh tariwang he aneukeunda
Rijang tawoe u Buket di Awan
Tamong u dalam bak teupat nyang ka

Kama 'Alam laen teupat
Maseng babat bak teupat nyang ka
Diu Palinggam troh lam meuligoe
Neubuka le jinoe cumboi meutia

Teubiet Putroe dua sinan
Ngon dendayang sajan sireuta
Teuma jibot le ngon tangan
Marit yoh nyan Putroe ngon Raja

Ampon deelat peue na khuseumat
Cumboi malakat pakon neubuka
Teuma seuot Diu Palinggam
Lon sukaan he Putroe Muda

Ka troh adoe lam meuligoe
Patot jinoe meusuka-suka
Peue nyang ka beue dengon galak
Tapeugah bak kakeunda gata

Meunankeuh adat dilon he adoe
Peugah bak kamoe bandua gata
Teuma seuot cut Putroe intan
Bandua sajan jimeusuara

Jibet jaroe bandua Putroe
Ampon kamoe doli meukuta
Hana napsu deungon hajat
Doli halarat nyang lon cinta

Teuma neumarit Diu Palinggam
Sira meuwayang ngon Putroe Muda
Insya Allah ngon tulong Tuhan
Pudoe ngon intan ateueh jeumala

Teutap sikeujab Putroe di sinan
Ngon Diu Palinggam meusuka-suka
Kama 'Alam Diwa nanggroe neupulang
Diu Palinggam neuboh keu Raja

Neupulang nanggroe teuma ngon mideuen
Neupulang keurajeuen ngon balatandra
'Oh lheueh nyan neupulang dum sibarang
Diu Palinggam neubalek nama

SULOTAN MIGA teuma geupeunan
'Oh lheueh nibak nyan neuhukom donya
Sulotan Miga teutap didalam
Ngon Putroe Kayangan lam astana

Nila Wati pi na sajan
Miseue intan ngon peurmata
Indra Kayangan ngon Nila Wati
An na miseue ban adoe deungon a

Teutap sinan lam meuligoe
Sajan Putroe deungon Raja
Sulotan Miga hukom that seunang
Nanggroe lam awan Gunong Miga

Meusyeuhu gah|jeueb-jeueb nanggroe
Cit lam geupujoe bandum donya
'Oh roh Raja Diu Palinggam
Nanggroe diawan makmu raya

Bandum rakyat hate sukaan
Keureuna sulotan ade lagoena
Padum lawet teuma dudoe
Hame le jinoe Putroe Miga

Hame Putroe cut Nila Wati
Malam hari hate suka
Umu lhee buleuen budak dalam pruet
Tuan Putroe cut hate suka

Bandum ureueng galak hate
Putroe Siti hamejih ka
Teukeudi Allah peurintah Tuhan
Leumah lam lumpoe teuma bak Raja

Bak simalam Raja meulompoe
Hanatom meunoe dilee nyang ka
Neumeulumpoe teuka mata uroe
Lam meuligoe limpah cahya

Cahya limpah ban saboh dalam
Gunong nyang manyang habeh seureupha
Sigala kayee nyang di padang
Bandum keunan sujud bak cahya

Teuma leumah cahya laen trang
Ban saboh 'alam seumeulhoh cahya
Jibeudoh cahya dua seun tujoh
Cahya seumeulhoh lam awan miga


Troh lam awan cahya trang-bandrang
Uroe di manyang ka padam cahya
Na sikeujab dudoe nibak nyan
Gadoh cahya trang di tanoh donya

Leubeh that kreueh bak mata uroe
Cahya bunoe lam astana
'Oh sare lheueh neumeulumpoe
Teukeujot le jinoe sulotan Miga

Uroe ka beungoh cuaca ka trang
Tren le sulotan bak bale raksa
'Oh ban teuingat Raja keu lumpoe
Neuleueng jaroe lakee do'a

Teuma neupangge deungon bujang
Troh le rijang lam astana
'Oh ban sare troh yub peurakna seumbah
Jaroe dua blah ateueh jeumala

Pakon tuanku neupangge kamoe
Neukheun jinoe peue na sabda
Teuma seuot baginda sulotan
Tadeungo lon kheun ubak gata



Jak leh pangge ulama Syiah
Tayue jinoe langkah keunoe lam kuta
'oh ban jideungo sabda sulotan
Jijak le yoh nyan pantah sigra

Habeh jikrah ulama ngon syiah
Jitren le pantah ubak Raja
'oh ban sare troh yub peurakna seumbah
Jaroe dua blah ateueh jeumala

Ampon tuanku meuribee ampon
Ho neusuron kamoe dum na
Trenkeuh sabda teuma di manyang
Tadeungo lon kheun he panita

Nyang kupangge gata keunoe
Keureuna kamoe leumah rahsia
Peue rahsia tuanku ampon
Neupeugah bak lon po meukuta

Ulonteu lumpoe malam bunoe
Mata uroe limpah cahya
Na nyum teuka mata uroe
Lam meuligoe limpah cahya

Cahya limpah ban saboh 'alam
Gunong nyang manyang habeh seureupha
Sigala kayee nyang na di padang
Bandum keunan sujud bak cahya

Meunankeuh leumah cahya bak lon trang
Ban saboh 'alam seumeulhoh cahya
Jibeudoh cahya dua seun tujoh
Cahya seumeulhoh lam awan miga

Troh lam awan cahya trang-bandrang
Uroe di manyang ka padam cahya
Na sikeujab dudoe nibak nyan
Gaduh cahya trang di tanoh donya

Leubeh that kreueh bak mata uroe
Cahya bunoe lam astana
'Oh noe habeh nyang lon lumpoe
Teukeujot kamoe uroe ka faja

'Oh ban nujum deungo haba meunan
Kitab le yoh nyan leugat jibuka
Habeh jikalon dum jilihat
Teuma jideelat ubak Raja

Ampon tuanku meuribee ampon
That meuuntong po meukuta
Aneuk tuanku ureueng lakoe
Hana bagoe meutuah raya

Teuma nyang dudoe cahya leumah
Tuanku sah ureueng donya
Nyankeuh aneuk Mambang Sari
Sabe-sabe ngon aneuk meukuta

Leubeh cit nyoe tuanku lam tayeb
Kakeuh habeh lon pareksa
'Oh ban neudeungo haba nujum
Baginda yoh nyan hate suka

'Oh lheueh nibak nyan neukanduri
Peujamee faki ngon ulama
'Oh lheueh nibak nyan neubri seudeukah
Ulama ngon syiah habeh gisa

Teutap Raja lam meuligoe
Sajan Putroe lam astana
Padum lawet lheueng nibak nyan
Teukeudi Tuhan budak keulua

'Oh troh bak hat buleuen sampoe
Manyak jinoe pandang donya
Aneuk pi agam rupa samlakoe
Ban mata uroe limpah cahya

Lang geumilang amat sangat
Meukeukilat cahya muka
'Oh lheueh nyan Raja pangge bujang
Trohle rijang pantah sigra

'Oh sare troh lam meuligoe
Jibet jaroe ateuh jeumala
Pakon tuanku neupangge kamoe
Neukheun jinoe peue na sabda

Nyang jeuet lon pangge gata keunoe
Taseutot jinoe nujum panita
'Oh jideungo sabda sulotan
Jijak le yoh nyan pantah sigra

Habeh jikrah ulama ngon syiah
Jitren le pantah leugat lam kuta
Sigo neutet beude nubat
Jitren rakyat dum bak Raja

Sigala Raja ngon uleebalang
Dum sikarang tren bak Raja
'Oh sare habeh dum meusapat
Teuma jideelat ubak Raja

Ampon tuanku meuribee ampon
Ho neusuron kamoe dum na
Keureuna kamoe ka meusapat
Bandum rakyat habeh teuka .

Jinoe tuanku peue na hajat
Doli halarat peue na sabda
Trenkeuh sabda teuma di manyang
Tadeungo lon kheun ubak gata

Nyang jeuet lon pangge gata sinaroe
Keureuna kamoe aneuk ka na
Aneuk ka na ureueng lakoe
Soe mee jinoe taboh nama

Cuba kalon lam buseutan
Soe taboh nan aneuk Raja
'Oh ban jideungo sabda sulotan
Nujum yoh nyan kitab jibuka

Habeh jikalon harah lapan
Teuma jibuang deungon angka
Bintang tujuh ngon dua blah
Habeh jeulah jipham makna

'Oh habeh leumah deueh jipandang
Jideelat yoh nyan ubak Raja
Ampon tuanku meuribee ampon
That meuuntong po meukuta

Aneuk tuanku nyang patot nan
Baginda HUKMAN 'ALAM DIWA
Keureuna Allah meusyeuhu tunggang
Beurangri sulotan hana neuteuka

Teutapi cahya kaya dudoe
Meureutoh Putroe di tanoh donya
Deungon aneuk Mambang Pari
Meungadu sakti di mideuen Raja

Bit pi meunan keureuna Putroe
Uroe dudoe meuteumeung nama
Sulotan Miga deungo haba meunan
That sukaan hana tara

'Oh lheueh nibak nyan neubri seudeukah
Ulama ngon syiah teuma gisa
'Oh lheueh kanduri rakyat riwang
Tinggai sulotan dalam astana

Hukman 'Alam raya leugat
Miseue kilat ujeuen baroe sa
Siuroe laen simalam bukon
'Oh takalon maken raya

Rupa pi jroh miseue bintang
Soe nyang pandang hate suka
Ho siuroe meutamah budiman
Galak sulotan hana tara

Kama 'Alam Diwa pi that sukaan
Keureuna Hukman samlakoe rupa
Tujoh thon umu teuma Hukman
Neubri saktian uleh Raja

Neupeurunoe ileumee hekeumat
Dua droe sabat sajan sireuta
Sidroe geupeunan PADUKA SARI
Keudua geurasi SAMAILA

Sajan sabe pubuet hekeumat
Baginda halarat hate suka
Siploh thon umu Hukman 'Alam
Bak Zanggi Meureudan neuyue jak tapa

Zanggi Meureudan diwa keusakti
Asai nini Kama 'Alam Diwa
Neutapa lam Tasek Pawoh
Zanggi nyan entu Pari Peureuba Lila

Hukman 'Alam keunan geuintat
Dua droe sapat sajan sireuta
Sinan teutap dalam tapan
Tamat 'oh nan saboh calitra

JINOE LON SEUBOT KEU UREUENG SEUMURAT
Seubab payah that wahe adek
Payah lon that hikayat lon surat
Keureuna ralat peukeunon canek

Nyang seumurat na neutusoe
Wahe adoe dum na eunceck
HALI DAWOD nama geupeugah
ULEE LHEUE sah teumpat patek

bek tacarot ngon taupat
Lon seumurat hana lisek
Seubab geuyue uleh teuku
Lon peulaku wahe eunceck

Tamat 'oh nan ureueng seumurat
Bek that lambat wahe adek

'AJAYEB SUBHANALLAH
Tadeungo lon kisah laen calitra
Na sidroe Raja IRAM KEUSUMI
Raya that sakti hana tara

Keurajeuen luah amat sangat

Peutimang rakyat mat neuraca
Kuta nanggroe tujuh lapeh
Meujeuneh-jeuneh laku rupa

Kuta nyang phon 'akek nyang mirah
Lom meutamah ngon peureumata
Kuta nyang dua that meusigak
Jroh that layak taeu rupa

Kuta nyang lhee manyang sangat
Jroh meukilat taeu rup'a
Teuma nyang keupeuet kuta dalam
Nyang geupeunan kuta SUASA

Haba kuta han le lon peugah
panyang that kisah he syeedara
Peurumoh Raja sikureueng droe
That sambinoe hana tara

Teuma nyang tulet peurumoh lotan
PUTROE AWAN geurasi nama
Sulotan Keusumi that sukaan
Keu Putroe Awan hate suka

Saboh meuligoe sikureueng bilek
Meuturab 'akek mutu ratna
Maseng-maseng Putroe neubri teumpat
Dendayang meuhat dua droe saja

Sikureueng Putroe lam astana
Nyang jroh rupa Putroe Awan

Putroe lapan hate han puteh
Raja neugaseh keu Putroe Awan
Cit lam sabe jimita ilah
Hate susah keu Putroe Muda

Nyankeuh seubab deungki ji that
Lom khianat ban lapan Putroe

Uroe malam jiba peusuna
Ubak Raja balek bagoe

Haba meunoe jipeugah le ban
Keu Putroe Awan jiupat ceula
Bak that teuingat wahe adoe
Nyang na lakoe dum na gata

Bek tatueng miseue ngon teuladan
Ban Putroe lapan khianat raya
Meung nyo tatueng teuladan nyan
Akhe sosahan ateueh gata

Putroe jameun hana meuh
Umat Muhammad Nabi kita
Bak siuroe jimita bicara
Jijak bak Raja jiboh padan

'Oh ban sare troh u nab sulotan
Marit ban lapan Putroe Muda
Ampon tuanku meuribee ampon
Neudeungo lon po meukuta

Nyang troh langkah kamoe keunoe
Hajat kamoe bak meukuta
Peue na hajat wahe Putroe
Cuba peugah proe lon deungo nyata

Teuma seuot tuan Putroe
Tadeungo kamoe po meukuta
Adak na neugaseh keu kamoe lapan
Tuanku beujalan dalam rimba

Kamoe hawa that keu rasa uteuen
Tuanku beujalan dalam rimba
'Oh ban neudeungo haba Putroe
Neukrah le jinoe rakyat dum na

Habeh teuka uleebalang

Dum sibarang ngon panglima
'Oh ban sare troh dum u dalam
Jideelat le yoh nyan ubak Raja

Ampon tuanku meuribee ampon
Seumbah ulon po meukuta
Pakon tuanku tapangge kamoe
Takheun jinoe peue na sabda

Trenkeuh sabda teuma di manyang
Tadeungo lon kheun ubak gata
Nyang kupangge gata keunoe
Keureuna kamoe meung jak meurusa

'Oh ban jideungo sabda sulotan
Jideelat le yoh nyan dum bak Raja
Insya Allah tuanku ampon
Kamoe peungon jak meurusa

'Oh ban Raja deungo haba rakyat
Sukaan that hana tara
'Oh lheueh nyan Raja peuhase beukailan
Dum sikeulian alat bungka

Sare hase dum sikeulian
Marit cut Awan deungon Raja
Cut Awan Cahya Putroe sambinoe
Neukheun meunoe ubak Raja

Pakri tuanku neumeung jak lam gle
Hame ka hampe brat that badan
Seuot le Raja neukheun meunoe
Bek he adoe gata sosahan

Gata lon keubah dalam astana
Dendayang dua lon bri sajan
Teutap 'oh nan haba cut Ti
Raja neugri kheundak beujalan

Raja neutren Putroe jimoe

Ri geumanoe ro ie mata
'Oh lheueh nyan Raja neubeurangkat
Sajan ngon rakyat meuribee laksa

'Oh ban leupah Raja u gle
Mangat hate Putroe lapan
Jinoe ka troh ban nyang suka
Ek binasa Putroe Awan

Sulotan Keusumi teungoh rimba
Mita rusa jeueb-jeueb jalan
Hana meuteumeung bakat rusa
Sisat Raja bak beujalan

Dua buleuen Raja sisat
Meuteumeung bakat rusa meukawan
Sinankeuh Raja neumeuburu
Ka'a ka'u uroe malam

'Oh lheueh nyan meuteumeung rusa sinaroe
Rakyat meukatoe hate suka
Padum uroe 'oh lheueh nibak nyan
Raja riwang leugat neugisa

Umu lhee buleuen neujak sabe
Hingga troh le bak Putroe Muda
'Oh ban sare troh Raja u nanggroe
Troh le jinoe Putroe lapan

Cut Awan cahya nyang hana jak
Keureuna pruetneuh hame ka raya
Ka limong buleuen neukandong budak
Aneuk halarat poteu Raja

Nyankeuh seubab cut Awan han jak
Nibak halarat woe lam rimba
Neutakot jiseutot peunyaket rambalui
Hantu buru dalam rimba
Putroe lapan troh bak Raja

Jimarit teuma ngon sulotan
Ampon tuanku meuribee ampon
Neudeungo lon po meukuta

Silawet tuanku neubeujalan
Laen padan cut Awan Miga
Peue na bicara he Putroe lapan
Tacuba kheun lon deungo nyata

Teuma seuot tuan Putroe
Neudeungo kamoe meucalitra
Lon kalon cut Awan pruet ka raya
Laen bicara 'oh leupah janjongan

'Oh neudeungo Putroe peugah
Raja amarah hana tara
Leugat neuwoe u meuligoe
Ubak Putroe Awan Miga

'Oh troh Raja keunan sampoe
Beudoh le Putroe seumbah Raja
Raja kalon ateueh Putroe
Neutanyong le jinoe pantah sigra

Wahe Putroe cut bungong keumang
Pakon buet meunan he Putroe Muda
Paleng muka adoe keu kamoe
Lon kalon bagoe ateueh gata

Jinoe gata keunong rude
Lon poh mate he Putroe Muda
Keureuna gata buet teuh salah
Han ulon poh ayeb nama

Seuot Putroe tuanku ampon
Bek neupoh lon hana deesya
Hana lon pubuet nyang teugah Allah
Ampon di bawah doli meukuta

Ampon tuanku meuribee kali
Beuranggakri hana deesya
Neupoh mate neugantung manyang
Wahe janjongan deesya lon hana

Adak mate lon wahe janjongan
Kheundak Tuhan ka troh masa
Kheundak Tuhan Ilahon hak
Barang hajat wahe meukuta

Adak lon kheun beurangaban
Wahe janjongan neupateh hana
Getkeuh bahle lon meusumpah
Wallah Billah hana deesya

That lon takot Allah ngon Nabi
Wahe doli han lon meuzina
Ampon tuanku bek neuwaham
Salah bak Tuhan wahe meukuta

Meutamah lom ayeb keuji
Lon he doli peurumoh Raja
Meunan geukheun le ureueng nanggroe
Akhe dudoe teulah meukuta

Sikarang jinoe pakri nyang muphom
Pakri nyang hukom meukuta donya
Habeu haba tamat kalam
Putroe lapan tuanku peucaya

Hana neupateh Putroe peugah
Raja amarah hu ngon mata
Hana sidek bak ureueng nanggroe
Neupubuet keu Putroe hana keureuna

Raja sosah dalam hate
Teuma neuhei le ngon peudana
Habeu teuka bandum rakyat
Baginda halarat neumeusabda

Nyang lon pangge gata keunoe
Keureuna Putroe darohaka
Pakri bicara he uleebalang
Takheun bak rijang lon deungo nyata

Teuma seuot uleebalang
Ban nyang reumbang bak meukuta
Teuma seuot peudana meuntroe
Tadeungo kamoe po meukuta

Meunyo meunan buet Putroe Awan
Wajeb laman boh lam rimba
Cit meunan adat bak nanggroe nyoe
Beuranggasoe buet salahan

'Oh Raja deungo haba meunan
Neuyue boh le yoh nyan Putroe Muda
Hana sidek deungon sasat
Neuyue boh leugat Putroe lam rimba

Teuma geupeutren Putroe Awan
Rupa na ban buleuen purnama
Dendayang kalon bandum hireuen
Na ri ujeuen ro ie mata

Cut Awan Cahya deungo meunan titah
Jiyue meulangkah neujak lam rimba
Meuhila langkah Putroe han tom jak
Sirasa brat nanyum meusingkla

Ile ie mata hana teudoh
Putroe sampoh ngon punca ija
Ingat keu untong jiteuoh keu ujud
Allah he macut tinggai dum gata

Tinggai cutda aduen adoe
Dikamoe jinoe meujak lam rimba
Jikalee mate lon cutda droe
Uroe dudoe meuteumeung ngon gata

Sideh meuteumeung bak syeureuga lapan
Dum na dendayang nyang sajan hamba
Sikarang jinoe tapeumeu'ah
Barang nyang salah ampon deesya

Lom teuingat ke doli halarat
Cut Awan that teugoh seutia
Allah he judo meukuta nanggroe
Tinggai meuligoe lon ka hana

Allah hai judo peurmata nilam
Putroe intan tinggai astana
Han le ureueng uroe ngon malam
Putroe Awan ka lam rimba

Tinggai deungon alat keurajeuen
Putroe lam uteuen ka troh masa
Tinggai Deungon alat peukayan
Gleueng ngon subang ikai meujeuntra

Tinggai bandum sikeulian
Putroe Awan geuboh lam rimba
Hanjeuet lon ingat deesya lon tan
Malingkan Tuhan nyang peulara

Sira jikheun nyan ie mata ro
Jitumbok baho jilimpah dada
Cut Awan Cahya ingat keu untong
Meugeugulong ngon ie mata

Hanco hate teuingat keudroe
Jeh pat nanggroe geuba lam rimba
Putroe cut Awan teungoh peumeusan
Uleebalang suroh jak lanja

Teuma Putroe neujak leugat
Troh bak dairah pinto rimba
Dendayang rakyat jikalon deuh
Pandang sineulheueh cut Awan Cahya

Dum na rakyat bandum jimoe
Teuingat keu Putroe salah hana
Seubab sayang hategeuh rawan
Keu Putroe Awan geuboh lam rimba

Ayohe Allah ya Tuhanku
Neutulong bantu keu Putroe Muda
Allah ngon Nabi nyang na sajan
He Putroe Awan sideh lam rimba

Mumeunan jikheun uleh rakyat
Ubak halarat jimohon pinta
Sireuta jikheun le dendayang
He Putroe Awan tinggai seutia

Teuma ka troh geuba Putroe
Rakyat sinaroe meuntroe panglima
Sireuta deungon sikeulian
Uleebalang nyang ba lam rimba

'Oh ban troh Putroe dalam rimba
Teutap jigisa rakyat dum na
Tinggai Putroe dalam rimba
Jiwoe lanja bak sulotan

'Oh troh bak Raja teuma jipeugah
Ka lheueh lon boh po meukuta
Putroe lapan deungo haba rakyat
That sukaan hana tara

Teutap Raja lam meuligoe
Sajan Putroe sinan lapan
Uroe malam peuhabeuh deundam
Putroe lapan deungon Raja

Seubab hana le Putroe awan
Gata ban lapan han cre ngon Raja
Nyankeuh seubab tapeusuna
Peuturot hawa gata ban lapan

Ingat-ingat wahe Putroe
Ban lapan droe gata ka tuha
Teuduek haba sulotan Keusumi
Lon puwoe rawi keu Putroe Muda

KATA SAHIBON EUMPUNYA KISAH
Deungo lon peugah keu Putroe Muda
Putroe Awan didalam rimba
Ro ie mata meuteutaloe

Putroe teuduek muka pucat
Dum na rakyat habeh jiwoe
Putroe cut moe bukon bubarang
Meugeulumbang ie mata meutaloe

Allah hai untong lon paban bah
Grak bak Allah keu lon sidroe
Teungoh lon duek lam astana
Ateueh hamba bahya han pudoe

Putroe teuduek tundok ulee
Allah nyan thee keu lon sidroe
Na sikeujab jiduek sinan
Jibeudoh le yoh nyan Putroe sambinoe

Peue jeuet lon duek dalam rimba
Bah lon bungka beurangri naggroe
Putroe pike dalam hate
Bahle bak mate nibak mumeunoe

Teuma beudoh neujak leugat
Ho nyang teupat neujak sidroe
Rupa ilok lang geumilang
Bukon that sayang Putroe sambinoe

Umu baro dua blah thon
Putroe meugleueng cre ngon lakoe
Tapaban bah grak bak Tuhan
Ka roh meunan ateueh Putroe

Bukon sayang Putroe meugleueng
Hana ureueng neujak sidroe
Lom ngon pruet brat makanan tan
Sayang cut intan hana bagoe

Adak hana pruet meutayeuen
Allah he buleuen nilam peurmata
Nyankeuh seubab hate rawan
He Putroe intan ingat keu gata

Adak na ureueng dalam rimba
Sajan gata jijak he intan
Keureuna sayang bintang seumeulhoh
Geuboh jioh lam rimba raya

Hana sidroe geubri gunangan
Hana sayang ingat keu guna
Bit nyo saket hate hana ban
Lom sulotan ingat keu nama

Teutapi bacut Wallahu 'alam
Putroe lapen ba peusuna
Ingat bandum wahe adoe
Salang Putroe peurumoh Raja

Seubab buet ayeb nama keuji
Allah he nyak Ti nama agama
Meung nyang laen han peue peugah
Jeuet karam sah langet bumoe

Dilon nyang deungo hate sosahan
Sayang cut intan sidroe lam rimba
Meung ie hana neukeumeung jeb
Putroe ka treb payah lageena

Keureuna han tom nyang na payah
Deuek deungon grah wahe adoe
Allah he Tuhan neubri seuliseh
Keu Putroe puteh cat Awan Cahya

Neubri bak jarak binatang uteuen
Badeuek ngon rimueng bandum simua
Nyankeuh lon lakee keu Putroe Awan
Allah hai Tuhan neupeutroh pinta

Bukon sayang Putroe seudang
Tinggai sulotan ngon inong tuha
Miseue panton nari geundrang
Lon meuwayang kalam teulanca

Tajak u gle tamita urot
Raja peuseutot peuet peukara
Neuboh nyang roh neutinggai lapan
Raja suang tan pariksa

Putroe Awan jiduek jimoe
Ri geumanoe ro ie mata
Hate lam dada nyum hanco luruh
Teubiet reuoh jeueb anggeeta

Cit lam sosah hana reuda
Bak Allah Ta'ala jipeujok droe
Ie mata ro seun-seun siploh
Tamse putoh taloe meutia

Tamse manek putoh lam karang
Sret lam leumueng cut Awan Cahya
Hate lon ka troh hat
Lon hadap akhirat lon tinggai donya

Ka troh hajat sampoe umu
Sabab madu putroe tuha
Putroe neujak dalam uteuen
Meuteumeung ngon rimueng takot han padoe

Putroe neumee teungoh beujalan
Dum na binatang teumakot keudroe
Leupah sinan Putroe neujak
Teuma meurumpok saboh sungoe

Ie didalam that jeureuneh
Rasa mameh hana bagoe
Putroe tren le dalam krueng nyan
Neusrah tangan neurahob dhoe

Putroe jeb le ie siteugok
Nekmat pi tok jeueb-jeueb asoe
Putroe piyoh sinan siat
Payahneuh that hana tara

'Oh teuingat geuboh lam rimba
Ro ie mata meutaloe-taloe
Allah hai Tuhan lon paban bah
Gata peurintah keulon sidroe

Teungoh lon duek lam astana
Neupeutren bala ateueh kamoe
Ya Tuhanku tatueng nyawong
Bek treb lon kalon seksa han padoe

Nibak udeb sinoe lam gle
Bahle mate lon uroe nyoe
Bukon sayang bungong keumang
Jarak mawang cre ngon nanggroe

Rupa jroh that ban buleuen trang
Weueh tapandang dawok jimoe
Putroe teungoh dalam krueng nyan
Ubak Tuhan neupeujok droe

Sira neujak ie mata ro
Miseue peuraho meugisa-gisa
Teujak teudong tahe-gante
Beurangsoe eu meuhat teumoe

Neujak lanja laju pantah
Seutet langkah taloe sungoe
Teuma meuteumeung saboh padang
Hana lawan luah han soe

Di teungoh padang sibak kayee meuh
On di ateueh jampu meutia
Putroe jak le yub kayee nyan
Leumah neukalon ureueng sidroe

Rupa hibat sang eelia
Neupeurab lanja mumat jaroe
Putroe neumoe ro ie mata
Ureueng tuha tanyong jinoo

He ureueng binoo pakon duka
Peue na baya jeuet nyak tamoe
Peue buet keunoe dalam rimba
Lon kalon gata nyan cit sidroe

Lon geudawa le suami
Geuboh u gle ngon aneuk droe
Ulon geuboh deesya lon tan
Nyankeuh tuan nyang jeuet lon moe

Ureueng tuha deungo haba meunan
Teuma neukheun bak Putroe Muda
Meunyo meunan aneuk tapeugah
Bek that gundah bijeh mata

Ulon teu nyoe Nabi Haile
Bak taturi he Putroe Muda
Lon bri makanan keu ureueng sisat
Suroh halarat nibak hamba

Jinoe aneuk bek gundah le
Bak teutap hate bek that goga
Nyoe na aneuk lon bri salen
Badai ulon intat u nanggroe

Nyoe na aneuk saboh malakat
Peue nyang hajat Tuhan bri sampoe
Putroe teurimong rijang-rijang
Haile yoh nyan lom kheun meunoe

Jinoe he aneuk keudeh tapioh
He Putroe jroh dang-dang troh lakoe
Bak gaki gle di pucuk krueng
Sibak bak rambong ramphak han bagoe

Sinan tapioh mangat na budak
Teumpat meusigak miseue meuligoe
Cut Awan Cahya deungo haba mumeunan
That sukaan hana bagoe

Putroe seumbah Nabi Haile
Neubeudoh le neujak lanja
Hingga troh bak gaki gunong
Leumah bak rambong that seureuloe

Timoh bak rambong bak pucok krueng
Di bineh reuleueng batee pudoe
Di yub rambong batee palinggam
Luah linteueng lapan sagoe

Dua ploh hah buju seulinteueng
Ukheue rambong lingka sinaroe
Putroe neuk ateueh batee nyan
That sukaan hana padoe

Miseue neuduek sajan Raja
Dum peukara hana bagoe
Ngon beureukat Eelia Tuhan
Troh dum keunan peue hajat droe

Jeuneh ija gleueng ngon subang
Incien meukarang teuka keudroe
Watee meukeusud neutatang malakat
Troh le siat dum sinaroe

Ranub pineung dum beukailan
Jiteuka keunan dum bak Putroe
Umu lhee buleuen Putroe sinan
Teukeudi Tuhan manyak keulua

Kutika suboh uroe Seunanyan
Budak yoh nyan pandang donya
Rupa jroh that hana lawan
Beurangri 'alam hana ngon peusa

Rupa elok ban buleuen trang
Siakan-akan ban mata uroe
Putroe Awan hate mangat
Keureuna seubab ka na sambinoe

Nan sinyak cut teuma geurasi
BUDIMAN KHANDI rupa sang uroe
Sinyak jiboh dalam ayon
Syae panton timang Putroe

Jak kutimang bungong nireh
Jiek peureuseh rupa sambinoe
Bak rijang raya he nyak puteh
Saleh soe gaseh puwoe u nanggroe

Ayahteuh aneuk gatanyoe geuboh
He aneuk jroh bek that tameung woe
Jak kutimang bungong mancang
Le soe pandang dalam nanggroe

Bak rijang rayek boh hate nang
Mangat tariwang beurangri nanggroe
Ayahteuh aneuk han geutueng le
Saleh mate geutanyoe sinoe

Rayek laot that meuguncang
Kapai kuangkang meugisa jiwoe
Saleh soe na gaseh ngon sayang
Gata he bintang puwoe u nanggroe

Ayahteuh aneuk lale bimbang
Gata he bintang geuboh di nanggroe
Ayahteuh aneuk hana tuah
Patot geuboh gata ngon kamoe

Raja neupateh kheun Putroe lapan
Gata he intan Tuhan bri meunoe
Lon paban bah ke bungong keumang
Gata deungon nang geuboh di nanggroe

Adak na buah lon ngon gata
Saleh soe teuka gata geupuwoe
Jak kutimang bungong maliri
Han soe turi dalam nanggroe

Bak rijang raya cut puteh di
Nanggroe beurangri geutanyoe tawoe
Adak na buah lon ngon gata
Dalam rimba bak na nanggroe

Bak rame rakyat luah ngon mideuen
Aneuk buleuen peutimang nanggroe
Dalam rimba gata nyoe rayek
Duteu aneuk teutab di nanggroe

Jak kutimang bungong maliri
Jroh meuriti keumang sinaroe
Bak rijang raya gata he nyak ti
Saleh na soe bri gleueng bak jaroe

Bukon sayang bungong meurak
Jroh meusigak hana bagoe
Bukon sayang nyak puteh muprak
Teungoh galak geuboh di nanggroe

Bukon sayang bungong sikumbong
Jroh meukeupong binéh sagoe
Limong buleuen brat gata lon kandong
Geuboh ulon he sambinoe

Bukon sayang putik rambot
Ka habéh sret kilat tampoe
Limong buleuen gata dalam pruet
Ulon he nyak cut kurasa deuek troe

Jeueb-jeueb uteuen meuraba-raba
Jeueb-jeueb rimba keudeh keunoe
Bungong malari keumang bunta
Bungong keupula meusagoe-sagoe

Lon tren gunong lon ek data
Hana reuda dalam duroe
Bungong meulu puteh muprak
Bungong meurak meususon padoe

Keureuna du gata wahe ponyak
Nyang jeuet lon jak leupah keunoe
Dalam reudok teuka tupheuen
Dalam ujeuen lon jak sidroe

Haba timang seb ka 'oh nan
Bek le panyang lon calitra
Cut Awan Cahya teutap lam gle
Budiman Kandi jiyon keudroe

Budiman Kandi raya leugat
Miseue kulat ujeuen baroe
Han that payah Putroe Awan
Budiman intan raya keudroe

Rupa ilok ban buleuen trang
Soe nyang pandang mata laloe
Lang-geumilang amat sangat
Meukilat-kilat ban mata uroe

Adak uroe Putroe teulihat
Malam meuhat roh talumpoe
Siakan-akan budiadari
Hate beureuhi beuranggasoe

Teutap Putroe sajan bunda
Indah that rupa hana padoe
Teuduek kisah Budiman Khandi
Sulotan Keusumi lon calitra

KATA DALANG EUMPUNYA RAWI

Sulotan Keusumi lon puwoe haba
Baginda teutap lam meuligoe
Lapan droe Putroe sajan sireuta

Suka hate geumbira dasyah
Han le sosah didalam dada
Bak simalam Raja meulumpoe
Hantom puroe dilee nyang ka

Na nyum teuka Putroe Awan
Leugat keunan ubak Raja
Rupa indah lang-geumilang
Miseue bintang cahya muka

Putroe marit ngon sulotan
Ampon laman po meukuta
Pakon tuanku neuboh lontuan
Salah lon tan bak meukuta

Ulonteu nyoe pruet limong buleuen
Aneuk janjongan nyoe nyang lon ba
Tuanku pateh kheun Putroe lapan
Neuboh lontuan hana keureuna

Seuot Raja neukheun meunoe
Tadeungo kamoe cut Awan Cahya
Bit nyo meunan he nyak Putroe
Ampon kamoe nibak gata

Keureuna seubab Putroe lapan
Dilon pi han jan lon pareksa
Jinoe pocut peurab keunoe
Ampon kamoe barang deesya

Putroe teukhem teusinyom-sinyom
Ngon sulotan meuwayang seunda
Teungoh-teungoh lale meuwayang
Teukeujot sulotan uroe ka faja

'Oh ban jaga bak meulumpoe
Neuteugom jinoe bantai sigra
Neucok bantai neusangka Putroe
Neutajo dudoe bak gulong tika

'Oh ban teuingat puleh le hate
Ka neutren le lam astana
Troh u bale piyoh siat
Hate teuingat keu Putroe Muda

Keureuna seubab Raja syuroilan
Seubab cut Awan jroh that rupa
Hana sidroe na teuladan
Siakan-akan aneuk syeuruga

Adak bit na Putroe lahan
Ngon gaki cut Awan hana ek sa
Hana ngon sa Putroe Awan
Ngon Putroe Kayangan nyang sabe sa

'Oh lheueh nyan Raja neupike keudroe
Neukrah le jinoe rakyat dum na
Geusyk waki uleebalang
Dum sibarang tren bak Raja

Habeh meusapat bandum keunan
U hadapan poteu Raja
Ampon tuanku meuribee ampon
Ho neusuron kamoe dum na

Teuma seuot baginda sulotan
Tadeungo lon kheun dum na gata
Nyang lon pangge gata keunoe
Keureuna kamoe keumeung jak meurusa

Hana neupeugah neujak eu Putroe
Neutakot jitupeue malee Raja
Sulotan Keusumi lheueh nyan beujalan
Rakyat sajan meuribee laksa

Habeh bungka sajan sulotan
Uleebalang bandun raja
Neuteungoh gle neutren paloh
Lam geurugoh cot ngon rata

Uroe malam jak hana teudoh
Hana piyoh sikutika
Watee teuingat keu cut Awan
Baginda sulotan ban ureueng gila

Duek teupako sang ureueng majeunun
Miseue bangon han le bicara
Rakyat kalon bak sulotan
Dum sikeulian sosah raya

Hana sidroe nyang na meukalam
Keureuna sulotan ban ureueng gila
Watee puleh hate sulotan
Lom beujalan dalam rimba

Dum na rakyat that sukaan
Ngon bunyi-bunyian meusuara
Raja-raja uleebalang
Dum sibarang ngon panglima

Ladom rakan seunampang cicem
Aneuk peureuleng jijak mita
Hingga troh bak saboh padang
Piyoh angkatan dalam rimba

Watee piyoh Raja Keusumi
Teuingat keu Putri cut Awan Cahya
Watee beujalan hate seunang
Neutangah gunong rimba raya

Padum lawet Raja lam gunong
Hana meuteumeung cut Awan Cahya
Padum-padum mate rakyat
Raja sisat dalam rimba

Umu sibuleuen Raja lam gunong
Meuteumeung padang luah raya
Di teungoh padang saboh sungoe
Meuturab pudoe batee meutia

Ie didalam that jeureuneh
Rasa mameh miseue nira
Neujeb siteugok rasajih le ban
Nyang dudoe datang leubeh lom rasa

Batee manikam meutia pudoe
Tanoh ngon anoe intan peurmata
Sulotan Keusumi piyoh di sinan
Bineh sungoe nyan pante meutia

Rakyat manoe dalam krueng nyan
Batee intan jicok dum rata
'Oh ka tamat jeuet keu batee
Meunan lagee taeu rupa

'Oh takeubah jeuet keu intan
Hireuen he tuan gadoh bicara
Rakyat piyoh dum di sinan
Sajan sulotan meusuka-suka

Beungoh uroe lom beujalan
Sajan rakan beurangkat Raja
Rot taloe Krueng Raja neujak
Rakyat meusak-sak meuribee laksa

Hingga troh bak pante manikam
Sinan pi lom piyoh Raja
Teutap piyoh bak malam nyan
Teuduek 'oh nan saboh haba

JINOE LON KISAH TUAN PUTROE
Teuduek keudroe sajan poma
Bak simalam Budiman Khandi
Tuhan teukeudi leumah rasia

Na nyum teuka sidroe syiah
Bajee jubah seureuban raya
Syiah marit teuma ngon Putroe
Tadeungo kamoe he aneuk Raja

Wasiet ulon bek taubah
Aneuk meutuah bek talupa
Ayah gata he sambinoe
Ka troh keunoe jak bak gata

Bek tadhoh-dhot bek tageurantang
Wahe bintang tanglong donya
Bek tabri saket hate ayah
Aneuk meutuah bek angkara

Bak meujeulih ngon horeumat
Bek khianat hate gata
Adak neumaba woe nyan u nanggroe
He sambinoe bek tadawa

Meunan leumah bandua Putroe
Seuot meunoe jawueub gata
Insya Allah wahe teungku
Lon pi rindu nyan keu Raja

Lom ka treb cre nyan di nanggroe
Nibak kamoe han paleng muka
Ban nyang wasiet cit lon seuon
Teungku ampon ban kheun gata

'Oh lheueh wasiet beungoh uroe
Teukeujot Putroe uroe ka faja
'Oh ban jaga neuleueng jaroe
Tuan Putroe hate that suka

Teutap sinan tuan Putroe
Neuduek keudroe dalam guha
Sulotan Keusumi teungoh beujalan
Jeueb-jeueb sirokan neujak mita

Uroe malam jak han teudoh
Hingga troh bak sungoe raya
Raja mudék u pucok krueng
Leumah rambong sibak that raya

Baginda neujak leugat keunan
Neukalon padang jroh lagoena
Rambong ramphak cabeueng panyang
Raya bak nyan sibuleuen lingka

Batang rambong manyang tinggi
Cabeueng ube-be raya-raya
Di yub rambong pante zamrot
Di bineh krueng cut indah that rupa

Raja piyoh yub kayee nyan
Rakyat sajan meuribee laksa
Rioh kiam bandum rakyat
Jideungo bak Putroe Muda

Budiman Khandi umu tujuh thon
Goh sulotan keunan teuka
Rupa ilok that sambinoe
Neudeungo bunyoe riyoh subra

Ka neutanyong rijang jinoo
He ma Putroe peue that gabra
Lon deungo suara di yub rambong
Saleh pane ureueng keunan teuka

Teuma seuot Putroe Awan
Bah lon kalon bijeh mata
Cut Awan Cahya jingeuek yub rambong
U bineh krueng neukalon nyata


'Oh deueh neukalon leumah sulotan
Neukalon sajan rakyat meulaksa
Bandum piyoh di yub rambong
Putroe riwang bak aneukeunda

Neupeugah teuma bak Budiman Khandi
Aneuk boh hate ka troh Raja
Ayah gata ka troh keunoe
Rakyat sinaroe sajan sireuta

Pakri bicara he sambinoe
Keureuna geutanyoe treb lam rimba
Teuma seuot Budiman Khandi
He ma siri ayah lon Raja

Hana lon turi han tom lon kalon
Neupeugah bak lon wahe poma
Cut Awan Cahya teuma peugah
Jehkeuh ayah he aneukeunda

Nyang deueh yub payong ateueh keuritan
Alat keurajeuen bak anggeeta
Nibak bajee meuh teuupam
Peudeueng neusandang ulee meuti



Budiman Khandi deungo haba meunan
Neulakee idin nibak poma
Idin lon jak ma bak ayah
Lon tanyong langkah ho keumeung bungka

Peue neumita keunoe lam uteuen
Lon mubri saleuem tanda mulia
Teuma seuot Putroe cut Awan
Wahe intan ban nyang suka

Budiman Khandi deungo haba meunan
Neucok le puan pantah sigra
Neuboh ranub dua batang
Nueboh pineueng na dua tiga

Lam keurandam neuboh gapu
Lam keutumbu gapu laga
Bungong lawang dum jipateng
Jiboh sajan ngon bakong cina

Ranub lam puan peunoh jipasoe
Jitren Putroe jak seumapa
Jisok siluweue kasab meuteupi
Jippingang lagi tulesan dua

Teuma jisawak sarah awan
Jitob ulee ngon meusurudi wangga
Putroe Budiman jisok subang
Euncien meukarang intan peurmata

Soe nyang kalon akai hilang
'Oh tapandang han puweh mata
Ayeuem sanggoi meukeurawang
Anteng-anteng mutiara

Ngon pucok reubong teuma bak jaroe
Deungon patam dhoe indah rupa
Keuruncong meuh teuma bak kaki
Jitren cut khandi bak nyahanda

Habeh jingui minyeuk bee-beewan
Putroe Budiman jak seumapa
Majih Putroe di cong rambong
Hana ureueng kalon rupa

'Oh troh bak bumoe Putroe jidong
Leumah jikalon le rakyat Raja
Raja-raja uleebalang
Dum jipandang bak Putroe Muda

Cut Khandi jak jipoh linggang
Rakyat pandang han puweh mata
Jipoh linggang jitiék lingiék
Sapai jitek ban leuek kua

Bak jilingiék meukilat subang
Bak jilinggang meusimpreue cahya
Meutangkeh gleueng bak jilinggang
Miseue canang meusuara

Raja kalon ureueng binoe
Rupa bagoe uroe keulua
Neukalon puang teuma bak jaroe
Raja muproe ho jihala

'Oh ban geukalon jipeurab keunan
Bak sulotan jijak lanja
'Oh troh bak Raja Budiman Khandi
Jiseumah le bak teuot Raja

Nateuh keunoe tuanku ampon
Jak saweue ulon dalam rimba
Di gunong tinggi keurajeuen Milon
Di teungoh duson keurajeuen Diwa

Kureueng meujeulih kamoe duson
Meu'ah ampon po meukuta
Raja seuot sapa Putroe
Nabu kamoe po jroh rupa

Putroe bri ranub teuma lampuan
Baginda sulotan sambot le sigra
Raja kalon rupa cut Khandi
Bacut na hi cut Awan Cahya

Leubeh ceudah Budiman Khandi
Sigeutu na hi bak iku mata
Putroe marit ngon sulotan
Jibet tangan ateueh jeumala

Jaroe jibet meuek meutren
Jilakee ampon meu'ah deesya
Jipuduek jaroe teuma jibet
Ban leuk meulet jipeutren kua

Dua jaroe putroe jibeuet
Teuma jisujud bak teuot Raja
Ampon tuanku keu lon meuribee
Idin lon lakee bak sri paduka

Patbu gampong siri nanggroe
Tuanku soe geuhei nama
Peue neumita neujak keunoe
Bak teumpat nyoe dalam rimba

Neuboh gampong tinggai teumpat
Peue na hajat dalam rimba
Lon kalon sajan deungon rakyat
Cukop ngon alat dum anika

Seuot Raja neukheun meunoe
Tadeungo kamoe he tanglong donya
Lon nyoe Raja Iram Keusumi
Tuhan teukeudi leupah lam rimba

Lon jak seutot Putroe cut Awan
Leupah ka zameun dalam rimba
Umu lhee thon seutot Putroe
Jeueb-jeueb sungoe meuraba-raba

Hingga troh lon bak teumpat nyoe
Mita Putroe cut Awan Cahya
Meuteumeung gata bak uroe nyoe
Tuah kamoe that bahgia

Di gata nyak peue buet keunoe
He sambinoe soe geuhei nama
Teuma seuot tuan putroe
Neudeungo kamoe po meukuta

Nama ulon Budiman Khandi
Treb dalam gle tujoh thon nyang ka
Di tuanku neujak keunoe
Neuseutot Putroe cut Awan Cahya

Peue seubab gadoh Putroe cut Awan
Pakon janjongan leupah lam rimba
Teuma seuot baginda sulotan
Tadeungo lon kheun he Putroe Muda

Nyang jeuet leupah Putroe Awan
Putroe lapan boh rancana
Keunong tipee lon jitaki
Lon boh u gle Putroe Muda

Tujoh thon ka treb lon boh Putroe
Leumah lumpoe ubak hamba
Nyankeuh seubab lon seutot keunoe
Bak nyum kamoe sang mantong na

Digata nyak peue buet lam uteuen
Soe he buleuen ayah ngon bunda
Soe nan ibu deungon ayah
Peue dairah nanggroe gata

Seuot Putroe tuanku ampon
Neudeungo lon na saboh haba
Na saboh nanggroe IRAM KEUSUMI
Hana sakri rame banda

Peurumoh Raja sikureueng droe
Dum sambinoe indah rupa
Putroe nyang cut leubeh indah
Keunan dahayah hate Raja

Putroe lapan hate deungki
Keu Putroe Ti nyang jroh rupa
Jimita ulah geunab uroe
'Oh hame Putroe jitaki Raja

Jikhianat le Putroe lapan
Jiyue sulotan jak meurusa
Jikheun hawa keu rusa uteuen
Raja jipadan le Putroe nyan

Raja pi teuma neujak rijang
Neupateh ban Putroe meuhaba
Hana pike meung sikeujab
Neupangge rakyat meuntroe panglima

Raja yue ba tumbak ngon leumbeng
Teuma ngon areng bak pawang rusa
Bak troh rijang singoh uroe
Ulon jinoe keumeung jak lam rimba

Sare beungoh teuka uroe
Rakyat meukatoe beurangkat Raja
Putroe pi hame dua buleuen
Leupah sulotan jak meurusa

Umu sibuleuen Raja lam uteuen
'Oh lheueh nyan neuwoe teuma lam kuta
'Oh ban sare troh Raja u dalam
Putroe lapan teuma teuka

Jikheun bak Raja keu Putroe tulet
Ka raya pruet jimeuzina
Raja pateh kheun Putroe lapan
Neuboh Putroe nyan dalam rimba

Putroe neukeubah di yub kayee
Tumpang ulee ro ie mata
Raja teutap lam meuligoe
Putroe Ti sidroe dalam rimba

Jipeujok droe teuma bak Allah
Putroe cidah umu that muda
Dua blah thon umu Putroe
Jiboh le lakoe dalam rimba

Limong buleuen dalam uteuen
Makeuen minom meujan-jan na
Theun seungsara dalam uteuen
Teuma meuteumeung ngon eelia

Neubri saboh euncien malakat
Hase ngon siat peue nyang suka
Teuma Putroe jak lam uteuen
Troh u pucok krueng pante meutia

Sinan neupiyoh Putroe meugleueng
Yub bak rambong meuseuninya
Di yub rambong batee palinggam
Piyoh Putroe nyan miseue lam guha

Teutap sinan tuan Putroe
Teuma dudoe budak nyata
Aneuk inong rupa samlakoe
Miseue uroe cahya muka

Tujoh thon umu aneuk Raja nyan
Teukeudi Tuhan troh ayahanda
Putroe Budiman 'oh lheueh neukheun nyan
Baginda sulotan ro ie mata

Teuma teupike lam hate sulotan
Ulon salahan bak Putroe Muda
Bit nyo patut lon jitommah
Keureuna piteunah bak Putroe tuha

Meunan meulintah bak hate sulotan
Nyo ban jikheun nyan le aneukeunda
Habeh narit di sulotan
Leumah pikeran ke buet nyang ka

Sayangneuh that keu Putroe Awan
Dalam uteuen kueur ngon mata
Seubab paleh Putroe lahan
Khianat han ban deungki raya

Habeh marit ampon deelat
Teupike siat dalam dada
Neuteukui ulee ie mata ro
Ne ucap syuko keu Tuhan nyang Asa

Ya Tuhanku lon ya Rabbi
Soe nyang deungki muwoe keu droe
Soe nyang kueh mon di rot raya
Akhe masa sretjih keudroe

Meunan janji nibak Tuhan
Tren peureuman jebrai ba
Di poteu Raja neuturi aneuk droe
Neucom bak dhoe ngon bak dada

Bak meutuah po sambinoe
Ka turi kamoe bijeh mata
Hoka poma he sambinoe
Peugah bak kamoe bijeh mata

'Oh lheueh nyan Raja reubah pangsang
Sireuta sajan ngon aneukeunda
Dum na rakyat hana kalam
Jikalon pangsang Putroe ngon Raja

Cut Awan Cahya ngiang u bumoe
Neukalon Putroe lam pangkee Raja
Neucok ie mawo saboh ceurahi
Leugat Putroe Ti tren le sigra

Neungui alat gleueng ngon subang
Ija di badan han teukira
Cut Awan ka troh bak sulotan
Rakyat sikeulian keunan mata

Cut Awan Cahyan cok ie mawo
Leugat neusibu ateueh Raja
Puleh le yoh nyan bandua droe
Raja kalon droe pangsang raya

'Oh ban leumah Putroe Awan
Marit sulotan meunoe haba
Wahe Putroe cut nyak Awan
Ampon laman po jroh rupa

Udeh pocut woe u nanggroe
Bek le sinoe dalam rimba
Teuma seuot Putroe Awan
Ampon laman po meukuta

Keureuna ulon ureueng hinaan
Bahle janjongan sinoe lam rimba
Ulon hina rupa keuji
Meutamah lagi sang beulaga

Teuka beunci bak asoe nanggroe
Bahle sinoe dalam rimba
Bek keuji nama tuanku ampon
Ngon seubab lon rupa sang singa

Rupa pi brok lom meuzina
Ampon meukuta bahle sinoe
Ampon tuanku di bawah doli
Han lon woe le bek neumaba

Seuot Raja neukheun meunoe
Tadeungo kamoe po jroh rupa
Bek meunan takheun he sambinoe
Keureuna kamoe salah bak gata

Bak uroe nyoe lon lakee ampon
Keusalahan lon nibak gata
Jinoe pocut wajebe tawoe
Gaseh keu kamoe Putroe jroh rupa

Meung han tawoe gata sajan
Dilon intan han le lon gisa
Bahle mate lon disinoe
Bak teumpat nyoe dalam rimba

Teuma seuot Putroe intan
Bek neukheun meunan po meukuta
Adak beurangkeu lon han lon woe
Idin jinoe laman sroepada

Nyan leupeue aneuk neujak puwoe
Dilon jinoe sinoe lon tapa
Keupeue guna lon seutia kureueng
Lom ngon tungan budi bicara

Harap binasa janji ubah
Lom meutamah tan budi basa
Bak rayek idin tuanku ampon
Akan ulon hamba sahya

Sikali-kali hana le lon woe
Bak uroe nyoe habeh seutia
Neuseuot lom uleh sulotan
He Putroe Awan taampon deesya

Ampon he cut nyak barang nyang salah
Lon ka leupah buet teulanca
Bek tahaloh he Putroe intan
Lon salahan nibak gata

Beukit tabeungeh he Putroe intan
Lon minah han lon cre ngon gata
Hana peue syok le lam hate
Ulon ka mate meuhan tagisa

He Putroe cut badan seudang
Udeh tariwang deungon kakeunda
Bek le meudawa cut puteh di
Neubeudoh beudiri cok aneukeunda

He meuh mirah wareuna keumbang
Beudoh rijang mangat tabungka
Teuma seuot tuan Putroe
Ampon kamoe bek teumeureuka

Ampon tuanku ka habeh kalam
Putroe Awan bahle lam rimba
Ka habeh wajah tuanku ampon
Masa Putroe tren lam astana

Yoh masa Putroe tren bak rinyeun
Hana dua seun lon pandang donya
Uroe nyoe donya singoh akhirat
Ampon deelat bek le na cinta

Kheundak Tuhan Malikorrahman
Putroe Awan bahle lam rimba
Buet nyang ka lheueh bek le neuingat
Wahe halarat meukuta donya

Ka tujoh thon Putroe lam rimba
Hana le donya wahe meukuta
Ngon keuramat Eelia Allah
Teungku Syiah Haile lam rimba

Habek amanah neupeugah bak Putroe
Meukuta nanggroë bahle neugisa
Bahle di sinöe tuan Putroe
Ngon aneuk droë keumala donya

Han le lon minah teungku ampon
Bahle yub rambong du'a meukuta
Ka meunan janji lon nibak Allah
'Oh noe langkah mumeunan kada

Langkah rezeuki ngon peuteumuan
Wahe sulotan bak Tuhan nyang Asa
Pakri tapaban tuanku ampon
Ka Kheundak Tuhan keu Putroe Muda

Teungoh neumarit Putroe cut Awan
Ngon sulotan di teungoh rimba
Budiman Khandi deungo haba cut Putroe
Neubeudoh le jinöe seumbah cut bunda

Ampon he ma deesya ayah
Barang nyang salah ampon he bunda
Jinöe nyang got poma neuwoë
Neuintat kamöë jak kalon desa

Keureuna lon na lam uteuen
Han tom lon kalon nanggroë Raja
Meung na gaseh ma keu kamöë
Neuwoë jinöe sajan ayahanda

Keureuna ulon na lam uteuen
Hantom lon kalon nanggroé ayahanda
Hana lon turi adat nanggroé
Keureuna kamoe na lam rimba

Meunyo he ma neugaseh keu kamoe
Got neujak woe sajan ayahanda
Meung han neugaseh ma keu kamoe
Bahle bek neuwoe sajan ayahanda

Meunyo bit he ma hana neuwoe
Dilon pi sinoe dalam rimba
Deumi Allah han le lon riwang
Meung hana sajan ma ngon gata

Cut Awan deungo haba aneuk droe
Neumarit le jinoo ngon aneukeunda
Meunyo meunan he aneuk droe
Bahle lon woe sajan gata

Teutapi aneuk bak habeh syarat
Ngon doli halarat ayahanda gata
Lon takot teuka teuma dudoe
Bak lapan Putroe neupateh le Raja

Wahe aneuk Budiman Khandi
Bak habeh pike seumangat rimba
Bak habeh pakat deungon janji
Bek jeuet keuji nama agama

Seubab ka lheueh lon peurasa
He bijeh mata tanglong donya
Wahe aneuk wareuna geumilang
Lon peutimang gata lam rimba

Lahe gata aneuk yub rambong
Sinan lon ayon doda-idi
Sinankeuh aneuk gata ro abee
Di yub kayee tunyok Eelia

Allah he aneuk han jeuet lon ingat
Tuhan halarat nyang bri keu gata
Allah he aneuk nyak cut Khande
Reuloh hate'oh ka lon rika

'Oh ka lon ingat nyum reuloh gle
Meunankeuh tamse keu buet nyang ka
Teungoh marit cut Awan Cahya
Ro ie mata hana tara

Miseue meutia putoh karang
Miseue intan sret bak jaroe
Meunankeuh nyum he Putroe cantek
Bundateuh asyek aneuk keu gata

Nyankeuh seubab lon peuingat
Lon amanat aneuk bek lupa
Teungoh neumarit Putroe Awan
Teuingat keu Tuhan Rabbolgafa

Teuingat keu Putroe leumah lam syawe
Aneuk boh hate cit sidroe saja
Rupa ilok peurangui pi jroh
Aneukku saboh han kubri bak Raja

Tamse bungong teungoh keumang
Aneuk jeunulang bek cre ngon bunda
Gotkeuh bahle kujak sajan
He aneuk intan ban kheun gata

Tajakkeuh aneuk peurmata nilam
Ubak sulotan tapeugah haba
Tapeugah aneuk bundateuh woe
Lon seutot cut Putroe tangke hate ma

Wahe aneuk Putroe meutuah
Ho nyang talangkah bundateuh sama
Jakalee habeh nyawong lam badan
Bundateuh han peulheueh aneukeunda

Pakri nyang napsu he intan pudoe
Bak sajan kamoe miseue lam rimba
Seubab payah bunda peulara
Lon useuha lam rimba raya

Nyang na tuban Allah ngon Nabi
Di bawah gaki Haile lam rimba
Laen nibak nyan Eelia Allah
Teungku Syiah he aneuk Raja

Nyankeuh he intan hana lon pike
Adak malee pi lon saba
Tamse haba ureueng Meulayu
He aneuk teungku tapateh' bunda

Seubab lon gaseh tatueng malu
Seubab napsu teubuang iman
Jinoe pi aneuk han le lon pike
He Putroe Khandi beudoh udehta

Beudoh rijang he buleuen trang
Jeh sulotan neupreh gata
Bek le gundah aneuk sambinoe
Beudoh jinoe mangat tagisa

Putroe cut Khandi beudoh rijang
Gleueng ngon subang jime jimeusuara
Sigala peukayan jimeulakee
Bak Tuhan nyang mee jimupinta

Bak seulamat Putroe ngon Raja
Bak troh u tangga lam meuligoe
Meunan jikheun dum peukayan
Grak bak Tuhan Rabbol'ala

Keureuna peukayan bak Nabi Haile
Keu cut Khandi jilakee do'a
Jimeuinseuen ubak Tuhan
Beutroh cut Awan woe u nanggroe

Sigala binatang nyang lam rimba
Jilakee do'a bandum keu Putroe
Sigala cicem nyang teureubang
Jih pi meunan jilakee do'a

Seubab ka treb neuduek lam uteuen
Sigala binatang jikheun syeedara
Jimeuucap syuko keu Tuhan Kade
Bak ek sampe hajat Putroe

Raja deungo kheun cut Awan
Neubeudoh le yoh nyan bak Putroe Muda
Raja neumat Putroe bak jaroe
Udeh adoe jinoe tabungka

Taek Putroe ateueh gajah
Rijang pantah he adekeunda
Teuma beudoh neujak rijang
Putroe Awan ngon aneukeunda

Neuek cong'gajah bandua Putroe
Sulotan keudroe ngon lasyeuka
Bandua Putroe ke ateueh gajah
Han le sosah hate Raja

Bandum rakyat hate sukaan
Putroe cut Awan meuteumeung ngon Raja
Sulotan Keusumi woe u nanggroe
Rakyat meukatoe sajan sireuta

Neuteungoh gle neutren paloh
Taeu neubloh dalam rimba
Uroe malam jak hana piyoh
Hingga troh u padang raya

Na sikeujab piyoh sinan
Baginda padan tamong lam kuta
Budiman Khandi marit ngon ayah
Ampon di bawah doli meukuta

Tuanku tamong dilee u dalam
'Oh troh syaratan kamoe pi sama
Meung nyo tuanku hana troh syarat
Hana meuhat lon tamong lam kuta

'Oh ban Raja deungo narit Putroe
Leugat le neuwoe dalam kuta
Tinggai di mideuen Budiman Khandi
Dua ngon Putri cut Awan Cahya

Teuma meusabda doli halarat
Neuyue teubiet uleebalang dum na
Neuyue teuma ngon bungong jaroe
Dum sinaroe tuha muda

Neuyue teubiet Putroe lapan
Jak tueng cut Awan di mideuen Raja
Ngon haluan jiba sajan
Tanda meujeulisan Putroe Cahya

Neuyue meuntroe ngon peudana
Geujak lanja bak Putroe di lua
Geuyue dendayang dum sinaroe
Ban adat Putroe bak na jiba

Di peurumoh uleebalang
Nyang didalam geuyue keulua
'Oh lheueh Raja neumeusabda
Rakyat teuka agam dara

'Oh meuhimpon dum ka keunan
Kheun sulotan jak seumapa
Raja pangge ngon haria
Geupasoe lila meuriam raya

Ban sigo lingka kuta dalam
Geutet meuriam tujoh go lingka
Geutet meuriam meung siploh ribee
Mangat jithee woe Putroe Muda

Teuma haria jitet meuriam
Suara geumeuntam ban saboh donya
Jitet sabe hana jipiyoh
Haria boh pasoe lanja

Teuma neukheun uleh sulotan
Ka haselan bakai taba
Kana bandum bungong jaroe
Meujeulih nanggroe reusam donya

Teuma jiseuot dum sikeulian
Ampon laman bandum ka na
Jakalee meunan beudoh rijang
Jinoe sikarang jak seumapa

'Oh lheueh tasapa teuma dudoe
Tapuwoe Putroe ngon aneukeunda
Tapeuek leugat u meuligoe
Bandum Putroe uleh gata

Teuma jibeudoh inong ngon agam
Jak sapa cut Awan Putroe Muda
Uleebalang teubiet u mideuen
Bak Putroe buleuen di teungoh data

Cut Khandi tanyong bak cut Awan
He ma badan lon pareksa
Soe jeh he ma teubiet u mideuen
Lon eu sajan teubee u muda

Teuma seuot Putroe Awan
Tadeungo lon kheun he bijeh mata
Nyankeuh aneuk Putroe lapan
Suroh janjongan neuyue tueng gata

Budiman Khandi deungo haba meunan
That sukaan hana tara
Jithee mulia bak Putroe lapan
Jipateh ban kheun Putroe Muda

Sajan rakyat ngon uleebalang
Dum sikeulian tuha ngon muda
Putroe lapan ka troh u mideuen
Bak Putroe buleuen cut Awan Cahya

Putroe lapan jilakee ampon
Bak Putroe tanglong cut Awan Cahya
Jilakee ampon barang nyang salah
Jilakee meu'ah barang deesya

Mumeunan jikheun le Putroe lapan
Bak Putroe Awan jimohon deesya
Dua lhee seun jilakee ampon
Le Putroe lapan bak Putroe Muda

Putroe cut Awan teuka inseueh
Ka teuka weueh didalam dada
Teuma neumarit Putroe cut Awan
Ngon cutda lapan jinoe teuma

Ulonteu nyoe hamba Tuhan
Lon pi saban miseue gata
Ka teuseubot dalam Kuruan
Bek tameudam-dam ngon syeedara

Sikarang jinoe talakee meu'ah
Ensya Allah wahe cutda
Ampon bak Allah deungon Nabi
Bak kamoe han le Putroe meudeesya

Teuma bak Putroe Budiman Khandi
'Oh lheueh nyan jibri teubee u muda
'Oh lheueh nyan teuma jilakee langkah
Bak Putroe cidah Awan Cahya

Teuma seuot Putroe Awan
Cit lon jak sajan deungon gata
'Oh lheueh nyan leugat tamong u dalam
Neuek le yoh nyan lam astana'

'Oh troh u meuligoe Putroe Budiman
Teuduek sajan deungon poma
Budiman Khandi that sukaan
Uroe malam sajan bunda

Teutap Raja lam meuligoe
Teutap Putroe lam astana
Padum lawet dudoe nibak nyan
Meusyeuhu jeueb-jeueb banda

Jitren rakyat jeueb-jeueb nanggro
Bungong jaroe sajan jiba
Ladom me samah ladom sikatoe
Ladom pasoe hidang raya

Jak meuteumeung teuma ngon Putroe
Asoe nanggro dum cut raya
Umu lhee buleuen Putroe didalam
Meusyeuhuran jeueb-jeueb Raja

Meugah jroh that Putroe sambinoe
Beurangri nanggro ureueng teuka
Adak teusinyom tuan Putroe
Peunoh meuligoe jiplueng cahya

Soe nyang kalon mata lazat
Pangsan rakyat jieu rupa
Ban bintang timu meuacak-acak
Beurangsoe galak hate lam dada

Teuma meugah u nanggro jioh
Jitren peunoh aneuk raja
Jiba ngon rakyat meuribee katoe
Jijak bak Putroe aneuk Raja

'Oh troh bak Raja jilakee meukawen
Ngon Putroe canden nyang jroh rupa
Sireutoh raja ka troh keunan
Dum sikeulian ngon balatandra

Bandum raja nyan keumeung meukawen
Ngon Putroe canden aneuk Raja
Jibri le narit bak Sulotan
Jikeumeung meukawen meunan haba

Meung han tabri meuh at jiprang
Aneuk sulotan sireutoh raja
Sulotan Keusumi sosah han bagoe
Seubab Putroe reuloh donya

Teuma neupangge ngon uleebalang
Dum sikeulian tuha muda
'Oh ban sare troh dum u dalam
Jideelat yoh nyan ubak Raja

Ampon tuanku meuribee ampon
Ho neusuron kamoe dum na
Trenkeuh sabda teuma di manyang
Tadeungo lon kheun dum na gata

Keureuna ulon hate sosah
Pakri ilah ngon bicara
Peue jeut sosah tuanku ampon
Neupeugah bak lon po meukuta

Nyang jeuet sosah ulon teupike
Aneuk boh hate gob meuhawa
Sireutoh raja teuka keunoe
Ubak kamoe jibri haba

Jikeumeung meukawen ngon Budiman Khandi
Pakri na pike ubak gata
Meung han tabri meuh at jiprang
Pakri reumbang taboh bicara

Teuma seuot dum uleebalang
Meunoe jikheun ubak Raja
Tuanku meutanggoh umu lhee thon
Dang-dang janjongan peugot astana

Tuanku peugot di teungoh padang
Soe nyang meunang nyan eumpunya
Keumah pakat dum sikeulian
Baginda sulotan hate suka

'Oh lheueh nyan Raja jak meutanggoh
Bak raja sireutoh neubri haba
'Oh ban sare troh keunan bujang
U hadapan raja dum na

Ampon tuanku syahi 'alam
Seumbah laman pacai nyang hina
Sabda Raja nyang didalam
Neuyue bri pham bak laman sroepada

Neulakee tanggoh umu teulhee thon
Dang-dang janjongan peugot astana
Neupeugot astana di teungoh padang
Sinan neupeudong teuma ngon kuta

Soe nyang meunang prang nyan po Putroe
Meunan bak kamoe neuyue bri haba
Umu teulhee thon bak tren keunoe
Meuseunoh Putroe di padang sempeuna

Gata sireutoh tapreh di mideuen
Meungadu saktian sabe raja
Soe nyang meunang neubri Putroe
Meunan jinoe neuyue peuhaba

Meung kon meunoe Raja peulaku
Laen tuanku hana bicara
Sireutoh tuanku Putroe sidroe
Sosah han baroe poteu Raja

Raja sireutoh deungo haba meunan
Wajeb kalam lon ngon raja
'Oh kong janji ngon sulotan
Leugat jiriwang aneuk raja

Maseng-maseng woe u nanggroe
Bak teumpat droe dilee nyang ka
Teutap raja bandum di nanggroe
Teuka lom dudoe LILA PEUKASA

Nyankeuh Raja nyang raya sakti
MAMBANG SARI nama ayahanda
Mambang Sakti Zanggi Meureudan
Raja saktian hana tara

Leubeh nibak Sulotan Peutawi
mambang Sari Pari Sikanda
Sikureueng laksa taklok sulotan
Zanggi pahlawan meuribee laksa

Nyankeuh Raja sakti teubileueng
Beurangri ureueng han sabe padra
Lila Peukasa aneuk Raja nyan
Ka troh keunan nanggroe Raja

'Oh ban sare troh nyan u mideuen
Jibri le ureueng teuma bak Raja
Bujang jak le leugat u dalam
Bak sulotan dalam kuta

'Oh sare troh nyan u dalam
Meuteumeung le yoh nyan poteu Raja
Raja marit teuma ngon bujang
Pane datang keunoe gata

Peue na hajat tajak keunoe
Takheun jinoe lon deungo nyata
Teuma seuot tuan bujang
Meunoe jikheun ubak Raja

Ampon tuanku meuribee ampon
Neudeungo ulon po meukuta
Lila Peukasa nyang di padang
Ubak janjongan neuyue bri haba

Neukeumeung meukawen ngon tuan Putroe
Pakri jinoe po meukuta
Teuma seuot baginda sulotan
Tadeungo lon kheun he syeedara

Keureuna Putroe nyan cit sidroe
Pakri jinoe lon tueng Raja
Sireutoh raja teuka keunoe
Ubak kamoe meunan cit pinta

Lon meutanggoh umu lhee thon
Meunan teukheun bak aneuk Raja
Dang-dang ulon peugot meuligoe
Teumpat Putroe di padang sempeuna

'Oh ban jideungo haba meunan
Leugat jiriwang ubak Raja
Troh bak Raja teuma jipeugah
Habej jikisah dum peukara

Lila Peukasa that sukaan
Seubab sulotan meunan haba
Lila Peukasa woe le leugat
Sajan rakyat ngon balatandra

'Oh sare troh nyan u nanggroe
Laen jinoe lon calitra
Sulotan Keusumi neukrah rakyat
Habej meusapat uleebalang dum na

'Oh ban sare troh dum u dalam
Jibet tangan ateueh jeumala
Ampon tuanku meuribee ampon
Tadeungo lon po meukuta

Pakon tuanku neupangge kamoe
Neukheun jinoe peue na sabda
Trenkeuh sabda teuma di manyang
Tadeungo lon kheun dum na gata

Nyang jeuet lon pangge gata sinaroe
Tapeugot keu kamoe saboh astana
Deungon kuta ban tujuh lapeh
Dum beuhabeh tuha muda

Habeh teuka keunan tukang
Dum sibarang tuha muda
Neuyue peugot saboh meuligoe
Teupat Putroe padang sempeuna

Tukang pi troh bandum keunan
Jipeugot le yoh nyan peukakah dum na
Phon jipeugot kuta beusoe
Ban peuet sagoe silari kuta

Lapeh nyang dua kuta pirak
That meusigak di mideuen Raja
Lapeh nyang keulhee batee rukham
Puseupa ragam ceureumen Cina

Lapeh nyang keupeuet geuboh suasa
Hu meucahya hana tara
Geutatah di ateueh cawareudi
Got han sakri geupheuet bunga

Lapeh nyang limong meuh geuturab
Bukon 'ajab takalon rupa
Geupheuet bungong geulima awan
Meugisa ban peuet sagoe kuta

Lapeh nyang keunan Batee pualam
Hireuen he tuan takalon nyata
Geutatah di ateueh ban peuet sagoe
Intan sinaroe muperemata

Lapeh nyang tujuh kaca ceureumen
Mangat jimeuen ureueng lam kuta
'Oh jimeungui sidadu gunangan
Leumah di sinan didalam kaca

Cicem di awan nyang po keunan
Jisangka kawan jipeutoe sigra
Han jeuet tangieng meunyo tapandang
Silala tuan saket mata

Pacangjih teuma wahe tuan
Meulila seulatan geuboh keu junga
Ban peuet sagoe cit mumeunan
Adak taprang hana kuasa

Lapeh teungoh geuhato meuriam
Di ateueh nyan sinampang lingka
Lapeh ateueh keumurah Bali
Ngon kamarati tumbak sinyata

Hase sinyata sigala bagoe
Sinampang he adoe meujeuneh rupa
Ka habeh cukop kuta ngon pacang
Ubak sulotan jijak peuhaba

Tukang peuseumah deelat ampon
Singoh lon peudong meuligoe astana
Teuma beungoh le ngon uroe
Tukang sinaroe peudong astana

Jipeudong taméh peuet ribee nam reutoh
Manyang that jioh lam awan miga
Binteh astana ngon meuligoe
Keurawang pudoe ngon meutia

Geujampu ngon intan meukarang
Geupateng ban bintang lam awan miga
Di ateueh pinto meuh teuupam
Geusaleuek gambaran sireutoh raja

Ban peuet lapeh bek ubahan
Sabda sulotan bak saban rupa
Lom astana that mubalak
Geuboh pucak pi meujeuntra

'Oh jipot angen meugisa pocut
Taeu blet-blot jiplueng cahya
Geulhak bungong kalimah meuawan
Didalam nyan intan peurmata

Di ateueh nyan geuboh beurlian
Asai intan nanggroé lerupa
Di ateueh tingkap geuboh ceureumen
Bak tulak angen ie peureuda

Geuboh bungong pirak seuntagi
Jroh meuriti hana tara
'Oh tangieng jioh sang buleuen trang
'Oh tapandang seumilu mata

Geuboh keu tampong suasa mirah
Meujeureulah cahya lam hawa
Keu pha rinyeun batee hitam
Geujampu tutam sukadana

Bak ulee rinyeun meuculek sipot
Leuk jimeulot deungon cempala
'Oh ka leungkap astana meuligoe
Geucat he adoe le ban wareuna

Di leuen meuligoe bale geupeudong
Teupat singgahan aneuk raja
Di bale nyan 'akek nyang hijo
That meulo-lo jroh wareuna

Geucat keu kindang di bale nyan
Ie meuh ruang geume di Cina
Habeu ka leungkap astana ngon bale
That meudeune sigak rupa

Lingka astana geupula bungong
Meuribee bangon le wareuna
Ladom geupula bungong puteh
Si beuladeh bungong jeumpa

Si u baroh jeupa keubiru
Si u timu meulu Cina
Bak batah tingkap bungong peukan
Teupnat meudendang Putroe ngon Raja

Laen nibak nyan sigala bungong
Peue nyang keunong geupula teuma
Bungong maliri deungo sitawon
Jroh meususon banja geupula

Di geunireng nyan geupeugot kulam
Teupnat meusiram Putroe ngon Raja
Di kulam nyan meuteureutak
Jroh meusigak bak duek Putroe

Bak peuduek beudak deungon sabon
Jroh meuturon hana tara
Ie didalam puteh hijo
'Oh keumeung tho teubiet mata

Ie mata ie di buket Zamrot
Di sinan he pocut geupeutren le Raja
Adak tateumeung manoe meung siblet
Siploh thon adek badan meucahya

Habeh cukop dum sikeulian
Tujoh buleuen habeh leungka
Ka musta'id dum sikeulian
Soe nyang kalon hate suka

Teuma Putroe geuba keunan
Ngon dendayang sajan sireuta
Tujoh droe dendayang sajan Putroe
Laen bagoe hana tara

Geume deungon alat meuligoe
Leulanget meusujoe ngon tire Beureuma
Ban sigo lingka tire geusujoe
Geupateng he po intan peurmata

Tire linteueng pi mumeunan
Sirusok ban meulaen rupa
Sirusok meuh geutatah intan
Sirusok tuan geuboh suasa

Bantai suson geuturab intan
Geuboh sajan meuh geuteumpa
Geukarang bungong deungon kalimah
Allah-Allah 'ajib rupa

Hireuen takalon bantai meususun
pudi ngon pualam geunantoe ija
Laen teuma kaso keuleumbu
Jroh meulaku kasab ija

Nama ija geureusang kasumi
Bungong nari dalam ija
Anteng-anteng geuboh beurlian
Geujampu sajan sukadana

Tika bantai pi mumeunan
Meuteurapan bak bineh tika
Dalam teurapan mata intan
Geujampu ngon pualam meutia

Lom nibak nyan cawan pingan
Teumpat minoman meuh suasa
Bandum cukop alat meuligoe
Keureuna Putroe aneuk Raja

Hana sapeue nyang na kureueng
Han soe linteueng dalam donya
Teuma laen neungui Putroe
Saboh peutoe geume ija

Ganceng gadeng euntuek subang
Gleueng bak tangan ceuraphi bak dada
Simplah sawek ikai patam dhoe
Taloe jaroe bungong jeumpa

Pucok reubong keutab puntu
Ceukam sanggoi ulee ceumara
Jinoe geuba bandum peukayan
Saboh keulandan neuyue me le Raja

Sireuta ngon ringget sireutoh ribee
Ngon bloe boh kayee ngon bungong jeumpa
Tujoh panglima kawai kuta nyan
Rakyat sajan meuribee laksa

Maseng-maseng ban nyang babat
Bandum rakyat geubri jeumba
'Oh troh tanggoh ngon raja datang
Teuka keunan dum cut raya

Maseng-maseng ban nyang babat
Meunankeuh rakyat raja jiteuka
Geupeudong jaga hekmat saktian
Bak piyoh angkatan kawai astana

Dalam kuta neuduek Putroe
Rakyat sinaroe keumiet di lua
Raja yue kawai di teungoh padang
Neutakot soe datang dalam kuta

Dendayang tujuh sajan Putroe
Dum sinaroe indah rupa
Sikureueng ploh teuma nyang gunangan
Di baroh nyan lapeh nyang dua

Sulotan Keusumi teutap di nanggroe
Geuba Putroe u mideuen sempeuna
Raja neuyue preh aneuk sulotan
Piyoh di mideuen ngon balatandra

Teutap sinan Budiman Khandi
Neumupike ngon dendayang nyang na
Peu na pike he dendayang
Taduek di padang lam astana

Hukon Raja geuyue preh datang
Aneuk sulotan sireutoh sa
Ka padum treb geutanyoe di padang
Meung sidroe pi tan na troh teuka

Adak na teuka meung sidroe banta
Jeuet tameuhaba wayang ngon seunda
Dilon dendayang han ek kuduek
Miseue takhaluet lam gunong raya

Tinggai gata wahe dendayang
Dilon kuriwang keudeh bak bunda
Seuot dendayang pocut Putroe
Meunyo neuwoe beungeh Raja

Meuhat mate kamoe bandum
Singoh geugantung geupupahna
Pakri meunan takheun he dendayang
Dilon sosahan hate lam dada

Meunoe he pocut nyang gadoh sosah
Bahle lon peugah tatem suka
Cuba peugah he dendayang
Meunyo hilang sosah lam dada

Taikat ayon yub meuligoe
Tameuen geutanyoe doda idi
Adak na lom biduan nari
Hana sakri he pocut droe

Dilon suka meunyo meunan
Jeh sinyak Dam tapeunari
Keumah pakat dendayang ngon Putroe
Jiikat jinoe ayon sigra

Teuma Putroe jijak meayon
Meuhimpon dendayang dum na
Teuma Putroe lale sinan
Ngon dendayang meuayon doda


Geunap uroe Putroe juhari
Meuayon nari yub astana
Hate sosah hanle datang
Putroe seudang aneuk miet muda

Meunyo hana wayang ngon seunda
Aneuk miet muda sosah han bagoe
Uroe malam sinan teutap
Dendayang ngadap hana sakri

Bahle dumnann haba nyan siat
Laen he sabat tacalitra
A L K I S A H wahe rakan
Laen karangan lon calitra

Jinoe lon kisah HUKMAN 'ALAM
Aneuk sulotan di buket Miga
Teungoh neutapa di Pawoh Zanggi
Nibak Pari Peuraba Lila

Nibak Zanggi Peureudan Juhan
Nyang le saktian di ateueh donya
Bak siuroe Hukman 'Alam
Neulakee idin bak gureenya



Idin teungku lon keumbali
Kheundak peureugi ubak ayahanda
Teuma seuot Zanggi Peureudan
Idin lontuan aneuk tagisa

'Oh lheueh idin Hukman 'Alam
Teungku Syiah pulang unggah peusaka
Unggah hekeumat sakti senalen
Peusaka bak en Indra Peuraba

'Oh lheueh nyan neubri keu Hukman
Neusambot le rijang pantah sigra
Hukman 'Alam neulakee droe
Neukeumeung woe u Buket Miga

Zanggi pulang dum sibarang
Eeleumee saktian beukailan Raja
Hukman 'Alam yoh nyan beurangkat
Deungon sabat sajan sireuta

Dua rakan neuba sajan
That pahlawan sakti raya
Neuteupok pha teubiet asap
Keulua 'ijab dua panglima

Hukman 'Alam neujak sidroe
Neutakat nanggroe Buket Miga
Tujoh uroe peujalanan
Troh le keunan u gunong Indra

Sinan neupiyoh ateueh gunong
Uroe pi malam teuka sinja
Hukman 'Alam piyoh di sinan
Euncien bak rangan neutiek u donya

Teuma jeuet bale ateueh gunong
Meutatah intan ngon peurmata
Na sikeujab piyoh sinan
Teungeuet Hukman pangsang raya

Hukman 'Alam yoh nyan pangsang
Teukeudi Tuhan leumah rahsia
Na nyum teuka ureueng binoe
Rupa bagoe bintang hawa

Jimubri saleuem ngon sulotan
Teusinyom Hukman teutawa-tawa
Hukman marit teuma ngon Putroe
Keunoe he adoe sajan hamba

Putroe peurab u hadapan
Ngon Hukman lom beukata
Sireuta neumat meucom bak dhoe
Neumarit jinoe miseue lam jaga

Wahe adoe cut bungong keumang
Gaseh sayang he adekeunda
Patbu gampong putroe sambinoe
Peugah bak kamoe nanggroe adekeunda

Soebu nama he sambinoe
Peugah bak kamoe putroe jroh rupa
Tatem meukawen adoe ngon kamoe
Peugah sambinoe lon deungo nyata

Teuma seuot tuan putroe
Dalam lumpoe meuteumeung mata
Ampon tuanku laman meukatoe
Neudeungo kamoe po meukuta

Nama ulon Budiman Khandi
Iram Keusumi teumpat ayahanda
Jinoe lon piyoh di teungoh padang
Tujoh dendayang sajan sireuta

Teuma seuot Hukman 'Alam
Jinoe he intan pakri bicara
Wajib janji gata ngon kamoe
Wahe putroe tanglong donya

Teuma seuot Budiman Khandi
Tadeungo lon kheun kri ubak gata
Keureuna ulon ka na tunangan
Sireutoh sulotan sakti raya

Janji ngon ayah di teungoh mideuen
Geuadu saktian di teungoh banda
Soe nyang meunang bak adu sakti
Nyan suami laman sroepada

Teuma seuot Hukman 'Alam
Bek gundahan he adekeunda
Raja sireutoh ulon lawan
Di teungoh midan lawan lon gaza

Gata he nyak bak jeuet meukawen
Deungon ulon po jroh rupa
Teuma seuot tuan putroe
Nibak kamoe ban kheun kakeunda

Hana lon dawa ban neupeugah
Ampon di bawah doli meukuta
'Oh lheueh janji Hukman 'Alam
Neumat bak tangan putroe muda

Meuseunda-seunda dalam lumpoe
Beungoh uroe teubiet faja
'Oh lheueh nyan teukeujot Hukman 'Alam
Neukalon ka tan cut putroe muda

Teuduek teuseupok tundok ngon ulee
'Oh lheueh nyan ratee Raja Muda
Neuyue unggah jak teureubang
Sigala padang neuyue jak mita

Jak leh jinoo kah beujalan
Kakalon cut intan toh siri banda
Unggah teureubang dalam awan
'Oh lheueh surohan nibak Banta

Unggah jipo dalam awan
Leumah jikalon saboh kuta
Di teungoh padang kuta indah that
Di lua rakyat meuribee laksa

Teuma jidong bak tingkap meuligoe
Rupa bagoe cicem syeureuga
Bulee mirah jroh meukilat
Plang mupat-pat puteh wareuna

Paroh miseue intan meukarang
Gaki miseue ban pudoe meutia
Ilok sangat lang-geumilang
Soe nyang pandang lale mata

Jidong le bak tingkap meuligoe
Tuan Putroe kalon rupa
Jieu rupa lang geumilang
Bak dendayang Putroe kata

He dendayang kadrob cicem nyoe
Kame keunoe kukalon rupa
Lon eu cahya lang geumilang
kadrob rijang keunoe kaba

Dendayang deungo haba Putroe
Jitajo jinoe bak Putroe Muda
'Oh lheuuh nyan jitajo laju bak tingkap
Jikeumeung drob leugat unggah Raja

Unggah sakti kalon dendayang
Jiteureubang bak tiree rawa
Putroe kalon ka lam meuligoe
Neukeumeung beudoh droe neujak sigra

Unggah kalon beudoh Putroe
Jipo le jinoe bak tameh geuta
Putroe kalon jiteureubang
Putroe Budiman malee mata

Dendayang tajo lom bak cicem
Jimarit ban manusia
He Putroe cut rupa bangsawan
Wahe intan tanglong donya

Bek neuikat ulontuan
Wahe intan rugoe mubahra
Meunyo tadrob lon wahe pocut
Han troh meukeusud bintang kama

Meung han tadrob lon he intan
Lon puwoe gambaran Putroe keu gata
Hana ngon sa gambaran nyan
Wahe buleuen trang lam nanggroe donya

Gambaran areh he Putroe jeunulang
Jeuét marit ban manusia
Sigak bangon laku badan
Han ubah ban Raja Raya

Ngon meugunci gambaran nyan
Di dalam badan geuboh cintra
Meung ka nafsu wahe intan
Gunci gambaran sigra-sigra

Jimeusu le panton syae
Lom meudike he Putroe Muda
Cut Putroe neueh mita seunang
Bahle gambaran meuen suka

Meunan-meunan beuranggajan
He intan peue napsu gata
Meung tadrob lon pane gambaran
He Putroe seudang buleuen purnama

Teungoh jimarit cicem bangsawan
Putroe pikeran didalam dada
Hana neutukri asyek deundam
Haba cicem nyan saleh-saleh na

Teuma seuot tuan Putroe
Ngon cicem nyoe neumeuhaba
Peurab keunoe he cicem jroh
Mangat lon boh dalan cintra

Mangat kaduek teuma sinoe
Sajan kamoe lam astana
Lon bri umpeuen keu gata sidroe
Geunap uroe lon bri keu gata

Beuthat rugoe nanggroe lon rusak
Dilon galak hate keu gata
Lom tapeugah na gambaran
Gaseh sayang keu lon le gata

Napsu lon that keu gambaran
Han tom lon kalon he cicem raja
Bak le inseueh he cicem droe
Tabri keu kamoe dua peukara

Adak he cicem han taduek sinoe
Gambaran keu kamoe tajak jok sigra
Bak rijang le taba keunoe
Keureuna Putroe rindu keu gamba

Rindu pi that he cicem droe
Keureuna kamoe han tom eu gamba
Seubab tapeugah le gata jroh
Jinoe tabeudoh he cicem raja

Beudoh rijang he cicem cut
Putroe meukeusud jinoe keu gamba
Tajak le jinoe bak rijang tariwang
Deungon sikarang bak troh le taba

Nyankeun napsu he cicem meutuah
Ngon tulong Allah harap keu gata
Teuma seuot unggah sakti
Tadeungo lon kheun kri Putroe Muda

Pakri neuyue duek lon di sinoe
Keureuna kamoe suroh Raja
Keureuna ulon nyang troh keunoe
Kon galak droe ulon teuka

Meung nyo neudrob ulon jinoe
Teulah dudoe po jroh rupa
Keureuna lon troh keunoe jalan
Hukman 'Alam suroh hamba

Meung nyo galak keu lontuan
Bak jeuet Banta nyan keu judo gata
Teuma gambaran kon bak ulon
Pocut ampon bak gob nyan na

'Oh talakee geubri le rijang
He Putroe bintang gob nyan kaya
Han jeuet han geubri wahe Putroe
Bak peunyum kamoe Raja pi suka

Han jeuet han talakee he Putroe intan
Patot gambaran meuneuen gata
Keureuna sipheuet ureueng binoe
Lom ngon Putroe keumala donya

Diraja keupeue ureueng agam
Sabe lam prang sakti na
Bak pike lon kadang sampoe
Idin Putroe bahle lon gisa

'Oh troh ulon bak Hukman 'Alam
Rijang lon riwang he Putroe Muda
Budiman Khandi deungo Hukman 'Alam
Teuingat le yoh nyan leumah rahsia

Seubab leumah dalam lumpoe
Tuan Putroe jaweueb sigra
Wahe unggah nyang budiman
Pat Hukman peugah sigra

Teuma seuot cicem unggah
Tadeungo lon peugah he Putroe Muda
Keupeue tatanyong Hukman 'Alam
Keureuna gob nyan siteungoh gila

Peue meukeusud nyang tatanyong
Peugah he bungong lon deungo nyata
Tatem meukawen deungon Hukman
Mangat lon peusan keunoe bak gata

Teuma seuot lom Budiman Khandi
Rupa mise uroe keulua
Nyang jeuet lon tanyong Hukman 'Alam
Meuteumeung simalam lam rahsia

Habeh lon kalon dum lon lihat
Bit nyo jroh that hana tara
Habeh geupeugah lom bak kamoe
Nama geupujoe di Buket Miga

Nyankeuh seubab nyang jeuet lon tanyong
Keureuna meuteumeung dalam rahsia
Tapeugah pat Hukman 'Alam
Lon keumeung peusan janji nyang ka

Jak leh kawoe meunoe ka peugah
Wahe unggah ubak Raja
Kakheun ulon peuek saleuem
Janji jameun dalam rahsia

Meunyo sunggoh kon seunda wayang
Takheun bak reujang keunoe neuteka
Meunyo akhe han troh meukeusud
Meuhat raya buet meung treb neuteka

Janji dilee bak rijang datang
Lon preh di padang ngon balatandra
Ban unggah deungo narit Putroe
Jipo le jinoe leugat jigisa

'Oh troh u Buket nibak Hukman
Jiseumbah le yoh nyan teuot Raja
Hukman 'Alam tanyong bak unggah
Peue na leumah taeu rupa

Teuma seuot cicem unggah
Tadeungo lon peugah po meukuta
Na tuanku nyan neukalon
Di teungoh padang saboh kuta

Ulonteu kalon sidroe Putroe
Hana bagoe indah rupa
Badan jeunjang rupa got that
Patot deelat estri meukuta

Hana bandeng ngon teuladan
Lom meujeulisan he meukuta
Habeh lon ujoe sikada dapat
Ka lon lihat aneuk Raja

Ka lon marit dua lhee patah
Ampon di bawah doli meukuta
Bit nyo cantek Putroe meugleueng
Nyankeuh ureueng peuet peukara

Di yub langet ateueh bumoe
Hana sidroe nyang meunan na
Jinoe tuanku ulon peutrang
Adak roh jeued prang pi tagaza

Nyang Putroe cut muda seudang
Adak lam prang tacok lanja
Bek tatakot keu meuriam
Keusaktian wahe Raja

Tajak lanja tacang lawan
Nyang Putroe seudang tapuwoe sigra
Meunan meulintah bak hate lon
Tuanku ampon pakri nyang suka

Padum-padum dendayang sinaroe
Ngon meuligoe jroh han tara
Ngon dendayang na peuet ploh droe
Sajan Putroe muda-muda

Ngon peukayan cie b bak asoe
Teuma sidroe neuboh peutua
Sidroe geupeunan panghulee Rom
Asoe dalong jih keukira

Sidroe geupeunan Siti Bungsu
Ranub gapu jih keukira
Sidroe geupeunan Siti Nubat
Ranub lipat jih keukira

Teuma nyang dua teuduek sapat
Ureueng nyang ngadab Putroe Muda
Nama Putroe Budiman Khandi
Jiyue tanyong le bak meukuta

Jipeugah janji ka lam lumpoe
Tuanku jinoe neuyue teuka
Meung nyo lambat tuanku datang
Meuhah gob tueng Putroe Muda

Hukman deungo haba unggah
Hate dasyah dalam dada
'Oh lheueh nyan teuma Hukman 'Alam
Neucok le euncien pantah sigra

'Oh neucok euncien nyan u jaroe
Bale jinoe han le nyata
Hukman cinta unggah sakti
Jipeujeuet le badan keu geureuda

Banta neuek leugat neupasang
Jiteureubang lam awan miga
Na sikeujab geureuda teureubang
Jitren upadang nanggroe Raja

Teuma jipo di teungoh padang
Siteuntang-teuntang deungon kuta
Hukman piyoh yub kayee meuh
Neukalon deuh lam astana

Putroe teuduek bak tingkap meuligoe
Neukalon le jinoe u mideuen Raja
Leumah neukalon yub kayee meuh
Cahya peungeuh sidroe Banta

Rupa ilok ban buleuen trang
Soe nyang pandang hate gila
Budiman Khandi keunan neupandang
Hukman 'Alam euncien neugisa

Teudong le bale yub kayee meuh^u
Neuduek u ateueh Banta Muda
Budiman Khandi kalon mumeunan
Neuthee saktian ureueng muda

Putroe piyoh preh troh unggah
Mata dasyah neungieng Banta
Hukman 'Alam neuyue unggah
Jak teureubang kah u astana

Kabalek droe laen ruman
Bek jituban le Putroe Muda
Cicem unggah deungo haba meunan
Jibalek ruman meulaen rupa

Jipeujeuet droe teuma keu nuri
Indah han sakri taeu rupa
Cicem nuri indah sangat
Meukilat-kilat bulee meucahya

Di teungoh ulee miseue pudoe
Teuma bak takue miseue meutia
Gukeejih tajam miseue tajoe
jipo bak Putroe dalam astana

Cicem nuri dong nibak tingkap
Putroe galak that kalon rupa
Putroe tawok teuma dendayang
Kadrob rijang cicem jroh rupa

'Oh ban nuri deungo haba Putroe
Jimarit le jinoe sang manusia
Sireuta panton le di babah
Meunoe ulah jicalitra

Puan kaca di ateueh peuti
Besi kharsani puta keu taloe
Apa meukeusud tuan Siti
Suroh dendayang meunangkap kamoe

'Oh neudeungo panton cicem
Teuma teukhem Putroe Muda
Yoh nyan Putroe neukheun panton
Tadeungo lon cicem jroh rupa

Umbak datang ribot keuncang
Kapai tongkang pulang keumari
Apa maksud beutanya datang
Siapa tuan suroh keumari

Teuma nuri lom meupanton
Meunoe jikheun bak Putroe Muda

Sayang aneuk lang teureubang sikawan
Jatohlah satu di nanggroë Yaman
Kami suroh nibak Hukman
Meung tanyakan janji padamu tuan

Teuma seuot tuan Putroe
Jikheun meunoe jawueub haba

Burong nuri teureubang sikawan
Beulayaran dalam hawa
Kalunya sunggoh kakeunda datang
Deungon sikarang datang keumari

'Oh ban nuri deungo panton Putroe
Jikheun le meunoe taleh sigra

Aneuk ayam makan padi
Aneuk babi didalam hutan
Kalunya sunggoh tuan puteri
Malam ini tuanku datang

'Oh ban Putroe deungo panton nuri
Budiman Khandi hate that suka
Sireuta neukheun narit sipatah
Meunoe ulah neucalitra

Kadeungo he cicem nuri
Jak leh keumbali jinoe bak sigra
Kakheun bak troh bak malam nyoe
Keureuna kamoe keumeung eu rupa

Han jeuet han troh malam sikarang
Adak sosahan bak troh neuteuka
Meunan meukeusud tuan Putroe
Wahe cicem droe bek han neuteuka

Bak na ngon gata he cicem teungku
Sajan tuanku bak sama-sama
Seuot cicem ensya Allah
Bek le sosah he tanglong donya

Bak malam nyoe troh Hukman
Wahe intan meuteumeung ngon gata
Taidin lon he pocut meutuah
Talakke bak Allah bak rijang lon gisa

Habeh janji cicem ngon Putroe
Leugat jipo ubak Raja
Putroe kalon hana le nuri
Neumarit le Putroe Muda

Wahe dendayang tadeungo kamoe
Keu haba nyoe bek tabuka
Bek tapeugah beurangasoe
Mate kamoe ayah pupana

Seuot dendayang pocut ampon
Han patot lon jak peuhaba
Meung nyo pocut kamoe peugah
Neukoh lidah bah le bak pana

Neupoh bak mate kamoe bandum
He pocut buleuen deumangat astana
'Oh hana le pocutmeuh sidroe
Hokeuh kamoe saleh toh donya

Siri nanggroe rimba gampong
Pocut tanglong bek meunan haba
Adak mate pocut lon sidroe
Bak sajan kamoe bandum beusama

Meunakeuh pocut bek tagundah
Poteu Allah nyang peulara
Putroe kheun lom bak dendayang
Kacuba kalon pane teuka

Nuri dua seun ka troh keunoe
Kaeu jinoe ho rot teuka
Dendayang dua duek bak tingkap
Jikalon leugat bak aneuk Raja

Hukman 'Alam tren bak bale
Euncien neucok le pantah sigra
'Oh ban neucok euncien bak tangan
Bale pi hilang han le nyata

Hukman 'Alam marit ngon nuri
Bek meunan le laen rupa
Nuri deungo haba Hukman
Jibalek yoh nyan laen rupa

Rupa ka jeuet teuma keu burak
Dendayang 'ajib kalon rupa
Hukman pasang burak meulayang
Jiteureubang pantah sigra

Dendayang peugah teuma bak Putroe
Jeh pocut droe aneuk Raja
Hukman pocut ka u manyang
Burak neupasang dalam hawa

Budiman Khandi deungo haba dendayang
Neuthee le saktian aneuk Raja
Piyoh Putroe lam meuligoe
Preh-preh sampoe aneuk Raja

Burak jitren rot lam awan
Troh u dalam meuligoe Raja
Rot tingkap manyang nibak bubong
Burak tamong lam astana

Nuri peujeut droe teuma keu meurak
Ka jijak-jak dalam astana
Hukman 'Alam ka lam meuligoe
Sajan Putroe neuduek dua

Teubiet le panton nibak meurak
Seun-seun sikrak jimeuhaba

Cahya buleuen dalam astana
Dudok beusama laki esteuri
Bukonlah ilok di mata hamba
Meulihat rupa dalam meuligi

Tuan Putroe yoh nyan teusinyom
Neudeungo cicem mumeunan haba

Budiman Khandi ateueh keta meuh
Hukman 'Alam sajan sireuta
Teubiet lom panton nibak meurak
Meunoe layak nyan jikata

Beuseuri-seuri cahya buleuen
Buleuen beucahya dalam meuligi
Bukon that ilok Hukman 'Alam
Dudok beusama Putri juhari

Yoh nyan cut Banta khem teusinyom
Putroe sajan meung teutawa
Teuma lom meurak jimeupanton
Kon lagee phon laen rasa

Aneuk guda plang di teungoh padang
Datang sulotan ambekkan dia
Apakah seubab tuanku teutawa
Meulihat siapa tuanku ini

Yoh nyan cut Banta lom teusinyom
Dendayang sajan meung teutawa
Dalam meuligoe meuhubo-hubo
Miseue peuraho meugisa-gisa

Ureueng meukhem ban saboh meuligoe
Tuan Putroe nyang that teutawa
'Oh that teukhem tuan Putroe
Cahya gigoe peunoh astana

Lom neumeung marit Putroe ngon Banta
Teusinyom muka na dum intan
Neumarit Putroe deungon Hukman
Meunoe neukheun ubak Raja

Pakon tuanku cicem meurak
Habej jipeukhak dendayang dum na
Han tom cicem nyang na meunoe
Bandum geutanyoe meung teutawa

Teuma seuot cicem meurak
Jipujoe bak di nab Raja
Pakon meunan neukheun tuan Putroe
Pakon keu kemoe muwoe haba

Dilon hana laba rugoe
Lon duek sidroe haba teuka
Digob geuduek lakoe binoe
Meuseunda guroe geupeugah haba

Sineulheueh buet ateueh cicem
That kuat khem Putroe meuseunda
Teuma seuot tuan Putroe
Neukheun le meunoe bak cicem jroh rupa

Bek saket hate he cicem jroh
Kamoe meuteuoh deungon Raja
Kon lon marit meudeh meunoe
Keureuna kamoe galak keu gata

Yoh nyan meurak hate galak
Jimarit rancak ngon Putroe Muda
Sireuta jikheun deungon panton
Neudeungo lon Putroe Muda

Puhon keulapa di teungoh jalan
Jatohlah satu dimakan babi
Apakan seubab dendayang teuceungang
Meulihat cut Banta ngon tuan Putri

Yoh nyan dendayang lom teuseunyom
Maneh ranom ngon ie muka
Dendayang teuma muka teuseunyom
'Oh ban jikalon meurak diwangga

Tuan Putroe neuduek sinan
Deungon Hukman meusuka-suka
Sideh pi suka sinoe pi galak
Bandua pihak hate suka

Hingga malam le ngon uroe
Tuan Putroe lam astana
Teuma geubri ngon makanan
Makeuen santapan Putroe ngon Raja

'Oh lheueh makeuen Banta Hukman
Pinah le hidang pantah sigra
Dendayang dua teuma bri puan
Jijok bak tangan Banta Muda

Neupajoh ranub dalam karah
Neubri le seupah keu adekeunda
Nakeuh umu teungoh malam
Baginda sulotan leubui mata

Dendayang dua lhom keuleumbu
Teumpat beuradu Putroe ngon Raja
Jilhom ngon tiree tujuh lapeh
Cahya peureuseh lam astana

'Oh lheueh leueng tika teulhom keuleumbu
Jiteubiet laju keudeh u lua
Teuma beudoh Banta ngon Putroe
Beuradu jinoo lam tiree rawa

Aman Banta lam keuleumbu
Neubeuradu ngon Putroe Muda
Haba laen hana lon seubot
Maklum pocut dumteu rata

Meuseuki Kleueng Walee Aceh
Hana leubeh dum na gata
Na cit bacut ureueng duson
Leubeh hirom raja-raja

Laen nibak nyan hana lon peugah
Malee babah ureueng nyang baca
Pineung muda makanan sireh
Masak sibiji di ateueh peutoe

Beuteumu mudaseumuanya 'areh
Bagoe bumoe jigrak-grak geumpa
Allah Subhanallah
Teulanjo lidah lon meuhaba

Tapeuampon lon ya maujud
Deesya cut dum sireuta
Hingga beungoh le ngon uroe
Jaga le jinoo sigo bandua

Lanja neutren laju bak kulam
Jak meusiram cut Banta Muda
'Oh lheueh nyan neuek u meuligoe
Neuduek rab Putroe sapat dua

Teutap cut Banta lam meuligoe
Deungon Putroe suka teumasa
Neumeuseunda Banta Hukman
Ngon Putroe intan lam astana

'Oh lheuch meuseunda Banta ngon Putroe
Neupeugah jinoe janji nyang ka
Janji dilee Putroe intan
Gata tunangan sireutoh raja

Tatem meukawen he Putroe intan
Ngon raja nyan sireutoh sa
Adak tatem he intan pudoe
Peugah bak kamoe he tanglong donya

Teuma seuot Putroe Khande
Haba moseutahe tuanku kata
Keupeue tuanku haba jameun
Jinoe neutanyong nyang Putroe cinta

Habeh seunda deungon wayang
Beuradu yoh nyan Putroe ngon Raja
Hingga malam lob ngon uroe
Rakyat meukatoe kawai lingka

Bandum lingka kuta Putroe
Rakyat sinaroe peuet droe panglima
Putroe neukheun nibak Hukman
Uroe ka malam po meukuta

Jinoe tuanku neucinta hekeumat
Bek meularat dalam kuta
Keureuna tuanku ka treb keunoe
Saleh soe-soe jak peuhaba

Hukman deungo narit Putroe
Euncien bak jaroe leugat neugisa
Tujoh go gisa euncien bak jaroe
Lingka kuta nyoe na lom kuta

Tujoh lapeh kuta seureuloe
Silapeh beusoe silapeh meulila
Silapeh teumaga silapeh pirak
Silapeh treuk teuma suasa

Silapeh treuk 'akek nyang mirah
That bit indah kuta Raja
Budiman Khande kalon meunan
Neuthee Hukman sakti raya

Rupa pi jroh ngon beurani
Le that sakti aneuk Raja
Rakyat keumawai lingka kuta nyan
Tahe hireuen jikalon kuta

Kuta dilee tujuh lapeh
Pakon jinoe tujuh treuk na
Bandum meuhimpon peuet blah lapeh
That bit 'areh aneuek Raja

Lingka kuta jeuet ngon laot
Habeu teumakot rakyat dum na
Jisangka ka troh raja sireutoh
Seubab tanggo rab troh teuka

Teuma bak Raja jijak peugah
Dum kafilah seumbah Raja
Ampon tuanku meuribee katoe
Dum na kamoe raya deesya

Kamoe keumawai tuanku di padang
Peuet jeuem malam peuet panglima
Lingka kuta tuan Putroe
Kamoe sinaroe dum meujaga

Hana teungeut meung sikeujab
Cit lam inget hana lupa
Kheundak Allah po janjongan
Putroe Budiman lam astana

Lingka kuta tuan Putroe
Ka na lom jinoe tujuh lapeh kuta
Lingka kuta na ngon laot
Saleh pane trok aneuk raja

Saleh aneuk raja sireutoh
Sidroe ka troh u mideuen Raja
Saleh aneuk Mambang sakti
Nyang that beurani lagi peukasa

Saleh Raja Miga di awan
Aneuk sulotan di Gunong Miga
Teuka tuanku rot lam awan
Kamoe sikeulian di mideuen Raja

Hana teuka nyang rot bumoe
Kamoe sinoe kawai lingka
Malingkan tuanku rot u manyang
Leugat neutanyong lam astana /

Dilee nyang meugah nyang jak meunan
Diu Palinggam di gunong Miga
Meunyo tuanku aneuk raja di manyang
Nyankeuh lawan prang sireutoh raja

Sulotan Iram deungo haba meunan
Neuhei le yoh nyan dum panglima
Habehe meusapat dum uleebalang
'Adi ngon bujang meuribee laksa

'Oh lheueh nyan beurangkat Sulotan Kasumi
Rakyat rame sajan sireuta
Leugat neujak u teungoh padang
Neujak kalon aneuk Raja

Tangguh ka troh janji sampoe
Singoh troh keunoe dum aneuk raja
Sulotan Keusumi troh u mideuen
Khimah teupeudong bak piyoh tandra

Raja piyoh di teungoh padang
Preh troh angkatan raja dum na
Hukman 'Alam dalam meuligoe
Sajan Putroe meusuka-suka

Neukalon ureueng di teungoh padang
Khimah ka teudong dum na tandra
Hukman tanyong bak Putroe Budiman
Wahe intan tanglong donya

Pane ureueng di teungoh padang
Rakyat sajan meuribee laksa
Budiman Khande seuot le pantah
Nyankeuh ayah laman sripada

Meung nyo meunan tuan Putroe
Idin lon jinoe jak bak Raja
Teuma seuot tuan Putroe
Idin bak kamoe po meukuta

Cit patot tuanku neujak bak ayah
Meunankeuh nyang jroh po meukuta
Hukman deungo haba Putroe
Neuteupok jaroe laju ubak pha

Teubiet le apui teuma ngon asap
Sajan ngon kilat meunyala-nyala
Teubiet le lam pha dua droe rakan
Neuyue beujalan ubak raja

Teuma neuyue jak bak baginda sulotan
Neuyue peugah yoh nyan dum peue haba
Panglima deungo sabda Hukman
Jijak le yoh nyan laju bak Raja

'Oh lheueh nyan jipasang ateueh guda plang
Leugat beujalan teubiet lam kuta
Rupa hibat lang-geumilang
Teubiet u padang pahlawan dua

'Oh troh ubak Sulotan Kasumi
Jitamong le seumbah Raja
Sulotan kalon Raja dua droe
Rupa samlakoe gagah peukasa

Teuma neutanyong bak pahlawan
Pane beujalan gata dua
Teuma seuot sidroe pahlawan
Nyang jimeunan Po Tamam Likha

Ampon tuanku meuribee ampon
Kamoe surohan Raja Miga
Hukman 'Alam suroh lontuan
Neuyue tanyong ban bak meukuta

Keureuna hukman keunoe datang
Aneuk sulotan di Gunong Miga
Ka langsung buet leupah langkah
Ampon di bawah doli meukuta

Adak teuka raja sireutoh
Tuanku hei taroh lon lawan gaza
Jinoe neuidin Budiman Khande
Akan estiri aneuk Raja

Keureuna kamoe langkah ka leupah
Han jeuet le minah malee mata
Ampon tuanku Juhan 'Alam
Bak jeuet Hukman meulintee meukuta

Bak jeuet keu aneuk doli halarat
Meunankeuh hajat paduka aneukeunda
Bak neutueng he doli keu ureueng khadam
Hukman 'Alam pi aneuk Raja

Bek neuhaloh keu peurebuatan
Wahe janjongan ureueng muda
Umu baru muda seudang
Wahe sulotan pike bak na

Meung han neupike wahe deelat
Akhe meuhat rugoe meubara
Nanggroe reuloh rakyat mate
'Ayeb keuji nama agama

Keu aneuk raja nyang sireutoh
Hukman peuputoh hukom dawa
Jikalee napsu galakjih keu prang
Na Hukman nyang lawan gaza

Di tuanku neukalon jioh
Neuhei taroh ganda watra
Adak han lagot ganda dumnan
Siploh satuan neulawan bak na

Hana jituri Diu Palinggam
Keurajeuen lam awan troh u donya
Aneuck Raja nyang Usuli
Muda Sakti geurasi nama

Nyoekeuh aneuk Diu Palinggam
Neubri Putroe nyan keu aneuk Raja
Bak le gaseh deungon sayang
Hukma 'Alain dalam astana

Neupreh tuanku musoh datang
Kon buet 'ayeban wahe meukuta
Sulotan deungo narit pahlawan
Hireuen sulotan sikutika

Keureuna neudeungo Diu Palinggam
Raya saktian hana tara
Le that keuji dum na sulotan
Han ek jilawan Diu Peukasa

Teuma marit sulotan Iram
Tadeungo lon kheun he panglima
Meung nyo aneuk Diu Palinggam
Bak lontuan ateueh jeumala

Taman Likha deungo haba sulotan
Leugat jiriwang ubak Raja
'Oh troh lam kuta bak Hukman
Jipeugah le yoh nyan ban nyang sabda

Hukman deungo haba meunan
Teulakee idin bak Putroe Muda
Tuan Putroe teuma idin
'Oh lheueh nyan neutren lam astana

Hukman 'Alam neutepok jaroe
Teubiet le jinoe asap meubura
Teubiet apui deungon kilat
Sinan lom teubiet sidroe Raja

Suara Geumbira geurasi nan
Jiseumbah Hukman pantah sigra
Ampon tuanku meuribee ampon
Tadeungo lon po meukuta

Pakon tuanku neupangge kamoe
Neukheun jinoe peue na sabda
Teuma seuot Banta Hukman
Tadeungo lontuan he kakeunda

Nyang lon pangge gata keunoe
Keureuna kamoe keumeung jak bak Raja
'Oh ban jideungo sabda meunan
Jiteupok le tangan teuma bak dada

Teuka le rakyat meuribee katoe
Peudeueng bak jaroe puteh mata
Ateueh guda dum jipasang
Maseng-maseng alat jiba

Mubajee zireh keutupong beusoe
Alam di jaroe bandum rata
'Oh sare habeh rakyat keunan
Baginda Hukman pasang guda

Neupasang le ateueh guda plang
Dua pahlawan ireng sireuta
Sidroe di wie sidroe di uneun
Rakyat sajan meuribee laksa

Nyang jak di likot Suara Geumbira
Rakyat that bha sajan sireuta
Keumang ngon payong iram-iram
Ateueh guda plang Raja muda

Oh ban sare troh bae Sulotan
Hukman ' Alam tren ateueh guda
Sigala rakyat nyang di padang
Hireuen jipandang ateueh Banta

Rupa Hukman that samlakoe
Hireuen laloe soe eu rupa
Troh bak khimah beudoh angkatan
Jak mubri saleuem ngon aneuk Raja

Hukman tamong bak sulotan
Jak mumat tangan deungon Raja
Baginda kalon Hukman 'Alam
Patot tunangan ngon Putroe Muda

Nyo sibaloh bit sipadan
Inong ngon agam rab keumeung sa
Puteh kuneng rupa bandua
Ngon aneuk Raja sabe padra

Lagi aneuk Diu Palinggam
Raja lam awan sakti raya
Neumarit le doli halarat
Pakri pakat bak gata dum na

Teuma seuot uleebalang
'Adi ngon juhan meuntroe bentara
Nibak kamoe sikeulian
Hate sukaan keu Banta Muda

Lom hukman aneuk sulotan
meulintee janjongan sabe Raja
Teuma Raja teupike siat
Seubab meusapat uleebalang dum na

Lom meusabda doli halarat
Pakri nyang pakat-dum na peutua
Bahle tatueng Hukman 'Alam
Ngon Putroe intan judo aneukeunda

Habeh pakat dungon pike
Raja meusyawe deungon peutua
Uleebalang peudana meuntroe
Jiseuon jaroe ateueh jeumala

'Adi ngon juhan dum pahlawan
Bahle jeuet prang jikheun bak Raja
Got bek tatueng sireutoh raja
Tabalek bicara 'oh troh jiteuka

Adak tatueng Raja sireutoh
Kadang han ek roh nyang meunoe rupa
Raja yue pangge kali ngon syiah
Neuyue peunikah Putroe Muda

Troh le kali jak peunikah
Hukman pantah kabui le sigra
Haba keu Raja hana lon peugah
Panyang that kisah he syeedara

Keureuna seubab nanggroë rab orang
Baginda sulotan hana keurija
Sulotan marit ngon Hukman 'Alam
Tadeungo lon kheun he aneukeunda

Raja sireutoh singoh troh keunoe
Idin samlakoe lon lawan gaza
Bek ngon gata bahle ngon kamoe
Singoh uroe watee teuka

Teuma seuot Hukman 'Alam
Ampon laman po meukuta
Bek tuanku neukeumeung muprang
Meung na lontuan nyang aneukeunda

Tuanku neuduek neukalon muprang
Raja sibarang lon lawan gaza
Di tuanku neulakee do'a
Sireutoh raja kamoe pupana

Hana jituri Hukman 'Alam
Aneuk sulotan lam awan miga
Cit biasa didalam prang
Di phon seudang troh 'an muda

Nyoekeuh cuco Raja Usuli
Muda Sakti geurasi nama
Deungon tulong Zanggi Meureudan
Ngon saktian Peureuba Lila

Di tuanku neudong bak jioh
Neuhei taroh sianeuk dua
Bek tuanku hate sosahan
Hukman 'Alam singoh jak gaza

Sulotan Kasumi han le kalam
Seubab Hukman mumeunan kata
Tèuma Banta leugat neuwoe
Ubak Putroe lam astana

Banta marit ngon pahlawan
Wahe rakan tajaga kuta
Banta teutap lam meuligoe
Sajan Putroe meusuka-suka

Meuseunda-seunda bak malam nyan
Banta Hukman peuhabeuh hawa
Lam keuleumbu sujoe kasab
'Inalbanat meusudi wangga

Cit ka cukop alat meuligoe
Lon boh di sinoe keu mangat haba
'Oh sare beungoh ka ngon uroe
Teukeujot Putroe deungon Raja

Laju neutren di meuligoe
Neujak manoe bak kulam bunga
'Oh lheueh manoe suci badan
Neuwoe le yoh nyan lam astana

Na sikeujab Raja ploh
Raja sireutoh pi troh teuka
Sajan ngon rakyat meuribee katoe
Dum sinaroe ateuh guda

Mubajee zireh keutupong beusoe
Peudeueng bak jaroe maseng rata
Meuseundi-seundi rupa peukayan
Geumeureulapan ngon meukuta

'Oh ban sare troh u teungoh mideuen
Khimah jipeudong maseng jeumba
Sireutoh raja sireutoh khimah
Maseng jeumeulah meujeumba-jeumba

'Oh ban sare troh u teungoh padang
Jibri utosan ubak Raja
Jiyue bujang na bimong droe
Jijak le jinoe pantah sigra

'Oh ban sare troh bak pinto dalam
Jitawok le ureueng dalam kuta
Tuan-tuan nyang jaga pinto
Lon keumeung lalo jak bak Raja

Si kawai pinto seuot le rijang
Pane datang gata teuka
Kamoe surohan raja sireutoh
Tabuka pantah pinto sigra

Si kawai pinto buka rijang
Leugat jitamong jak bak Raja
'Oh troh bak Raja teuma jideelat
Sireuta sujud ubak Raja

Ampon tuanku meuribee ampon
Kamoe surohan raja di lua
'Oh ban neudeungo haba meunan
Baginda tanyong pantah sigra

Peue na haba nibak sulotan
Peugah rijang lon deungo nyata
Nyang troh langkah kamoe keunoe
Neuyue tanyong jinoo janji nyang ka

'Oh ban neudeungo haba meunan
Baginda sulotan marit le sigra
He utosan tadeungo kamoe
Kukheun jinoo ubak gata

Keureuna Putroe kheundak Tuhan
Aneuk sulotan keunoe teuka
Aneuk Raja lam meuligoe
Keudeh jinoo tajak gata

'Oh ban jideungo haba sulotan
Leugat jiriwang troh bak raja
'Oh troh bak raja meunoe jipeugah
Ka gob meunikah Putroe Muda

'Oh ban jideungo haba meunan
Beungeh le yoh nyan hu ngon mata
Sigala raja uleebalang
Mupakat le yoh nyan cut ngon raya

Pakri bicara he uleebalang
Dum sikeulian geutanyoe dum na
Teuma seuot sidroe uleebalang
Meunoe reumbang po meukuta

Get tuanku neupeugot surat
Neuboh narit nyang bisa-bisa
Meunoe haba neuboh lam surat
Neuyue intat pantah sigra

MILIK KEPUSTAKAAN
DIREKTORAT TRADISI
JEN NBSF DEPODAR

Wahe Raja Banta Hukman
Pakon meunan buet digata
Jinoe nyang got Putroe tapulang
Nak bek jeuet prang lon ngon gata

Meung han tapulang taingat keudroe
Gata jinoe kupupana
'Oh nan habeh tamat surat
Jiyue intat pantah sigra

Troh bak Raja jijok surat
Neuploh leugat ka neubaca
'Oh neukalon haba dalam kireman
Banta Hukman beungehneuh raya

Hukman 'Alam balah surat
Saleuem nibak sulotan Miga
Nyoekeuh Raja Miga di awan
He sulotan ingat binasa

Meung nyo hawa keu tuan Putroe
Tajak keunoe talawan gaza
Sinoe tacok bak ujong peudeueng
Jinoe he rakan teubiet u lua

'Oh noe habeh surat tamat
Jijok leugat utosan raja
Leugat jiwoe bak sulotan
Jok kireman pantah sigra

'Oh ban jikalon haba lam surat
Amarah that bandum raja
Jinoe got taprang dilee Hukman
'Oh talo nyan laen bicara

Nak jithee keudroe buet geutanyoe
Tadrob jinoe taboh cong sula
Jih jak langgeh binoe geutanyoe
Hana thee keudroe po cilaka

'Oh lheueh tapoh Raja nyan sidroe
Laen bagoe tabicara
Meunankeuh pakat raja sireutoh
Jiyue beudoh bandum panglima

Peuet reutoh panglima jibeudoh rijang
Rakyat sajan meuribee laksa
Ateueh guda dum jipasang
U teungoh padang jijak gaza

'Oh ban sare troh u teungoh padang
Jihele ureueng dalam kuta
Kateubiet keunoe he Hukman
Bek duek sinan dalam kuta

Bek that rindu gata ngon Putroe
Tunangan kamoe pakon tahawa
Han le Putroe lam nanggroé awan
Bit kon sulotan kah aneuk Raja

Saleh aneuk haram jadah
Peurumoh kah na kee meuhawa
Meung nyo gata aneuk sulotan
Teubiet u midan tameucang lanja

Meung nyo tatubiet kuthee agam
Aneuk sulotan bukon dara
Meukon meunan peue tapeugah
That beurakah malee hana

Adak biet tatakot keu geudubang
Putroe tapulang bak kamoe sigra
Meunyo galak takeumeung theun peudeueng
Teubiet u mideuen bek lam kuta

Sama ila deungo haba meunan
leugat jipasang ateueh guda
Suara Geumira teubiet sajan
Rakyat sikeulian meuribee laksa

'Oh ban leupah pinto dalam
Meuteumeung le lawan sabe panglima
Sideh jiek sinoe jijk
Prang meusigak hana tara

Sideh jideumpek sinoe jisurak
Meuhayak-hayak 'alam donya
Yoh nyan ka prang di teungoh mideuen
Han peue takheun raja-raja

Hana sidek deungon sasat
Jimeutak rakyat di mideuen Raja
Deumpek ngon surak sabong meunyang
Rakyat jitren han teukira

Meusurak-surak di mideuen prang
Miseue tupheuen bumoe meutaga
Miseue geulanteue bade barat
Jipot angen mublet kilat

Meunankeuh lagee ureeng muprang
Keusaktian hana jikira
Keusaktian hana jiharap
Jiek leugat jicang lanja

Sulotan Kasumi kalon u padang
Neukalon prang that guranta
'Oh ban meuteumeung jimuprang le
Hana jan pike mita bicara

Sama Ila di teungoh padang
Le that neucang rakyat raja
Mate rakyat ulee ili
Meutindeh bangke di mideuen Raja

Ile darah miseue ie krueng
Darah ureueng ngon darah guda
Sama Ila jibeuet do'a
Hekeumat donya phon jigaza

Phon jimula jijok langkah
Jikheun bismillah teuma jigaza
Meuteumeung lawan jimuprang le
Hana jipike mita bicara

Suara Geumira that guransang
Di teungoh padang neucang tandra
Le that mate bandua sagoe
Prang sang bagoe peujok nyawa

Suara Geumira kalon mumeunan
Neubeuet le yoh nyan saboh do'a
Troh le rimueng saboh kawan
Hibat ruman takalon rupa

Jidong di nab Suara Geumira
Jitanyong haba peue na sabda
Suara Geumira teuma peugah
Jeh umpeuen kah dum kaseuba

Nyang ka mate dum ka simpan
Sosah kumeucang di mideuen Raja
'Oh ban jideungo sabda meunan
Jilumpat yoh nyan binatang rimba

Jipeutoe le bak kawan musoh
Habej jipajoh dum nyang pana
Raja sireutoh kalon laku meunan
Raya saktian Raja teuka

Jiyue teubiet bandum pahlawan
Uleebalang bandum rata
Nak rijang keumah talo ngon meunang
Teubiet he rakan dum na gata

'Oh ban jideungo haba sulotan
Jiteubiet le yoh nyan bandum panglima
Ateuh guda leugat jipasang
That guransang bandum panglima

Cit hana jan meung jipike
Jitajo le u mideuen Raja
Miseue ureueng jak pileh bungong
Han jan tanyong tajo lanja

Jimat bak jaroe cokma ngon peudeueng
Na miseue ureueng pungo gila
'Oh ban sare troh u teungoh mideuen
Ka meuteumeung Sura Geumira

Yoh nyan ka prang that meuhayak
Rakyat jimeutak han ban publa
Putoh le dua neutak ngon peudeueng
Mate ureueng meuribee laksa

'Oh mate nyan teuka laen
Maken masen nibak nyang ka
Sama Ila pi that guransang
Rakyat neucang seun-seun dua

Meutindeh bangke miseue tanoh cak
Bruek tangkurak meukeuba-keuba
Mate siribee silaksa jiek
Surak ngon deumpek bunyoe tanggoe na

Hana sagai ngilu hate
Siribee mate jiek meulaksa
Uroe ngon malam prang hana teudoh
Meugeureupoh di mideuen Raja

Suara cokma nyum runtoh nanggroe
Prang nyoe bagoe kiamat donya
Deumpek pahlawan di teungoh mideuen
Suara peudeueng that meutaga

Jibeudoh dhoi tanoh teureubang
Raya that prang hana tara
Prang nyoe that bit jipeugajah
Jikeumeung bak tiwah Raja Miga

Paduka Sari that pahlawan
Sireuta deungon Sama Ila
Suara Geumira pi na sajan
Lhee droe pahlawan that guranta

Jiek bisa miseue birang
Rakyat jipandang ube-be seuma
Peudeueng bak jaroe meutoto ujong
Taeu neusayong teungoh tandra

Ri nyang leumah u hadapan
Habeu simpan ban sineuna
Meuteumeung le yoh nyan di teungoh padang
Sabe pahlawan meuen sinyata

Paduka Sari bisa ban seudong
Peudeueng neusayong u teungoh tandra
Keunong guda gajah peutong
Keunong keutupong teuciek keudua

Paduka Sari neucinta hekeumat
Seubab sosah that neucang lasyeuka
Keureuna le that musoh mate
Han tatukri pubicara

Neukeumeung cang musoh lawan
Mayet meutamon ban gunong raya
Teuma neusrom hekeumat u mayang
Troh lam awan Buket Miga

Troh bak Zanggi Juhan Peureudan
Jitren le yoh nyan apui meunyala
Habeu tutong mayet lawan
Dum sikeulian hangoh dum na

Mangat hate lhee droe pahlawan
Keureuna padang prang peungeuh raya
Suara Geumira bisa ban birang
Cokma neusayong u teungoh laksa

Keunong ureueng nyawong hilang
Di teungoh padang mate meulaksa
Sama Ila pantah ban kilat
Neulumpat-lumpat di teungoh tandra

Peudeueng bak jaroe rupa hibat
Neucang rakyat seun-seun dua
Dua buleuen sabe muprang
That gurancang hana tara

Sama Ila tak ngon peudeueng
Han jan ureueng jiseuot haba
Jigrob lam kawan jilumpat u lua
Ban kilat faja lam reudok Zuha

Di sinankeuh dum kalang-kabot
Ladom u likot riwang lam kuta
Seubab jitakot geusama peudeueng
Ban siwah naleueng Sama Ila

Matekeuh ureueng sobhanallah
Dum kafilah sireutoh raja
Nyang ka mate taeu meutamom
Ka ban gunong dalam rimba

Jiteuka le rimueng saktian
Peusalenan Purba Lam Cahya
Jipajoh le bangke meutamom
Miseue bangon jimakeuen lam rimba

Sama Ila meunyum ka payah
Troh le pantah Suara Geumira
Peudeueng bak wie kapak bak uneun
U teungoh mideuen neujak lanja

Neucang rakyat hana meung ngilu
Meung sigeutu han shok sangka
Teungoh neucang rakyat lam kawan
Rimueng saktian sinan sama

Troh le teuma Paduka Sari
Meukab-kab bibi ngon seudong bisa
Suara peudeueng meutaga-tagat
Deungon cokma su meugeunta

Neusayong peudeueng keunan lam tandra
Mate that bha di mideuen Raja
Nyang ladam plueng meukong kayee
Keunong ulee patah lam pha

Na nyang ladam plueng lam rimba
Badeuek seuba dum barang na
Tinggai ureueng nyang meunama
Surot lam kuta nyang raja-raja

Rakyat pahlawan duek lam khimah
Nyang luka patah me lam kuta
Yoh nyan ka prang sobhanallah
Meunyum tiwah lasyeuka raja

Raja sireutoh yoh nyan tiwah prang
Jisurot angkatan di mideuen Raja
Na siteungoh rakyat nyang ka tan
Piyoh angkatan raja dum na

Raja sireutoh meunyum ughah
'Oh jieuh tiwah dum panglima
Leueh nyan jipiyoh di yub khimah
Dang-dang leumah akai bicara

Sigala lasyeuka keumala hekeumat
Dum na rakyat nanggroë Lam Cahya
Sama Ila Paduka Sari
Sajan keumbali Suara Geumira

Tamong lam kuta bak Sulotan
Bak Hukman Raja 'ala
Teutap piyoh uroe malam
Minom makan meusuka-suka

Teuduek haba ureueng muprang
Jinoe laen lon calitra
Haba lon nyoe meutindeh lapeh
Jeh goh habeh laen ka teuka

A L K I S A H wahe rakan
Teuseubot Sulotan LILA PEUKASA
Kisah jinoe MEUREUDAN ZANGGI
SIKANDA PARI SERI PADUKA

MAMBANG SAKTI aneuk na sidroe
Ureueng lakoe ilok rupa
Lila Peukasa teuma geupeunan
That pahlawan hana tara

'Oh troh tanggoih ngo sulotan
Jikrah le yoh nyan rakyat dum na
Dua droe pahlawan jiba sajan
Kheundak beujalan u nanggroe Raja

Sigala 'adi deungon juhan
Rakyat sajan sikureueng ploih laksa
Mubajee zireh keutupong beusoe
Peudeueng bak jaroe tatah peumata

Ateueh guda dum jipasang
Nyang uleebalang ateueh singa
Siteungoh ri ateueh waliman
Nyang biek sulotan ateueh naga

Ladom ateueh gajah meujuhang
Le nyang pawang ateueh geureuda
Lila Peukasa ateueh seurapah
That barollah rakyat Raja

Langkah jicok kutika malam
Saleh bit meunang Lila Peukasa
Padum lawet peujalanan
Sampoe le yoh nyan u mideuen Raja

'Oh ban sare troh u teungoh padang
Teuma jipeudong saboh kuta
'Oh hase kuta jitarek alam
Rakyat sikeulian tamong lam kuta

Seubab jikalon di teungoh padang
Leumah meureuntang sireutoh kuta
Jikalon ngon rakyat that barollah
Hireuen dasyah Lila Peukasa

Raja sireutoh kalon u padang
Ka teuka angkatan meuribee laksa
Deungon kuta saboh jipeudong
Jithee le yoh nyan Lila Peukasa

Raja sireutoh teuma mupakat
Pakri mangat geutanyoe dum na
Bahle tapiyoh dum geutanyoe
Seubab troh keunoe Lila Peukasa

Adak tamuprang pi han ek talawan
Raya saktian aneuk Raja
Bahle taduek dum geutanyoe
Taëu buet jaroe Lila Peukasa

Raja sireutoh sapeue pakat
Jiduek teutap maseng Raja
Hukman kalon u teungoh padang
Kuta manyang troh lam hawa

Teuma neukheun bak panglima prang
Teubiet u padang he panglima
Lon kalon kuta di teungoh padang
Saleh soe datang aneuk Raja

Sama Ila deungo haba sulotan
Leugat jipasang ateueh guda
Suara Geumira Paduka Sari
Rakyat rame nanggroe lam Cahya

Leugat jiteubiet u teungoh mideuen
Dum sikeulian rakyat meulaksa
Mubajee zireh dum jipakoe
Keutupong beusoe ateueh keupala

Leugat jituju u teungoh padang
Piyoh le yoh nyan di mideuen Raja
Teudong meuseueh-seueh di teungoh mideuen
Musta'id ngon alat sinyata

Meuseundi-seundi rupa peukayan
Geumeureulapan ngon meukuta
Bandum rakyat that guransang
Jiheh lawan dalam kuta

Soe na lam kuta teubiet jinoe
Nyoe pat kamoe di mideuen Raja
Bek that uga peuleumah bako
Teubiet he po u mideuen Raja

Mangat taeu kupoh pahlawan
Nak mangat tatuban kamoe Indra
Lila Peukasa deungo haba meunan
Beungeh le yoh nyan hu ngon mata

Ho ka gata dum na pahlawan
Teubiet rijang u mideuen Raja
Pahlawan deungo haba sulotan
Leugat jipasang ateueh guda

Sajan ngon rakyat meuribee katoe
Teubiet le jinoe u mideuen Raja
Padum 'adi deungon juhan
Rakyat sikeulian teubiet jak gaza

Mubajee zireh keutupong beusoe
Peudeueng bak jaroe bandum rata
Leugat jijak u teungoh padang
Jidong meureuntang rakyat meulaksa

Meuseundi-seundi rupa peukayan
Geumeureulapan cahya meukuta
Teudong meuseueh-seueh di teungoh padang
Uleebalang rakyat meulaksa

Sideh jiek sinoe jijak
Prang meuhayak hana tara
Sideh cokma sinoe peudeueng
Nyan baro lom prang that raya

Sideh pi jiplueng sinoe pi jiplueng
Yoh nyan meuteumeung dua tandra
Maseng-maseng mita lawan
Dum sikeulian meunan juga

'Oh ban meuteumeung di teungoh padang
Meungadu saktian sabe peukasa
Pahlawan dua that guransang
Sidroe geupeunan GEUMPA GEUMPITA

Teuma nyang dua GEUREUDAN 'ALAM
That pahlawan hana tara
Dua droe pahlawan peulheueh sakti
Teubiet gogasi di teungoh tandra

Le that jipoh rakyat di mideuen
Leumah jikalon le Sama Ila
Jicok saboh panah saktian
Jisrom lam awan pantah sigra

Na sikeujab panah di manyang
Jeuet le yoh nyan binatang geureuda
Geureuda jitren leugat u bumoe
Gogasi bunoe jijak mita

Habeh jipoh dum gogasi
Mate sare di mideuen Raja
Geureudan 'Alam cok panah laen
Jipeulheueh he palem jeuet keu naga

Naga hekeumat ka peunoh mideuen
Jipajoh ureueng di teungoh tandra
Paduka Sari kalon meunan
Neupeulheueh le yoh nyan panah sigra

Aneuk panah nyan ka jeuet keu kleueng
Jiteureubang u mideuen raja
Gukee tajam miseue tajoe
Jiklok le jinoe mata naga

Kleueng pi le that bukon bubarang
Peunoh padang dalam hawa
Saboh naga kleueng sireutoh
Meuseunoh pajoh aneuk mata

Habeh buta naga sinaroe
Sakti geupujoe pahlawan Miga
Geureudan 'Alam peudeueng bak jaroe
Meuteumeung le jinoe Suara Geumira

Suara Geumira teuma tanyong
Soe he bungong nama gata
Lon kalon laku that pahlawan
Jinoe he rakan peugah nama

Teuma seuot Geureudan 'Alam
Tadeungo lon kheun he syeedara
Nama ulon Geureudan 'Alam
Di baroh sulotan Lila Peukasa

Bak uroe nyoe lon masok prang
Meurumpok lawan teuma ngon gata
Jinoe he polem lon peuingat
Jak tasurot dalam kuta

Peuteubiet keunoe Budiman Khanda
Meung han mate hana bila
Meung han tabri gata mupaloe
Bak uroe nyoe hilang nyawa

Jinoe nyang get peugah sinan
Adak mate tuan na meusoe nama
Suara Geumira seuot le pantah
Peue ka peugah nyang kon haba

Peue kapeugah Geureudan 'Alam
Nyang kon tuan kameuhaba
Pakri han malee kajeuet peugah
That beurakah narit gata

Kasarab mate lon di mideuen
Nyang jeuet takheun leupah haba
Lon nyoe agam kon ureueng binoe
Keurajeuen kamoe nanggroe lam Cahya

Han lon takot meung dum rupa kah
Bak that kapeugah beurangpeue haba
Suara Miga nama lon tuan
Han soe lawan ube nyang ka

bit kaeu muda umu that lawi
Habeu lon tukri ka'idah Raja
Bek tapeukeujot ngon sarong peudeueng
Lon kon ureueng takot keu taga

Sireutoh raja ka lon lawan prang
Han soe linteueung lantak 'an tuha
Geureudan Raja kalon lawan prang
Jitak le yoh nyan pantah sigra

Keunong jitak ubak baho
Meuk meuhambo na sigunca
Suara Geumira kheun bek kagaro
He adoe teungku gatai lon hana

Jinoe katheun kutak balah
Bak ingat kah hilang nyawa
Sireuta neubet cokma meulayang
Geureudan 'Alam keunong keupala

Reubah meugule di teungoh mideuen
Hanco tuleueng jeuet keu sira
Geumpa Geumpita kalon meunan
Leugat jipasang ateueh guda

Lanja jijak u teungoh mideuen
Jicang ureueng meuribee laksa
Ri nyang leumah u hadapan
Habehe jisimpan rakyat dum na

Sama Ila kalon laku meunan
Leugat jipasang ateueh guda
Jicang rakyat meuribee katoe
Meuteumeung le jinoe Geumpa Geumpita

Geumpita tanyong pantah-pantah
Jinoe tapeugah soe nan gata
Adak mate gata di padang
Peugah he rakan soebu nama

Teuma seuot Sama Ila
Deungo lon kata wahe cabang
Jinoe jak leh woe bak sulotan
Yue teubiet u mideuen Raja gata

Ngon gata adoe han sabe lawan
Sigo kuhantam mate pana
Sama Ila nama kamoe
Peugah jinoe nama digata

Geumpita 'Alam seuot le rijang
Tadeungo lon kheun ubak gata
Geumpita 'Alam nama dikamoe
Bak ingat jinoe gata binasa

'Oh ban neudeungo haba meunan
Neutak le yoh nyan pantah sigra
Keunong neutak ateueh peurise
Miseue bade geulanteue teuka

Geumpa Geumpita teuma balah
Neutheun pantah peurise raya
Na nyum hanco rasa beukah
That amarah Geumpa Geumpita

Sama Ila tak le balah
Keunong reubah Geumpa Geumpita
Reubah meugule sinan di mideuen
Surak ureueng tandra Diwa

Lila Peukasa eu pahlawan
Leugat jipasang ateuh guda
Leugat jijak u teungoh padang
Rakyat sikeulian meuribee laksa

Mubajee zireh keutupong beusoe
Peudeueng bak jaroe puteh mata
Meuseundi-seundi rupa peukayan
Geumeureulapan cahya meukuta

Rupa pi jroh lang-geumilang
Saleh biet meunang meuteumeung nama
Leugat jijak u teungoh kawan
Habeh jicang rakyat dum na

Neucang ureueng di teungoh mideuen
Ban siwah naleueng ngon cempala
'Oh ban meuteumeung ngon Paduka Sari
Meungadu sakti di mideuen Raja

Paduka Sari neuingat rijang
Zanggi Peureudan le neucinta
Jeu et le laot meugeulumbang
Di teungoh padang mideuen Raja

Dalam laot nyan buya sinaroe
Sakti geupujoe ureueng lam Cahya
Lila Peukasa ka lam laot
Neungieng u likot buya keumeung wa

Neuingat le Meureudan Zanggi
Sikandan Pari Sari Paduka
Laot pi tho deungon rijang
Buya sibirang mate dum pana

'Oh jikalon le Paduka Sari
Jisuet peudeueng le jicang lanja
Lila Peukasa jitak bak rueng
Reubah teulinteueng neubeudoh sigra

Bek kameuseunda deungon wayang
Kah pahlawan han sabe padra
Kajak meuhei Hukman 'Alam
Nyang sabe wadan u mideuen Raja

Jinoe katheun kutak balah
Bak ingat kah hilang nyawa
Teuma neusayong peudeueng panyang
Neutak rijang Sari Paduka

Paduka Sari pantah ban kilat
Neugrob lumpat u dalam hawa
Teuma beungeh Lila Peukasa
Neucinta le sigra hekeumat donya

Jitren teuma geulanteue cot uroe
Sang reuloh nanggroe di mideuen Raja
Sret le lanja Paduka Sari
Ka neutak le uleh Raja

Neutak bak ulee troh u baho
Meuk meuhambo na sigunca
Bek tatak lon wahe Raja
Pakon meuseunda gatai lon hana

Tatheun keunan wahe sulotan
Nyoe kireman Raja Miga
Nyoe neuyue jok bungong sitangke
Budiman Khandi bek tameuhawa

Peudeueng meulayang jikeumeung sama
Lila Peukasa pantah panika
Meunan-meunan ureueng dua droe
Troh le jinoe Suara Geumira

Suara Geumira peudeueng bak jaroe
Neucinta jinoe Peureuba Lila
Neupanah le dalam awan
Tren saktian apui meunyal

Keunong u ateuh Lila Peukasa
Neucinta sigra hekeumat donya
Tren le ujeuen nyang raya that
Apui samat padam pana

Dua pahlawan mubalah-balah
Kureueng leubeh deungon Raja
Sama Ila di padang prang
Le that neucang rakyat Peukasa

Mate rakyat ulee-ili
Meutindeh bangke di mideuen Raja
Ile darah miseue ie krueng
Darah ureueng silangue guda

Sama Ila pike rijang
Sosah tameucang di mideuen Raja
Seubab bangke le that meutamon
Miseue bangon tabloh lam paya

Bah kucinta Zanggi Meureudan
Juhan lam awan nanggroe Miga
Troh le teuma rimueng saktian
U hadapan Sama Ila

Jipeuseumbah ka troh laman
Peue Hukman wahe Raja
Teuma neupeugah le Sama Ila
U mideuen Raja tajak lanja

Nyang ka pana musuh di padang
Tamakeuen simpan uleh gata
Meuhan han jeuet kucang musoh
Miseue ureueng bloh dalam paya

'Oh ban jideungo haba meunan
Jigrob lambong binatang rimba
Teuma jipeutoe rimueng saktian
Jipajoh le yoh nyan bangke dum na

Deungon siat habeh jipajoh
Binatang utoh sakti geupuja
Lila Peukasa hate saket that
Jibeuet hekeumat saboh do'a

Neuhasek ulee neupet ngon mata
Do'a neubaca tujoh seun lingka
Neucinta le Meureudan Zanggi
Sikanda Pari Sari Paduka

Troh le saboh aneuk naga
Neupeulara le Raja Peujasa
Habeh neuwasiet ngon amanat
Neupeuingat bak aneuk naga

Hukman 'Alam di meuligoe
Sajan Putroe meusuka-suka
Teungoh meusyae deungon mupanton
Hana neutren lam astana

Meuseunda-seunda lam meuligoe
Geunab uroe hana reuda
Meunankeuh buet Banta seudang
Prang di mideuen hana neukira

Peuturot napsu peuhabeh deundam
Lasyeuka pahlawan habeh pana
Bak pihak na tulong Tuhan
Na saktian Peureuba Lila

Seubab Zanggi Peureudan Juhan
Ek neulawan prang di mideuen Raja
Teutapi lale ateueh buet prang
Banta seudang umu muda

Hana neuthee keunong isyarat
Keunong hekeumat Lila Peukasa
Lila Peukasa neumuprang di mideuen
Hateneuh rawan u astana

Seubab Hukman sajan Putroe
Dalam meuligoe wayang seunda
Burong unggah jidong lam awan
Jikalon prang di mideuen Raja

Jingieng lagee keulakuan
Jidong di manyang leumah dum na
Jipandang bak Hukman 'Alam
Suroh sulotan neuyue jaga

Budiman Khande pi jipandang
Mantong sajan Banta Muda
'Oh deueh jieu mantong sajan
Unggah Budiman seutia raya

Keureuna jikalon prang meuguncang
Di teungoh midan mate meukeuba
Nyankeuh seubab han seunang hate
Keu Putroe Khande aneuk miet muda

Lila Peukasa beuet lom hekeumat
Neulambong isyarat dalam hawa
Deungon siat naga jimeusu
Meuseue geulanteue tren u donya

Teukeujot rakyat sobhanallah
Tamse ulah kiamat donya
Badan raya hana bagoe
Phon di bumoe troh lam hawa

Ngon pruet raya hana bagoe
Siblah naggroe gob peuhaba
Atot lipat sireutoh nam
Miseue panyang meureula-reula

Gigoe tajam ban beusoe wajah
Raya babah meulaot Sikatra
Lidah panyang that han tatukri
Di lua bibi limong ploh deupa

'Oh jigeuriwat naga di mideuen
Plueng dum ureueng teumakot raya
Hukman 'Alam laloe bingong
Neukalon guransang Lila Peukasa

Neumeung marit babah han teuhah
Troh le pantah Putroe Muda
Budiman Khande marit rijang
Pakon meunan po meukuta

Teutop babah teugunci gigoe
Ngon Tuan Putroe lam astana
Di sinankeuh dua meugulong-gulong
Ngon bintang tanglong sinan meuwa-wa

Teungoh-teungoh ka'a ka'u
Neukalon laju jireutek pha
Ji'uet rakyat kuta sajan
Dum na pahlawan ka lam pruet naga

Raja sireutoh bandum ka keunan
Lam pruet naga nyan rakyat meulaksa
Hukman 'Alam ngon Tuan Putroe
Dum sinaroe ka lam pruet naga

Lila Peukasa peuturot hate
Jimeung poh mate Putroe ngon Raja
Nyankeuh seubab jikhianat
Raja laknat hana bicara

Hana jituri ban kheun Tuhan
Peuturot nyan napsu hawa
Tren peureuman nibak Tuhan
Peuet peukara han neubri keu hamba

Cuba gata pike bi'at
Peue beungeh that laen tamita
Patkeuh hana ureueng binoe
Meung na lakoe nakeuh dara

Meung na Raja nakeuh Putroe
Meuaneuk dudoe na aneukeunda
Tiep-tiep nanggroe pi mumeunan
Adak lam awan sama juga

Seubab hate that keu Putroe
Jikira sampoe meukeusud Raja
Uroe malam bandua si
Budiman Khandi jimeuhawa

Teuingat-ingat dalam lumpoe
Keu Tuan Putroe na nyum di mata
Nyankeuh seubab han troh hate
Jiyue 'uet le ubak naga

Habeh bandum ureueng di mideuen
Tinggai meung rakan Lila Peukasa
Nyang laen dum kuta meuligoe
Ban sinaroe meuriam lila

Habeh peukakah alat muprang
Dum sibarang ka lam pruet naga
Habeh bandum sikeulian
Jipeureulan uleh naga

'Ajayeb sikalibuet di Tuhan
Ek jeuet meunan dilee masa
Lila Peukasa hate mangat
Keureuna rakyat ka lam pruet naga

Lila Peukasa leugat riwang
Tamong u dalam sikutika
Galak that hate hana sakri
Geukira han keuji akhe masa

Pioh lam kuta dum angkatan
Preh-preh lawan saleh lom teuka
Teuduek haba nyoe dilee siat
Laen riwayat lon calitra

AMMABAKDU DUDOE NIBAK NYAN
Unggah teureubang lon calitra
Unggah kalon teuma u mideuen
Jikalon ka tan le ngon kuta

Sigala rakyat Banta Hukman
Habeh jipeureulan uleh naga
Leugat u Tasek Pawoh Zanggi
Bak Meureudan Pari Peureuba Diwa

Lila Peureuba tanyong bak unggah
Peue buet keunoe kah unggah Raja
Pat kakeubah Hukman 'Alam
Aneuk sulotan Gunong Miga

Teuma seuot cicem unggah
Tadeungo lon peugah po meukuta
Ampon Tuanku meuribee ampon
Tadeungo lon po meukuta

Jinoe Hukman Tuanku ampon
Ka jipeureulan uleh naga
Ngon Lila Peukasa meungadu sakti
Ka ji'uet le panglima naga

Meuseunoh Putroe Budiman Khande
Iram Keusumi Putroe jroh rupa
Meureudan Pari teuma kheun meunoe
Tajak jinoe u Buket Miga

Kapeugah teuma bak Raja nanggroe nyan
Diu Palinggam sulotan Miga
Kakheun hana le Hukman 'Alam
Ka keunong saktian Lila Peukasa

Adak na malee ngon maluan
Yue tren bak rijang jak tuntutan bila
Unggah deungo haba meunan
Jiteureubang dalam hawa

Tujoh uroe unggah teureubang
Troh le yoh nyan u Buket Miga
Diu Palinggam yoh masa nyan
Teungoh seumayam di ateuh keta

Jingadab uleh dum gunangan
Putroe pi sajan sinan bandua
Unggah pi troh u nab sulotan
Jidong le yoh nyan bak tameh keta

Putroe Kayangan eu teuka unggah
Hireuen dasyah Putroe jroh rupa
Unggah jidong u nab sulotan
Jibeu-et tangan ateuh jeumala

Dua sayeueb laju jibet
Laju bak teuot seumbah Raja
Ampon Tuanku meukuta awan
Ampon laman po meukuta

Lon nyoe nibak Hukman 'Alam
Nyang tapa di dalam Tasek Peureuba
Jinoe Tuanku Hukman 'Alam
Ka jipeureulan uleh naga

Keunong sakti Mambang Zanggi
Meungadu sakti ngon Lila Peukasa
Adak na malee Tuanku ampon
Jinoe neutren jak poh bila

'Oh neudeungo haba meunan
Diu Palinggam hu ngon mata
Yo ngon badan miseue geumpa
Jiek bisa ubak muka

'Oh ka puleh nibak amarah
Neuhei le unggah teuma lom sigra
Wahe unggah nyang budiman
Bit Hukman ka ji'uet le naga

Teuma jiseuot unggah budiman
Ampon laman meukuta donya
Han tom Tuanku lon meusulet
Silama udeb meukuta donya

Keureuna patek dong lam awan
Neuyue kalon prang di mideuen Raja
Meung nyo meunan bah kujak muprang
Kujak lawan Lila Peukasa

Jih kugantung nanggroe kureuloh
Aneuk peurumoh kupubloe ba
Lom neumarit Diu Palinggam
Ngon Putroe kayangan di ateueh keta

Neuduek deungon lhee na sajan
Ngon cut intan Putroe Miga
Idin Cutnyak bandua droe
Lon jak jinoe eu aneukeunda

Bak le gaseh he Putroe Intan
Adak jeuet prang talakee do'a
Hate han seunang he Putroe jeunulang
Hukman 'Alam ka jime le naga

Seuot Putroe Indra Kayangan
Ngon cut Intan Putroe Miga
Hukman Tuanku neuthee han mate
Ngon tulong Rabbi nyang peulara

Bek Tuanku neujak keudroe
Aneuk lon sidroe Tuhan peulara
Jinoe Tuanku neupeugot surat
Neuyue intat jeueb-jeueb raja

Neuyue tuntutan bila Hukman
Bak Sulotan Raja dum na
Neubri surat u Buket Zibon
Bak Raja Milon nyang peukasa

Saboh neukirem keu ayah laman
Sa'id Meureudan nyang sakti raya
Saboh neukirem u Biram Peutawi
Neuyue adu sakti bak Raja donya

Meung nyo han ek ngon Raja nyan
Patot janjongan keudroe neugaza
Diu Palinggam deungo haba Putroe
Surat le jinoe pantah sigra

Mumeunoe haba di dalam surat
Saleuem nibak raja Miga
Dapat disampe uleh Tuhan
Keupada Tuan syeedara hamba

Bahwa sikarang hamba katakan
Padamu Tuan syeedara kita
Aneukeunda lon Banta Hukman
Ka jitawan le Lila Peukasa

Ubak naga jiyue peureulan
Meuseunoh cut intan aneuk Raja
Gaseh sayang akan laman
Tuan gasehan jak tuntutan bila

Jinoe tajak prang duson Beudian
Harap lontuan padamu jua
Nanggroejih taprang tapoh sulotan
Zanggi Meureudan bila aneukeunda

Meunankeuh haba di dalam surat
Neuyue jak intat u tanoh donya
Nibak unggah neubri kireman
Jitren le yoh nyan u tanoh donya

Leugat bak Raja Sa'id Meureudan
Jitiek kireman u nab Raja
Sa'id Meureudan kalon surat
Neuploh leugat pantah sigra

'Oh ban neukalon haba lam surat
Neueu alamat saleuem Raja
Usi Tapa seuot sulotan
Ampon laman po meukuta

Patot Tuanku neujak muprang
Neupeuleumah saktian sumpah seutia
Sa'id meureudan deungo haba meunan
Neuyue krah le yoh nyan jeueb-jeueb Raja

Sa'id Meureudan teungoh krah rakyat
Milon troh surat unggah bawa
Unab Raja jitiek surat
Jipiyoh leugat bak Raja Raya

Troh bak Raja Peutawi Biram
Jibri kireman ubak Raja
'Oh lheueh nyan jipo ubak Hukman
Jitamong yoh nyan lam pruet naga

Raja Milon kalon surat
Suroh halarat jak tuntutan bila
'Oh lheueh nyan jikrah sigala rakyat
Jikheundak beurangkat jak pula guna

Sulotan Biram kalon surat
Neudeungo narit Raja Miga
'Oh lheueh nyan jikrah sigala rakyat
Kheundak beurangkat jak tuntutan bila

Teuduek haba nyoe dilee siat
Laen riwayat lon calitra
Keu Lila Peukasa jinoe lon seubot
Tadeungo he pocut dum na gata

Lila Peukasa mantong di padang
'Oh lheueh nyan jiriwang woe u tangga
Naga sakti jiteureubang
Jijak meureundam lam laot raya

U tengoh laot bak ie hitam
Jijak meureundam naga raya
Lila Peukasa woe u nanggroe
Rakyat meukatoe sajan sireuta

Nyang ka mate dum pahlawan
Nyang-nyang rakan han teukira
Jiwoe u nanggroe hate seunang
Prang ka meunang aneuk Raja

Troh bak Raja jiwoe leugat
Hate mangat poteu Raja
Mambang Sakti tanyong soe meunang
Wahe bintang rijang tagisa

Pakri ka prang aneuk boh hate
Saleh soe talo bijeh mata
Lila Peukasa seuot le rijang
Kamoe riwang ngon meunang saja

Talo Tuanku Hukman 'Alam
Aneuk sulotan di Gunong Miga
Ka ji'uet le naga hekeumat
U teungoh laot jinoe ka jiba

Mambang Sakti deungo haba meunan
Ngon aneuk Sulotan Raja Miga
Maklum aneuk Diu Palinggam
Baginda Sulotan ubah ie muka

Seubab ka muphom Diu Palinggam
Taklok ensan jeueb-jeueb raja
Phon di donya troh lam awan
Diu Palinggam sakti geupuja

Leubeh nibak Sulotan Peutawi
Raya that sakti Raja Miga
'Oh lheueh nyan jikheun bak pahlawan
Dum sikeulian raja-raja

Habeh jiyue krah jeueb-jeueb sulotan
Tayue tamong bandum lam tapa
Jiyue tamong bandum lam khaluet
Geutanyoe meuhat teuka baya

Diu Palinggam meuhat troh keunoe
Jiprang nanggroe bila aneukeunda
Diu Palinggam hana soe sagang
Meuhat jiprang jireuloh kuta

'Oh troh haba bak sulotan
Dum uleebalang tamong lam tapa
Ladom tanom droe dalam bumoe
Ladom lam apui hu meunyala

Ladom tapa ateueh mata kreh
Sangat 'areh hana tara
Teutap Raja dalam tapaan
Muwoe karangan haba nyang ka

Sa'id Meureudan jikrah rakyat
Habeh meusapat tujoh ploh raja
Sare hase dum sikeulian
Baginda Sulotan hate suka

Mubajee zireh keutupong beusoe
Peudeueng bak jaroe alat jiba
Meuseundi-seundi rupa peukayan
Geumeureulapan deungon meukuta

Sa'id Meureudan yoh nyan beurangkat
Sajan ngon rakyat meuribee laksa
Leugat jituju u duson Beudian
'Adi ngon juhan sajan sireuta

Teuduek haba Sa'id Meureudan
Zamilon Awan lon calitra
Sare habeh dum tren rakyat
Hate suka that Raja Raya

Mubajee zireh keutupong beusoe
Dum sinaroe tuha muda
Sare habeh ka meusapat
'Oh lheueh nyan beurangkat ngon balatandra

Leugat jituju u Buket Beudian
'Adi ngon juhan meuribee laksa
Maseng-maseng peudeueng bak jaroe
Dum sinaroe ateueh guda

Raja milon ateueh guda plang
Beurangkat sulotan sambat seutia
Teuduek haba Zamilon Awan
Peutawi Biram lon calitra



Raja jinoe jikrah rakyat
Jikheundak beurangkat jak poh bila
Habeh teuka rakyat keunan
Dum sikeulian alat jiba

Mubajee zireh keutupong beusoe
Peudeueng bak jaroe puteh mata
Sare habeh dum meupasat
'Oh lheueh nyan beurangkat Raja Raya

Meuseundi-seundi rupa peukayan
Leugat beujalan rot lam rimba
Neujak eu sabat Bulia Zakari
Raja nyang sakti Bulia Geumira

Raja Engkong nyang that teubileueng
'Oh lheueh nyan meuteumeung dum raja rimba
Bandum beurangkat sajan sulotan
Jak tuntutan bilaan Raja Miga

Leugat jituju u nanggroe Beudian
Rame angkatan sukee Raja Kra
Padum lawet peujalanan
Sampoe le yoh nyan nanggroe Raja

Raja Milon ngon Sa'id Meureudan
Sulotan Biram ngon Raja Kra
Bandum sigo troh u padang
Teuma jipeudong lhee boh kuta

Tamong rakyat dum u dalam
Dang-kadang mita bicara
Raja limong droe teuma mupakat
Takirem surat dalam kuta

Taboh narit nyang krang-ceukang
Nanggroejih taprang yue peukong kuta
Raja limong droe sapeue pakat
Nyang peugot surat Usi Tapa

Meunoe haba dalam surat
Saleuem nibak Raja 'Ala
Saleuem-saleuem Biram Peutawi
Nyang Raja Sakti meusyehu nama

Sireuta saleuem Sa'id Meureudan
Zamilon Awan sajan sireuta
Dan lagi saleuem Bulia Zakari
Raja Usuli Bulia Geumira

'Oh habeh nyan saleuem juhan pahlawan
Nyang jimeunan Lanta Waila
Dapat disampaikan surat ini
Keupada doli Raja mulia

Habeh kuteubah teutuleh syahdan
Sahya maklumkan padamu jua
Wahe Raja Mambang Sakti
Saleuem doli keupada gata

Sikarang ini sahya katakan
Padamu tuan syeedara hamba
Keureuna Banta Hukman 'Alam
Dibunohkan Lila Peukasa

Sikarang ini sahya datang
Suroh sulotan jak tuntutan bila
Meung na takeumeung bek reuloh nanggroe
Peuteubiet keunoe Lila Peukasa

Meung han meunan nanggroe teuh kuprang
Han ek soe lawan sukee Raja Kra
Meunyo takeumeung bek rusak nanggroe
Peuteubiet keunoe pantah sigra

Meung han tabri tapeukong teumpat
Takrah rakyat dum peutua
Kuta bak kong taboh pacang
Nanggroe teuh kuprang hana syok sangka

'Oh noe habeh tamat kalam
Neulipat le yoh nyan pantah sigra
Bak pahlawan neuyue me surat
Nyang that kuat panglima kra

MILON TUANGGA pahlawan meuceh
Di Batee Puteh teumpat jiraja
Surat jicok jimat bak tangan
Leugat beujalan dalam kuta

Seubab jikalon rupa that hibat
Yo meutat-tat dum na tandra
Mambang Sakti yoh masa nyan
Teungoh seumayam bak singgasana

Jingadab uleh meuntroe uleebalang
Ka troh keunan uleebalang Kra
Leugat jiek bak bale keumang
Jiduek sinan di nab Raja

Raja kalon Kra that hibat
Bulee meukilat bagoe suasa
Ubak Raja jibri surat
'Oh lheueh nyan jilipat pantah sigra

Di leuen bale na saboh kulam
Bak bineh nyan batee raya
Dua blah hah buju teuma ngon linteueng
Teubai bidéueng na lhee deupa

Milon Tuangga mat ngon jaroe
Jisrom le jinoe dalam hawa
Dum na rakyat hireun teuceungong
Seubab jikalon that peukasa

Mambang Sakti beuet le surat
Jideungo narit sangat that bisa
'Oh lheueh nyan teuma jikaleh surat
Neuboh narit nyang sabe haba

Meunoe haba di dalam surat
Saleuem nibak Raja Raya
Dapat disampai uleh Tuhan
Keupada tangan nyang mulia

Keupada tangan limong sulotan
Nyang le saktian hana tara
Wahe Raja Peutawi Biram
Ampon laman po meukuta

Dan lagi he Sa'id Meureudan
Milon Eungkong deungon Kra
Saleuem Tuanku kiremkan
Laman sahya angkatkan ateueh keupala

Teuma teupangge Gambaran Syah
Nyang that meugah hana tara
'Oh lheueh nyan teupangge Hamaran syah
Sajan kafilah raja-raja

Habeh jikrah dum sulotan
Baginda le yoh nyan hei panglima
He panglima uleebalang
Teubiet u padang he syeedara

Teuma teubiet sidroe pahlawan
Nyang le saktian hana tara
Geurasi nan Kasuran syah
Sajan kafilah teubiet jak gaza

Meuseundi-seundi rupa peukayan
'Adi ngon juhan meuribee laksa
Mubajee zireh keutupong beusoe
Peudeung bak jaroe ladam khanja

Ateueh guda dum jipasang
Teubiet u padang jak lawan tandra
Teuduek meuseueh-seueh di teungoh padang
Musta'id ngon alat sinyata

Sireuta jideumpek ngon jisurak
Meugalak-galak di mideuen Raja
Sideh jiek sinoe jijak
Prang meusigak hana tara

Sinoe jideumpek sideh jisurak
Hate galak rakyat dum na
Sideh jiek lom sinoe jijak
Yoh nyan meurumpok dua tandra

Sideh reudok sinoe pi reudok
Saleh bit tok ujeuen raya
Sideh jipeusak sinoe jipeusak
Deumpek ngon surak that meutaga

Geugap gumpita di teungoh mideuen
Jimeukab limpeuen deungon kala
Yoh nyan meuteumeung dua pihak
Prang meuhayak di mideuen Raja

Maseng-maseng mita lawan
Nyang sabe wadan meuteumeung mata
Nyang uleebalang sabe uleebalang
'Adi ngon juhan meunan juga

Nyang pahlawan sabe pahlawan
Meuntroe ngon bujang mumeunan juga
Nyang di rakyat sabe rakyat
Jilumpat lumpat di mideuen Raja

Sinoe that seuu sideh guransang
Di teungoh padang meuen sinyata
Ali meureudan, Ahmad Zamhari
That beurani hana tara

Ahmad Zamhari ingat saktian
Keureuna mula prang di mideueng Raja
Neusrom guliga u dalam awan
Sret bungong peukan u mideuen Raja

Puteh meutabu dalam mideuen prang
Lasyeuka lawan meuseunoh bunga
Meudilee-dilee meureubot-reubot
Jisangka bungong tok bak Putroe Indra

'Oh troh jimat le bak jaroé
Jicom sinaroé teuma bunga
Ladom jiboh dalam ulee
Nak mangat bee bak jikira

Na treb siat lheueh nibak nyan
Teuka deumam dum lasyeuka
Meutamah lom saket ulee
Seubab mangat bee bungong geupuja

Ahmad Zamhari that guransang
Guda neupasang rijang sigra
Teuma neuk ateuh guda plang
Neutarek keukang u dalam tandra

Nibak jaroe cokma ngon peudeueng
Ban aneuk kleueng utoh sama
Cantek pi that ngon ceureudek
Bak neumeutak guna biasa

Neucang rakyat di teungoh mideuen
Ri meuteumeung habeh seureupha
Usi Tapa pi that pahlawan
Di teungoh padang neucang lasyeuka

Mate le that ureueng po nanggroe
Ngon siuroe mate meulaksa
Kasuran Syah kalon meunan
Leugat jipasang u teungoh tandra

Neucinta le hekeumat pulesan
Bak muwoe mideuen ngon lasyeuka
Neubaca do'a meuriwang-riwang
Bungong peukan hilang dum na

Lasyeuka han le saket badan
Ka muwoe ban miseue nyang ka
Ngon Usi Tapa meuteumeung le
Meungadu sakti sabe Raja

Mambang Sakti pangge angkatan
habeh troh keunan dum sireuta
Ube nyang ka keunan jimuprang
U teungoh padang jijak lanja

Adoe Raja Juhan 'Alam Syah
Nyan pi ka troh u mideuen Raja
Jikarat prang jipeugajah
'Oh lheueh nyan tiwah ureueng phon gaza

Tiwah tandra Raja datang
Ka guransang ureueng po banda
Bulia Geumira eu tiwah rakan
Jiteubiet le yoh nyan dum sukee Kra

Lanja jijak u teungoh padang
Rakyat sajan meuribee laksa
Lanta Waila jiteubiet u mideuen
Sajan-sajan deungon Raja

Dua blah bangsa teubiet sajan
Sukee Eungkong nyang that peukasa
Nyankeuh sukee nyang teubileueng
Watee u mideuen han ek soe sangga

Bandum habeh teubiet u mideuen
Tinggai Sulotan dalam kuta
Raja yue jak tamasok prang
Dum sikeulian tuha muda

Sideh pi rame di teungoh padang
Sinoe pi hitam di mideuen Raja
Juhan 'alam Syah adoe sulotan
Amarah yoh nyan hu ngon mata

Neucinta le hekeumat Beudian
Tren le rijang sigra-sigra
Tren le angen puteng beuliong
Habeh jilambong tandra Raja

Habeh cre-bre saboh saho
Ladom teubapo dalam rimba
Ladom mate keunong angen nyan
Badan hitam jiek bisa

Guransang that Juhan 'Alam Syah
Leugat pantah neupasang guda
Neumat keukang neupeuseunang
Dalam kawan neujak gaza

Dalam kawan Kra leugat jipasang
Peudeueng bak tangan panyang that mata
Di teungoh kawan peudeueng jisayong
Ulee puntong dum rakyat Kra

Jisayong wie deungon uneun
Peungeuh mideuen mate meulaksa
Meurhaba Syah pi that pahlawan
Jijak lam kawan Milon meulaksa

Peudeueng bak jaroe mata ube bleuet
Jicang rakyat meuribee laksa
Ri nyang meuteumeung u hadapan
Dum sikeulian habeh pana

Darah ile miseue ie krueng
Darah ureueng darah guda
Peureudan Syahi peudeueng bak jaroe
Jipoh le jinoo rakyat meulaksa

Meuhubo-hubo di teungoh padang
That guransang rakyat dum na
Jipoh rakyat Peutawi Biram
Dum sikeulian mate meukeuba

Ho jipeukeue habeh ranab
Mate le that nyang sukee Kra
Keumala 'alam Syah that beurani
Lam tandra Pari jipasang guda

Nibak jaroe cokma ngon peudeueng
Ban siwah naleueng pantah sama-sama
Le that mate rakyat di mideuen
Jitak ngon peudeueng putoh keudua

Jipoh ngon cokma hanco tuleueng
Darah meukeubeueng bagoe ie raya
'Oh lheueh nyan tiwah rakyat nyang datang
Seubab guransang ureueng po banda

Bandum jisurot u likot pahlawan
Han ek jilawan tandra Raja
Amarah teuma Meureudan Ali
Seubab mate rakyat meulaksa

Meureudan Ali kalon mumeunan
Ka jeuet saktian ureueng po banda
Neubaca le do'a peunuleh
Tujoh seun habeh neupet ngon mata

Habeh gadoh hekeumat nyang datang
Keumbali rijang tandra lasyeuka
Teuma neubalah hekeumat nyang laen
Ali meureudan sakti raya

Neusrom u ateueh le lam awan
Tren le ujeuen boh keureuma
Sret bak padang Zanggi Meureudan
Jipajoh le yoh nyan le lasyeuka

Meuseunoh-seunoh meudilee-dilee
Seubab boh kayee mameh rasa
Na sikeujab lheueh nibak nyan
Saket sikeulian dum lasyeuka

Saket ulee teuka mumang
Teuma teusumpom di mideuen Raja
Nyang hana piyoh ladam lasyeuka
Aneuk keureuma jimeusuara

Jimeusu ban beude sinampang
Keunong badan dum lasyeuka
Han jituho le meusilee
Lam-lam bajee meusuara

Ladam jiplueng jijak meusom
Meukeutum lom keunong di dada
Meureudan Ali that guransang
Neumeung meucang ngon ureueng po banda

Ateueh guda leugat neupasang
U teungoh padang neujak gaza
'Oh bansare troh u teungoh mideuen
Neujak linteueung pahlawan Raja

Teuma meuteumeung deungon Juhan 'Alam Syah
Sabe gagah meuteumeung dua
Meureudan Ali yoh nyan teumanyong
Soe he bungong nama gata

Lon eu le that tapoh rakyat
Jinoe he sabat peugah nama
Citmeunan patot kaidah prang
Wajeb peugah nan di mideuen Raja

Keureuna prang that meuseuke
Sidroe mate dalam dua
Nyankeuh seubab lon tanyong nan
Peugah rijang he syeedara

Teuma seuot Juhan 'Alam Syah
Tadeungo lon peugah he syeedara
Lon nyoe adoe baginda sulotan
Juhan 'Alam Syah geurasi nama

Ube nyang ka hana soe lawan
Treb that rakan ulon jak tapa
Dua blah thon umu lon seudang
Meugah he abang ka troh gata

Cit baro troh lon woe keunoe
Bak uroe nyoe lon jak gaza
'Oh troh ulon teuma u padan
Meurumpok lawan lem ngon gata

Lon eu gata umu tuha that
Peugah he sabat soebu nama
Janggot panyang rupa hibat
Umu tuha that bak ri rupa

Ok ka puteh gigoe ka rumpang
Jak tariwang lon takot pana
Han sabe padra gata ngon kamoe
Gata sidroe umu ka tuha

Jak woe gata yue teubiet laen
Dilon han lon tem meung nyo ngon gata
Teuma seuot Meureudan Ali
Tadeungo lon kheun kri he syeedara

Nama ulon Meureudan Ali
Biram Peutawi lon nyang raya
Pakon adoe tamarit meunan
Pakon he intan lon taseurapa

Narit bak jroh-jroh buet beurangkri
Meunan boh hate daseuto Raja
Bek takheun-kheun narit krang-ceukang
Wahe bintang rugoe mubara

Lon takon han troh ban nyang takheum
Bek that teusreueng narit gata
Nibak leupah narit bahle leupah buet
Meunan he nyak cut nyang mubahgia

Lon ka tuha bek tapeukeujot
Wahe adoe cut ingat keu nama
Lon ka tuha umu that lawi
Habeh lon tukri wayang ngon seunda

Siumu hayat sabe dalam prang
Han tom lon riwang 'oh ka lon gaza
Bit han padra gata deungon lon
Keureuna he tanglong umu that muda

Han roh lon poh seubab jroh ruman
Lom nibak nyan gata /goh raya
Nyang got jinoo jak tariwang
Yue teubiet sulotan aduen gata

Juhan 'Alam Syah deungo haba meunan
Amarah le yoh nyan hu ngon mata
Jisuet peudeueng dalam sarong
Jitak rancong Raja tuha

Keunong bak dhoe ujong peudeueng
'Oh lheueh nyan neukheun bek tameuseunda
Lon ka tuha bek that tagaro
He adoe teungku bek tameuseunda

Lom jitamah sikali lagi
Meureudan Ali keunong bak dada
Teubiet meuk apui meujeureulah
Khem meuhah-hah Raja tuha

Hai aneuk bek muwayang le
He boh hate woe lam kuta
'Oh ban jideungo haba meunan
Jibet le yoh nyan deungon cokma

Jipoh ateueh Meureudan Ali
Ka jitadi hana reuda
Lhee go jipoh meuadoe-adoe
Patah jinoe gaki guda

Meureudan Ali dong bak bumoe
Neukheun he adoe bek tameuseunda
Jinoe tatheun lon poh balah
Bak ingat kah nyang jroh rupa

Meureudan Ali neusuet le peudeueng
Neutak rancong pantah sigra
Juhan 'Alam Syah theun peurise
Hana lale pantah jisangga

Ateueh peurise keunong peudeueng
Meuk jeumeureulang jipo lam hawa
Lom neutak sikali lagi
Keunong bak lihe Raja Muda

Hana putoh bulee meung sion
Bandua saban sang sibangsa
Juhan 'Alam Syah kalon meunan
Bandua Raja nyan amarah raya

Jitiek peudeueng teuma meureupah
Sabe gagah ngon peukasa
Meusinthob-sinthob keudeh keunoe
Ngob lam bumoe 'oh — 'oh dada

Keudeh keunoe hana tiwah
Sabe gagah ngon peukasa
Ureueng nyang laen han le geumuprang
Jikalon birang lawan cuala

Rakyat di mideuen dong meureuntang
Jikalon prang pojih Raja
Meusinthob-sinthob di teungoh padang
Bumoe meuguncang miseue geumpa

Tujoh uroe sabe meureupah
Yoh nyan uga Raja Muda
Juhan 'Alam Syah bukon that sayang
Teuma keujang umu that muda

Meureudan Ali sangat beurani
Seubab lawi umu that tuha
Juhan 'Alam Syah reubah di mideuen
Meureudan Ali teuma boh singkla

Neuboh taloe jaroe kaki
Neupeuwoe le teuma lam kuta
Meureuhib Syah kalon meunan
Neupuleh le yoh nyan dum lasyeuka

Siploh seun beuet do'a neubaca
Neutob ngon muka neubalek gisa
Han cit puleh hekeumat nyan
Neujak bak Mambang poteu Raja

'Oh troh bak Mambang jipeugah reujang
Ampon laman po meukuta
Lasyeuka tuanku di teungoh padang
Ka keunong saktian boh keureuma

Neupeupuleh tuanku jinoe sikarang
Lasyeuka di padang saket dan luka
Dilon tuanku ka lon puleh
Siploh seun habeh lon baca do'a

Teuma neupeupuleh uleh sulotan
Raja Mambang sakti geupuja
Tujoh go neubeuet do'a hekeumat
Puleh le siat ban dum lasyeuka

Meureuhib Syah neulakee pulang
U padang prang le neugisa
'Oh troh u padang neukalon meunan
Leugat neupasang ateueh guda

Neuek cong guda keukang neumat
Nepeuteupat neujak gaza
Cokma neusandang peudeueng bak tangan
Ban geulayang ek lam miga

U teungon mideuen jijak leugat
Jicang rakyat meuribee laksa
Wie ngon uneun peudeueng jisayong
Le that puntong sukee Raja Kra

Ahmad Zamhari kalon mumeunan
Neujak linteueng pantah sigra
Ahmad Zamhari tanyong le rijang
Soe he bungong nama gata

Wasiet Raja nyang didalam
Neuyue tanyong nan ubak gata
Teuma seuot Meureuhib Syah
Tadeungo lon peugah ubak gata

Ulonkeuh Raja nanggroë Beudian
Beta tuban he panglima
Geurasi nan Meureuhib Syah
Nyang that meugah hana tara

Jinoë nyang got jak tariwang
Dilon sayang that keu gata
Dilon adoe ka lon peugah nan
Digata rakan soë geuhei nama

Teuma seuot Ahmad Zamhari
Tadeungo lon kheun kri ubak gata
Nama ulon Ahmad Zamhari
Nan geurasi uleh Raja

Lon pahlawan Biram Peutawi
Hana sakri gagah peukasa
Nyang got adoe jak woe u dalam
Dilon sayang that keu gata

'Oh ban jideungo haba meunan
Mirah padam ngon ie muka
Jibet le cokma ka meulayang
Jipoh le rijang pantah sigra

Keunong jipoh ateueh peurise
Miseue bade geulanteue teuka
Ahmad Zamhari pantah ban kilat
Ka neulumpat pantah sigra

Ahmad Zamhari poh le balah
Nyan pi pantah jitheun sangga
Keunong neupoh ateueh peurise
Rakyat tunye ban sineuna

Meureuhib Syah that beurani
Bandua sabe gagah peukasa
Dua blah uroe dua blah malam
Yoh nyan ka prang that guranta

Silab bacut Ahmad Zamhari
Teuma jidrob le pantah sigra
Jiboh taloe jaroe gaki
Jipuwoe le dalam kuta

Usi Tapa kalon meunan
Leugat neupasang ateueh guda
Laju jiteubiet teuma u mideuen
Jicang ureueng seun-seun dua

Wie ngon uneun peudeueng reubah
Mate barollah ureueng po banda
Keumala 'Alam Syah kalon meunan
Jijak le linteueng Usi Tapa

Keumala 'Alam Syah tanyong le rijang
Soe he rakan nan digata
Lon eu le that tapoh rakyat
Peugah he sabat nama digata

Usi Tapa seuot le rijang
Tadeungo lon kheun he syeedara
Usi Tapa nama lontuan
Bak tatuban wahe Raja

Bak uroe nyoe lon masok prang
Meurumpok lawan adoe ngon gata
Nyang got jinoo jak tariwang
Dilon sayang that keu gata

Dilon adoe ka lon peugah nan
Digata rakan soe geuhei nama
Keumala 'Alam Syah seuot le rijang
Tadeungo lon kheun ubak gata

Lonkeuh Raja di nanggroo Sakdian
Geurasi nan uleh Raja
Keumala 'Alam Syah nama lontuan
Bak ingat rakan gata binasa

Nyang ka dilee hana soe lawan
Keumala 'Alam gagah peukasa
Nyang got jinoe jak tariwang
Sa'id Meureudan yue teubiet sigra

Keumala 'Alam Syah neucinta hekeumat
Jilambong leugat dalam hawa
Na sikeujab tren le gunong
Teuma meusumpon ateueh tandra

Matekeuh dum Engkong ngon Kra
Di mideuen Raja meukeukeuba
Usi Tapa kalon meunan
Beungeh le yoh nyan hu ngon mata

Sireuta neudeumpek bukon bubarang
Rasa karam nanggore Indra
Usi Tapa neupeupuleh rijang
Hekeumat saktian nanggroe Indra

Tren le angen nyang raya that
Jibapot angen nyan u laot raya
Teuma neucinta saboh hekeumat
Pulang saket le neubaca

Teuma neusrom le lam awan
Tren le intan ngon meutia
Sret u teungoh tandra lawan
Meutia intan blet-blot cahya

Meuseunoh-seunoh meureubot reubot
Intan ka sret di mideuen Raja
Habej jicok intan meutia
Meulimpah cahya teuma bak mata

Mata lasyeuka ka habej buta
Ka keunong cahya intan meutia
Meuraba-raba di mideuen prang
Lawan kawan han leumah rupa

Seubab keunong hekeumat tapan
Lam cahya intan teuka cidra
Neusuet peudeueng dalam sarong
Neutak rancong putoh dua

Usi Tapa that guransang
Neucang ureueng meuribee laksa
Peureudan Syahi kalon mumeunan
Leugat jipasang ateueh guda

Teuma neucinta saboh hekeumat
Rijang neuingat neutepok bak pha
Teubiet le asab meubura-bura
Engkong ngon Kra ka peudeh mata

Hana lale Engkong deungon Kra
Jaroe bak muka sampoh le mata
Dalam sab nyan lon saktian
Teubiet rimueng nyang dalam rimba

Jijak pajoh Engkong ngon Kra
Nyang ka pana di mideuen Raja
Peureudan Syahi that amarah
Muka mirah ban keusumba

Peudeueng bak jaroe kapak jireugam
U teungoh padang jijak gaza
Neucang rakyat sukee Engkong
Le that mate lom di mideuen Raja

Ho nyang jipeukeue habeh ranab
Ho nyan jipeunab habeh seureupha
Ngon Milon tuangga teuma meuteumeung
Jimat bak tangan jisrom lam hawa

Sigala rakyat Biram Peutawi
Jisurak le that meutaga
Deumpek ngon surak that meualon
Miseue bakat tren ujeuen keunong sa

Sigala Rakyat Mambang Zanggi
Jisurot le dalam kuta
Mambang Zanggi kalon rakyat plueng
Teuma jitanyong bak lasyeuka

Pakon taplueng gata di mideuen
Pane ureueng gagah peukasa
Lasyeuka seuot jikheun meunoe
Tadeungo kamoe po meukuta

Nyang jeuet muplueng kamoe di mideuen
Le that pahlawan nyang ka pana
Sukee Raja Kra that pahlawan
Jisrom lam awan bandum panglima

Lom meutamah sakti meureudan
Rakyat sikeulian ka buta mata
Habeu meugule di mideuen prang
Ladom badan na nyang luka

Seubab jijak hana teupat
Teuma meusipak kayee raya
Siteungoh ri jak meusilee
U yub kayee meuteumeung bak bunga

Di sinan lom meutamah rusak
Han jeuet jijak wahe Raja
Nyangkeuh seubab kamoe muplueng
Han ek meutheuen wahe meukuta

Bek tabeungeh tuanku ampon
Yoh bunoe ulon hana kutika
Nibak uroe nyoe ka leupah langkah
Ka roh lam babah guleran naga

Bahle tapioh jinoo sikarang
Singoh tamuprang di mideuen Raja
Ensy Allah ngon tulong Tuhan
Singoh laman teubiet jak gaza

Bahle mate kamoe di mideuen
Meung bek saktian mumeucang lanja
Di tuanku neulakee do'a
Kamoe jak gaza lawan tandra

Bila nyawong bila darah
Singoh keumah wahe Raja
Sikarang jinoe wahe sulotan
Bahle meuriwang dalam kuta

Jijak leugat han jidong le
Dijih hate u dalam kuta
'Oh ban neudeungo haba meunan
Seungab kalam hana haba

Teuduek haba ureueng siblah
Jinoe lon peugah nyan keudua
Milon kalon teuma u mideuen
Han le ureueng habeh lam kuta

Leugat jiwoe teuma u dalam
Bak sulotan Bulia Geumira
Usi Tapa pi ka riwang
Dum sikeulian u dalam kuta

Bandum pihak ka piyoh prang
Uroe pi malam teuka sinja
Sare beungoh le ngon uroe
Teubiet lom jinoe u midueen Raja

Teuma meusu gong ngon geundrang
Alamat prang raja-raja
Mambang Zanggi kheun bak pahlawan
Jak teubiet u mideuen tuha muda

Mangat talo saho-saho
Teubiet he po u mideuen Raja
'Oh ban jideungo haba sulotan
Dum sikeulian hate suka

Sigala rakyat that guransang
Jiteubiet u padang tuha muda
Hamarun Syah nyang panglima prang
'Adi ngon juhan meuribee laksa

Lapan Raja nyang teubileueng
Teubiet u mideuen jipasang guda
Mubajee zireh keutupong beusoe
Peudeueng bak jaroe deungon cokma

Leugat jijak u teungoh padang
Dong meureuntang le mubanja
Meuseundi-seundi rupa peukayan
Geumeureulapan cahya meukuta

Teudong meuseueh-seueh di teungoh mideuen
Musta'id ngon alat sinyata
Sireuta jideumpek ngon jisurak
Meuhayak-hayak bumoe meutaga

Biram Peutawi kalon u padang
Rakyat hitam siblah utara
Teuma meusu ngon geundrang prang
Peutawi Biram suroh tandra

Wahe Raja dum uleebalang
Jak teubiet u padang tuha muda
'Oh ban jideungo sabda sulotan
Dum uleebalang hate suka

Ateueh guda leugat jipasang
Dum uleebalang teubiet jak gaza
Sukee Raja Kra pi beurangkat
Sajan rakyat meuribee laksa

Meuseundi-seundi rupa peukayan
Geumeureulapan ngon meukuta
Mubajee zireh keutupong beusoe
Peudeueng bak jaroe alat dum rata

Laju jijak u teungoh padang
Teudong meureuntang le mubanja
Teudong meuseueh-seueh di teungoh padang
'Adi ngon juhan meuribee laksa

Sireuta jideumpek ngon jisurak
Bumoe meuhayak miseue geumpa
Sideh jiek sinoe jijak
Meugalak-galak di mideuen Raja

Sideh pi reudok sinoe pi reudok
Nyoe baro tok ujeuen keunong sa
Sideh pi peugom sinoe pi peugom
Nyoe baro lom keumeung jeuet baya

Sideh jipeucrok sinoe jipeucrok
Yoh nyan meurumpok dua tandra
Maseng-maseng mita lawan
Nyang sabe Wadan dum panglima

Yoh nyan ka prang that meusigak
Taeu jimeutak sabe Raja
Teuma jiteubiet Hamarolkama Syah
Jitajo pantah u mideuen Raja

Jicang rakyat wie ngon uneun
Miseue bayeuen di teungoh tandra
Lanta Waila cinta hekeumat
Rijang neuingat sakti lam tapa

Jiculok jaroe nibak bumoe
Teuka sinaroe bak kayee dum na
Ka miseue rimba dalam mideuen prang
Engkong sibarang ek dum rata

Jiek cong kayee engkong deungon kra
Jipeulheueh le cokma lam tandra Raja
Cokma jisrom jih di mayang
Han tatuban patah ngon luka

Bak ranteng kayee engkong jijak
Na tamse bak kuta raya
Lanta Waila beungeh han padan
Mukajih ban le wareuna

'Oh jideumpek bukon bubarang
Kra ngon engkong jisurak dum na
Ladom jisurak di cong kayee
Meudilee-dilee jijak gaza

Teuma jikalon le mumeunan
Jijak le yoh nyan pantah sigra
Teuma meuteumeung Hamarolkama
Jimat le lanja bak tangannya

'Oh lheueh nyan jisrom u dalam awan
Sret u mideuen mate pana
Sukee Raja Kra surak meuguncang
Dum sikeulian that guranta

Teuma jikalon le Kamaran Syah
Jipasang gajah u mideuen Raja
Kamaran Syah neubeuet peunuleh
Lhee go habeh ka neubaca

Gadoh bak kayee di mideuen prang
Kra ngon engkong teudong dum na
Kra ngon engkong ka ateueh bumoe
Tamse nanggroe ka talo kuta

Na ban gampong ka teumutong
Teutinggong-tinggong engkong dengon kra
Jigrob keudeh jigrob keunoe
Han ban bunoe cong kayee raya

Teuduek tahe teuceungong-ceungong
Rumoh di mideuen ka habeh pana
Kamaran Syah that guransang
Teuma u padang neujak gaza

Peurise blah wie peudeueng di uneun
Jicang ureueng meukeuba-keuba
Ho nyang jicang habeh ranab
Mate le that sukee Raja Kra

Ho nyang jicang habeh teureuban
Teukeujot angkatan sukee Raja Kra
Teuma meuteumeung ngon pahlawan
Meungadu saktian di mideuen Raja

Lhee uroe lhee malam ngadu saktian
Milon pahlawan mate le pana
Sukee Mambang surak meuguncang
Dum sikeulian hate suka

Seubab jieu pahlawan mate
Dumjih sare galak raya
Teuma teubiet Raja Gunong
Neujak ampeueng pantah sigra

Lanja neujak u teungoh mideuen
Jicang ureueng meuribee laksa
Wie ngon uneun neucang rakyat
Mate le that di mideuen Raja

Teuma meuteumeung deungon Kamaran Syah
Neutanyong le pantah soebu nama
Seuot Raja Gunong Sarang
Tadeungo lon kheun jinoo nama

Nama ulon Raja Gunong Sarang
Le saktian hana tara
Jinoo nyang got jak tariwang
Han ek taprang lon le gata

Dilon adoe ka lon peugah nan
Digata rakan soebu nama
Teuma seuot Kamaran Syah
Tadeungo lon peugah ubak gata

Nama ulon Kamaran Syah
Nyang that meugah ngon peukasa
Nyang got dalem jak tariwang
Keudeh u dalam ubak Raja

Beungeh Raja Gunong Sarang
Sireuta neukheun meunoe kata
Nyoekeuh Raja Gunong Sarang
Geurasi nan Suara Kurangga

Bak uroe nyoe lon masok prang
Peue na haluan keunoe taba
Kamaran Syah deungo haba meunan
Jibet le yoh nyan cokma nyang raya

Jipoh u ateueh Raja Gunong Sarang
Neugrob le rijang ban kilat faja
Jipoh keudeh jigrob keunoe
Meugrak-grak bumoe miseue geumpa

Raja Gunong Sarang that biet pantah
Kamaran Syah neudrob le neuwa
Teuma neulambong dalam awan
Sret u padang miseue nyang ka

Kamaran Syah ka teudong u mideuen
Jisuet le peudeueng pantah sigra
Jitak le ateueh Raja Gunong Sarang
Di teungoh padang mate pana

'Oh mate Raja jicang rakyat
Mate le that Milon deungon kra
Raja Kra kalon tiwah rakan
Leugat jipasang ateueh guda

Raja Engkong ngon Raja milon
Teubiet u mideuen lhee droe Raja
Sajan 'adi deungon juhan
Meuribee ban alat sinyata

Nyang raja-raja gunong jitatang
Uleebalang mumeunan juga
Taeu ka jijak bukon bubarang
Dum sikeulian meusuka-suka

Ateueh gunong nyang dum bak kayee
Ulah lagee miseue rimba
Rakyat kra dum di cong kayee
Suara rame engkong deungon kra

Galakjih that hana tara
Jikira uteuen rimba raya
Nyankeuh seubab riajih that
Han jitupeue hekeumat Milon Raja

Nyankeuh Raja di Buket Zibon
Raja Milon sakti raya
'Oh troh teuma u teungoh padang
Gunong jisimpan uleh Raja

Tren le rakyat nyang ateueh kayee
Meudilee-dilee jijak gaza
Nyang di musoh ka roh yub gunong
Jiklik meuong-ong nyang patah luka

Nyang ka mate wallahu 'alam
Teutap di sinan yub gunong raya
Teuma jijak tamong lam kawan
Yoh nyan meuteumeung sabe meunama

Cokma bak wie peudeueng bak uneun
Ban lhee Raja nyan gagah peukasa
Jisurak-surak ngon jilumpat
Seubab utoh that meuen peunika

Jinari-nari di mideuen prang
Han miseue ban manusia
Keureuna kaya Tuhanku Rabbi
Binatang peuet gaki jeuet lawan gaza

Sideh deumpek sinoe pi deumpek
Leugat jiek rakyat meulaksa
Sideh pi peugom sinoe pi peugom
Nyan baro lom raya baya

Kamaran Syah teubiet u mideuen
Jak bantu rakan di mideuen Raja
Yoh nyan teubiet Kamaran Syah
Prang that gagah leubeh bak nyang ka

Kamaran Syah ngon Hukman Syah
That bit gagah Raja nyan dua
Ngon Raja Milon meungadu sakti
Hana soe tukri geugap gumpita

'Oh lheueh tiwah Raja Milon
Teuma meuteumeung ngon Bulia Geumira
'Oh ban meuteumeung ngon Raja dua droe
Meungadap le jinoe ngon Bulia Geumira

'Oh lheueh nyan teuma meungadu sakti
Hana soe tukri sabe peukasa
Bulia Geumira jigra-grak droe
Jeuet le jinoe binatang geureuda

Leugat jitren keunan u mideuen
Jipajoh ureueng sukee Raja
Kamaran Syah kalon meunan
Jilambong saktian u dalam hawa

Jeuet le naga that barollah
Jijak pajoh binatang geureuda
Bulia Geumira saket hate
Jipeulheueh le panah laen pula

Ubak bumoe jiteupok jaroe
Jeuet le jinoe laot raya
Meualon-alon ngon geulumbang
Miyub manyang meubura-bura

Sigala rakyat nyang di padang
Lam laot nyan mate pana
Kamaran Syah kalon teuma meunan
Beungeh le yoh nyan hana tara

Ubak bumoe jiteupok jaroe
Laot ka doe miseue nyang ka
Teuma jinoe peulheueh hekeumat laen
Teuka le jen meuribee laksa

Jijak laju keunan u padang
Jipajoh le yoh nyan sukee Raja Kra
Bulia Geumira kalon meunan
Panah le yoh nyan jisrom lam hawa


Na sikeujab panah di manyang
Teuka le keunan apui meunyala
Habeh tutong jen nyang bunoe
Bandum rangoe jeuet keu baja

Kamaran Syah kalon meunan
Panah bak tangan jisrom lam hawa
Na sikeujab panah lam awan
Teuka le ujeuen jitren u donya

Apui nyang bunoe dum habeh len
Lom jilambong hekeumat donya
Na sikeujab panah di manyang
Teuka le keunan naga meulaksa

habeh jipajoh kra deungon Milon
Dum sikeulian habeh pana
Bulia Geumira kalon meunan
Leugat jilambong hekeumat sigra

Na sikeujab panah lam awan
Teuka le kleueng seupot donya
Jipo laju keunan u padang
Jipajoh le yoh nyan mata naga



Naga saboh kleueng sireutoh
Meuseunoh pajoh aneuk mata
Habeh mate dum naga di mideuen
Keureuna kleueng le lagoena

Kamaran Syah yoh nyan amarah
Jisuet le pantah peudeueng raya
Leugat jitak Bulia Zakari
Jinari-nari meuen peunika

Jitak keudeh jigrob keunoe
Utoh han soe meuen peunika
Dua blah uroe dua blah malam
Tiwah le yoh nyan Bulia Geumira

Teuma meuteumeung ngon Raja Engkong
Meungadu saktian di mideuen Raja
Raja Engkong nyang teubileueng
Nyang that carong Lanta Waila

Meungadu sakti diteungoh mideuen
Miseue bayeuen ngon cempala
Meunyum tiwah Raja Engkong
Seubab that carong Raja dua

Teuma neukalon le Sa'id Meureudan
Leugat neupasang ateueh guda
Leugat neujak u teungoh padang
Neucang angkatan Raja nyan dua

Wie ngon uneun neucang rakyat
mate le that meukeuba-keuba
Ile darah ka mirah blang
Le that neucang rakyat Raja

'Oh le darah nyan di bumoe
Seupot tuloe glab gulita
Miseue ureueng meuen bak buleuen peungeuh
Dumnankeuh deuh ureueng meugaza

Na sikeujab nyang mumeunan
Ka peungeuh padang miseue nyang ka
Teuma meuteumeung ngon Raja dua droe
Neutanyong jinoe soe nan gata

Raja dua seuot le rijang
Tadeungo lon kheun ubak gata
Kamaran Syah nama kamoe
Teuma nyang adoe Hukman Syah nama

Kamoe dua ka meusoe nan
Peugah rijang nama gata
Teuma seuot Sa'id Meureudan
Tadeungo lon kheun jinoe bak gata

Ulonieu Raja nyang that meugah
Nama geuuroh le ayahanda
Nama ulon Sa'id Meureudan
Bak ingat rakan gata binasa

Peue na haluan taba keunoe
Tabri keukamoe kumeung rasa
'Oh ban jideungo haba meunan
Jitak le yoh nyan ateueh Raja

Sidroe di wie sindroe di uneun
That bit hireuen jinoe Raja
'Oh ban jitak keunong bak ulee
Hana neuthee poteu Raja

Meusurot-surot di teungoh midan
Sa'id Meureudan nyang that geupuja
Raja dua droe pi that beurani
Raja sakti bak ri rupa

Sa'id Meureudan marit le jinoe
Tadeungo kamoe gata bandua
Bak uroe nyoe gata mupaloe
Taingat keudroe gadoh nama

Kuboh hekeumat nyawong hilang
Nyang got he bintang jak tagisa
Bek keunong hekeumat Sa'id Meureudan
Lon takot hitam jeuet keu baja

Kamaran Syah seuot rijang
Cuba he rakan lon kalon rupa
Meung nyo gata Sa'id Meureudan
Cuba tuan peukeunong do'a

Sa'id Meureudan deungo mumeunan
Neubeuet le yoh nyan hekeumat donya
Baro habeh neubeuet do'a
Tron le sigra saboh guliga

Raja di mideuen habeh pangsang
Sa'id Meureudan boh reuncana
Guliga haloh saktian neubri
Uleh Pari Peureudan Miga

Kamaran Syah ngon Hukman Syah
Sinan reubah di mideuen Raja
Laen pahlawan hate teumakot
Habeh teukeujot jiplueng dum na

Seubab saktian hana leumah
Ureueng reubah di mideuen Raja
Meutamah lom Sa'id Meureudan
Raya saktian Raja geupuja

Tiep-tiep nanggroë meugah meusyeuhu
Barat timu troh lam miga
'Oh ka geukheun hana ubah
Raja meutuah troh ban kata

Meunankeuh dum jimeukheun-kheun
Sira jiplueng woe lam kuta
Han le ureueing ka peungeuh padang
Sang han le prang ka mumada

Rab seungab gong deungon geundrang
Rab seungab prang taklok Raja
Lila Peukasa Mambang Sakti
Jikalon han le rakyat meulaksa

Raja dua droe pi ka mate
Jipasang le ateueh guda
Leugat jijak u teungoh mideuen
Teuma meuteumeung ngon Raja Kra

Engkong marit sabe keudroe-droe
Saleh nyo nyoe nyang geukheun Raja
Bulia Geumira kalon mumeunan
Panah bak tangan jisrom lam hawa

Na sikeujab panah di manyang
Jitren le keunan naga raya
Badan raya amat sangat
Jijak leugat u nab Raja

Mambang sakti kalon mumeunan
Panah bak tangan neusrom lam hawa
Na sikeujab panah lam awan
Teuka le keunan binatang geureuda

Badan raya na ube gunong
Jitren u padang ubak naga
Jimeukab-kab bandua droe
Mate le jinoe naga raya

Bulia Geumira kalon mumeunan
Panah bak tangan jisrom lam hawa
Na sikeujab panah lam awan
Teuka le keunan apui raya

Mambang sakti kalon mumeunan
Panah lam reugam neusrom lam hawa
Na sikeujab panah di manyang
Teuka le ujeuen jiek ie raya

Apui nyan bandum habeh ka len
Leubeh saktian Raja nyan dua
Dua blah uroe dua blah malam
Tiwah le yoh nyan Bulia Geumira

Teuma meuteumeung Raja Engkong
Nyang that carong Lanta Waila
Raja Milon pi di sinan
Meungadu saktian bandum Raja

Milon ngon Pari le saktian
That andalan hana tara
Umu sithon muprang sabe
Le that mate ureueng po banda

Mate rakyat meuribee katoe
Ka soh nanggroe teumpat Raja
Meung uleebalang han ek tabileueng
Le that di mideuen mate pana

Lila Peukasa ngon Mambang sakti
Meungadu sabe di mideuen Raja
Jeh pi utoh nyoe pi carong
Dua Raja nyan gob meulaksa

Umu sibuleuen meungadu sakti
Yoh nyan mate Lila Peukasa
Mambang Sakti ngon Zanggi Meureudan
Neukalon ka tan nyan aneuk dua

Yoh nyan Raja that amarah
Neueu ka reubah Lila Peukasa
Laju jijak bak Biram Peutawi
Meuteumeung le deungon Raja

Biram Peutawi yoh nyan teumanyong
Soe he bungong bandua gata
Lon eu hibat bangon sulotan
Peugah rijang jinoe nama

Seuot le Raja Mambang Sakti
Tadeungo lon kheun kri ubak gata
Nama ulon Mambang sakti
Nyang boh mupeuti bandum Raja

Lonkeuh Raja nyang mat nanggroe
Teuma nyang adoe pi lon kheun nama
Zanggi Meureudan nama adoe
Ingat jinoe gata binasa

Dilon adoe ka lon peugah nan
Digata rakan soe geuhei nama
Seuot le Raja Biram Peutawi
Tadeungo lon kheun kri wahe Raja

Nama ulon Biram Peutawi
Nyang boh mupeuti ensan deungon kra
Bak uroe nyoe lon masok prang
Meurumpok lawan lon ngon gata

Nyang got jinoe bek talawan
Rakyatteuh ka tan han ek tagaza
Got tataklok ubak kamoe
Meuhan jinoe hilang nyawa

'Oh ban jideungo haba meunan
Beungeh le yoh nyan hu ngon mata
Neucinta hekeumat Mambang Saktian
Zanggi Meureudan Pari euseukanda

Neutangah u langet neuteukui u bumoe
Neuteupok jaroe teuma bak dada
Tren le angen keulam-kabot
Mideuen seupot han leumah donya

Deungon guroh di mideuen prang
Angen sajan bade raya
Tren lom teuma ujeuen beusoe
Miseue sujoe pasang meulila

Meunankeuh tajam ujung ngon sagoe
Sret u ateueh poteu Raja
Sret u ateueh Peutawi Biram
Hireuen jipandang le lasyeuka

Na sikeujab akai hilang
Peutawi Biram teuingat le sigra
Neucinta le ngon isyarat
Raja meudeelat sakti raya

Tren le teuma kilat di awan
Jisampoh le yoh nyan hekeumat donya
Kakeuh peungeuh di mideuen prang
Na tamse ban dilee nyang ka

'Oh jikalon le Mambang Sakti
Beungeh han sakri hu ngon mata
'Oh jideumpek bukon bubarang
Na tamse ban geumpa raya

Jipeutoe laju keunan u padang
Peutawi Biram lisek mata
Jisuet peudeueng dalam sarong
Jitak yoh nyan ateueh Raja

Biram Peutawi pantah ban kilat
Sigo neulumpat peuet ploh deupa
Jitak keudeh neugrob keunoe
Pantah bagoe kilat faja

Teuma jipoh Peutawi Biram
Neugrob curam ban boh panta
Biram Peutawi balah hekeumat
Deungon mangat Raja raya

Neureugam jaroe neuupa-upa
Neurahob di muka doli meukuta
Tren le rijang beewan harom
Angen jitren di antara

Jipot u ateueh Mambang Sakti
Jaroe kaki leumbot teuka
Raja teudong han jeuet langkah
Lidah babah han le teubuka

Peudeueng bak jaroe sang keumeung sret
Jeueb-jeueb atos han le meugila
Peurasaan nibak jasad
Hana meuh at ek troh pinta

Keulakuan bak takalon
Yoh kala prang di mideuen Raja
Ho maken treb meutamah brat
Keunong hekeumat Raja donya

Biram Peutawi neutajo leugat
Mambang neuikat neuboh singkla
Teuma jikalon le Mambang Zanggi
Jitajo le pantah sigra

Leugat jipoh Biram Peutawi
Na ban piti neulumpat caca
Biram Peutawi teuma balah
Neupoh pantah ateueh Raja

Neupoh keudeh jigrob keunoe
Bandua droe jeuet peunika
Dua ploh uroe dua ploh malam
Meungadu saktian sabe peukasa

Silab bacut Mambang Zanggi
Bak jibot kaki reubah u donya
Biram Peutawi boh le taloe
Raja nanggroek ka roh lam singkla

Zanggi Meureudan pi karoh lam taloe
Bak uroe nyoe habeh keurija
Talo kuta teuma ngon dalam
Sa'id Meureudan geupujoe nama

Habeh jicok areuta rampasan
Dum sikeulian habeh jihila
Keubeue lumo kameng keubiri
Laen lagi hamba sahya

'Oh habeh jicok areuta rampasan
Geupeulheueh pahlawan yang lam singkla
Habeh neupeupuleh rakyat nyang pangsan
Di teungoh padang rakyat meulaksa

Bandum habeh woe u nanggroe
Jisujud sinaroe dum bak Raja
Zanggi Meureudan ka taklok keunan
Bak sulotan Raja dum na

Taklok bak Raja Peutawi Biram
Sa'id Meureudan dua droe Raja
Habeh taklok dum sikeulian
Keureuna sulotan keumeung bungka

'Oh lheueh jitaklok pulang keurajeuen
Sa'id Meureudan geupujoe nama
Teuma marit Mambang Sakti
Ngon Biram Peutawi meunoe haba

Ampon tuanku meuribee katoe
Udeh tamong jinoe dalam kuta
Teuma neutamong dum u dalam
Bak teumpat Mambang bandum Raja

Padum uroe nyang di sinan
Neulakee riwang ubak Raja
Ampon tuanku keu lon sikarang
Kamoe meuriwang Raja dum na

Mambang Sakti seuot le meunoe
Idin bak kamoe he syeedara
Bak na taingat tuanku keu kamoe
'Oh troh u nanggroe po meukuta

Kutika na prang neupeusan kamoe
Meuhat troh jinoe bak meukuta
'Oh lheueh idin bak sulotan
Leugat neuriwang bak teupat nyang ka

Sa'id Meureudan pi ka riwang
Deungon angkatan meuribee laksa
Raja limong droe hate sukaan
Ka han le prang 'oh taklok Raja

Maseng-maseng woe u nanggroe
Bak teupat droe maseng rata
Biram Peutawi peuk surat
Meunoe narit jiboh haba

Saleuem seumbah bak Biram Peutawi
Keubawah doli meukuta donya
Kamoe tuanku dum sikeulian
Ka meunang prang po meukuta

Lila Peukasa pi ka mate
Rakyat sare meuribee laksa
Mambang Sakti ka taklok keunoe
Bak geutanyoe po meukuta

Jinoe tuanku hana le prang
Nanggroe ka teunang po meukuta
'Oh noe habeh tamat surat
Teuma jilipat jisrom lam hawa

'Oh troh surat u keue sulotan
Neubuka yoh nyan neubeuet sigra
'Oh ban habeh neubeuet surat
Hate mangat Raja Raya

Maseng-maseng teutap di nanggroe
Bak teupat droe maseng rata
Teuduek haba dilee siat
Laen riwayat lon calitra

Kisah lon nyoe meuriwang-riwang
Nak mangat seunang bak lon cok punca
Nyankeuh seubab jeuet meuriwang
Meuhan han seunang lon calitra

AMMABAKDU MAKNA KEUMUDIAN
Hukman 'Alam lon calitra
Banta Hukman mantong lam laot
Goh teukeujot ka keunong mintra

Lam pruet naga mantong pangsang
Dum sikeulian raja-raja
Raja sireutoh pi di sinan
Rakyat sajan meuribee laksa

Kakeuh sithon teutap sinan
Goh puleh pangsang aneuk raja-raja
Peureuba Sari leumah lam lumpoe
Banta sidroe lam pruet naga

'Oh ban teukeujot bak meulumpoe
Neuleueng jaroe lakee do'a
Peureuba Sari beuet do'a peunuleh
Dua seun habeh ka neubaca

'Oh lheueh nyan puleh Hukman 'Alam
Neutanyong bak rakan pantah sigra
Peuebu nanggroek teuduek geutanyoe
Peugah jinoe lon deungo nyata

Teuma seuot nuri budiman
Meunoe jikheun ubak Banta
Ampon tuanku meuribee ampon
Tadeungo lon po meukuta

Geutanyoe tuanku ka lam laot
Seubab ka ji'uet le naga raya
Masa tuanku muprang di padang
Treb ka jameun ji'uet le naga

'Oh ban neudeungo haba mumeunan
Banta budiman teupok le dada
Ubak dada neutepok jaroe
Teubiet le jinoe apui meunyal

Teubiet apui sabong-meunyang
Miseue ka tutong nanggroe Indra
Yoh nyan naga tutong hate
Teugeutit le u mideuen Raja

Sret bak nanggroe Iram Keusumi
Sinan meugule mate pana
Naga mate di teungoh mideuen
Asoe ngon tuleueng habeh seureupha

Raja sireutoh teubiet le yoh nyan
Rakyat sajan meuribee laksa
Hukman 'Alam ngon pahlawan
Teubiet sikeulian dalam pruet naga

Raja sireutoh teuma mupakat
Jijak deelat ubak Banta
Ampon tuanku meuribee ampon
Keusalahan lon po meukuta

Harap kamoe di yub gaki
Di bawah doli meukuta donya
Neuampon barang keusalahan
Ampon laman wahe Raja

Banta Hukman seuot meunoe
Ampon bak kamoe gata dum na
Ampon bak Allah ngon bak Nabi
Ampon sare he syeedara

Raja sireutoh ka taklok keunan
Bak Banta Hukman aneuk Raja
Banta Hukman neuk meuligoe
Sajan Putroe dalam astana

Raja sireutoh mantong sinan
Teuma jimohon ubak Banta
Sireuta jibet jaroe meulayang
Meunoe jikheun dumjih rata

Ampon tuanku meuribee ampon
Tadeungo lon po meukuta
Idin tuanku keu kamoe sikarang
Meukheundak riwang po meukuta

Watee tuanku na sukaran
Kamoe neupeusan meuhat troh teuka
Seuot Banta neukheun meunoe
Idin bak kamoe wahe syeedara

Raja sireutoh woe u nanggroe
Bak teumpat droe maseng jeumba
Maseng-maseng woe u nanggroe
Jarak ngon toe rumoh tangga

'Oh troh u nanggroe dum peureugi
Mulia geubri maseng rata
Ban nyang kada ngon meutabat
Maseng pangkat cut ngon raya

Teutap hate han le sosahan
Deungon Hukman han le peukara
Aman Raja dum di nanggroe
Lon seubot jinoe lom keu Banta

Banta teutap lam meuligoe
Ngon tuan Putroe meuseusuka
Uroe malam suka hate
Ngon Budiman Khandi lam astana

Teuma teuka ureueng nanggroe
Ban sinaro^eagam ngon dara
Geujak horeumat Hukman 'Alam
Ngon cut intan Putroe Muda

Nyang ureueng lakoe bak Banta Hukman
Geume makanan teubee u muda
Mumeunan adat tiep-tiep nanggroe
Dum sinaroe geupeumulia

Nyang ureueng binoe bak cut intan
Dum uleebalang nyang raja-raja
Nyang peurumoh uleebalang
Dalong pirakan keu Putroe Muda

Laen nibak nyan Syamna Diman
Ija pinggang keu Putroe Muda
Teuma sikrak treuk Syamsi 'Alam
Seunawak Budiman cut Khandi Muda

Meunan adat daseuto nanggroe
Troh 'an jinoe hana meutuka
Nyang peurumoh waki Haria
Ban sikada meujeulih basa

Nyang laen dum sikeulian
Ban atoran laila kada
Meunan-meunan geunab uroe
Banta ngon putroe lam astana

Padum lawet Banta sinan
Teuma neukheun bak Putroe Muda
Idin adekeunda keu lon sikarang
Lon keumeung riwang bak ayahanda

'Oh ban Putroe deungo haba meunan
Teuma neukheun ubak Banta
Meung nyo tuanku neukeumeung riwang
Neuba lon sajan paduka adekeunda

Hukman deungo narit Putroe
Banta jinoe hate suka
Padum uroe lheueng nibak nyan
Teuka keunan Raja Raya

Lanja neuk u meuligoe
Ubak Putroe paduka aneukeunda
Hukman kalon teuka sulotan
Neubeudoh yoh nyan seumbah Raja

'Oh lheueh nyan neuduek Raja sinan
Geubri makanan keu poteu Raja
'Oh lheueh makeuen Raja nanggroe
Neumarit meunoe sipatah haba

Lon sangka han meuteumee eu le
Aneuk boh hate bandua gata
Lon sangka ka mate dalam laot
Kamoe he nyak cut sosah raya

Mantong hayat he aneuk droe
Tateumeung eu kamoe he bijeh mata
Bak na umu raya tuah
Ka ek leupah lam babah naga

Hukman seuot neukheun meunoe
Tadeungo kamoe po meukuta
Na lom hayat kamoe ngon Putroe
Meuteumeung eu jinoe mata ayahanda

Padum uroe Banta ngon sulotan
Neumohon pulang bak ayahanda
Idin tuanku keu lon sikarang
Kamoe riwang u Gunong Miga

'Oh ban neudeungo haba Hukman
Meunoe neukheun ubak Banta
Meung nyo aneuk takeumeung riwang
Taba sajan paduka adekeunda

Bek takeubah Budiman Khandi
Aneuk boh hate jijak sajan gata
Hukman seuot neukheun meunoe
Nibak kamoe ateueh jeumala

Meung ka idin tuanku sidroe
Bahle jinoe lon ba adekeunda
Adak tawoe aneuk u nanggroe
Uroe dudoe bak troh tagisa

Bak that taingat he aneuk Raja
Ayahanda ka tuha harap keu gata
Adak troh gata aneuk u nanggroe
Saleuem kamoe takheun keu Raja

Seumbah-seumbah sireuta saleuem
Keu Diu Palinggam sulotan Miga
Dan saleuem lon keu cut Nila Wati
Ngon Putroe Ti Kayangan Indra

Budiman Khandi jinoe he bintang
Ulon pulang keu Putroe dua
Adak na salah Budiman Khandi
Bek tatueng hate aneuk miet muda

Harap lon aneuk Allah ngon Nabi
Komdian lagi teuma keu gata
Sipeureuti Putroe Budiman Khande
He Raja boh hate tapeulara

Adak han jeuet tapeureunoe
Seubab Putroe umu muda
Umu baro muda seudang
Cre deungon nang he aneuk Raja

Hana jitupeue gana-ganu
He aneuk teungku bak that taaja
Bek jeuet keu 'ayeb nama agama
Geutanyoe Raja keuji that raya

Nyankeuh he Raja lon amanat
Lon peuingat aneuk bak gata
Bak le gaseh deungon sayang
Bek alang-alang tauseuha

Teuma neulakee idin nibak Hukman
Uleh sulotan neukeumeung gisa
Teuma neuidin uleh Hukman
Neuwoe rijang bak Putroe Muda

'Oh troh Raja u meuligoe
Neupeugah bak Putroe Hukman bungka
Teuma neuseuot cut Awan Cahya
Pajan geubungka wahe meukuta

Seuot Raja neukheun uroe nyoe
Lon ban lon woe bak aneukeunda
Teuma beudoh Putroe cut Awan
Neulakee idin bak poteu Raja

Idin tuanku keu ulon sikarang
Lon jak eu Budiman rijang lon gisa
Putroe Cut Awan neubeudoh neutren
Bintang tanglong jak eu aneukeunda

Troh cut Awan u meuligoe
Meuteumeung aneuk droe Budiman Muda
Teuma neutanyong le cut Awan
Pajan intan gata bungka

Seuot Putroe Budiman Khandi
Uroe nyoe he bunda Raja
Teuma neumarit cut Putroe Awan
Haba peuneusan u Buket Miga

Takheun saleuem lon meuribee kali
Keu cut Nila Wati Putroe Muda
Dan lom saleuem he aneuk badan
Keu Putroe Kayangan tapeugah le gata

Bak le do'a takheun keu kamoe
Geunab uroe bek talupa
Jinoe he aneuk nyak cut Budiman
Cut bunda peusan bek talupa

Jakalee troh gata he aneuk badan
Taturot reusam Buket Miga
Bek krang-ceumang ngon bantahan
He cut nyak intan bak sidarahna

Bak leumah leumbot keulakuan
He cut nyak Budiman bak raya saba
Adak tamarit ngon cut Nila Wati
Bak meureundah diri he aneukeunda

Lom he aneuk Putroe Budiman
Ngon Putroe Kayangan bak meujeulih basa
Hatta aneuk ngon gunangan
Bak meujeulisan he Putroe Muda

Mangat he aneuk geucinta budhoe
Le ureueng nanggroe Buket Miga
Hankeuh geukheun deungon geupat
Keu halarat deungon cut bunda

Nyankeuh aneuk tanglong nanggroe
Taingat he Putroe peuneusan bunda
Ka habeh aneuk lon amanat
He Tuhan halarat bek tabri lupa

Teuma neukheun le Putroe cut Awan
Bak Putroe Budiman Khandi jroh rupa
Wahe intan jantung hate nang
Takheun bak Hukman lon meung meuhaba

Beudohkeuh teuma Budiman Khande
Jijak peugah le bak cut Banta
Ampon tuanku meuribee ampon
Cut bunda lon keumeung meuhaba

Sikarang jinoe pakri hukom
Pakri maklum bak meukuta
Atawa cut bunda neujak keunoe
U meuligoe bak meukuta

Atawa tuanku neujak horeumat
Cut bunda meuhat dalam astana
Ampon tuanku neupeugah rijang
Bek treb laman beungeh cut bunda

Teuma meusabda Banta Hukman
Udeh he intan bah sajan ngon gata
Beudohkeuh teuma Hukman 'Alam
Ngon Putroe Budiman neujak bak bunda

Hukman 'Alam ka lam astana
Neuseumbah bunda cut Awan Cahya
Teuma neubri adat meujeulisan
Ranub santapan lam puan meucintra

Teuma marit cut Putroe Awan
Deungon Hukman neupeugah haba
He aneuk Raja Hukman 'Alam
Cut bunda peusan amanat bak gata

Keureuna Putroe Budiman Khande
Goh lom na pike wahe meukuta
Bek tahaloh keusalahan
Putroe Budiman aneuk dara

'Oh troh u nanggroe Miga di awan
Putroe Budiman tauseuha
Tapeureunoe wahe intan
Adat ngon reusam nanggroe Miga

'Oh meuteumeung cut Nila Wati
Han jitukri meujeulih basa
Nyang ka lon peugah he intan Raja
Bek rugoe nama wahe cut Banta

Sikarang jinoo cut bunda pulang
Putroe Budiman Khande Muda
Udeb mate laba rugoe
Pulang sinaroe hukom meukuta

Takheun saleuem lon keu Putroe Kayangan
Bandua sajan ngon Putroe Miga
Bek han takheun wahe Hukman
Seumbah cut Awan saleuem meulaksa

Habeh narit haba peuneusan
Putroe cut Awan han le haba
Nyang na hireuen lale tahe
Ie mata ro meuleulumba

Neuupa wie jiteubiet uneun
Treb-treb siseun neusampoh muka
Sayang taeu bintang juhari
Budiman Khandi rab lakoe ba

Teuma neuseuot Hukman 'Alam
Neupeugah habaran nibak cut bunda
Ensyia Allah ngon tulong Tuhan
Narit bunda nyan ateueh jeumala

Hana ubah sikali-kali
Allah ngon Nabi nyang peulara
Sikarang jinoe neupumeu'ah
Hukman seumbah le tuanta

Beudohkeuh Purtoe Budiman Khandi
Jijak com gaki paduka bunda
Neuwakeuh teuma uleh cut Awan
Neucom Budiman Putroe jroh rupa

Allah he aneuk jantung hate
Dalam rimba gle lon peulara
Allah he aneuk bintang tanglong
Di yub rambong gata lon doda

Keureuna ulon aneuk ka tuha
Harap keu gata boh hate ma
Bak seulamat tajak tawoe
Bandua ngon lakoe Banta Muda

Bek meubantah wahe Putroe
Gata ngon lakoe di Buket Miga
Tajakkeuh aneuk sikarang jinoo
Taingat keu kamoe be tanglong donya

Beudohkeuh aneuk bek tamoe le
Tajak cut Khande uroe ka jula
Banta, Budiman 'oh lheueh nyan riwang
Putroe sajan ban tanglong donya

Leugat neutren di meuligoe
Banta ngon Putroe leugat neubungka
Ka neuk gle neutren paloh
Dawok neubloh dalam rimba

Lom neuk gle neutren panton
Data ngon leupon neujak lanja
Uroe malam hana piyoh
Nak rijang troh bak ayahanda

Padum uroe Banta beujalan
Rab troh Hukman gampong Haria
Hingga sampoe u Miga di awan
Banta Hukman ngon Putroe Muda

Sinan neupiyoh di teungoh mideuen
Banta Hukman ngon Putroe Muda
Banta marit teuma ngon Putroe
Neukheun meunoe bak adekeunda

Tinggai gata dilee di padang
Lon woe u dalam teuma lon gisa
Banta beudoh leugat beujalan
Tinggai cut intan sidroe saja

Banta neutuju leugat u mideuen
Troh le u leuen bak bale raksa
Teuma neuk lam meuligoe
Meuteumeung le jinoo teuma ngon Raja

'Oh ban neukalon ka woe Hulman
Diu Palinggam hate that suka
Cut Nila Wati ngon Putroe Kayangan
Bandua sajan hate suka

Bandua droe hate galak
Ka woe budak paduka aneukeunda
Banta neukheun bak maneuh Putroe
Neudeungo kamoe wahe bunda

Tajak he ma tateubiet u padang
Jak tueng cut intan Putroe Muda
'Oh ban neudeungo Banta peugah
Geuma dasyah hate lam dada

Cut Nila Wati ngon Putroe Kayangan
Neuhei yoh nyan dendayang dum na
Ureueng laen pi na sajan
Leugat beujalan u mideuen Raja

Sireuta deungon arak-arakan
Meuntroe uleebalang teubiet u lua
Waki tandi keujruen meuntroe
Laen sinaroe han teukira

Nyang laen dum han lon peugah
Sobhanallah subra donya
'Oh ban sare troh u teungoh mideuen
Neukalon cut buleuen sidroeneuh saja

Cut Nila Wati ngon Putroe Kayangan
Leugat keunan bak Putroe Muda
Budiman Kahnde kalon mumeunan
Neujak meuteumeung deungon bunda

Teuma rakyat pi jak meuteumeung
Dum sikeulian ngon Putroe Muda
'Oh lheueh nyan marit cut Nila Wati
Ngon Budiman Khandi paduka aneukeunda

Udeh aneuk tamong u dalam
Bek di padang he bijeh mata
Budiman Khande seuot meunoe
Neukheun jinoe ubak poma

Ensyah Allah poma teungku droe
Lon tamong jinoe sajan bunda
Cut Nila Wati hate sukaan
Ngon Putroe Kayangan hate suka

Leugat neuwoe laju u dalam
Putroe Budiman sajan sireuta
Leugat neuuk u meuligoe
Sajan Putroe paduka aneukeunda

Neupeuduek Putroe ateueh keta meuh
Cahya peungeuh lam astana
'Oh lheueh nyan geubri ngon makanan
Makeuen le yoh nyan Putroe Muda

Budiman Khandi hate sukaan
Neuduek sinan dalam astana
Deungon Putroe cut Nila Wati
Malam dan hari meusuka-suka

Padum uroe Putroe keunan
Meugah le yoh nyan bak rakyat dum na
Habeuh jiteuka dum sikeulian
Jime peuseumbahan ke Putroe Muda

Nyang kaya-kaya jiba sitahe
Nyang iku teuma me sipeuha
Ladom rakyat jime siamah
Ube nyang mudah keu Putroe Muda

Ladom me u deungon pisang
Ladom rakan hidang raya
Padum uroe Putroe sinan
Le that meutamon teubee u muda

Meung nyang ringget han ek peugah
That barollah teuka areuta
Budiman Khandi hate sukaan
Seubab neukalon that mulia

Hukman 'Alam teutap sinan
Ngon putroe Budiman aneuk Raja
Uroe malam geuma dahsyah
Ngon that indah paduka adekeunda

Padum uroe lheueng nibak nyan
Hukman 'Alam marit ngon bunda
Wahe ma po ma teungku droe
Idin kamoe wahe poma

Lon jak intat Budiman Khande
U nanggroe Kasumi Putroe Muda
Meung nyo aneuk takeumeung intat Putroe
Tajak jinoo ubak Raja

Hukman deungo haba meunan
Neujak le yoh nyan ubak Raja
'Oh ban sare troh u hadapan
Meuteumeung yoh nyan deungon Raja

Hukman marit ngon sulotan
Meunoe neukheun bak ayahanda
Ampon tuanku meuribee ampon
Tadeungo lon po meukuta

Idin tuanku keu lon jinoo
Lon intat Putroe bak ayahanda
Diu Palinggam deungo haba meunan
Meunoe neukheun bak aneukeunda

Tajak he aneuk bak seulamat
Bak jioh laknat mara bahaya
'Oh ban neudeungo haba sulotan
Banta Hukman hate suka

Neuseumbah Raja Diu Palinggam
Banta Hukman leugat neugisa
'Oh ban sare troh u meuligoe
Neuduek le jinoe ateueh keta

Budiman Kahnde kalon Hukman
Teuma neutanyong sipatah haba
Ampon tuanku meuribee ampon
Neudeungo lon paduka adekeunda

Ka neujak tuanku ubak ayah
Talakee langkah geutanyoe bungka
'Oh ban neudeungo haba Putroe
Neukheun le meunoe bak adekeunda

Cit ban lon woe nibak ayah
Ka lon lakee langkah geutanyoe bungka
'Oh ban neudeungo haba Hukman
Putroe Budiman hate suka

Neupeuhase dum beukailan
Dum sikeulian le Putroe Muda
Sare malam le ngon uroe
Tuan Putroe lam astana

Hukman 'Alam ngon tuan Putroe
Bandua droe hate suka
Sare beungoh ka ngon uroe
Banta ngon Putroe neukeumeung bungka

Lanja neutren deungon Putroe
Neuek le jinoe lam astana
Teuma meuteumeung deungon ayah
Neukheun le pantah sigra-sigra

Lon tuanku lon bungka jinoe
Lon intat Putroe bak ayahanda
Cut Nila Wati ngon Putroe Kayangan
Sinan sajan deungon Raja

Teuma meusabda Diu Palinggam
Bak Hukman 'Alam paduka aneukeunda
Takheun saleuem lon keu Sulotan Kasumi
Ngon estiri cut Awan Cahya

Putroe Miga kirem saleuem
Keu sulotan Keusumi Raja
Teuma lom saleuem Putroe Kayangan
Keu sulotan Iram Raja

Teuma saleuem keu Putroe cut Awan
Wahe Hukman bak troh takata
Saleuem seumbah meuribee kali
Budiman Khande geuwoe bak Raja

Sajan deungo Hukman 'Alam
U nanggroe Iram Keusumi Raja
Meunankeuh saleuem bak ulontuan
Wahe Hukman tapeugah bak Raja

Teuma lom marit cut Nila Wati
Deungon Putroe Ti Kayangan Indra
Tapeugah he aneuk Hukman 'Alam
Bak cut Awan saleuem bunda

Keureuna Putroe Budiman Khande
Ka Allah bri lon eu mata
Dua lhee uroe ka lon duek sajan
Ngon Putroe intan lam astana

Jakalu na silab deungon bubai
Meu'ah he Putroe cut Awan Cahya
Budiman Khande, Hukman 'Alam
Ka neuriwang bak Putroe Cahya

Meunan tapeugah wahe Hukman
Saleuem lontuan keu Putroe Cahya
Budiman Khande putroe jeunulang
Tapeugah he bintang bak cut bunda

Bek neuhaloh keusalahan
Peugah he intan keudeh bak bunda
Habeh narit han le kalam
Hukman 'Alam seumbah poma

Di Putroe cut Budiman Khande
Neuseumbah le nyan tuanta
Neubeudoh rijang cut Nila Wati
Neucom Putroe Ti teuma bak dada

Teuma beudoh Putroe Kayangan
Com cut intan teuma bak muka
Tajak he aneuk bak seulamat
Bak na taingat keu po meukuta

Bandua Putroe sidroe teukheun
Neumeuinseuen bak Tuhan Nyang Esa
Bak rijang troh gata he Putroe
Dua ngon lakoe tawoe bak bunda

Wahe Tuhan ya Tuhanku
Neutulong bantu ke Putroe Muda
Bandua sajan deungon lakoe
Bak rijang troh Putroe lam astana

Teuma meulangkah Hukman 'Alam
Bandua sajan ngon Putroe Muda
Neujak Banta deungon Putroe
Miseue uroe teungoh keulua

Miseue buleuen malam peuet blah
Munankeuh cidah Putroe ngon Raja
Miseue intan deungon pudoe
Lakoe binoe geujak dua

Putroe Budiman badan meutrieng blang
Keuieng seudang keumang bak dada
Neutiek aleh nyum reuloh blang
'Oh neulinggang nyum reuloh donya

Bandua sajan ngon Hukman 'Alam
Nyan pi saban tanglong donya
Dua uroe jak rot lam nanggroe
Sikarang jinoe rab troh lam rimba

Teuma neujak rot lam uteuen
Ruek-ruek buleuen dalam rimba
Ka neuek gle neutren paloh
Dawok neubloh dalam rimba

Uroe malam jak han piyoh
Nak rijang troh nanggroe Raja
Padum lawet peujalanan
Sampoe le yoh nyan u nanggroe Raja

'Oh troh Putroe deungon Hukman
Neuduek di peukan keude Haria
Troh le teuma ureueng peukan
Geujak khadam Putroe ngon Raja

Geume boh kayee asoe peukan
Tanda meujeulisan aneuk Raja
Nyang ureueng binoe sinan di peukan
Ranub lam puan keu Putroe Muda

Keumeujeulisan Putroe Budiman
Aneuk sulotan woe gampong tha
Neupiyoh siat Putroe ngon Banta
Teuku Haria jak bak Raja

'Oh troh bak Raja jipeuseumbah
Meuhah-meuhah teuku Haria
Ampon tuanku patek laman
Cut Budiman ka neugisa

Dua ngon Banta Hukman 'Alam
Sideh di peukan rumoh sroepada
Dang tuanku neupeutho reuoh
Neumupiyoh sikleb mata

Teuma meusabda doli halarat
Kameuhei siat cut Awan Cahya
Troh le teuma Putroe cut Awan
U hadapan poteu Raja

Teuma meusabda doli halarat
Neumarit ngon Putroe Muda
Wahe Putroe cut Awan Cahya
Ka woe aneukeunda di gampong tha

Dua ngon lakoe Hukman 'Alam
Jinoe di peukan rumoh Haria
Teuma neumarit Putroe cut Awan
Ngon Sulotan teusinyom muka

Pajan troh keunoe Hukman 'Alam
Ngon Putroe Budiman wahe meukuta
Han soe peugah meung sigeutu
Ampon tuanku pakri bicara

Bak lon pi hana he cutnyak Putroe
Baro siat nyoe Haria peuhaba
Jinoe he cutnyak Putroe intan
Tahei dendayang dum beurang na

Deungon peurumoh uleebalang
Nyang seudang-seudang muda-muda
Tajak ngon cut nyak keudah u peukan
Tajak tueng Budiman woe gampong tha

Dilon pi teuma he cutnyak intan
Ngon uleebalang jak tueng Banta
Seubab cuco Raja Usuli
Raja teupuji horeumat bak na


Tajakkeuh rijang wahe cut intan
Bak rijang tariwang he Putroe Muda
Teuma geujak Putroe cut Awan
Ngon dendayang dum beurang na

Ngon peurumoh uleebalang
Dum sikeulian meuntroe bentara
Panghulee Rom nyang jak dilee
Nyang boh lagee poda Kara

'Oh troh bak keude cut Putroe Awan
Beudoh Budiman jak seumbah bunda
Putroe cut Awan com bak talak
Neukheun sikrak seumangat haba

Allah he aneuk Budiman Khande
Ka Allah bri seulamat tagisa
Bak panyang umu bak mangat asoe
Bek cre ngon lakoe boh hate ma

Sikarang jinoo he aneuk droe
Beudoh tawoe sajan bunda
Keudeh tapiyoh u meuligoe
Wahe aneuk droe beudoh sigra



Teuma beudoh panghulee Rom
Nyang jak dilee phon poda Kara
Trohkeuh teuma u meuligoe
Neuek Putroe Budiman Muda

Na sikeujab troh cut Awan
Neukheun habaran bak aneukeunda
Beudoh aneuk jak seumbah ayah
Neukeumeung meulangkah neujak tueng Banta

Teuma beudoh Budiman Khande
Neujak com le gaki Raja
Teuma neucom uleh Raja
Bak mubahgia neukheun samporeuna

Teuma beudoh Raja uleebalang
Rakyat sikeulian neujak tueng Banta
'Oh troh u peukan neubri horeumat
Jaroe neumumat deungon Raja

Teuma meusabda baginda sulotan
He aneuk badan udeh tagisa
Tawoe aneuk Banta Hukman
Jinoe bak sajan ngon ayahanda

Teuma neuseuot Hukman 'Alam
Ban nyang hukom meukuta donya
Teuma beurangkat baginda sulotan
Sireuta sajan ngon Banta Muda

Di likot nyan sikeulian
Rakyat sajan dum beurang na
Trohkeuh teuma tamong u dalam
Neuyue seumayam bak bale rakna

Na sikeujab neuduek di bale
Troh le rame rakyat panglima
Jijak meuteumeung ngon cut Banta
Jideungo haba ka neugisa

Nyang me meujeulih u ngon teubee
Laen boh kayee sianika
Ka peunoh rumoh inong ngon agam
Geutet meuriam geumpa donya

Tujoh seun tujoh geutet meuriam
Sabda sulotan poteu Raja
Mangat jitupeue le asoe nanggroe
Cut Banta woe ngon Putroe Muda

Geuteuka di nanggroe Buket di awan
Geuwoe u Biram Keusumi Raja
Meunankeuh sabda doli halarat
Ubak rakyat dum peutua

Na treb siat troh le meuntroe
Jak bet jaroe bak Banta Muda
Ampon tuanku meuribee katoe
Seumbah cut Putroe geuyue tueng meukuta

Geuyue meulangkah u meuligoe
Bak sajan kamoe wahe meukuta
Teuma neubeudoh Banta Hukman
Neutren yoh nyan pantah sigra

Trohkeuh teuma u meuligoe
Seumayam jinoe pocut Banta
Na sikeujab neuseumayam
Ek le yoh nyan Budiman Muda

Ek le laen dum gunangan
Sajan-sajan poda Kara
Geupeuek hidang bu suntengan
Laen sikeulian cukop rata

Ek le teuma panghulee Rom
Sajan-sajan peurumoh bentara
Geupeuek sajan beureuteh keumang
Teuma meuteumeung seumbah cut Banta

'Oh lheueh meuteumeung geunoreumat
Teuma marit poda Kara
Hoka gata panghulee Rom
Jinoe tapuphon uleh gata

Panghulee Rom cok keumang beureuteh
Sireuta jiseumbah Banta Muda
Phon jiseubot BISMILLAH
Bak meutuah ureueng dua

Bak sijahtra Banta ngon Putroe
Lakoe binoe bek meudawa
Bak meuaneuk sithon-thon lhee
Bak meulintee sithon-thon dua

Bak bek jarak meung sipade
Bak bekkeuh cre meusideupa
Bak miseue intan deungon pudoe
Bak meunan Putroe deungon Banta

Habeh haba di pasai nyan
 Teuma peusunteng Putroe ngon Banta
 Teuma geubet le hidang santapan
 U hadapan Putroe ngon Banta
 Teuma jimarit panghulee Rom
 Jimekheun ampon bak cut Banta
 Neusrah jaroe ampon deelat
 Neumakeun bak sapat ngon Putroe Muda
 Meunankeuh hajat di dendayang
 Makeuen ngon bintang bak sapat dua
 Teuma teusinyom Banta ngon Putroe
 Cahya gigoe peunoh astana
 Neupentoe Banta bak hidangan
 Neumeuhei Budiman sigra-sigra
 He cut Putroe intan Budiman
 Keunoe rijang tamakeuen dua
 Tacok bacut samporeunaan
 Beudoh he intan sajan kakeunda
 Teuma beudoh Putroe intan
 Neumakeun sajan meujeulih donya
 'Oh lheueh makeuen simpan hidangan
 Neubeuet puan mupeureumata
 Dalam puan ranub teugapu
 Pineung geujampu tuha ngon muda
 'Oh lheueh ranub neungui bee-beewan
 Ban dua sajan Putroe ngon Raja
 Dendayang dum ka habeh tren
 Tinggai tanglong ngon panyot donya
 Tamse buleuen lingka bintang
 Mumeunan deundam Putroe jroh rupa
 Meuseunda guroe beuranggajan
 Maklum he tuan ureueng muda

Mangat hate bungong keumang
Putroe intan galak han tara
Bungong jeumpa dua sikarang
Teuka kumbang lingka-lingka

Putoh taloe manek hilang
Seungab Hukman han le seunda
Neupeuampon lon ya Allah
Nepumeuah ka leupah haba

Hana lon hajat ke haba nyan
Teulanca kalam kon lon sahya
Sabab gepeugah rupa han sakri
Budiadari wareuna bangsa

Mumeunan geukheun didalam rawi
Dilon ya Rabbi han troh duga
Cut Banta Hukman dalam meuligoe
Sajan Putroe neumuproe haba

Teutap Banta neuduek sinan
Ngon Putroe Budiman paduka adekeunda
Padum lawet Banta sinan
Sapeue pi tan na mumara

'Oh lheueh nyan Raja Iram Keusumi
Teuma neupangge rakyat dum na
Habeh jitren jeueb-jeueb sulotan
Ka peunoh dalam mideuen Raja

'Oh habeh rakyat dum meusapat
Teuma jideelat dum bak Raja
Ampon tuanku meuribee ampon
Tadeungo lon po meukuta

Pakon tuanku neupangge.kamoe
Neukheun jinoe peue na sabda
Teuma seuot baginda sulotan
Meunoe neukheun ban bak rakyat dum na

Nyang kupangge gata keunoe
Tadeungo jinoe kucalitra
Hukman 'Alam lon yue keurajeuen
Badai ulon paduka aneukeunda

'Oh ban jideungo haba sulotan
Meunoe jikheun ubak Raja
Sireuta jibet jaroe u manyang
Meunoe jikheun bak ubak Raja

Cit patot tuanku neuboh geunantoe
Badai jaroe doli sroepada
Nyankeuh lom peugah uleebalang
Hukman 'Alam taboh keu Raja

Lon pulang nanggroe deungon keurajeuen
Lon pulang mideuen dengon lasyeuka
Keureuna umu lon rab sampoe
Tamse uroe watee asa

Teuma seuot uleebalang
Beuna janjongan ban nyang sabda
Habeu pakat sabe janji
Isoh hari taangkat Raja

Sare beungoh teuka uroe
Rakyat meukatoe teuma teuka
Ngon piasan bala bagai
Keumeung tabai meulintee Raja

Piasan rame tieb-tieb nanggroe
Mubagoe-bagoe le wareuna
Meuen Meulayu nari bangsawan
Meujampuran wayang Cina

Teupok geundrang deungon napiri
Mala bari balek mata
Rame rakyat sobhanallah
Han jeuet peugah teungoh teuka

Teuma geupeungui Hukman 'Alam
Alat keurajeuen kulah kama
Meujeuneh-jeuneh dum na peukayan
'Oh troh bak badan ban buleuen purnama

Hukman 'Alam leungkap peukayan
Ban saboh badan simplah meujintra
Han jeuet tangieng rupa hireuen
Bandum ureueng keunan mata

Hana soe ngieng le bak piasan
Laloe keunan bak tanglong donya
Meunankeuh got Hukman 'Alam
Hana padan ngon tapeusa

Teuma beudoh Hukman 'Alam
Jiireng sajan gunangan nyang na
Meusukeuh teuma geundrang bunyian
Hukman 'Alam jak seumbah Raja

Lheueh nyan lanja teuma bak bunda
Cut Awan Cahya hate that suka
Teuma neupeujok uleh sulotan
Neukheun tuan Kali Ulama

Wahe Kali tadeungo lon peugah
Tapeunikah HUKMAN keu RAJA
Tapeunikah deungon nanggroe
Tapeuduekkeuh jinoe bak PATARAKNA

'Oh neudeungo sabda mumeunan
Syiah Kali yoh nyan beudoh le sigra
Neujak peuduek bak PATARAKNA SUMPAH
Teungku Syiah nyang baca do'a

Sireuta deungon do'a seulammat
Neumohon syafa'at bak Tuhan Nyang Asa
Neumohon bak keukai didalam deelat
Lom ngon bi'at teungoh samporeuna

Teuma geuboh nan uleh Ulama
SULOTAN ISKANDAR RAJA MUDA
Dum na rakyat jaroe jiseuon
Uroe nyoe phon geutabai RAJA

Teungku Ulama that bit 'areh
Geutupeue habeh adat Raja
Teuma geudeelat uleh teungku Syiah
Deelat sareh lhee go saya

'Oh lheueh nyan teuma uleebalang
Jideelat tuan dum sireuta
Laen nibak nyan bandum jideelat
Lheueh nyan bu leukat peusunteng Raja

Laen bandum Imum bileue
Khatib Teungku peusunteng Raja
'Oh lheueh nibak nyan bak Raja Keusumi
Neucom bak gaki le RAJA MUDA

Teuma meusabda Raja Tuha
Hoka panglima nyang dalam kuta
Tayue tet meuriam tujuh seun tujuh
su bek putoh kudeungon suara

Sabda pi telheueh panglima jak reujang
Meusu meuriam meutaga-tagat
Di pote Raja neumeuseumpeuna
Neukheun haba bak Raja Muda

Wahe Raja Cut, aneuk Budiman
Tadeungo habaran ayah ka tuha
Bak got aneuk peutimang nanggroe
Keu Tuhan sidroe bak that takira


Teuma neucok ngon bu leukat
Neusunteng leugat Raja Muda
Hingga meudo'a ngon tabi'at
Bak Tuhan halarat Raja mupinta

'Oh lheueh geudeelat Hukman 'Alam
Teutap sinan dalam kuta
Sigala rakyat woe u nanggroe
Bak teumpat droe maseng rata

Maseng-maseng teutap di nanggroe
Hukman jinoe teutap lam kuta
Hukman 'Alam sinan keurajeuen
Bak nanggroe Iram neumat neuraca

Hukom ade amat sangat
Peutimang rakyat hana tara
Amankeuh Raja sinan keurajeuen
Ngon cut buleuen Budiman Muda

Uroe malam geumeudasyah
Han le sosah Putroe ngon Raja
Prang hana le nanggroe pi aman
Teutap sinan dalam kuta



Nanggroe makmu amat sangat
Meusyeuhu that Iskandar Muda
Dum na dagang syeedaga peukan
Gaseh han ban keu Raja Muda

Keureuna seubab hate murah
Neubri seudeukah keu faki nyang na
Leubeh cidah deungon 'areh
Eleumee habeh ka lam dada

Watee neuhukom Peudakwaan
Payahna han Iskandar Muda
Hukom ade hana lawan
Bagoe geutimang ngon neuraca

Neuhukom rakyat ade han bagoe
Gob deungon droe hana bida
Neubri hukom that peuleuheuen
Ngon peungeutahuan thee sibeuna



PN BALAI PUSTAKA — JAKARTA

